



6


8-c

38



A-10.





2

6-8038



286. *King M. Haysij Valerij*

XXXII.13.19.

# Lippi Brando

L I N I D E R A T I O N E S C R I -  
bendi libri tres, nunquam an-  
tea in lucem editi:

*In quibus uir ille doctiss. Rhetoricæ præce-  
pta à dicendi ratione, ad rationem scriben-  
di, styliq; exercendi usum tam doctè transla-  
tit, tamq; diligenter accommodauit, ut nihil  
neq; maiorum nostrorum, neq; nostra memo-  
ria doctius, aut elegantius in eo  
genere scriptum esse  
uideatur,*

A D I E C T I S V N T,

Io. Ludouici Viuis D. Erasmi Roterodami,  
Conradi Celtis, Christophori Hegendor-  
phini, De Conscribendis episto-  
lis libelli.

• Cum locuplete rerum & uerborum nu-  
morabilium Indice.

B A S I L E A E.



1870

1871

1872

1873

1874

1875

1876

1877

1878

1879

1880

1881

1882

SEBASTIANVS CORRADVS  
S. P. Q. Rhegiensi S. D.,



VLLVM TEMPVS  
pretermitto, Rhegien  
ses, cogitandi, quò nā  
tandem pacto uobis  
pro tot meritis erga

me uestris, si nō parem, at aliquam  
tamen gratiam referre possim. Sed  
eorū tanta est magnitudo, ut quam  
uis, quicquid possim, faciam, ac pre  
stem, nullam tamen eorum partem  
uidear assecutus. Vos enim me iu  
uenem adhuc, ne mediocriter qui  
dem eruditum, dignū, qui iam tum  
publicè legerem, iudicastis: quod  
ego munus uti susciperem, nunquā  
adduci potui: quum dicerem, id ma  
ius esse, quā quòd iuuenis in lite  
ris græcis non multū uersatus, pos  
set sustinere: nec æquum uideri, ut  
ego, uiuo adhuc Antonio Caraso  
præceptore meo, uiro optimo, &  
homine doctissimo, locum illi qua  
si debitum tenerem. Nec ita multo  
post,

## EPISTOLA.

pòst, quum uobis ego non tam auctor quàm suasor essem, ut primùm Ambrosium Ripaltam, deinde Basilianum Landum, homines eruditissimos, ad legendum conduceritis, uos quidem meo quasi testimonio tantum fidei tribuistis, ut statim de ea re, ut ego uerba faciebam, ita censueritis: sed eas tamē uoces, quæ mihi semper in medullis ac uisceribus hærebunt, misistis: Quæ tu Corrade petis, ut alijs demus, ea nūc, quando tu, cui nihil negare possumus, ita uis, dabimus quidē, sed tibi nos dare cupimus, te uolumus, te optamus: nec quicquam est, quod iam pridem magis desideremus. Quare si nos, & patriam totam, tantifacis, quanti præ te fers, & debes, ut omnes debent: noli quæsumus pati, iuuentutē nostram à peregrinis potius, quàm à ciuibus erudiri. Nec petimus tamē, ut tu, quod nunquā fecisti, nec tibi faciendū censemus, minima quæq; doceas: sed de superiore

## EPISTOLÆ.

riore loco tantū proficere. Ego uerò quum iam præsens neq; aduersari amplius possem, neq; uobis rem, præsertim tam honestam petentibus negare auderem, recordarerq; Venetijs me latinis literis ediscendis quinquennium quasi Pythagoricū per summum otium sub Egnatio præceptore consumpsisse, eodem reuertī constitui, non eo mediūsfidius consilio, ut à uobis, quos semper omnis in oculis tuli, abessem: sed ut literarum Græcarum et philosophiæ studia paulisper intermissa, per otium, quod Venetijs esse solet, repetèrem. quod tanto studio & cura fecimus, atq; id ipsum per quadriennium, ut pauci nos, uel nemo potius posset domi conuenire, præter Marcellum Lancium, Prosperū Viddellum, Bartholomæū Ferrariū, Regienses, & Rubertum Salicetū Bononiensem, qui nos uel inuitos fuerant secuti. At uos interea ne expectastis quidem, quoad ego do-

## EPISTOLA.

mum redirem, sed mei absentis nō  
 modò quasi rationem habendam,  
 uerum etiam me ipsum uel absentē  
 huic muneri græcè & latinè legendi  
 omnibus omnium suffragiis præfi-  
 ciendum censuistis. Qua de re cum  
 Ludouicus Zobolus, uir nobilissi-  
 mus, ac de me optimè meritus, nun-  
 cium, atque adeò uestras literas ad  
 me Venetias usque perferendas cu-  
 rasset, etsi diu multumq; dubitauī,  
 ne minus ego idoneus essem ad tan-  
 tum onus ferendum, uestre tamen  
 uoluntati morem aliquandò tandē  
 gerendum iudicaui. Itaq; domum  
 quum rediissem, hoc munus alacri-  
 tate tanta & studio suscepi, atq; tan-  
 ta diligētia ac cura iam quinq; pro-  
 pè annos sustinui, nihil ut putē, nisi  
 maiorem fortasse doctrinā, deside-  
 rari. Hoc senatusconsulta, quibus  
 me sæpius ornastis: hoc mercedis  
 cumulus & accessio: hoc iuuenum  
 ad me audiendum concursus: hoc  
 omnium ordinum, & omnium æta-  
 tum



## EPISTOLA.

tum erga me beneuolētia declarat. Quare quum me tantum hic amarī & colī uideam, ut nullus penē ciuis quamuis nobilis & magnus, mihi non decedat: nullus me non obseruet: non sum equidem tam arrogans, ut dicere audeam, quod Themistoclem & Ciceronē dixisse constat, me nunc magnorum meorum laborum, multarumq; uigiliarū fructum capere: sed tacitus ago gratias Deo, & uobis, qui me tot honoribus pro uestra humanitate decorastis. nam me relaturū, affirmare nō possum, quum uestra in me beneficia plura sint, & maiora, quā pro quibus par uobis gratia referri possit: etsi uobis nō operam modō meam, quantulacunq; sit, sed me ipse etiam totum trado, & dedo: Aeschinem philosophum imitatus, qui Socrati se ipse donauit. Ne tamen ego nullam prorsus uobis gratiam retulisse uidear, cito uos testes, quā benē meo munere sim functus: quāq;

## EPISTOLA.

rectè & sedulò iuuentutē uestram  
 erudiendam curarim: quum nihil,  
 quod ad hoc munus pertineret, pre-  
 termisi. Sed quoniam, qui profite-  
 tur, præceptaq; uel carminis scri-  
 bendi, uel solutæ orationis forman-  
 dæ tradit, nō multum solet profice-  
 re, nisi iuuenes qui audiunt, stylum,  
 præstantissimū dicendi & scriben-  
 di effectorem & magistrum, exer-  
 ceāt: treis Lippi Brandolini de Ra-  
 tione scribendi libros nunc primū  
 describendos (siue, ut nunc loqui-  
 mur, imprimendos) curauī: cū ut  
 in uestro nomine apparerent, tum  
 ut iuuentutī uestræ ad stylum exer-  
 cendum prodesent. Nam uir ille  
 quamuis penē cæcus, certē lippus,  
 quum Rhetoricam in Pannonia in-  
 uītatus à Matthia Rege docuisset,  
 ex ea præcepta collegit, & à ratione  
 dicendi ad rationem scribendi tam  
 doctè transtulit, & tam diligenter  
 accommodauit, ut nihil neq; maio-  
 rum nostrorum, neq; nostra memo-  
 ria

# EPISTOLA.

ria doctius aut elegantius in eo genere scriptum esse uideatur. Quam ob rem quum Bartholomeus et Ludouicus Sanuiti fratres, iuuenes mei literarumq; studiosissimi, hosce libros manu patris utcunque scriptos mihi dedissent, dignos ego, in quibus corrigendis aliquid temporis consumerem, iudicaui. Id ego uerò feci, quàm diligentissimè potui, neq; uerò sine magno labore: quum multa fuerint mutanda, omnia interpungenda & diuidenda: uerba græca, quæ latinè & perperam fuerant scripta, græcè reponenda, & multa multis locis rursus scribenda. Quem laborem Regienses uobis, & librum ipsum iuuentuti uestræ, meæ erga uos omnes obseruantia monimentum, quasi consecramus. Valete, prid. Non.

Martij. M. D. XLV.

Regio Lepidi.

# RERVM ET VER- BORVM IN HOC LIBRO memorabilium Index.

A		partium	179
<b>A</b> Bominatio quid.		Amanuenses	342
190		amatorium epistolæ ge-	
accusandi genera	138	nus quod	383
ἀδελφότης græcis qua-		Ambrosij stylus	359
lia	241	amicitia quid	50
adiuncta negotio. 50. et		amicitiæ fructus	11
à Cicerone quæ dicta.		amicum epistolæ ge-	
ibid.		nus	383
adiunctio quid.	251	amor in quid referen-	
ædificiorū laudes.	407	dus	183
Aegyptij res suas ante		amor quomodo aut cō-	
literarum inuentionē		citandus. 181. aut se-	
absentibus quomodo		dandus. 182. & inde	
significarint	10	amplificatio quid	74
Aeneæ Syluij epistolæ.		loci communes qui	
360		dicti. ibid. & quot.	
ætatis quatenus haben-		ibid. & inde.	
daratio	119	ἀνακεφαλαίωσις quid.	
affectus quid	179	73	
affectui contrarium.		anapestus qualis pes.	
190		271	
affectuum motus quot		ἀναφορὰ	246
		ἀναστροφὴ	

# INDEX.

ἀναγροφῇ	246	argumenta quibus de	
Angeli Politiani stylus.		causis reprehendenda	
360. pueris an imi-		tur. 70. & inde	
tandus. ibid. pueris		argumentorum mate-	
quare arrideat eod.		ria unde nascatur. 45	
animi partes quæ.		eorum quis usus. 57.	
105		dissolutio	64
ἀντιπαρηγορία	380	in Argumentatione	
ἀντιμιαφορὰ	251	quid præcipue ser-	
ἀντιθέτου	247	uandum	59
ἀντονομασία	253	ars quantum dissimu-	
Aretini epistolæ	360	landa	16
argumentum quid	24	ars quid	15
argumenta unde petan		ars naturæ adiutrix.	
tur. 33. eorum di-		16. & obseruatrix.	
uisio quæ. 34. & for-		ibid.	
mæ quot	35	ἀσύνδετον quid	248
argumenta ex modo		attentos per epistolam	
quæ dicta	49	quando faciamus. 385	
argumenta ex rebus		attētus auditor quomo-	
sumpta, ex quot par-		do faciendus	21
tibus ducantur. 44.		auaritia quid	250
à causis rerum sum-		auaro tam deest quod	
pta quæ. 45. à loco		habet, quàm quod nō	
& tempore quæ.		habet	192
47. à modo quæ.		ad Audaciam quomo-	
48		do adducendi homi-	
		nes	

# I N D E X.

nes	197	derandum	19
B		causæ in deliberatione	
Basilij epistolæ	359	quomodo consideren-	
beneficentiæ quæ par-		tur	100
tes	99	causæ rerum quomodo	
beneficium quomodo		considerentur	45
laudandum	133	causarum genera. 13.	
benevolentiam quando		tria. 372. & inde.	
conciliamus per epi-		quatuor secundum	
stolam	385	Ciceronem, & quæ	
βερχυλογίæ quid. 252.		18	
262		causarū genera an om-	
G. Budæi stylus	362	nia exordium requi-	
C		rant	19
κακίμφοτος quid. 243		in Causis quid primò	
Cæsar in Catonem qui-		inueniendum	80
bus constitutionibus		celeritatem orationi	
usus	81	quid adferat	270
ad Cæsarem quomodo		character epistolæ qui	
scribendum	395	384.	
ad Canonicum quomo-		character extra episto-	
do scribendum	395	lam qui	395
in Causa honesta, facili,		character interrogati-	
& sepe agitata, qua		uus	394
li utendū exordio. 19.		character suspensiuus.	
in noua, quali. ibid.		394	
causa posita quid consi		character ubi scribatur	
		394	

# INDEX.

394	Comma quid	394
chartā ad epistolas qua	commendatitia episto-	
lem esse conueniat.	la sub quo genere com-	
342	prehendatur	377
Cicero commendatus.	commendandi quod ge-	
232	nus. 154. eius in epi-	
Cicero de epistolæ fine.	stola quis usus	ibid.
11	commendatitium epi-	
Cicero græca suis episto	stolarum genus quan-	
lis cur immiscuerit	do fiat	389
340	commodorum & in-	
Cicero in quo epistola-	commodorum quæ ra-	
rum genere præci-	tio	62
puè excelluerit	12 compar quid	248
Cicero quibus usus sit	complexio quid	40
uocabulis	238 cuiusmodi esse debe-	
Cicero totus quare le-	at	ibid.
gendus	369 compositio uerborum,	
Ciceronis locus. 400. et	in oratione qualis es-	
401. de dandi con-	se debeat. 265. &	
filiij ratione	176 inde	
clausula orationis quid.	compositionis quæ ui-	
269	tia	239
πλίμας quid	247 concedendi genus qua-	
codicilli qui	341 le	159
colloquium quid	364 conciliandi auditorem	
κῶλον quid	248. 394 quot modi	19
	concitandi	

# I N D E X.

concitandi quale genus	consilia plura in re si
epistolarum 12	sint, quid agendum.
conclusio quid 252.71	177
et qualis in epistola	consolatorium genus
esse debeat 72	epistolæ 383
confirmatio quid.33. di	constitutio. 80. à Græ-
uisioni cur proxima.	cis quomodo dicta.
ibid. in epistolam an	ibid. eius quot gene-
sepius ueniat eod.	ra.eod. cuius generis
cur difficillima eod.	propriissima 81
confutandi ratio quæ.	constitutio in demon-
413	stratium genus an
confutatio quid 60	cadere possit eod.
eius diuifio.ibid. et ra	consultationis genus.
tio quotuplex 61	162. eo quomodo in
coniecturalis status qua	epistola utendum.
lis.82.quomodo in eo	ibid. et inde
agendum accusatori.	ad Contemptionem pe-
83. quomodo reo.	cuniarum,honorum,
ibid.	gloriæ,et uolupta-
coniunctio quid 251	tis, quomodo persua-
consequentio quid Cice-	dendi homines 190
roni 55	et inde
consilij dandi quæ ra-	contendendum cum
tio in epistola 175	amico in epistola quo
et inde. unde ea con-	modo.141. et inde.
stet ibid.	contentio et contrari-
	um



# INDEX.

um quomodo disse-	potissimum conside-
rant	247 randa
96	
correctio quid	250 Democritus quo usus
crimina epistolis quate	genere epistolarum.
nus accidunt	63 12
cupiditas amorem quo-	demonstratiue cause
modo sequatur	187 que
103	
ad Cupiditatem quomo	demonstratiuum genus
do incitandum	188 quos locos habeat.
	402
D	
Dactylus	270 demonstratiuum quale
defendendi generis que	genus causarum
13	
partes. 145. eius in e-	demonstratiui generis
pistola quis usus.	exempla
403	
ibid.	Demosthenis epistole.
definitio quid	249 358
definitio mala que.	66 descriptio quid
250	
ex Definitione qualis	desperatio quomodo
oriatur controuersia	tollatur
199	
88	διελλαν quid
257	
delectare quid	11 dignitas in quibus re-
deliberatiuum quale	bus consideretur.
116	
genus causarum	13 Dij quomodo laudan-
in Deliberatiuum ge-	di
103	
nus constitutio quan-	diminutio quid
255	
do cadat	81 disiunctio
250	
in Deliberatione que	dispositio
15	
	diuinum

# INDEX.

diuinum epistolarum	ἐνθὺμια	quid	35
genus cuiusmodi. 122	enumeratio epistole		
diuisio quid. 31. 258.	quæ		384
eam epistola an reci-	enumeratio quid. 73.	à	
piat. 32. & inde	Græcis quomodo dicta.		
in Docendo quæ ser-	ibid.		
uanda methodus. 217	ἐπαγωγὴ	quid	35
docilis auditor quomo-	ἐπιστέλλω		9
do reddendus	21	epistola an à necessita-	
dociles per epistolam	te inuenta		10
quando faciamus. 385	epistola cur potissimū		
doctrina detrahit stylo.	inuenta		11
372	epistola in quo uerse-		
dubitatio quid	251	tur causarum gene-	
dubium causarum ge-	re		13
nus	18	epistola nuncia mentis.	
λόγους materia cur	382		
dicta	45	epistola quid, & unde	
E	dicta	9. 398. 364	
Elocutio quid	15	epistola uelut puella	
elocutionis ornatus in	plebeia		338
quo situs. 236. & inde	epistole causa quæ.		
eloquutionis uirtus.	384. quis finis. 11		
136	epistole grauitas in		
eloquutionis tractatio	quo sita		117
uniuersalis	225	epistole initium	383
ἐμφασις quid	259	epistole inuectores ab	
		historicis	

# I N D E X.

historicis cur non pro ferantur	10	quid sit difficillimum.	15
epistolæ inuentionis causa an delectatio.	11	in Epistola scribenda quid primò uidendū.	386
epistolæ materia unde deducatur	121	in Epistola an uera sem per esse oporteat om	15
epistolæ obſignandæ ra tio	346	nia	15
epistolæ partes	383	epistolarum an solum duo genera	11
epistolæ scriptū an ue tus	10	epistolarum inuentio quæ	10
epistolæ scriptio cum hominibus nata	10	epistolarum qui primi authores	359
epistolæ scriptor an mo uere debeat. 11.	et ibid.	epistolarum scribenda rum an ars aliqua.	370
epistolæ scriptori an i dem cum oratore fi nis	11	epistolarum sermo nu meris solutus esse de bet	337
epistolæ stulta partitio quæ	371	epistolarum species in finitæ	13
per Epistolam an ali quando etiam laude mus et uituperemus.	13	epistolarum quod uiti um. 23. earum prin cipia qualia esse debe ant	ibid.
epistolam scripturo		Epistolarum uaria ge nera	†

# INDEX.

nera. 382.	Et quot.	exordium quid. 13.	eo
10. 120		an semper utendum	
epistolas quomodo ue-		in epistola	ibid.
teres obfignarint.		in Exordio quid potissi-	
347. inde		mum agendum	19
ueteres Epistolas suas		exordiorum quæ uitia.	
quomodo scripserint.	22.	Et inde	
341		expeditio quid	252
in Epistolis quid cau-		F	
dum	365	Factum quomodo quis	
epistolicum stylum qua		defendere possit	32
lem esse conueniat.		familiaze genus episto-	
36		larum quale	12
epithetis in epistola		fides quomodo compa-	
quomodo utendum.		randa	182
118		fidei quæ partes	99
Erasmi stylus	362	figuræ orationis quæ,	
Euathli exemplū apud		Et quot	232
Gellium	66	figuræ sententiarum	
exarare literas quid, et		quæ	257
unde dictum	342	formalis epistola	342
exclamatio quid	247	fortitudo quid.	67. 99.
exercitatio. 16. quomo		eius quæ Et quot par	
do comparetur	ibid.	tes	ibid.
exordium epistolæ qui		fortune partes quæ.	
bus modis constituen-		104	
dum	384	fluminum laudes	403
		Franciæ	

# I N D E X.

Francisci Petrarchæ	nus	382
epistolæ	359	humile causarū genus.

## G

A. Gellij dictio monstro	18	humilia uerba 236
sa	231	hominem beatum quid
gloriæ comparandæ	reddat	67
quæ difficultas	192	homines qua ratione
γνώμην quid	257	laudandi 106
græcis uocabulis in lati	ὁμοιοτέλειον quid.	
nis scriptis cur quidā	249	
utantur	229	ὁμοιότητων eod.
γραμματοφῶροι Græcis	honestum causarum ge	
qui	342	nus 18
gratiarum actio in epi-	honestæ cōsultationis di	
stola quomodo tracte	uisio quæ	98
tur	133	honor per se quid 192
gratulatione in episto-	Horatius in imitatores.	
la quomodo utendum	369	
135	Horatij locus. 365.	de
græue genus epistola-	institutione liberorū.	
rum	383 227	

## H

hortatorium genus epi		
Hermolai Barbaristya	stolæ quod	383
lus	361	Hortensius orator 17
ἱερογλυφικαὶ quales no	ἔλκ quid	45
tæ	10 ὑπερβατὰ	240
humanum epistolæ ge-	ὑπερβολή	245. 255
	† 2	lambus

# INDEX.

I	inuentio	15
Iambus qualis pes. 270	inuenienda quomodo	
imitatio quid 16.204	materia in omni scri-	
imitatio an per se suffi-	bendi genere 221	
ciat 369	inventionis quot par-	
imitatio magna artis	tes 17.	
pars 367	Ioannis Capnionis epi-	
ad Imitationem optima	stole 361	
quæq; eligenda ibid.	iocosum genus epistola	
ad Imitationem exacto	rum quale 12	
iudicio opus 368	ira audaciæ confinis.	
in Imitatione sequenda	199	
præcepta 371	ad Iram quomodo con-	
imperandi quæ genera.	citandus quis. 201.	
151	inde	
inductio quid. 36.	eam iudiciale genus causarū	
quomodo Cicero faci	quale 13	
at. ibid. ea quomodo	iuridicialis constitutio	
utendum. eod. quid	quæ 89	
concludat. 37. inde.	iuridicialis assumptiua	
ex ea exemplum an	quæ 91	
nascatur. 38. falsum	iusticia quid. 39	
an concludat 37	partes quæ, & quot.	
interpretatio quid. 251	ibid.	
interpretandi quæ ra-	L	
tio in epistola 171	Leticia quomodo res	
interrogatio 248	primenda 206	

# INDEX.

λακωνικὴ σκυταλὴ.	am usurpemus	9
355	locus quid.	42. in quot
latina uerba quæ pro-	partes distributus.	
prie dicta	237	ibid.
leticia quomodo exci-	locus contra quæstio =	
tanda	202	nes qualis 85
latine quomodo dici	loci communes qui di-	
possit	ibid.	cti. 74. & quot. ibid.
laudandi genera	133	inde
laudandarum rerum di	loci contrarij	410
uisio	110	loci rerum qui. 44.
laudandi & uituperan	quomodo diuisi.	
di quod genus episto-	ibid.	
larum	128	Christophorus Longo =
laudi quid coniunctum.	lius corrumpit natu =	
133	ram. 361.	imitator.
laudibus in epistola quo	Ciceronis superstitio	
modo utendum. 129.	sus	ibid.
& inde	Luciani epistolæ	352
laus unde sumatur. 103	M	
legitima constitutio	Margo honorarius in	
quæ. 86.	eius quot	epistolis 347
partes	87	Marsilius Ficinus philo
Leontinus Gorgias.	sophaster	361
268	mechanicæ artes quæ.	
literæ pro epistola in	115	
singulari cur non eti-	mæror quomodo sedan	
	† 3	duſ

# INDEX.

duo	207	qualis esse debeat.	126
membrane deletilis a=		narratiua epistola quæ	
pud ueteres usus.	343	125	
memoria & pronun=		narratio epistolæ	384
ciatio ad epistolam an		naturæ partes	104
necessariæ	14	necessarium argumen=	
μεταφορὰ quid	256	tum	34
μικρομυία quid	253	negandi quod genus in	
metus in epistola quo=		epistola	159
modo tractādus.	197	negotiosum epistolarū	
miseratio	74	genus	124
morale epistolarum ge		negotium sequentia	
nus	122	quæ	55
moribus praua lectio	νόημα		255
an perniciofa	228	κατάχρησις quid	256
ex Morte alicuius con=		nomen nostrum in salu	
ceptus dolor quomo=		tatione cur præpo=	
do sedandus	213	nendum	384
mouendi epistolarū ge=		numerosa oratio	267
nus Cicero in quot		○	
partes distinguat	12	Occupatio	250
N		ὀνομαστωσίμ	253
Narratio quid. 27. eius		opinandi ratio in epi=	
genera quæ, & quot.		stola	172
ibid. & uirtutes. 29		opinio quarum rerum	
inde		propria	180
narratio in epistolis		opisthographa Græcis	
		quæ	



# INDEX.

quæ dicta	343	peregrinis uocabulis	
optandi ratio per epi-		quando utendum.	230
stolam quæ, & quo-		periodus.	394.
tuplex	166	Græcis	239
ab Orationis uitio quid	περίφρασις		254
maximè abhorreat.	permissio		252
241	permutatio		256
orationem numeris ad	persona à quibus rebus		
pud Græcos qui pri-	laudetur		399
mi astrinxerint.	263	personarum quot gene	
ordinis primi homines	11		19
qui. 296.	item se-	ad Perspicuitatē in ora	
cundi.eod. & infimi.	tione quid potissimū		
ibid.	requiratur		236
ornatus qualis eloqu-	personis quæ attributa.		
tionis uirtus	243	42	
P		petendi genus quale.	
Pæan qualis pes	270.	159	
Palimpsestos	343	Philelphorum epistole.	
παρὰ γωνίαν	35	360	
παράδοξον	253	Philostrati epistole.	
parenthesis	240.	359.	
394		pietatis partes	99
παρενομήσια	249	Plato quo usus genere	
partitio quid Quinti-		epistolarum	12
liano	50	Platonis epistole.	
πάθος	179	353	
		† 4	Plinius

# INDEX.

Plinius de imitatione.	quando utamur	385
16	professores quomodo	
Plinij epistolæ. 358.	appellandi	420
acutæ	364 prohibendi ratio per e-	
Plinij nepos ad eloquen-	pistolam quæ	151
tiam consequendam	propria uerba quæ.	
an imitandus	16 236	
post Plinium qui scri-	proprium quid	13
pserint epistolas. 359	προσωποποιία	261
πλονη	246 prudentia artis socia.	
Poggius garrulus	359 371	
Politianus cur imitan-	Q	
das	368 Quintilianus de Cice-	
Politiani diligentia in	rone	16
scribendo	ibid. R	
Pontifici Romano quo	Rationes loquendi in e-	
modo inscribendæ li-	pistolis quæ	343
teræ	395 ratiocinatio	257
præcisio quid	252 remotio quid	Quinti-
prædicendi ratio in epi-	liano	52
stola	170 respondendi ad episto-	
probabile argumentū	las formulæ	350
34. à Boetio quo-	rhetorum artificium in	
modo definitum. ibid.	epistola cur non res	
quorum præcipue.	quirendum	339
eod.	S	
proæmio in epistolis	Salustius in scribenda	
	histro-	

# INDEX:

historia tardissimus.	366	signum quid	34
salutandi in epistolis		similitudo	268
formulae. 25. inde.		sordida uocabula quæ.	
usui nostro aptæ.		236	
350. & resalutandi.		ad Spem quomodo ad-	
352		ducendi homines.	
salutatio in epistola		195	
quomodo ponenda.		spondeus qualis pes.	
384		271	
ῥήματα Græcis quid.		σέως quid. 80. cur pri-	
245		mò inuenienda in cau-	
in Scribendo quæ præ-		sa	ibid.
cipue obseruanda.		status quot esse possint.	
114		82	
ad Scribendum quot		stylus frequenter exer-	
res necessariae	14	cendus	366
sedandi quale genus epi-		stylus frequens eloquen-	
stolarum	12	tiam parit	ibid.
Seneca doctis solum le-		stylus optimus dicendi	
gendus	366	effector	eod.
Seneca quo usus genere		stylus primò tardus sit.	
epistolarum	12	eod.	
sermocinatio	261	stylus primò lentus ad	
sexus quando, & quo-		quid utilis	367
modo habenda ratio.		ad Stylum quid maxi-	
119		mè necessarium	366
		suadendi & dissuaden-	
		† s di	

# I N D E X.

di genus quale. 152.	lis esse debeat	393
et inde	Tertulliani stylus	359
Symmachi epistola.	texere uerba	240
359	Thomas Aquinas	190
συλλογισμὸς à Cicero	titulorum qualis habent	
ne quomodo dicatur.	da ratio	395
33. quomodo definiatur. ibid.	transgressio	255
et à Boe	transitio	250
tio. ibid. quomodo di-	Thrasymachus	278
uidatur. 39. quomodo tractetur	Tribrachus qualis pes.	
ibid.	ibid.	271
συμπλοκή	246	τρίπῳλα quæ Græci uocant
συναθροισμὸς	258	cent
Synesij epistola	359	Trochæus qualis pes.
T	271	
Tabellarij unde dicti.	tropi in epistola an crebri esse debeant.	
342		
tabellarum usus quàm diu durarit	338	τρόποι Græcis quid.
341	245	
tarditatem orationi	quid adferat	269
269	247	ταυτολογία
temporis præteriti et futuri in certis et in certis rebus quæ ratio in epistola	150	
terminus epistolæ quæ		
	V	
	Vale	345
	Veredarius quis	341
	Vergilius paucissimos indies uersus composuit.	

# INDEX.

suit	366	tum præmium	189
ueteres in scribenda e-		uitia quomodo per epi	
pistola arte an usi.		stolam accusanda.	
16		141	
ueteres quo loquendi		Vlysses cur accusatus.	
modo usi	336	81	
uirtutum in hac uita		usitata uocabula quæ.	
quod nam constitu-		238	

## CAPITVM

# CAPITV M ELENCHVS.

## Libri primi.

Præfatio.	Pag. 1
Quid fit Epistola, & unde dicta. Cap. 1.	Pag. 9
De inuentione, & generibus epistolarū.	2. 10
In quo genere causarum uersetur epistola.	3. 13
De rebus ad scribendum necessarijs.	4. 14
De arte, imitatione, exercitatione.	5. 15
De partibus inuentionis.	6. 17
De exordio, & causarum generibus.	7. 18
De uitijs exordiorum.	8. 22
De salutatione, & principio epistolarum.	9. 25
De narrationum generibus.	10. 27
De uirtutibus narrationis.	11. 29
De diuisione.	12. 31
De confirmatione & confutatione.	13. 33
De argumentis.	14. 34
De formis argumentorum.	15. 35
De inductione, & exemplo.	16. ead.
De syllogismo, siue ratiocinatione, & enthymemate.	17. 38
De locis personarum.	18. 42
De locis rerum.	19. 44
De argumentis à causis rerum.	20. 45
De argumentis à loco & tempore.	21. 47
De argumentis ex modo & facultatibus.	22. 48
De adiunctis negotio.	23. 50
De his	

# INDEX.

De his quæ negotium consequuntur.	24.55
De usu argumentorum	25.56
De confirmatione.	26.60
De dissolutione argumentorum.	27.64
De conclusione.	28.71
De enumeratione.	29.73
De amplificatione.	30.74
De miseratione.	31.76

## LIBRI II.

Prefatio.	1.79
De constitutionum generibus.	2.80
De coniecturali constitutione.	3.82
De legitima constitutione.	4.86
De iuridiciali constitutione.	5.89
De iuridiciali assumptiua.	6.91
De causis deliberatiuis.	7.96
De causis demonstratiuis, dijsq; laudandis.	8.103
De laudandis hominibus.	9.106
De rebus laudandis.	10.110
De personis.	11.114
De generibus epistolarum.	12.120
De diuino & morali genere epistolarũ.	13.122
De negotioso, siue actiuo epistolarum genere.	14.124
De narratiua epistola.	15.125
De laudandi & uituperandi genere.	16.128
De gratiarum actione.	17.133
De gratia	

# I N D E X.

De gratulatione.	18.135
De accusandi genere.	19.137
De iniuriarum, uitiorumq; accusatione.	20.141
De excusandi, siue defendendi genere.	21.145
De certis & incertis rebus.	22.150
De imperandi & prohibendi genere.	23.151
De suadendi & dissuadendi genere.	24.152
De commendandi genere.	25.154
De petendi, concedendi, & negandi genere.	26.159

De consultandi genere.	27.162
De optandi ratione.	28.166
De prædicendi, interpretandi, opinandiq; ratione.	29.171
De consilij dandi ratione.	30.175

## L I B R I III.

De affectibus.	1.179
De amore concitando, & sedando.	2.181
De cupiditate incitanda.	3.187
De contemptione pecuniæ, honorum, gloriæ, & uoluptatis.	4.190
De spe ac desperatione.	5.195
De audacia & metu.	6.197
De ira.	7.199
De læticia & iocis excitandis.	8.202
De læticia reprimenda.	9.206
De mœrore, siue ægritudine sedanda.	10.207
De con=	



# INDEX.

De consolatione paupertatis.	11.208
De consolatione amissorum honorum, & patriæ.	12.210
De consolatione mortis.	13.213
De consolatione cæcitatis, & totius corporis infirmitatis.	14.218
De inuentione in uniuersum.	15.221
De dispositione.	16.223
De elocutione in uniuersum, & de scribendi materia.	17.225
De figuris orationis.	18.232
De uirtutibus elocutionis.	19.236
De uitij compositionis.	20.239
De ornatu.	21.243
De figuris uerborum.	22.246
De figuris sententiarum.	23.257
De compositione.	24.267
De numerosa oratione.	25.ead.

FINIS.



LIPPI BRANDOLINI IN LI  
bros de Ratione scribendi, ad Franciscum  
Picolmineum Cardinalem Se-  
nensem Præfatio.

BIBLIOTECA NAZ.  
ROMA  
VITTORIO EMANUELE



VLTA QUIDEM, AT-  
que ingentia munera nobis ab il-  
lo optimo parente, ac redem-  
ptore nostro collata sunt, sapien-  
tissime pater: nullum tamen ne-  
que maius, neque præstabilius, neq; humano inge-  
nio dignius est, diuinarum humanarumq; rerum  
cognitione, atq; sciētia, quam quidem sapientiam  
maiores nostri appellauere. Nam quum partici-  
pes rationis ac diuinitatis simus, nihil habemus  
quo auidus intelligendi animus tantopere delecte-  
tur, quo tantopere alatur, in quo denique tanto-  
pere acquiescat. opes enim, honores, imperia, uo-  
luptates, cæteræq; res omnes, quæ ab hominibus  
expetuntur, atq; in precio summo habentur, par-  
tim tam fluxæ atq; instabiles, partim tam plene  
curarum ac sollicitudinis sunt, ut omnem animo  
non modo delectationem, sed tranquillitatē quo-  
que, ac sui ipsius potestatem eripiant. hæc una re-  
rum diuinarum humanarumq; scientia, ita pro-  
pria animi, & perpetua possessio est, ut cui se-  
mel est parta, ei ui aliqua eripi, auferriq; nō pos-  
sit: delectationem uerò & suauitatem animo tan-

A tam

tam affert, ut eum ab omni alia cura & cogitatione ad sui studium et contemplationem traducat. Huc accedit immensa quædam, et incredibilis animi quies, atq; tranquillitas, quæ hac una contemplatione comparatur. Animus enim pulcherrimarum atq; altissimarum rerum studio & investigationi deditus, omnem sollicitudinem, cupiditatemq; deponit, humana omnia contemnit, ac pro nihilo ducit, omni deniq; affectu ac perturbatione uacuu, solutusq; quiescit. Ratio autem, & peritia bene beateq; uiuendi, hinc potissimum sumitur. Animus enim optimis præceptis, exemplisq; saluberrimis institutus, siue sibi uicturus, siue alijs præfuturus sit, facile totius uitæ cursum uidet, ad eamq; traducendam omnes rationes & consilia comparat, seq; ipsum ad ea quæ legit, quæ audiuit, quæ obseruauit, accommodat. ita ut, qui ex literarum cognitione degendæ uitæ rationes, fructumq; non capiunt, hi mihi nescire omnino literas uideantur. Porro hæ quantum in secundis rebus ornamentum, quantum in aduersis præsidium afferant, incredibile dictu est. Præstant enim in alteris moderationē, mansuetudinem, auctoritatem: in alteris, animi magnitudinem, patientiam, humanarum rerum contemptionem: contra, ex illis superbiam atq; elationem omnem, ex his omnem dolorem atq; egritudinem adimunt.

adeo,

# P R A E F A T I O.

adeo, ut hæc una ad expellēdos omnes animi morbos, affectusq; sedandos medicina optima, atq; accommodatissima sit ab omnibus semper iudicata. Postremò hæc una contemplatio nos in cœlū rapit, & quantum homini scire fas est, usq; ad ipsius Dei cognitionem ducit. Hæc immortalem nostrum animum ad suam originem redire cupientem, mira quadam eius quam optat beatitudinis spe, & quasi prægustatione incendit, & quoad fieri potest, Deo proximum atq; simillimum reddit. Quam quidem rem sapientiss. nobis ille Paulus uerissime atq; apertissime declarauit, quum per patientiam & consolationem scripturarum spem habere nos iussit. Tuum itaq; tam præclarum institutum, sapientissime pater, ego quidem satis commendare, admirariq; non possum: qui in maximis opibus, in amplissimo fortune ac dignitatis gradu, in summa apud omnes homines estimatione atq; autoritate constitutus, cæteris rebus omiſsis, te totum sapientiæ studijs, contemplationiq; tradideris: eaq; de quibus inter se homines contendere atq; digladiari solent, despicias, ac pro nihilo ducas. neq; tu solum id facias, sed à tuis quoq; faciendum cures. egregium sanè, et dignum sapientissimo uiro, & Cardinale religiosissimo institutum. Quod quidem tametsi tu à sanctissimo ac sapientissimo uiro patruo tuo, Pio Se-

A a cundo

cundo Pont. Max. tanquam hæreditarium munus accepisti: qui quidem in maximis regendæ Christianæ Reipub. & totius penè terrarum orbis administrandi laboribus ac occupationibus positus, ea, per quæ ad locum illum peruenerat, literarum studia nunquam deseruit. Habes tamè à benignitate quadam naturæ tuæ, & ingenij magnitudine, ut à studijs illis, quæ tu optima atque religiosissima esse sentis, distrahi, auocariq; non possis. Perge igitur pater optime, ut facis: perge inquam, tibiq; persuade, id quod diuinitus à Salomone primum, deinde etiam à Platone est dictū, sapientiæ possessionem esse omni auro diuitijsq; meliorem: spera q; fore, ut eius rei fructus quam nunc magnos percipis, maiores tamen in dies singulos, uberioresq; percipias. Ego quidem, quanquam neq; doctrinæ, neque ocij ad contemplandum satis habeo, eius rei tamen incredibilem quotidie fructum capio. Nam quum ab ineunte ætate sim in maximis semper angustijs, ac laboribus corporis, animiq; uersatus, cum ob naufragium rei familiaris nostræ: tum ob hanc, quæ totū corpus aggrauat, cæcitatem: unum hoc literarū præsidium, unum hoc solatium semper habui, quo calamitates omnes, & præsentēs constantissimè toleraui, & aduentantes fortissimè repuli. Hodie quoque quum nihilo minus, atq; haud scio an eti-

am

am magnæ fortunæ procellis exagiter, amiſſa ob  
temporum peruerſitatem quieſcendi ſpe, ab hoc  
uno literarum ſtudio & uitæ præſidia, & animi  
relaxationem peto. Dies enim alijs inſtituendis,  
noctes mihi, quantum licet, impendo. Ne uerò no-  
cturna etiam ſtudia noſtra à communi utilitate  
diſiuncta ſint, quum ſolis nobis nati non ſimus, co-  
nor aliqua aſſiduè lucubrare, quo non mei ſolum  
animi delectationibus, ſed cæterorum etiam tum  
uiuentium, tum poſteriorũ utilitati proſpiciam.  
Itaque quum cogitarem, ſi quid eſſet, in quo ego  
mea opera & induſtria noſtris hominibus pro-  
deſſe poſſem, uideremq; permulta de ratione di-  
cendi, tum à ueteribus, tum à noſtris conſcripta  
uolumina, de Scribendi ratione ab illis nihil tradi-  
tum eſſe: digna mihi uiſa res eſt, & noſtris homi-  
nibus neceſſaria, de qua aliquid conſcriberetur:  
præſertim quum hoc tempore, quicquid eſt elo-  
quentiæ, id in ſcribendo tantũ exerceatur, dicen-  
di exercitatio penè tota deſecerit. nam accuſandi  
& defendendi ratio, ad quam omnes eloquentiæ  
uires, omnis dicendi facultas à ueteribus compa-  
rabatur, mutata fori iudiciorumq; conſuetudine,  
ſublata penitus, atq; extincta eſt. Sententiæ in Se-  
natu apud cæteras ciuitates, patria & communi  
lingua, hic in noſtro colloquio & breuiter, &  
minus latinè dicuntur, ita ut in illis dicendi facul-

tas locum non habeat. Conciones quoque patriæ  
 ferè oratione pronunciantur : paucae admodum  
 aut sanctorum, aut defunctorum laudationes lati  
 na lingua habentur: atq; hæ quoque ab illa ueteri  
 oratoria in nouam quandam & barbaram con  
 suetudinem ab his quos Fratres appellamus, com  
 mutatæ sunt. Sola iam nobis scribendi ratio reli  
 cta est, in qua uersari possit eloquëtia. Atq; hanc  
 quidem præceptionem ueteribus eam existimo fu  
 isse causam primam literis non tradendi, quòd  
 partim cum dicendi ratione coniunctam esse ar  
 bitrarentur, partim sciri hæc ab omnibus tanquã  
 trita & uulgata conspicerent. Nobis, qui neq; in  
 dicèdo exercemur, neq; hæc scire alibi possumus,  
 necessario tradenda esse censui. His igitur de cau  
 sis scripsi superiori anno de Scribendi ratione li  
 bro tres, in quibus & ea quæ erant de arte dicen  
 di à ueteribus tradita, quæ quidem usui nobis esse  
 possent, breuiter atque dilucidè sum complexus:  
 & quæ ab illis prætermissa fuerant, quantum po  
 tui longa obseruatione, collegi. Nam & quæ ab il  
 lis de sex partibus orationis, de causarum generi  
 bus, de dispositione, de elocutione præcepta fue  
 rant, quantum ad hanc institutionem conferre ui  
 sa sunt, non omisi. & quo pacto ad omnem sigilla  
 tim materiã accommodari possit inuentio, ( quæ  
 res adhuc intacta fuerat ) diligenter copiosèq;  
 tractauit



tractavi: atque ut eius rei certa præceptio tradi posset, epistolam, quoniam eo maxime scribendi genere utimur, quasi formulam quandam, in qua scriptor uersetur, accepi, ad eamq; scribendam omnem præceptionem nostram accommodavi. Quos quidem libros, quia neque adhuc satis emendatos putabam, neq; publicandi gloriam affectabam, libenter apud me continebam. Quum autem tu eos à me his diebus & coràm, et per Augustinum fratris tui filiū, præstanti ingenio, moribusq; optimis adolescentem, pro tua consuetudine petisses, quod fore illius institutioni eos non inutiles indicares: non sum passus, pro tua summa erga me benevolentia, meaq; in te incredibili obseruantia, eos abs te diutius desiderari: Augustinumq; ipsum hac utilitate, si qua ex nostris libris ei prouentura est, ulterius carere: imò in magna mea felicitate duxi, res nostras tibi aliqua ex parte uel iucundas, uel utiles esse posse. Eos itaq; tibi, sapientissime pater, quam possum emendatissimos, quamprimum exhibeo: ne, si eos apud me diutius emendando detineam, uel Augustini commodum, uel tuam cupiditatem uidear remorari. Peto tamen abs te, ut non tibi pro amplitudine & sapientia tua dedicatos fuisse, sed ad Augustinum instituendum tanquam in seruitutem missos esse existimes. Nam quæ tibi dedicanda sunt, et maiora,

Et meliora sint necesse est. Ea si quando à nobis scribentur, ad te potissimum scribentur. Hos interea libros accipies, ut tibi aut non legendos, aut si legeris, emendandos putes. Dabis autem operā, ut hæc quæ præcepta sunt, ab Augustino non discantur solum, sed diu multumq; exerceantur. Omnis enim dicendi, scribendiq; facultas, una exercitatione perficitur. Quam quidē ad rem, ne quid ei deesse possit, me, quum uolet, socium, adiutoremq; habebit. Sed suauitate consuetudinis tuæ, et studio tecum colloquendi, euectus sum longius fortasse, quàm debebam; breuius certè, quàm uolebam. Quamobrem ad ipsam nunc præceptionem ueniamus.

9

LIPPI BRANDOLINI DE RA  
tione Scribendi Liber I.

Quid sit epistola, & unde di-  
cta sit. Caput I.



VONIAM IGITUR  
omnis sermo noster de scriben-  
di ratione futurus est, eaq; in e-  
pistola tanquā in subiecto quo-  
dam, & quasi speculo demon-  
stranda est, placet primū philosophorum mo-  
re definire quid sit epistola, ut intelligatur, quid  
sit id de quo disputetur: atq; eam in sua genera di-  
uidere, deinde de rebus ad scribendi rationem ne-  
cessarijs pertractare, tum singulorum præcepta  
tradere, atq; ad ea nostram orationem accommo-  
dare. Est igitur epistola, sermo ad absentes, de re  
ad eorum alterum pertinente conscriptus. Græci  
ἐπιστολήν eam uocant, ἀπὸ τοῦ ἐπιστάλλειν, quod est  
mittere. Nos quanquā epistolæ nomen in tam fre-  
quentem usum recepinus, ut nostrum quodam-  
modo fecisse uideamur, tamē literas appellamus:  
illud autem in soluta oratione seruamus, ut ad ele-  
mentorum differentiam eas in plurali duntaxat  
numero, quas ad absentes scribimus, Literas ap-  
pellemus. Poetæ singularem etiam nu-  
merum usurpant.

A 5 De

## De inuentione, &amp; generibus epistolarum. Cap. II.

A quibus uerò primum inuenta sit epistola, neq; ego satis exploratum habeo, neq; existimo quæri curiosius oportere. nō enim ad eam, quam suscepimus, institutionem magnopere pertinet: neque à rerum gestarum scriptoribus, quod ego sciam, memoriæ proditum est. Illud inter omnes constat, hoc scripti genus omnium antiquissimū esse. Nam quum primum literæ inuentæ sunt, statim ad absentes scribi coeptæ sunt: & fortasse hac potissimum de causa etiam sunt inuentæ, ut cum absentibus quasi cum præsentibus loqueremur. Necessitatis enim gratia, quum antea non essent, inuentas certum est: ut absentes, ea quæ audire, aut uidere non poterant, quoquo modo cognoscerent. Quod quidem hinc uel maxime deprehendi potest, quod Aegyptij antequam literarum usum haberēt, figuris quibusdā, atq; imaginibus rerum depictis, quæ *ἱερογλυφικά* dicebantur, ea quæ uolebant, designabāt. Ex quo fit, ut scribendarū epistolarum consuetudo antiquissima sit, neq; habeat autorem ullum satis certū, cui eius rei assignari possit inuentio: sed sit ante ullas literas ab ipsa necessitate inuenta, imò cum ipsis penè hominibus nata. Scribendi autem illa potissimum causa fuit,

fuit, ut cum absentibus de nostris, uel aliorum rebus communicarem: quæ ratio assignari utilitati potest. Accessit deinde etiam animi delectatio, ut cum amicis iocaremur, eorumq; consuetudine etiam absentes frueremur: qui quidem amicitiae fructus est maximus. Finis autem epistolarum scriptori est ille idem propositus, qui oratori: ut doceat, ut moueat. nam delectare, quod tertio loco posuit Cicero, in mouendi parte collocandum puto. Quid enim est aliud delectare, quam animum ad laticiam, ad uoluptatem, ad cupiditatem, ad spem, et ceteros affectus concitare? Sed Cicero aliam fortasse rationem est secutus. nos duplici tantum fine contenti, docendi, & mouendi, Epistolarum duo genera omnino existimamus esse: alterum, quod ad docendum: alterum, quod ad mouendum sit. Ac superius illud quidem, ac maximum docendi genus, quum latissime pateat, duo genera ex sese facit: unum, quod in præceptis & studiis liberalium disciplinarum: alterum, quod in actionibus uitæ ciuilibus, ac negotiis positum est. illud studiosum, siue contemplatiuum: hoc actiuum, siue negotiosum possumus appellare. Ac studiosum quidem illud in duo rursus genera diuiditur: Vñ, quod ad res diuinas pertinet, quod Apostoli secuti sunt, item Dionysius Areopagita, Cyprianus, Augustinus, Hieronymus, alijq; complures: Alterum,

Alterum, quod ad uirtutes, moresq; & instituta philosophiæ tradenda maximè accommodatum est. Quo ex Græcis Democritus, Plato, aliq; permulti frequenter usi sunt, ex nostris potissimum Seneca. Illud uerò, quod actiuum appellauimus, quoniam in summa uitæ communis uarietate uersatur, certis generibus comprehendere non potest: species habet penè infinitas. In eo, quoniam latissime patet, atque ad omnes pertinet, omnes penè uersati sunt, hodieq; uersantur: sed ex omnibus quos habeamus, ut in cæteris quæ ad doctissimū hominem spectant partibus, ita in hac maximè floruit Cicero. Posterius illud scribendi maximū genus, quod ad mouendum accommodatum esse diximus, in duo item distinguitur genera: unum, quod ad concitandos: alterum, quod ad sedandos animi affectus pertinet. hoc instituendi gratia remissiuum, illud concitatiuū, opinor, appellemus. In horum utroq; ita uersatus est, atq; excelluit Cicero, ut cum illo cōferri possit nemo. Nec desunt, qui hoc mouendi genus non in hæc duo concitandi, & sedandi, sed in alia duo distinguant genera: quorum alterum sit seuerum & graue, quod ad tristitiam, metum, iram, dolorem, affectusq; grauiores uel concitandos, uel sedandos pertineat: alterum familiare, & iocosum, quod affectus habeat iucundiores, materiamq; leuiorem. Ego superiorior

perio rem diuisionem, quæ & melior & clarior est, magis probo. Atq; hæc ferè sunt epistolarum genera. Species uerò, quoniã innumerabiles sunt, persequi infinitum & superuacuum esset. Nos eas, quæ & insignes, & necessariae maximè uidebuntur, cum ad earum præcepta peruenerimus, colligemus. Nunc in quo genere causarum uersari possit epistola, ostendemus.

In quo genere causarum uersetur  
epistola. Cap. III.

Tria sunt causarum genera, quæ recipere debet orator, ut & Cicero tradit, & omnes ferè scriptores consentiunt: Demonstratiuum, quod in alicuius laude, aut uituperatione est positum: Deliberatiuum, quod habet suasionem, & dissuasionem: Iudiciale, quod habet accusationem, uel defensionem, cum petitione. Horum generum quod potissimum epistolæ proprium dici possit, non uideo. Nam tametsi in epistola multos sæpe laudamus, multos uituperamus: suademus item, & dissuademus: accusamus, & defendimus, ac petimus: non tamen ea propria dicenda sunt epistolarum. Id enim propriū cuiusq; rei dicitur, quod ei uel soli, uel maximè conuenit, quo quidem res illa carere sine suo magno detrimento & immi-  
nutione nō potest: ut risus hominis, numerus car-  
minis proprius esse dicitur. His autem generibus  
causarum

causarum magna pars epistolarum caret, ut non modo ea non desideret, sed ne recipere quidem ullo modo possit. Quo enim ex generibus utuntur, qui per epistolam narrant res gestas, qui negotia exponunt, hi qui docent, hi qui iocantur, qui deniq; uarios affectus describunt? Sed laudatur etiam in his epistolis, aut uituperatur aliquis. Incidunt saepe consultationes, petitiones, et alia his similia, fateor: non tamen est illa principalis epistolae subiecta materia, quam tractet, et in qua uersetur, sed extrinsecus accersita. habere autem multas etiam epistolas laudem, uituperationem, deliberationem, petitionem, et quae sunt eiusdem generis, ut propriam, principalemq; materiam: et tunc ea causarum genera recipere posse, non negauerim. sed esse omnibus epistolis tanquam propria recipienda, non censeo. Recipere haec igitur omnia causarum genera, ut aliena interdum potest, ut propria semper non potest. Sed de generibus causarum satis.

### Derebus ad scribendum necessarijs. Cap. IIII.

Tria igitur habere debet is, qui ad scribendum accedit: inuentionem, dispositionem, elocutionem. nam memoria, et pronuntiatio, quae oratori maxime necessariae sunt, huic non sunt ita expetendae. Ea enim quae literis mandamus, memoria et actione



actione non egent. Inuentio est, excogitatio earū  
 rerū quas scribere uolumus. Veræ, an falsæ sint,  
 non semper refert. non enim idem finis semper  
 nobis propositus est, qui oratori, ut persuadea-  
 mus: sed delectare interdum eum ad quem scribi-  
 mus, apologis & iocis, satis ducimus, quos ueros  
 esse non semper est necesse. Dispositio est, conue-  
 niens rerum inuentarum ordo in singulis rebus,  
 partibusq; seruandis. Elocutio est, elegans & or-  
 nata uerborum, sententiarumq; compositio. Har-  
 um partium ut inuentio est maxime necessaria,  
 (scribere enim quicquam, nisi prius inueneri-  
 mus, non possumus) ita elocutio meo iudicio dif-  
 ficillima, nobis præsertim, qui hanc linguam non  
 quasi patriam habemus ut ueteres, sed quasi pere-  
 grinam discimus: neq; habemus ex illorum scri-  
 ptis sanè multa, ex quibus possimus absolute lin-  
 guam perdiscere. multa enim sunt, quæ quo mo-  
 do latinè exprimamus, non habemus. Quamob-  
 rem multo magis est in elocutione nobis, quàm  
 ueteribus, elaborandum. Hanc tamen, et reliquas  
 partes tribus illis rebus, quas tradit Cicero, asse-  
 qui poterimus, arte, imitatione, exercitatione.

De arte, imitatione, exercita-  
 tione. Cap. V.

Ars est præceptio uel ad dicendum, uel ad ali-  
 quid quippiam agendum accommodata: quæ natu-  
 ra tum

re tum obseruatricem, tum adiutricem esse, dici potest. Ea ueteres magna in scribendis epistolis utebantur. sed eius rei præcepta separatim non reliquere: propterea quod cum eo, quem instituebant oratorem, coniuncta uiderentur. Nos, qui illud iam assequi non possumus, huic incumbimus, hoc magnum existimamus, hinc præcepta exquirimus. Illud tamen in primis obseruandum est, ut artem, quantum possumus, dissimulemus. illa enim erit optima demum, et artificiosa epistola, quæ minime affectata, artificiosaque uidebitur. Imitatio est, diligens conatus eius exprimendi, cuius in re aliqua similes esse uolumus. hæc ab optimis est petenda semper. Stultum est enim, ut ait Plinius, sibi ad æmulandum non optima quæque proponere. Atque hac quidem in re quem cum Cicerone comparemus, habemus neminem: qui non solum est optimus, sed in hoc genere penè solus. Nam Plinium Nepotem ei qui aliquid eloquentiæ assequi uelit, ego quidem imitandum non puto. Danda est igitur opera, ut Ciceronis quam simillimi esse possimus. Nam, ut ait Quintilianus, ille se profecisse sciat, cui Cicero ualde placebit. Exercitatio est, assidua consuetudo eius rei, in qua proficere uolumus, faciendæ. Hæc multa scriptione comparatur: cuius rei unusquisque sibi magister esse potest. Tantum autem hæc una res cum ad cetera omnia,

nia, tum uel maximè ad dicendū ualet, ut sola sine cæteris multū possit, cætera sine hac nihil omnino. hac ueteres tam frequenter usi sunt, ut Hortensius summus orator nullū præterire diem pateretur, quo se non aut domi, aut in foro, dicendo exerceret: sæpe utrunq; eodem die faceret. Sed quoniam quæ res ad scribendum essent necessariae, & quibus modis eas assequi possemus, satis diximus: nunc ad inuentionē redeuntes, eius partes considerabimus: & quo pacto ad epistolā singulæ accommodari possint, ostendemus.

## De partibus inuentionis.

### Cap. VI.

Inuentio sex omnino partes habet, Exordium, Narrationem, Diuisionem, Confirmationē, Confutationem, Conclusionem. harum partium aliæ alijs epistolis necessariae sunt, omnes omnibus nō sunt: imò uix existimo posse accidere, ut una eademq; epistola has omnes partes recipiat. Orationis enim tunc, non epistolæ nomen assumeret. pauciores tamen quàm duas, Conclusionem, & aliam quamuis siue Narrationem, siue Confirmationem, habere potest nulla. Quando autem sit earum unaquæq; necessaria, suis locis aperiemus. ab exordio enim incipiētes, de singulis nunc partibus tractabimus.

## De exordio, &amp; causarum generibus. Cap. VII.


Exordium est, artificiosum principium, quo animus uel lectoris, uel auditoris ad legendū, audiendumue paratur. Eo non semper in epistola utendum est: quando autem sit utendum, tum causa, tum persona nos admonebit. Causarum genera, ut scribit Cicero, quem potissimum autorem sequimur, sunt quatuor: honestum, turpe, dubiū, & humile. Honestū est, quum recta defendimus, oppugnamusq; contraria: ut quum homines ad uirtutes cohortamur, deterremus à uitijs. Turpe contrā genus est, quum ea quæ uidentur ab omnibus uituperanda, defendimus, & laudamus: aut quæ laudanda, uituperamus: ut si quis uirum bonum, & quem omnes laudandum putent, uituperare, & in odium eius ad quem scribit, adducere uelit: aut contrā, si quis obscurum & ignauū hominem, & qui malus ab omnibus iudicetur, commendet, & bonis ac studiosis anteponendum ducat. Dubium genus est, quod habet in se turpitudinis & honestatis partem: ut si quis clarum atque honestum hominem, ceterū flagitiosum & improbum commendet, ac præferat. Humile genus est, quum rem uel nostram, uel eorū ad quos scribimus, dignitate multo minorem, inferioremq; tractamus: ut si quis à summo Pontifice uel par-

hant

nam uestem, uel exiguam pecuniam per literas petat. Personarum uero tria genera sunt: nostra, qui scribimus, eorum ad quos scribimus, & eorum de quibus scribimus. Causa igitur posita, personae considerandae sunt. Si honesta sit, nec ualde grauis, aut difficilis, & inter pares personas saepius agitata, aut nullo, aut peregrino exordio utendum est. Si noua, grauis, aut difficilis: item si is ad quem scribimus, nos uel aetate, uel dignitate, uel honore, uel potentia, uel uirtutibus, uel alijs partibus antecedit, longiori exordio uti necesse est. Si de negotijs notis inter nos, usitatisq; ad quemuis scribamur: item si literis aliorum respondemus, propositio rei, de qua scripturi sumus, pro exordio erit. Cetera causarum genera aliud atque aliud, omnia tamen exordium exigunt. Nos quum de singulis epistolarum generibus praecipua trademus, quo pacto in singulis exordiri conueniat, aperiemus. Illud in praesentia satis erit admonere, in omni exordio lectorum animos quam maxime possumus, esse conciliandos. Conciliantur autem tribus illis rebus, beneuolentia, docilitate, attentione: sed beneuolentia in primis, ea captatur uel a rebus, uel a personis. a rebus quidem, si eas utiles, uel honestas, uel laudabiles, uel cognitione dignas, uel certe iucundas, uoluptatisq; plenas ostendemus: a personis triplici-

ter pro ea, quam modò fecimus, personarum distinctione. A nostra quidem, si nostram erga illos beneuolentiam, amicitiam, consuetudinem, obseruantiam, seruitutem etiam, si poterimus, si nostram perpetuam uoluntatem, nostra in eos studia, officia, cōmemorabimus: item, si à nobis omnem arrogantiam, superbiam, ambitionis, cupiditatis suspicionem remouebimus: si quid de nostra uita, aut doctrina, sine arrogantia proferemus: item, si aut splendorem nostræ familiæ, aut nostras calamitates indicabimus: item, si spem, dignitatem, salutem nostram in illis positam esse dicemus: item, si nostram curam, sollicitudinem, diligentiam in eorum rebus, in eorum salute, aut dignitate esse ostendimus. A lectorum persona beneuolentiam contrahemus, si eorum in nos, uel in patriam, uel in bonos omnes officia, studia, merita, beneuolentiam, obseruantiam, uoluntatemq; referemus: si eorum sapientiam, mansuetudinem, pietatem, fidem, beneficentiam, animi magnitudinem, constantiam, modestiam, cæterasq; uirtutes collaudabimus: item, si genus, opes, copias, honores, dignitates, potentiamq; commemorabimus: atq; hæc omnia ad eam, quam scribimus, materiam accommodabimus. Ab eorum de quibus scribimus, persona beneuolentiam comparabimus, si eorum nobilitatem, uirtutem, probitatē, uitam,

uitam, cæteraq; animi, cum fortunæ, tum etiã naturæ bona, ut opus esse uidebimus, pro subiecta materia extollemus: item, si quales in patriam, in cæteros amicos fuerint, quales in eos ipsos, ad quos scribimus, futuri sint, ostendemus: item si eorum misérias, calamitates, solitudinem, inopiam, necessitatemq; aperiemus: si ostendemus, quantum fiduciæ, quantum spei, quantum præsidij in illo, ad quem scribimus, positum esse ducant: si omnem illos salutem, dignitatem, fortunas omnes in ipsius potestate collocasse dicemus. atq; his ferè modis beneuolentia parari solet. Dociles lectores faciemus, si breuiter, quibus de rebus scripturi sumus, dilucideq; ostendemus: si causas, quæ nos ad scribendum adduxerint, proferemus: si rei, de qua scripturi sumus, fundamenta quædam, & quasi semina iaciemus. Deniq; nostris legendis attentos reddemus, si pollicebimur, nos de rebus magnis, nouis, inusitatis, & ad communẽ eorum qui legent, utilitatem, dignitatem, laudem, salutemue pertinentibus esse scripturos. Attentos faciemus item, si spem, uoluptatem, delectationemq; afferemus: si metum, dolorem, cæterasq; animi perturbationes nostris literis sublaturus, aut magna ex parte sedaturos esse pollicebimur: item si de Deo, de rebus cœlestibus, de summa religionis, de summa reip. tractaturos nos esse dice-



mus:deniq; si alio,quàm ceteri solent,modo scri-  
pturos nos esse ostendemus. His ferè modis animi  
lectorum in principijs conciliantur. Fiunt autem  
hæc tum apertius, tum occultius, pro causæ hone-  
state, ac dignitate personæ. quum apertius fiunt,  
principium: quum occultius, insinuatio dici solet:  
quæ sit, cum causæ aut personæ diffidimus, ut is  
ad quem scribimus, causæ aut personæ genere of-  
fendatur, & tamen in nostram sententiã ueniat.  
Fit autem ita, ut cum id maximè agimus, minimè  
agere uideamur. Quod in commendatitijs Cicero-  
nis epistolis deprehendi facillime potest. atq; hæc  
duo sunt exordiorũ genera. Neq; ignoro me mul-  
ta præterijisse. omnia enim complecti, superuacu-  
um esset: & prudentẽ esse eum qui scribit, neces-  
se est. Præceptis præterea nostris aditum ingenijs  
patefacimus, non res terminamus. Si quid tamen  
addendum uidebitur, quum de singulis epistola-  
rum generibus agemus, latius explicabimus. Ac  
de uirtutibus quidem exordij satis nunc, pauca de  
uitijs attingemus.

### De uitijs exordiorum.

#### Cap. VIII.

Vitiorum autem alia tam epistolis, quàm ora-  
tionibus, et omnibus penè scriptorum generibus  
communia sunt: alia propriæ epistolarũ. Commu-  
nia



nia sunt, quæ Cicero & Quintilianus tradunt. Vitiosum enim exordiū, ut ambo scribunt, est, quod ad plures causas accommodari potest: quod ab illis uulgare appellatur. Quale est eorū, qui tenuitatem ingenij sui semper excusant: quod Quintilianus scribit aliquando non oratoribus euitatum fuisse. id meo iudicio adolescentium est propriū, uel eorum qui non satis cogniti sunt, & tum primum ad dicendum scribendumue accedunt. Vitiosum item exordium est, quod non est cum ipsa re de qua agimus, coniunctum, sed affectatum, & aliunde accersitū de industria uidetur: quod Quintilianus translatum appellat. qualia sunt, meo iudicio, Salustij procemia in Catilinarium et Iugurthinū bellum. Nonnulli enim nō quæ ad rem maxime faciunt, sed quæ ipsi optime sciunt, ea potissimum scribunt. Vitiosum item exordiū est, quod nimis longū est pro subiecta materia. Quamquā autē terminus exordio præscribi non potest (alia enim alijs longiora debent esse) uidendum tamen est, in epistola præsertim, ne longius exordiū sit, ne epistola quasi monstruosum corpus caput cæteris membris maius habeat, & tota penē exordium sit. Est item uitiosum exordiū, quod nimis apparatus, uerbisq; exquisitioribus atq; obscurioribus compositum est, quod lectori atque auditori tum suspensionem, tum tædium affert: suspicio-

nem quidē, quia se dolo peti et circumueniri putat, quum nimis compositam, et quasi phaleratam orationem uidet: tedium uerò, quum non sine difficultate intelligit quæ legit. In quod uitium pleriq; nostris temporibus incidunt. qui tum se optimè atq; elegantissimè loqui putant, quum obscurissimis atq; ab usu remotissimis, aut longissimè translatis uerbis utuntur. Atq; hoc uitium si quibus uitandum fuit unquam, nobis præcipuè uitandum est, cum quia non semper cum doctissimis agimus, tum quia in leuissimo scriptorum genere, hoc est epistola, plerunque uersamur. Nam quum scripta omnia dilucida ac facilia esse debeant, quippe quæ propterea eduntur, ut legantur atq; intelligantur, neq; semper à doctissimis legi possunt: hoc epistolæ maximè proprium esse debet, ut facilis, ut dilucida, ut perspicua sit: quæ, ut suprà diximus, necessitatis gratia inuenta est, ut cum absentibus de rebus communibus colloquamur. neq; semper ad doctos scribitur, et responsum semper expectat, sæpe etiam spacium excogitandi nō habet. Ideo dixerunt nonnulli, extemporalem eam, et quodammodo negligentius scriptā uideri debere. Sed ut ad exordia reuertamur, dabimus operam, ut quū uniuersa epistola, tum uel maximè exordium, simplex, dilucidum, et perspicuum sit, et animos lectorū tribus illis modis, beneuolentia

ne uolentia, docilitate, et attentione cōciliet. nam qui hæc non assequetur, uitiosum sine dubitatione se fecisse intelliget. Atq; hæc omnibus scriptis communia uitia sunt.

## De salutatione, & principio epistolarum. Cap. IX.

Proprium uerò uitium epistolarum est, quæ uel salutationem in principio nō apponimus, uel alio quàm deceat modo apponimus. Quo loco illorum error mihi corrigendus est, qui quū ad magnos uiros scribunt, illorū nomen suo præponūt. sic, Innocentio Pontifici Max. Lippus Brandolinus S.D. existimantes dignitatem aliquam inesse in illa nominis præpositione: quæ profectò nulla est. Sed emanauit hic error à nonnullis religiosis uiris, qui quū ad Episcopos, uel ad Pontifices scriberent, reuerentiæ gratia illorū nomen suo præponebant. quos quidē autores in uita imitari debemus, in lingua non debemus, si ueterum illorū in scribendo similes esse uolumur. Est tamen hodie ita corrupta dicendi scribendiq; consuetudo, atq; ita ab ea quæ olim erat, immutata, ut qui suum nomen Pontificis nomini præposuerit, superbus atq; impudens uideatur. Itaque hoc uniuscuiusque prudentiæ arbitrioq; relinquo. Illud admonere satīs est, eum qui ueterum illorum simi-

lis esse uelit, nomen & cognomen suum præponere in salutationem debere: nam prænominibus nos quidem nō utimur. deinde illius ad quem scribit, similiter nomen cognomenq; apponere, sic: Lippus Brandolinus Francisco Picolmineo S. P. D. Multi etiam, Suo, addunt, è quibus est Plinius: Cicero non addit. Id quidem, quoniam non magni momenti est, addamus nec ne, non magno pere laboro. Dignitatē autem eius ad quem scribimus, omittendam in salutatione non puto: sed nostra neque omittenda est, quum insignis est, uel quū ad pares aut minores scribimus, sic: Franciscus Picolmineus Cardinalis Senensis, Oliuerio Carraphæ Cardinali Neapolitano, uel Lippo Brandolino, S. P. D. quanquam sacerdotes nomen familiæ nouo quodam instituto non apponunt. Principium autem epistolæ nomen eius ad quem scribimus, nisi certis de causis, habere non debet. Causæ autem sunt, ut uel aliquem affectum animi exprimamus: ut, Ego uerò Serui uellem, ut scribis, in meo grauissimo casu affuisses. Vel ut in re admodum graui attentio rem habeamus auditorem: ut, Ego Lentule initio rerum atq; actionum mearum. Vel quum aliquid uehementius exprimere uolumus, quod non in principio modò, sed in tota quoque epistola fit: ut, Urbem mi Rufse cole, & in ista luce uiue. Seneca ferè semper no

men eius ad quem scribit, apponit: Plinius, quod ego meminerim, nunquam: Cicero his ferè, quas exposui, causis. Atque hæc de exordio in præsentia satis. nunc ad narrationem accedemus.

## De narrationum generibus.

### Cap. X.

Narratio ( ut scribit Cicero ) est rerum gestarum, aut perinde ut gestarum expositio. eius alij tria, alij plura genera fecere: ego duo tantum esse puto. Vnum, quod ad negotia, & ad ciuiles causas accommodatum est, quod actiuum, siue negotiosum appellari potest. Alterum, quod ab usu fori, negotiorumq; remotum, domi tantum, & in otio exercetur: quod domesticum, siue ociosum, opinor, uocemus. Ac superius illud quidem dicendi genus, quoniam certum finem sibi propositum habet, ut efficiat quod uult, siue laudet, siue delibaret, siue defendat, siue aliquid horum contrarium faciat, ita tractandum est, ut non quæcunq; gesta sint, sed quæ ad nostram maxime causam faciunt, exponamus. Eius genera sunt duo. unum, quod ad totam rem, & causam exponendam pertinet: qualis est narratio Clodiane cædis apud Ciceronem pro Milone: quod genus epistolarum frequenter recipit in negotijs, in laudationibus, petitionibus, commendationibus. Alterum est, quod

rem

rem uel causam nonnunquam intercurrit, aut exempli, aut affectus mouendi, aut comparationis, aut asseuerationis, aut alia simili de causa, quod fortuitum, siue accidentale possumus appellare: qualis est narratio Seruij Sulpitij ad Ciceronem in ea epistola, Posteaquam mihi renunciatum est. Quum inquit: Quæ res mihi non mediocrem consolationem attulit, uolo tibi commemorare. Eius plures species facit Quintilianus. quum persona exactius describitur: ut, M. Acilius Palicanus humili loco: Picens, loquax magis, quàm facundus. quum locus describitur: ut, Est in Hetruria Sena urbs, & natura & arte munitissima. quum tempus: ut, Veris initio, quum omnia florere incipiunt. Præterea quum alicuius belli, seditionis, pestilentie, aut alterius rei causa describitur. Quo toto genere frequenter in omnibus epistolis utimur. Alterum illud genus narrationis, quod otiosum, aut domesticum appellauimus, in duo genera distribuitur, historicum & poeticum. Historica narratio, quia ueram atque integram rerum gestarum cognitionem sibi propositam habet, ita tractanda est, ut nihil falsi dicamus, nihil ueri omittamus. Hac etiam in epistolis nonnunquam utimur, quum nostras uel aliorum res gestas conscribimus: quales sunt multæ à Cilicia missæ Ciceronis epistolæ.

Poetica

Poetica narratio, quia non similis est, et delectationē plerunq; finem habet, non eodem semper modo tractanda est. Aliter enim comici, aliter tragici: item aliter heroici, aliter elegi narrant. Omnes tamen uarietati atq; delectationi inserviunt. ea paratur festiuitate sermonis, uariorum ac dissimilium affectuum concitatione, diuersorum tum animorum, tum euentuum expositione, iucundo exitu rerum, ut scribit Cicero. hæc tota narratio, nisi ioci gratia ueniat in epistolam, aliena de causa, quod ego quidem sciam, nunquam uenit.

## De uirtutibus narrationis.

### Cap. XI.

Omnis autem narratio tres habeat uirtutes necesse est, ut sit breuis, dilucida, uerisimilis. Breuis erit, si inde narrare cœperimus, unde cognosci rem necesse est: neque ab ultimo initio repetamus, ut si quis Romani ciuis nobilitatem explicare uolens, incipiat ab aduentu Aeneæ in Italiam: quod in historia tolerabilius esset, quæ causas rerum initiaq; explicet necesse est: in epistola non conuenit. Breuiter etiam narrabimus, si summam res, non particulatim exponemus, quale esset illud: Cicero uespero domum applicuit, ex quo descendit, domum ingressus est, pallium deposuit,

posuit, suos salutauit: quæ omnia satis intelligetur, si domum tantum uenisse Ciceronem dixerimus. nisi quid ex particularibus illis ad rem nostram causamq; conueniat: ut si uelimus inferre, insidias Ciceroni à domesticis in illa salutatione paratas fuisse. Breues item erimus, si nullis transitionibus et digressionibus utemur: ut sunt aliquando in metamorphosi Quidij, qui fabulam fabulæ interponit. Sed quod in eo poemate uirtus est, in epistola aut historia uitium esset. Rem etiam bis aut sæpius non repetemus, sic: Venit Romam Augustinus: postquam uenit, domum applicuit: ubi uerò domū applicuit, benignè à suis exceptus est. Ita etiam consequentia narrabimus, ut ex illis antecedentia intelligamus: ut, si te Romam rediisse dixeris, discessisse quoq; te facile intelligat. Deniq; rerum exitus longius quam opus sit, nō persequamur: ut si propositū sit, tuum ad urbem reditum narrare, prosequaris etiam quicquid in urbe postea feceris. Præterire autem quicquam ex re gesta, ubi rei notitia sola petitur, non oportet. Vbi narratio ad finem aliquem laudis, deliberationis, iudicijue dirigitur, non ea modò quæ obsunt, sed ea etiam quæ non profunt, omittenda sunt. Dilucida erit narratio, si ordinem rerum gestarum, temporum, locorum, personarumq; seruabimus: si nihil quod extra rem sit interponemus: si nihil



nihil obscure, nihil contortè, nihil concisè aut contractè proferemus: si proprijs atque usitatis tum uerbis, tum sententijs rem exponemus: si ambitu, (siue ut Cicero appellat) comprehensione uerborum longiore, quàm necesse est, nō utemur: si circuitiones & quasi ambages omitemus: si nō deerrabimus ab eo quod cœperimus: deniq; si ea quæ paulo antè tradita sunt breuitatis præcepta obseruabimus. Verisimilis siue probabilis erit narratio, si omnia locis, temporibus, rebus, personis conuenientia proferemus: si, ut res gesta est, aut geri potuit, ita narrabimus: si nihil difficile, nihil incredibile, nihil fabulosum, aut à facultate hominum, memoriaue remotum, & monstro ferè simile proferemus: si rei, quam narrabimus, argumenta, signa, testimonia, quatenus egere uidebitur, ostendemus: si eam probabilem nostrā, aut illustrium uirorum fide, assueuratione, aut auctoritate faciemus. Ac de narratione quidē hactenus.

### De diuisione. Cap. XII.

Diuisio est distributio totius uel orationis, uel alterius rei in suas partes. ea narrationē statim sequi debet. Atq; in iudicialibus quidē causis primū dicendū est, quid nobis conueniat cū aduersarijs, quid in cōtrouersia sit: deinde enumerandæ, atq; exponendæ breuiter partes, de quib. dicturi sumus: quæ plures aut pauciores tribus (ut Cicero præcipit)

capit) esse non debent. In domesticis uerò & deli-  
beratiuis causis neq; diuisio semper adhibenda est,  
neq; quid nobis conueniat cum aduersarijs expo-  
nendum, sed explicandæ tantum partes de quibus  
dicturi sumus. hoc plerunq; post exordiū fit. nar-  
ratio enim in his causis nō ita semper necessaria  
est. Epistola meo iudicio uel nunquam, uel quā-  
rarissimē diuisionem recipit. nam quū illud quasi  
propriū habere debeat, ut minimē excogitata  
atq; artificiosa uideatur, illa partiū enumeratio-  
ne non indiget. Præterea unica ut plurimū in ea  
tractatur materia, eaq; simpliciter. Quod si plu-  
ribus de rebus eodem tempore scribendū sit, quo-  
niam auditoris aut lectoris memoriā non magno  
pere expetunt, satis est, si re priore absoluta, ali-  
am, et deinde aliam subtexamus. Si autem duabus  
pluribusue epistolis eodem tempore responde-  
re uelimus, poterimus uti diuisione, siue propo-  
sitione, hoc modo: Binas abs te accepi literas, al-  
teras Calendis, alteras Nonis datas: quibus ut uel  
le uideris, ego suo ordine respondebo. Illi quo-  
que, qui aliquid per epistolas docent, præsertim  
cum quæstionibus interrogationibusq; respon-  
dent, diuisione utuntur, hoc modo: Petis à me,  
ut tibi quæstiones tres per epistolam declarem.  
quibus breuiter explicatis, subiungemus in hanc  
sententiam pauca: Faciam, ut potero, breuiter,  
et eo

Et eo ordine, quo requiris, quo quidem modo Hieronymus sepiſſime utitur. Ac de diuiſione ſatis, nunc ad reliquas partes tranſeamus.

### De confirmatione & confutatione. Cap. XIII.

Diuiſioni proxima eſt confirmatio, & confutatio: quæ partes quoniam & difficilimas tractationes habent, et frequenter in epistolâs ueniunt, accuratiùs explicandæ ſunt. Nam ſiue docere, ſiue monere uelimus, probemus, quæ dicimus, neceſſe eſt, refutemusq; contraria. Sed quum aliud ſit, epistolâs domi ſcribere, aliud in foro cauſas agere: aliâq; ſit epistolæ, alia ſit orationis ratio: nō eſt utraq; eodem modo tractandâ. Nos itaq; omiſſis his, quæ fori & iudiciorum propria ſunt, ea quæ uenire in uſum ſcribentiũ ſolent, tantũ perſequemur. Quoniam autem ex quibus locis confirmatio ſumitur, ex hiſdem ſumitur cōſutatio, neq; noſtra ſatis cōfirmare poſſumus, niſi aliena refellamus, de utraq; mihi primò coniunctè, deinde etiâ ſeparatim dicendum eſſe exiſtimaui. Eſt igitur confirmatio, noſtrarum rerũ artiſcioſa comprobatio: ſiue (ut Cicerò deſinit) noſtrorum argumentorum expoſitio, cum aſſeueratione. Confutatio eſt, contrariorũ locorũ diſſolutio. Vtrâq; rationibus atq; argumentis tota conficitur. Argumenta autem è certis locis, & ſedibus eruuntur.

tur. Nos prius de argumentis pauca dicemus: deinde de locis, è quibus argumenta eliciuntur, quantum res postulabit, breuiter attingemus.

### De argumentis. Cap. XIII.

Argumentum est igitur ( ut omnes definiunt ) ratio rei dubiæ faciens fidem. uel ( ut apertius dicam ) est ratio, quæ incerta & incognita per ea quæ certiora & notiora nobis sunt, probat. Id in duo genera omnino distribuitur, probabile, & necessarium. Probabile ( ut Boetius definit ) est id quod omnes, aut quamplurimi, & sapientes, & in ea re de qua agitur, periti, sic esse consentiunt. quale est illud: Si mater est, liberos diligit: item, Si literis operam dedit, aliquid scit. Est enim apud omnes probabile, eam quæ mater est, filios diligere: & eum qui literis operam dederit, aliquid scire. non tamen ita necessarium est, ut aliter esse non possit. Atq; hoc genus oratorum & dialcticorum est proprium. Necessarium est id, quod etiam si apud omnes non probetur, aliter se habere non potest. quale est illud: Quum terra inter lunam & solem posita fuerit, luna deficiet: item, Quum luna soli ac terræ se interposuerit, sol deficiet. lunam enim terræ interpositione, solem uero interpositione lunæ deficere, tametsi non omnibus probabile uideatur, ita tamen necesse est, ut aliter se habere non possit. Atq; hoc genus philosopho-

Sophorū mathematicorumq; propriū est. Vtrun-  
que autem hoc genus si inter se coniungatur, pa-  
rit ex sese genus tertium, quod probabile, & ne-  
cessarium nuncupatur. quale est: Si dies est, lux  
est: item, Si currit, mouetur. Vtrunq; enim & a-  
pud omnes probatur, & sic esse necessarium est.  
quod quidem genus ut est ex genere utroq; com-  
positum, ita etiam omnibus, quas memorauī, disci-  
plinis conuenit, & commune est. Ac de argumen-  
torum quidem generibus satis, nunc de eorum for-  
mis pauca dicamus.

## De formis argumentorum.

### Cap. XV.

Argumentorum formæ duæ præcipuè sunt, in-  
ductio, quæ à Græcis ἐπαγωγή: & ratiocinatio,  
quæ συλλογισμός ab illis appellatur: à quibus a-  
liæ duæ ducunt originem: exemplum, quod Græ-  
cè παράδειγμα dicitur: et ἐνθύμημα, quod Quin-  
tilianus commentum, siue commentationem in-  
terpretatur: quibus omnibus non oratio modò,  
uerū etiā epistola, & omne scripti genus frequen-  
tissime utitur. Nō inconueniēs mihi uidetur, ut de  
his singillatim, quàm breuissimè possumus, præ-  
cipiamus, ab inductione potissimum incipientes.

## De inductione, & exemplo.

### Cap. XVI.

C 2

Inductio

Inductio igitur est oratio, quæ per similitudines particulares, non dubias, rei dubiæ, siue illa particularis, siue uniuersalis sit, assensionem elicit. Eam plerumque Cicero per interrogationes facit, ut plurimis, de quibus nulla dubitatio esse possit, similibus collectis rebus, hisque omnibus nobis per interrogationem concessis, de re, quam uolumus, demum interrogemus: ut quum ille similitudine uictus, negare non possit, uel tacere, quod assensionis genus est, uel aperte, quod uolumus, fateri compellatur. Ea utemur hoc modo. Sit aliquis, quem ad literarum studia compellere cupiamus, eum nos per inductiones ita compellemus. Si ciuis tuus plus opum habeat, quam tu, tuasne, an illius opes malis? illius profecto, respondebit. quid si ciuis tuus plus potentiæ, aut auctoritatis, quam tu, in ciuitate habeat, tuamne, an illius, cedo, potentiam, atque auctoritatem malis? illius uero, dicet. tunc nos inferemus. at si quis ciuis tuus plus doctrinæ, atque eloquentiæ habeat, quam tu habes, tuamne, an illius malis? illius profecto malle se, cogetur respondere, aut certe conuictus tacebit. tunc nos, siue taceat, siue fateatur, quod uolumus concludemus. Atque hæc inductio per interrogationes fit, et particularia concludit. Potest et uniuersa affirmando concludere, hoc modo. si superrare alios ciues opibus, uolumus, si honoribus, si dignitatibus,

gnitatibus, si potentia, si autoritate, si gratia cupimus eos antecire, propterea quòd hæc honestissima, & præclaro ciue dignissima existimamus: profectò omnibus quoq; rebus, quæ honesto & præclaro ciue dignæ habentur, præstare alijs, & antecellere uelle debemus. Atq; hoc in genere tria esse præcepit Cicero: primùm, ut res illæ, quas per similitudinē inducimus, ita certæ atq; indubitatæ sint, ut eas omnino concedi nobis necesse sit: deinde, ut id cuius causa fiet inductio, ita simile sit his rebus, quæ antè allatæ concessæq; sunt, ut refugii, aut negari similitudo non possit: postremò, ut similitudines tales inductæ sint, ne intelligi possit quò spectent, aut quem ad exitū peruenturæ sint. nã qui uidet ex primis interrogantibus, si assenserit, sibi postea cõfirmandū esse quod nolit, aut nō respondēdo, aut malè respondēdo, longius procedere interrogationes nō sinet. Atq; hoc postremū in ea inductione, quæ per asseuerationem fit, non ita seruari necesse est. Poteest autē inductio falsum etiam aliquando cõcludere, hoc modo. Qui scit canere, cantor est: luctari, luctator est: qui scit literas, literatus est: ita etiã, qui scit mala, malus est. quæ quidem falsa conclusio est. uirtutes enim scire sine contrariorū, hoc est uitiorum scientia nō possumus. quo quidem modo si quis contra nos argumentetur, facile confutari ac refelli poterit.

Ex inductione autem exemplum nascitur, quod ex inductione particulari particularem conclusionem facit, hoc modo: Vt Græci Homerum summopere uenerantur, ita nos Virgiliū summopere uenerari debemus. Ac de inductione quidem, et exemplo satis, diximus: nunc ad ratiocinationem transeamus.

### De syllogismo, siue ratiocinatione, & enthymemate. Cap. XVII.

Syllogismus, qui ratiocinatio interpretari potest (ut Cicero definit) est oratio ex ipsa re probabile aliquid eliciens, quod expositum, & per se cognitum, sua se ui ac ratione confirmet. Boetius syllogismum definit: Syllogismus est oratio, in qua quibusdam positis, & concessis, per ea quæ posita & concessa sunt, necesse est aliud euenire. Quæ definitio tametsi uerbis à Ciceronis definitione discrepet, eodem tamen, si rectè consideretur, tendit. Quod enim ait Boetius, Quibusdam positis, & concessis: Cicero ait, Expositum, & per se cognitum. Tum quod ille ait, Necesse est aliud euenire per ea quæ posita & concessa sunt: hic ait, Ex ipsa re probabile aliquid eliciens. Et ut ostenderet, fieri per ea quæ posita & concessa sunt, neque aliunde trahi, quod probatur, subiunxit, Se sua ui ac ratione confirmet. Constat



stat autem syllogismus tribus ad minimum partibus: propositione, quam dialectici maiorem appellant: assumptione, quam illi minorem uocant: & complexione, quæ ab illis consequentia dicitur. eius tale exemplum est, ut si probare uelis hominem esse substantiam, sic probes: Omnis homo est animal, omne animal est substantia, ergo omnis homo est substantia. Hic species habet plures, sed quoniam his orator nunquam, aut rarissimè utitur, explicandi eas in præsentia tempus non uideatur. Oratorius autem syllogismus, quæ Cicero ratiocinationem appellat, quinque ad summum partibus efficitur: propositione, probatione (quæ uel una, uel pluribus rationibus effici potest) assumptione, alia item probatione (quæ pluribus etiam rationibus atque argumentis exornari atque amplificari potest) & complexione, quam eandem conclusionem licet appellare. Ea tractatur hoc modo. ut si uelim ostendere ciuitatem melius ab uno, quàm à multis gubernari, sic ostendam: Quæ ad publicum commodum gubernanda sunt, ea melius ab uno, quàm à pluribus gubernantur. Hæc est propositio, quæ probatur hoc modo: Multi enim & inter se sæpe dissentiunt, & omnia ad sese rapiunt: unus belli dux exercitui proponitur, unus rector nauem moderatur: denique apes ipsæ unum, qui cæteris præsit, regem creant. Sequitur assum-

ptio, siue minor propositio. Quid autē est, quod multorum commodum ita respiciat, ita sibi propositum habeat, ut ciuitas, quæ ad omnium est salutē & commodū instituta? Sequitur quoq; huius assumptionis probatio. nam quid aliud agūt, qui uniuersos cingunt, ac sepiunt, nisi ut omnes qui intra sunt, tueantur? quid aliud templa, fora, theatra, ceteraq; urbis tum publica, tum priuata ædificia, nisi ut omnibus seruiant, omnibus usui atq; ornamento sint? leges porrò, iura, magistratusq; qua de causa instituti sunt, nisi ut quæ sua sunt, tutò possidere unicuiq; liceat? Postremò tot artes, tot studia, tot disciplinæ, quid sibi uolunt aliud, nisi ut omnes in terris commodè uiuere, atq; habitare possint? Sequitur complexio, quæ si breue sit argumentum, simplex potest esse, hoc modo: Quæ quū ita sint, longè melius ab uno, quàm à pluribus, ciuitas gubernatur. Si uerò longior ratiocinatio fuerit, Complexio breuem epilogum habeat necesse est, hoc modo: Quod si omnia quæ publicum commodum spectant, melius ab uno, quàm à pluribus, gubernantur; nihil autem est, quod æquè salutem omnium commodumq; respiciat, atq; ipsa respicit ciuitas; eam profectò ab uno, quàm à pluribus, satius est gubernari. Potest ratiocinatio carere uel utraq; probatione, uel altera, quum id quod dicimus, ita per se patet, ut proba=

probatione nō egeat, hoc modo: Si quo die uirgo  
Romæ uitiata est, ego eo die in Sicilia fui: profe-  
ctò transferri in me hoc crinem non potest. hæc  
propositio ita per se manifesta est, ut probatione  
non egeat. Sequitur assumptio: fui autem in Sici-  
lia. hoc quia inter omnes non constat, probetur  
necesse est. Quod autem dixi de altera probatio-  
ne, de altera quoq; intelligi uolo. Potest enim inci-  
dere causa, in qua assumptionis probatio non sit  
necessaria: ut si dicam, Cæcus amore mulierū ca-  
pi non potest: amor enim formæ non nisi à re ui-  
sa proficiscitur. ego autem, ut uidetis, cæcus sum.  
atq; hæc assumptio probatione non eget. Potest  
et tribus tantum partibus constare sine ulla pro-  
batione, hoc modo: Si lux est, dies est: lux autem  
est: igitur dies est. Potest et duabus, quū propo-  
sio tacetur, hoc modo: Lux est, igitur dies est. Atq;  
hæc à Græcis appellatur enthymema: id (ut dixi-  
mus) Quintilianus commentum, siue commenta-  
tionem appellat. Atq; hæc præcipuè argumenta  
sunt oratori necessaria. Et prioribus quidem illis  
Socrates, et Socratici omnes: posterioribus uerò  
his Aristoteles, et Theophrastus, et Peripateti-  
ci omnes maximè usi sunt. Sunt et aliæ argumen-  
torum formæ quamplurimæ: sed quoniam ad no-  
stram institutionem non pertinent, hoc loco ex-  
ponendæ non sunt. Hæc quoq; quæ attigi, multi  
C 5 fortasse

fortasse reprehendent, & ad scribendi rationem minus necessaria iudicabunt: sed si diligenter aduerterint, apud unum Ciceronem (ut Senecam, Hieronymum, & alios omittamus) hæc omnia frequenter inuenient. Sed de argumentis hætenus. Si quis plura desiderabit, Ciceronem & Boetium legat. nunc de locis, à quibus argumenta ducuntur, differamus.

### De locis personarum. Cap. XVIII.

Locus est quasi argumenti sedes, ex qua ipsum argumentum ducitur. Distribuantur autem loci duas in partes: in personas, & res. Personis hæc ferè attributa esse scribit Cicero, nomen, naturam, uictum, fortunam, habitum, affectionem, studia, consilia, facta, casus, orationes. Nomen est, uniuscuiusq; proprium uocabulum. Ducitur autem ab eo argumentum, si quempiam aut laudemus, aut uituperemus, dicamusq; nomen esse personæ uel accommodatum, uel contrarium. Naturam uel omnibus communem, uel propriam uniuscuiusq; definire difficile est. In ea consideratur genus, uirile, an muliebre sit. Alia enim à uiris, alia à mulieribus argumenta ducuntur. Nam in uiro facilius furtum, in muliere facilius ueneficium creditur. Consideratur item natio, Italus,  
Gallus

Gallus, an Hispanus sit : patria, Romanus, Florentinus, an Venetus. Nam & nationum, & ciuitatum singularum proprii mores, opiniones, consuetudines, & instituta sunt : à quibus argumenta ducuntur. Consideratur præterea cognatio, claris, an obscuris maioribus ortus sit, à quibus sepe argumenta ducuntur : ut fecit Salustius in Ciceronē, atq; in eum Cicero. Item ætas : alia enim de puero, alia de adolescente, aut de sene ducuntur. Item commoda, & incommoda, animo, uel corpori à natura data : ut, acutus, an hebes, memor, an obliuiosus sit, longus, formosus, an contrà. In uictu, siue educatione consideratur, quomodo educatus sit, quos præceptores, aut socios uitæ habuerit, quibus cum habeat consuetudinem, quo studio aut artificio teneatur, quomodo rem familiarem administret. In fortuna consideratur, diues, an pauper sit : seruus, an liber : priuatus, an cum potestate : foelix, clarus, an contrà : quales liberos habeat. Quod si de mortuo loquemur, genus etiam mortis in argumentum ducemus. In habitu corporis consideramus, si quid commodi studio & arte consecutus sit, quo uel formosior, uel agilior sit effectus. In habitu animi, qua uirtute, qua doctrina præditus sit. In affectione quaeretur letitia, tristitia, metus, molestia, omnis deniq; animi mutatio subita.

## 44 DE RATIONE SCRIB.

In studio, poetica, philosophia, pictura, an musica deditus sit. In consilio quaeretur, quid cogitet, quid deliberet: quāquam hoc Quintilianus ad res magis putat, quā ad personas pertinere. Facta, casus, et orationes ex tribus temporibus considerantur. nam non modò quid quisque fecerit, quid dixerit, quid ei acciderit: sed quid agat, quid ue acturus esse uideatur, cōsiderabimus. Eadem de dictis, et casibus ratio erit. Atque hæc ferè personis attributa sunt.

## De locis rerum. Cap. XIX.

A rebus, siue negotijs argumenta multis modis ducuntur. Cicero ea quatuor in partes distribuit. dicit enim, partim esse continentia cum ipso negotio, partim in gestione negotij considerari, partim esse coniuncta negotio, partim gestum negotium sequi. Quintilianus argumenta, quæ à rebus ducuntur, quinque ex partibus duci affirmat. aut enim qua de causa, aut quo loco, aut quo tempore, aut quo modo, aut per quæ unūquodque fiat, considerandum esse dicit. Quæ diuisio tamen si à Ciceronis diuisione diuersa esse uideatur, eodem tamen tendit. Nam quæ Cicero cum ipso negotio continentia uocat, Quintilianus causas rerum appellat: quæ Cicero uel in gestione negotij, uel adiuncta, uel consequentia tanquam genera considerat, ea Quintilianus non generatim, sed

sed per suas species singillatim exequitur. Nos quoniam non oratorem instituimus, ut illi faciebant, sed scribendi rationem tradimus, locos tantum illos attingemus, quos ad eam rem esse maxime necessarios existimabimus: ne uel adolescentium mentes his quæ minimè in usu sunt, causis iudicialibus implicemus, uel Ciceronem uel Quintilianum ad uerbum scribere, non aliquid de integro condere uideamur.

## De argumentis à causis rerum.

### Cap. XX.

Ducuntur igitur argumenta in primis à causis rerum uel actarum, uel agendarum, quum ea quæ egimus, aut acturi sumus, nos aliqua de causa uel fecisse, uel facturos dicimus. quam materiam Quintilianus ab alijs ὕλην, ab alijs λόγον scribit appellari. Causæ autem rerum considerantur uel circa bonorum adeptiones, incrementum, cōseruationē, usum: uel circa malorum euitationē, imminutionem, conuersionem. Quicquid enim facimus, aut boni appetendi, aut mali fugiendi gratia facimus. Hinc nascitur uberrima argumentorū materia: siue in deliberando, quum ostendimus quæ bona consequentur, si id fiat quod uolumus: contrà quæ mala, si non fiat: siue in iudicijs, quum ostendimus eum qui accusetur, ex ea re magna uel commoda acquisiuisse, uel fugisse incommoda.

moda. ut si probemus, Aiace[m] ab Vlyss[e] occisum  
 esse, ostendemus Vlyss[em] inimicitias, iniurias, in-  
 teritūq[ue], qui sibi immineret, euitasse. Habent hæc  
 quoq[ue] causæ in epistolis magnam argumentorum  
 materiam, siue in commendando, quum ex ea  
 commendatione aliquid commodum euenturum  
 dicimus uel ei ad quem scribimus, uel nobis ipsis,  
 uel ei quem cōmendamus: siue in petendo, quum  
 ex ea re uel nobis, uel amicis, uel his ad quos scri-  
 bimus, utilitatem, dignitatem, laudem futurā de-  
 claramus: siue in consolando, quum ex ea morte  
 & illos qui decesserint, magnam felicitatem habi-  
 tuos, magnis miserijs liberatos: & eos ad quos  
 scribimus, uel aliquod commodum esse adeptos,  
 uel incommodo aliquo leuatos esse ostendimus.  
 Sunt autem & bonorum et malorum falsæ quoq[ue]  
 opiniones, quæ multorum & magnorum erro-  
 rum causas hominibus præbent. Multa enim uel  
 ut bona appetuntur, uel ut mala fugiuntur: quæ  
 opinione, non re uel bona, uel mala sunt. Atque  
 hinc existunt pessimæ animi perturbationes, odis-  
 sum, ira, inuidia, crudelitas, auaritia, libido, ambi-  
 tio, spes, metus, & quæ sunt generis eiusdem, quæ  
 materiam argumentandi in omnibus causis am-  
 plissimam præbent: quum ostendimus hominem  
 adductum odio, amore, aut alia perturbatione,  
 id de quo quæritur, facinus admisisse. Atq[ue] hic lo-  
 cus



cus in cōsolationibus latissimè patet, maximamq;  
uim habet. Possumus enim facile ostendere uel bo-  
na, uel certè non mala, quæ illis ad quos scribi-  
tur, mala uideantur: illos uerò dolore, uel amore  
impeditos, quæ recta sint, minus cernere. quem  
locum exequitur latè Seruius Sulpitius, quum Ci-  
ceronem de morte filiæ consolatur. & de causis  
quidem rerum hætenus.

### De argumentis à loco, & tem- pore. Cap. XXI.

Ducuntur argumenta à loco: in quo conside-  
ratur ipsius loci natura, maritimus, an mediter-  
raneus sit, montanus, an planus: Quantitas, ut,  
longinquus, an propinquus, magnus, an paruus:  
Qualitas, ut, desertus an frequens, consitus an  
incultus, præterea sacer an prophanus, publicus  
an priuatus, alienus, an eius de quo agitur: quæ  
quidem omnia tametsi fori & iudiciorū propria  
magis sunt, ueniunt tamen etiam in familiares  
epistolas, & in alia scriptorum genera, quum lau-  
damus, uel uituperamus aliquem à loco, unde ori-  
undus sit, in quo uersatus sit: quum suademus, uel  
dissuademus aliquid, propter loci opportunita-  
tem: quum consolamur, & eum qui descefferit, in  
patria, in suis ædibus, inter domesticos, & fa-  
miliares desceßisse, aut honestissimo loco sepul-  
tum

tum esse dicimus. quem quidem locum pulcherri-  
 me exequitur Seruius Sulpitius in ea epistola, in  
 qua mortem Marcelli describit. Ducuntur argu-  
 menta à tempore, quod uel est generale: ut quum  
 dicimus, olim sub Alexandro, quum reges Romæ  
 regnarent, quum Roma à Consulibus regeretur.  
 uel speciale quid in annos, menses, dies, horasq; di-  
 stinguitur. Huic Cicero occasione adiungit, quam  
 temporis speciem facit. omnis enim occasio tem-  
 pus est, sed non contrà. Eius facit tria tempora:  
 publicum, ut bellum, dies festi: commune, ut mes-  
 sis, uindemia: singulare, ut conuiuium, nuptiæ.  
 In omni uerò tempore consideratur, quid gestum  
 sit, quid geri potuerit, quid geri posse uideatur.  
 atq; hoc etiã in epistolam uenit. Nihil enim in ne-  
 gôtijs æquè, ac temporis opportunitas, conside-  
 ratur, siue narremus gesta, siue gerenda decernã-  
 mus. Hanc quoq; occasionem in Marcelli morte  
 non omisit Seruius Sulpitius. ait enim, post cœnæ  
 tempus occisum esse Marcellum, & manè sibi ho-  
 ra decima nunciatum. Valet etiam occasio tempo-  
 ris plurimum tum in deliberando, tum in conso-  
 lando. quam quidem partem latissimè tractat  
 idem Seruius Sulpitius, quum Ciceronem de mor-  
 te filie consolatur.

De argumentis ex modo & fa-  
 cultatibus, Cap. XXII.

Ducuntur

Ducuntur etiam argumenta ex modo, quum exponitur quo modo, quo animo aliquid à nobis, uel ab alijs factum sit. Eius partes sunt, prudentia, et ira. Prudenter aliquid factum existimatur, quum ui, dolo, consilio, persuasione, mente denique tali factum est. Imprudenter contra factum dicitur id, quod per inscitiam, casum, necessitatem; quod præterea per affectionem animi, iram, odiū, amorem est factum. Veniet autem hic locus in epistolas, quum nostrum, uel alterius factum accusabimus, uel excusabimus, et ueniam petemus. Hoc Cicero sepe facit, quū accusat Pompeium, quod ita bellum administrauerit: et quum se ipsum excusat, quod affuerit. Facultates etiam epistolis præstant argumenta in petitionibus, commendationibusque, præsertim quum ostendimus habere eum ad quem scribimus, magnam eius rei quam petimus, præstandæ facultatem. Conferunt etiam plurimum in deliberando; quū exponimus quæ necessaria sint ad eam rem quam scribimus, faciendam. Hunc locum tractauit Cicero, quum de ratione traducendæ uitæ cum Seruio Sulpitio consultaret. Conferunt etiam facultates ad reprehendendum, uel excusandum. cuius rei exemplum est apud Ciceronē ad eundem Seruium, quum Pompeium accusaret, quod neque militum genere, aut robore, neque consilio satis ualeret.



## De adiunctis negotio.

## Cap. XXIII.

Sequuntur ea quæ Cicero adiuncta negotio appellat, qui loci sunt plurimi, quos ipse breuissimè perstringit, Quintilianus latissimè tractat: nos eos tantum, qui nostræ institutioni conuenient, explicabimus: ceteros omittemus. Ducuntur igitur à diffinitione nonnunquam argumenta, quum uocabulum, aut rem de qua loquimur, diffinimus, ut per eandem definitionem, quod uolumus, inferamus. id fit uel interrogando, uel affirmando. Interrogando, sic: Nónne uirtus iuri propria est. & à uiro appellata? uel sic: Quid est amicitia? nihil aliud est, quàm mutua beneuolentia. Affirmando sic: Quod si amicitia nihil aliud est, quàm mutua beneuolentia, nos mutuò amemus necesse est, si amici uolumus appellari. Ducuntur argumenta à genere, specie, differentibus, proprijs: sed quoniam hæc in epistolam, uel aliud scripti genus uel nunquam, uel rarissimè, & disputandi tantū gratia ueniūt, omitto. Quòd si quis ea, de quib. disputaturus est, sciet: hæc quoque, sine quibus sciri illa non possunt, teneat necesse est. Ducuntur etiam à diuisione argumenta, quum totum in suas partes diuidimus, uel genus in suas species distribuimus. Quæ à Quintiliano partitio nominatur. Hinc multis modis argumenta ducuntur, quum omnia diuisionis

diuisionis membra à nobis ad eandem conclusio-  
nem deducuntur, hoc modo: Quū uirtus uiros bo-  
nos efficiat, si ametur, ab alijs expetēda est, ut alijs  
placere possimus: si non ametur, expetenda est,  
ut nobis ipsis placeamus. Item diuisione utimur,  
quum duabus, aut pluribus propositis partibus,  
quamcunq; nobis concedat aduersarius, uicimus,  
hoc modo: Quum antehac ad me non scripseris,  
aut superbiæ, aut negligentie te accusem neces-  
se est. tu uide, utra te minus deceat. Item quū om-  
nia diuisionis membra confutamus, ut ad id quod  
uolumus, deueniamus, hoc modo: Falso te excu-  
sas, quod ad me sepe scripseris. nam si scripsisses,  
aut tabellarijs, aut amicis, aut peregrinis matori-  
bus literas dedisses: tabellarij se nullas accepisse  
dicunt, amici istinc nulli huc ueniunt, peregrini  
istac iter facere non possunt. Quod si his omni-  
bus nullas dedisti, nullas profectò dedisti. Item  
quū pluribus enumeratis partibus, ceterisq; con-  
futatis, extremam relinqui ueram necesse est, hoc  
modo: Aut uoluisti ad me scribere, aut per multas  
occupationes, uel ægritudinem non potuisti, aut  
copiā tabellariorum non habuisti, aut certè ne-  
gligens fuisti. noluisse te, quum me magnopere  
ames, non puto: occupationes habes aut nullas,  
aut paucissimas. ægritudine nulla laborasti: nam  
omnes, qui istinc profecti sunt, te ualentem ui-

derunt: Tabellarij quotidie ultro citroq; cōme-  
ant. Quod si harum causarum nullam afferre po-  
tes, negligens fueris necesse est. Atq; hæc à Quin-  
tiliano remotio appellatur. Quum autem rerum  
omnium ratio ab initijs per incrementa ad sum-  
mam, siue finem procedat, probantur ultima ab  
initijs, uel incrementis, hoc modo: Quū adolescen-  
tiam tuam continentem & studiosam uideam, nō  
possum de reliqua atate nō optimè sperare. Pro-  
bantur contrā ab ultimis prima, hoc modo: Quū  
tu omnes gratis doceas, ostendis te nō lucri causa  
literas didicisse. Probātur res à similibus: ut, Si Ho-  
merus legendus est, Virgiliū quoq; legi par erit.  
A` dissimilibus: ut, Si cicero imitandus est, nō Plau-  
tum, aut Næuium imitari conuenit. A` cōtrarijs:  
ut, Si uirtus præmium meretur, uitiū certè suppli-  
ciū merebitur. A` repugnātibus: ut, Si amicus est,  
amicum odisse non potest. A` consequentibus tum  
natura, tum tempore. natura: ut, Si fides uirtus  
est, nemo est profectō fallendus. à tempore sic: Si  
caloris initium æstas attulit, eius hyems finē affe-  
rat necesse est. Quæ agi & conuerti possunt, hoc  
modo: Si nemo est fallendus, fidem uirtutem esse  
par est: item, Si finē caloris hyems attulit, eius ini-  
tium æstas afferet. Quædam ex rebus mutuā con-  
firmationem præstantibus, siue (ut Cicero appel-  
lat) sub eandem rationem uenientibus argumen-  
ta

ta nascuntur: ut, Si licet poeticem discere, docere  
cur non liceat? discere enim quisquam, nisi doceatur,  
non potest. Eodem modo uendere, & emere,  
locare, & conducere, & cetera quæ se mutuo  
consequuntur. Similia his sunt, quæ à causis appel-  
lat Quintilianus, quum ea quæ facta sunt, ab his  
quibus efficiuntur, causis probantur: uel contra,  
quum efficientes causæ ex rebus effectis ostendun-  
tur. Quæ quidem aliquando ex utraq; parte ne-  
cessaria sunt: aliquando ex altera tantum: ali-  
quando uerò ex neutra. Ex utraq; sic, Si sol exor-  
tus est, dies est: item, Si dies est, sol utiq; exortus  
est. Ex altera sic, Fuit apud ignem, ergo est calidus.  
hæc pars necessaria est: sed nō, Calidus est, fuit igi-  
tur apud ignem. potuit enim uel sole, uel alia cau-  
sa fieri calidus. Ex neutra parte necessaria sic,  
Exercuit corpus, ergo robustus est: uel cōtrā, Ro-  
bustus est, ergo corpus exercuit. horum neutrum  
necessarium est. non enim quisquis corpus exer-  
cuit, robustus est: neq; quisquis robustus est, cor-  
pus exercuit. potest enim & ille exercitatione ro-  
bustus non fieri, & hic robustus sine exercitatio-  
ne esse. Quo loco illud uidendum est, ne causæ ni-  
mis remotæ, et ex alto repetitæ afferantur: quod  
poetæ nōnunquam faciunt. ut, Vtinam ne nemo-  
re Pelio securibus casæ cecidissent abiegnæ ad ter-  
ram trabes. rem deinde sequitur: Nam nunquam

hera mea errans mea domo efferreret pedē Medea animo agra, amore seuo saucia. Optimè autē (ut mihi uidetur) probatur res ex cōparatione, quē maiora minoribus, minora maioribus, paria paribus comparantur. Quibus quidē argumentis non epistolæ tantū, et scripta omnia, sed sermo etiam cōmunis refertus est. Probantur autē maiora à minoribus sic: Qui alienos atq; ignotos iuuas, tuos tibi cōiunctissimos nō iuuabis? item, qui mouetur meretricis morte ob paruā consuetudinē, quid mihi faciet patri? Minora ex maioribus sic: Si patris mortem moderatē tulisti, quo tandē animo ferendam amici mortem putas? Item: Si totius reipub. interitum ferre potuisti, in unius mulierculæ animula quid tantopere commoueris? Qui locus pulcherrimus est apud Seruium Sulpitium in consolatione Ciceronis. Paria ex paribus sic: Quæ poena interfectori patris cōstituta est, eadem matris interfectori constituta esse debet. Item: Si magna præmia muscis debentur, poetis cur nō eadē debeantur? Atq; hæ cōparationes amplissimam in omni genere argumentandi materiam præbent: quas quia natura unicuiq; facile subministrat, plurib. eas uerbis nō explicabo. Ducuntur postremò etiam à fictione (ut Quintilianus appellat) argumenta, quū fingimus, id est proponimus aliqd, quod si re ipsa uerū esset, causam nostrā uehemen-



ter adiuuaret. ut, Si arbores et saxa uocē haberēt, tā indignū facinus detestarentur. Quē quidē ego locum non magnificerē, nisi eo sepiſimē Cicero uteretur, neq; in orationibus modō, uerū etiā in epistolis, ut ad Appiū Pulchrū: Si tibi respub. narrare posset, quomodo se haberet, nō melius quā ex ipſo Phannia intelligeres. Cuius quidem loci, quoniam totidē possunt esse species fictæ, quot ueræ, ideo feci eius cū Adiunctis negotio mētionem.

De his quæ negotium consequuntur. Cap. XXIII.

Restant ea quæ gestū negotiū cōsequuntur: quæ pars ex his, quæ negotio attributa sunt, quarta est, et à Cicerone Cōsecutio appellatur. in hac primum cōsiderandū est id quod factū est, quo nomine appellari conueniat. ut quū amicū per epistolā excusabimus, qui alium dicatur offendisse, ostendamus nō illā esse offensam alterius, sed sui defensionē appellandā. Vt Cicero fecit ad Metellū, quū inquit: Ego nō fratrem tuum oppugnaui, sed fratri tuo repugnaui. Deinde eius facti qui fuerint autores, qui cōprobatōres, qui imitatores, qui cōtrā id oderint, fugiāt, detestentur: ut quū dicimus, facultatē dicendi à sapientissimis atq; antiquissimis rerū pub. conditorib. fuisse inuentā, à summis postea uiris cōprobatā, ab optimo quoq; semper expetitā: quam non nisi ignari & flagitiosi detestentur.

stentur. Videndum postea, quid de ea re sit lege cautum, quid iudicatum, quid consuetudine frequentatum, quid arte aut scientia præceptum: item uulgo ne et frequenter ea res fiat, an insolenter et raro. Postremo, quæ rem honestas, utilitas, laus, gloria, consequatur: quæ omnia facile possumus in proximo exemplo considerare. Sunt autem pleraque à Servio Sulpitio in Ciceronis consolatione tractata. ut quum ait, tot oppida, tot claros uiros interijisse, et quotidie interire: item, fortunatos esse, qui liberos uel non genuerint eo tempore, uel amiserint: postremo, quum ostendit, quæ ignominia Ciceronem ex eo luctu, quæ hominum opinio, quod denique periculum consequatur. Atque hæc de locis, à quibus argumenta ducuntur, breuiter dixisse sufficiat. Si quis plura desiderabit, à Cicerone et Quintiliano accipiat. Nos ea tantum prosequimur, quæ ad scribendi rationem necessaria esse arbitramur: nunc quomodo argumentis uti conueniat, paucis absoluemus.

### De usu argumentorum.

#### Cap. XXV.

Omnis igitur argumentatio, quæ ex his locis nascitur, quæque ab oratore sumitur, aut ita necessaria est, ut probandum sit: aut ita probabilis, ut nulla ei necessitas adiungatur. Nam quæ tantum necessaria est, et assensione non indiget, ea mathematica

maticarum est disciplinarū propria. Neccessaria igitur, quæ assensionē hominum habet adiunctā, tractatur aut per complexionem, aut per enumerationē, aut per simplicē conclusionem. Complexio est, quæ ex duabus partibus propositis utrāq; uel interrogando, uel negando concludit. Interrogando sic: Si uirtus bona est, cur fugis? si mala, cur laudas? Negando: Si uirtus bona est, nō est fugienda: si mala, non est laudanda. Enumeratio est, quæ multis propositis partibus, ceterisq; refutatis, extremā necessariō probatam relinquit, hoc modo: Hūc librum necesse est uel emptione, uel commodato, uel dono, uel hæreditate, uel furto habueris: nam antehac non habuisse te illum, planē fateris. sed neq; emisti: quia pecuniam nullā habebas. neq; ab amicis aut commodato, aut dono accepisti: quoniam nemo in hac ciuitate te nouit omnino. neq; rursus aut testamento, aut hæreditate cuiusquam habuisti: quū ex tuis defunctus sit nemo. relinquitur ergo, ut illum ex furto habeas. Simplex cōclusio fit hoc modo: Si quo tempore tu ad me Romam scripsisti, ego Romæ nō fui, accipere tuas literas profectō nō potui. Ea uerō argumentatio, quæ solam assensionem requirit, frequentiusq; in epistolā uenit, per simplicē assumptionē, et cōclusionem, quod enthymema appellari diximus. item per inductionē, atq; exemplū frequen-

D s      tissimē

tiſſimè tractatur. Nam ratiocinatio, niſi neceſſita-  
 tem habeat, facillimè refellitur. Omnis aut̃ aſſen-  
 ſio, uel à naturæ ordine, uel ab hominũ opinione,  
 uel à rerũ cõparatione colligitur. Naturæ ordo  
 & ſenſus omnes, & iura naturæ comprehendit.  
 Nam quæ ſenſu aliquo percipimus, his facillimè  
 aſſentimur: ut quæ uidemus, audimus, tangimus.  
 Item quæ naturæ conſentanea ſunt: ut, Pater eſt, li-  
 beros igitur amat: & quæ ſunt generis eiſdem.  
 Quæ opinione hominũ cõſtant, ea partim legib.  
 probantur: ut, qui hominẽ occiderit, morti ſubia-  
 cere. Partim ſententijs hominũ: ut, quæ princeps  
 aut ſenatus decreuit, ea ſeruanda eſſe. Partim con-  
 ſuetudine: ut, maioribus natu aſſurgendum. Par-  
 tim cõmuni quodã hominũ cõſenſu: ut bonis præ-  
 mia, malis poenas poſt mortem eſſe præparatas.  
 Quæ aut̃ ex cõparatione probantur, ea uel cõtra-  
 riam rationẽ exigũt, uel ſimilẽ, uel maiorẽ, uel mi-  
 norẽ. Quarũ partium omniũ exẽpla ſuperius po-  
 ſuimus. Hoc autẽ uniuerſum, quod probabile ap-  
 pellamus, Cicero in plures ſpecies ſubtilius diui-  
 dit: quas, quoniã ad hãc institutionẽ nõ pertinent,  
 prætermiſi. Quis aut̃ ordo in argumẽtis collocan-  
 dis ſeruandus ſit, præcipi ſatis certè nõ poteſt. Nõ  
 enim uel in omnibus orationibus, uel epiſtolis, uel  
 ſcriptis unus idemq; ſemper eſt ſeruandus. Aliæ  
 enim cauſæ leuiſſima quæq; argumenta in princi-  
 pio

pio maxime desiderant: ut consolationes, quæ sensim irrepere, non statim irrumpere per uim in hominum mentem debent. Aliæ à firmissimis argumentis incipiendæ sunt: ut crimina, quæ minimè uidemur posse defendere. Illud tamè perpetuò tenendum est, ut optimis in fine argumentis utamur. Nam & quæ firmissima sunt, ad faciendam fidem plurimùm cōferunt: et quæ ultimo loco sunt dicta, memoriæ audientium magis inhaerent. Leuiora uerò in medio comodiissimè collocantur. Nam et antecedentibus, & cōsequentibus uim non mediocrè addunt: et ipsa, firmioribus utrinq; munita, ualidiora, grauioraq; redduntur. Illud in omni argumentatione seruandum in primis, tenendumq; est, ut uarietati inseruiamus: ut neq; hisdem argumentorū modis semper utamur: quale est, si semper inductione, aut ratiocinatione uteremur. Neq; eadem argumenta eodem semper modo conficiamus: quale est, Si mater est, filios diligit: mater autem est, filios igitur diligit. Sed nunc à conclusione incipiamus, hoc modo: Diligit sine dubio liberos, quia mater est. nam diligi à matribus liberos, naturæ cōsentaneū est. Nunc ab assumptione, hoc pacto: Quia mater est, diligere eam liberos credibile est: quod omnibus matribus est naturale, ac propriū. Ita deniq; tum argumentorū formam, tum modos, contextusq; uariemus, ut ipsa uarietas homines

ad nostra legenda, audiendaq; alliciat. Neq; in omnibus causis, siue negotijs, omnes quos supra memorauimus, locos aut quæremus, aut assumemus: sed eos potissimum deligemus, qui & optimi, & maximè necessarij ad nostram causam esse uidebuntur. Ac de confirmatione quidem satis diximus. nunc de confutatione differamus.

### De confutatione. Cap. XXVI.

Confutatio est alienorum argumentorum, dictorum uel destructio. Ea duplex est: generalis, in qua tota uersetur oratio: necesse est: quæ aduocatorum, siue patronorum, et eorum qui causas defendunt, propria est. Et specialis, siue particularis, quæ ad singulas orationis, uel sermonis partes pertinet: quæ propria est epistolarũ. Vtraq; tamen ab eisdem locis oritur, quibus oritur confirmatio, sed ex contraria ratione. Nam quibus locis illa ad confirmandum, iisdem hæc ad infirmandum utitur. Sed quantum differt ab oratione epistola, tantum prioris confutationis ratio à posteriore differt. Illa enim aduersarium habet, hæc nõ habet: illa in criminibus tota uersatur, hæc in causis plerunq; honestissimis: illa ea tantum quæ dicta sunt confutat: hæc etiam quæ dici possent inuestigat: illa obiectis plerunq; ex tempore respondet, hæc ad respondendum satis otij habet: illa deniq; futurum iudiciũ pertimescit, de hac nullum futurum

futurum iudicium est. proptereaq; defendendi, quàm accusandi rationē ueteres difficiliorem putabant, quòd accusandi ratio simplex esset, defendendi multiplex. Nos itaq; omissa illa patronorum consutatione, de qua satis abunde; à Cicero ne & Quintiliano tractatum est, de hac quæ ad nostram institutionē magis pertinet, breuiter disseramus. Hæc igitur in deliberatiuis causis, hoc est in suadendo & dissuadendo tota ferè posita est. neq; quid dictum sit, tantum considerat: sed multo magis, quid dici possit, explorat. Quid autem dici possit, per eosdem, quos suprà diximus, locos personarum inquirīt. Personarum quidem, ut si te cohorter ad studia literarū, ostendamq; te neq; ætatem, neq; ingeniū, neq; aliud quicquam, quod in personis consideretur, quo minus id facias, excusare posse. Rerum uerò, si neq; tempus, neq; locum, neq; facultates ad eam rem tibi deesse significem. Consutandi uerò duplex omnino ratio est, bonorum & malorum. Vtraq; & uera & falsa esse possunt. Bonorum ratio ita tractanda erit, primū ut ostendamus, quæ ei ad quem scribimus, bona uidentur, mala esse: id si non possumus, non esse bona, aut non magna bona esse contendamus. deinde maiora, si possumus, aut similia proponamus, aliquodq; his commodum adiungamus: ut si par bonū ex utraq; re consequatur, hoc certè

epistolas interpretari, quàm tradere scribēdi rationē uidear. Accidunt autē epistolis nonnunquā etiā crimina, siue calumniæ, uel ad nos, uel ad amicos pertinētes, quæ à nobis per epistolā uel defendendæ, uel refellendæ sint. Crimen defendere qui uolet, si factū sit, cur id fecerit, ostēdat necesse est. Si causam probabilē nō habebit, crimē neget: si negare totū non poterit, partē neget: & aut nō esse id factū, cuius arguat: aut nō eo modo factum esse contendat. Sin id quoq; nō poterit, culpā omnē in ætatē, in ignorantia, in negligentia, in occupationes, in socios, in alia deniq; omnia transferat, quæ aut leuare factū, aut ueniā impetrare aliquo modo possunt: quæ in epistola decet, in oratione non decet. Alia præterea crimina leuiora, alia minora molliendo, excusando, minuendo facimus: quædā uerò despicimus, ac pro nihilo habemus: quædam per iocū & cauillationes irridemus: nonnulla in illum ipsum qui obiecit, retorquemus: quod lepidiſſime fecit Cicero, quū ad Curionē scribens ait: Equidem neminē prætermiſi, quem ad te peruēturū putarē, cui literas non dederim: abs te uerò bis, ter ue ad summū, & eas per breues, accepi. Quod si pergis iniquus esse in me iudex, eodē ego te crimine cōdemnabo. Ambigua uerò omnia in meliorem partē accipiuntur, ita ut quæ ei ad quē scribimus uel grauiā, uel luctuosa, uel dura uidentur, ea



nos grauiorū comparatione, quæ ille aut tulerit, aut nisi hoc ei accidiſſet, in poſterū potuiſſet ferre, leuiora, tolerabilioraq; reddamus: quod optimè fecit Sulpitius, qui ut Ciceronem de morte filie cōſolaretur, ei patriæ, dignitatis, honeſtatis, cætera rumq; rerum, quæ multo ei debebant eſſe, quàm li beri, cariores, iacturā cōmemorat. Sed hæc omnia facile conſequemur, ſi quā ſuprà memorauī, bonorū, malorūq; comparationū rectè adhibebimus.

### De diſſolutione argumentorum.

#### Cap. XXVII.

Quoniam autē qua ratione fierent argumen ta, ſuprà docuimus, conſentaneū uidetur, quā ra tione diſſoluantur, etiam docere: ut quæ uitia in illis eſſe poſſunt, ea & ipſi in noſtris argumentis magnopere fugiamus, & in alienis cognita re prendere facilius, & conſutare poſſimus. Qui quidem locus tametsi eſt ita latè à Cicerone, di lucideq; tractatus, ut à nobis neq; copioſior, neq; dilucidior effici poſſit: eum tamen, ne uel ignoraf ſe, uel neglexiſſe uideamur, quàm breuiſſimè at tingemus. Omnis igitur argumentatio diſſolui tur, quum aut aliqua pars ipſius, aut tota uitioſa eſſe oſtenditur: aut contra eam alia uel firmior, uel æquè firma argumentatio collocatur. Partes eius uel ut minimè probabiles, uel ut in minimè ne ceſſariæ reprehenduntur. Minimè probabilis ar gumentatio

gumētatio fit, quū uel falsa proponimus. ut, Nemo est qui non pecuniam quā sapientiam malit. constat enim, multos contrā fecisse. uel incredibilia: ut, si auarus pecuniam se contempsisse dicat. Item minus probabilis fit, quum id quod à plebisq; fit, ab omnibus fieri dicimus: ut, Omnes opibus quā uirtutibus magis student. uel contrā, quum id quod à paucis fit, à nemine fieri affirmamus: ut, Nemo est qui uirtutis adipiscendæ gratia opes honoresq; cōtemnat. quod etsi non omnes, quidam tamen faciunt. Minus etiā probabilis argumentatio redditur, quū id quod proposuimus, uana aut infirma ratione probamus. Vana ratio est, quæ uel falsa est: ut, Poetæ legendi non sunt, quia homines à religione dehortantur. uel futilis & contemnenda: ut, Philosophia fugienda est, quia macilentos homines reddit. Infirma uerò ratio est, quæ causam minus conuenientem propositioni subijcit: ut, Vtile ieiunium est, nam ego hodie ieiunare institui. hic quare utile ieiunium sit, non probo: sed quid ego sim factururus, commemoro. Item infirma est, quum idem per idem, sed alijs uerbis probamus: ut, Magnū malum est auaricia, quia multis incommodis afficit homines pecuniæ cupiditas. Item infirma est, quum id quod proposuimus, omni ex parte non probamus: ut, Expetenda est sapientia, quia sapientes castitatē  
B      amant.

amant. non enim ob hoc solum expetenda sapientia est. Minus præterea probabilis argumentatio redditur, quum similitudines & comparationes ad rem de qua agimus, minimè accommodatas esse ostendimus. Id autem fit, quum ostendimus eas differre genere, specie, ui, magnitudine, tempore, loco, persona, opinione. Deinde utriusq; rei genus & differentiã demonstramus: quo modo confutantur maximè inductiones & exempla, quæ similibus & comparationibus maximè utuntur. Minus etiam necessaria, & propterea uitiosa argumentatio esse ostenditur, cuius complexio, uel simplex conclusio reprehendi potest. Complexio erat, quæ ex utraq; parte concludebat. ea uel ex utraq; parte conuertitur, uel ex altera reprehenditur. Conuertitur ex utraq; quale est pulcherrium apud Gellium exemplum Euathli, qui certa mercede causarum agendarum rationē à Protagora insigni eius artis magistro hac conditione didicerat, ut ei merces tum deberetur, quum primā in foro causam uicisset. Magister suo tempore mercedem petit, & negantem discipulum in ius uocat. Utitur autem aduersus eum argumento: Debes mihi omnino mercedem, siue uincas causam, siue perdas. nam si uincis, debes, quia uicisti primam causam: si perdis, debes, quia à iudicibus cōdemnaris. Discipulus contrā argumen-

tum cōuertit, hoc modo: Nihil tibi debeo, siue uin-  
tam, siue perdam. nam si uinco, non debeo, quia à  
iudicibus non condemnor: si perdo, rursus non de-  
beo, quia primam causam, ut inter nos conuene-  
rat, non uinco. Altera ex parte reprehenditur  
complexio, sic: Etiam si causam perdam, nihil de-  
beo tibi. iudices enim me nō pecuniæ, sed ignoran-  
tiæ condemnabunt. Enumeratio autē reprehendi-  
tur, quum aliquod in ea membrum præteritum  
est, hoc modo: Quoniam habes hunc equum: cum  
aut emptione, aut hæreditate, aut dono habe-  
as, aut certè furto abstuleris, necesse est. si dica-  
mus domi natum, aut ex hostibus captum, totum  
argumentum infirmabimus. Reprehenditur eti-  
am, quum aliquid ex membris negatis probamus:  
ut in eodem exemplo poterit ostendi, equum hæ-  
reditate uenisse, quod ille negauerat. Similis con-  
clusio reprehenditur, quum aliud sequi potest ex  
nostra propositione, quàm quod ipsi uolumus:  
ut, Si lux est, dies est. potest enim ex luna, uel ex  
igne lux esse: neq; lux necessariò diem facit. Con-  
clusiones uerò argumentorum omnium repre-  
hendi possunt, si uel non efficiant id quod propo-  
situm est, uel cauillationē, ambiguitatemq; effici-  
ant. non efficiunt quod propositum est, hoc mo-  
do: Si uenisses domum meam, uidissem te: non ui-  
di, ergo non uenisti. conclusio hæc non necessa-

riò sequitur nam potes uenisse clam me. Per ambiguitatem concludunt argumenta hoc modo, ut in eodem exemplo uersemur: Si uenisses domum, uidiſſem te: non uidi, ergo non uenisti: non autem uidi, non quia non ueneris, aut clam me ueneris, sed quia cæcus ſim. in qua ſignificatione tu meum argumentum non intelligebas. Per cauillationem ſic: Quod nō perdidisti, habes: non perdidisti caudam, ergo caudam habes. Atq; his ſerè modis argumentorū ſingulæ partes diſſolui poſſunt. Totum uerò argumentum reprehenditur, quum aperte falſum eſt: ut, Quicumq; pecuniam contemnit, ſtultus eſt: Diogenes pecuniam contempſit; ſtultus igitur fuit. Aut quum tam nobis, quàm ad uerſarijs cōuenit: ut, Qua cauſa confidebam, breuīs fui. Aut cū leuem excuſationē præferimus: ut, Si in mentem ueniſſet hoc, nunquam commiſiſſem. Item quū remotas, & minus longinquas cauſas repetimus: ut, Si Iupiter rem cum Leda nō habuiſſet, Ilium nunquam euerſum fuiſſet. Item quū rem quāpiam uel malè definiimus, uel malè diuidimus. Definitio mala eſt, quæ per proprium genus, & proprias differentias non fit. ut ſi uelim definire factioſum ciuē: Hic factioſus eſt, qui malus & inutilis ciuis eſt. quæ definitio non magis ad factioſum, quàm ad diſſolutum pertinet. Item mala definitio eſt, quæ rem definiendam non omni ex

ni ex parte complectitur: ut, Fortitudo est con-  
 stantia in aduersis. quæ definitio partē fortitudi-  
 nis, non totā complectitur. Mala uerò diuisio est,  
 quum plura uel pauciora quā opus sit, mem-  
 bra facimus. plura sic: Tria hominem beatū red-  
 dunt: uirtus, scientia, & sapientia. In hac diuisio-  
 ne sapientiam adiungere necesse non erat. nam  
 uirtus & scientia sapientiā complectuntur. Pau-  
 ciora sic: Duo potissimū homines ad scelera con-  
 pellunt, libido & auaricia. hic omissa sunt mul-  
 ta: ut, ambitio, gula, gloriæ cupiditas, & alia. Re-  
 prehenditur etiam argumentū, quod uel dubia,  
 uel inconuenientia, dubijs & inconuenientibus  
 probat. dubia: ut, Nō occidi hunc, quia neminem  
 unquam occidi, quum utrunq; dubium sit. Incon-  
 uenientia: ut si quis suum scelus magnorum uiro-  
 rum exemplo tueatur. Item quum rem perspicu-  
 am pluribus uerbis claram facimus: ut, si Orestem  
 accusans, occisam ab eo matrem, quod perspicu-  
 um est, coner ostendere. Item quum rem, de qua  
 causa & controuersia est, tanquam concessam as-  
 sumimus: ut, si Vlyssē accusans, iniquum esse di-  
 cam, Aiace m fortissimum hominem ab ignauissi-  
 mo esse occisum: quod adhuc non constat. Item  
 quum rem turpem & iniquam, & indignā tem-  
 pore, loco, personisq; commemoramus. Item quū  
 rem auditoribus inuisam proferimus: ut si apud

coelibes rem uxoriā laudē. Vel cū rem ab audi-  
 toribus aut lectoribus factitatā detestamur: ut si  
 apud Annibalem perfidiā, uel urbium expugna-  
 tionem detester. Item quū eadem de re diuerse  
 inconstanterq; loquimur: ut si quis amico tan-  
 tum beneuolentiæ causa fauere se dicat, postea-  
 quam subiungat, sperare tamen se aliquod ex ea  
 re commodum consequuturum. Illa quoque argu-  
 menta uitiosa sunt, & facile confutantur, quæ ad  
 institutum omni ex parte accommodata nō sunt:  
 ut si plura polliciti, pauciora exequamur. Quod  
 in uitium plerunq; incidunt hi, qui in sacris edi-  
 bus commorantur. ē tribus enim partibus, quas  
 in diuisione proponunt, tertiam plerunque lin-  
 quunt. Item si quū totum debēamus probare, par-  
 tem tantum probemus: ut si quū omnes senes a-  
 uaros probare uelim, unum aut alterum auarum  
 fuisse ostendam. Item si omīssa re, quæ in iudici-  
 um aut consultationem ueniet, alia præferamus,  
 uel defendamus: ut si quis de bello gerendo dictu-  
 rus, pacem laudet: aut si quis ambitus accusatus,  
 se fortissimum manu semper fuisse defendat. Item  
 si res ipsas ex uitijs uituperamus: ut si quis ex u-  
 nius poetæ uitijs totam poeticen detestetur. Item  
 si laudare quempiam instituerimus, & de felici-  
 tate eius, nō de uirtute dicamus. Item si rem cum  
 re ita comparauerimus, ut laudare alteram pos-  
 se non

se non putemus, nisi alteram uituperauerimus: quod pleriq; hac tempestate faciunt, qui laudare se hunc pontificem posse non putant, nisi antecessores uituperent. Item si quum de certa re dicendum sit, de communi & toto genere dicamus: ut si iustitiam laudaturus, de ipso genere uirtutis dicam. His frè de causis argumenta reprehendi solent: quas quidem latius fortasse explicauimus, non solum quia uitiosam epistolam, sed quia omnia quoque scripta, atque adeò sermonem ipsum uitiosum reddunt. Neque uerò id tantum feci, ut in aliorum scriptis hæc uitia cognoscamus, sed multo magis, ut ipsi caueamus. Reliquum erat in confutatione, ut contra aduersarij argumentationem, aliam uel firmiorem, uel æquè firmam collocaremus: quod quidē tum ad deliberationes, tum ad consolationes est maxime necessarium. Id fit, si quum aliquid aduersarij utile dicent esse, nos id quod defendimus, esse honestum dicamus: aut quod illi quibusdam, nos omnibus uel multis utile, aut honestum, aut acceptum esse ostendamus. Deniq; id optimè fit illa, quam suprà docuimus, bonorum, malorumq; comparatione. Sed de confutatione satè. Nunc ad conclusionem transeamus.

**De conclusione. Cap. XXVIII.**

Conclusio est artificiosus terminus totius non orationis modò, sed cuiusuis etiā materie: quæ à



nobis uel dicta, uel scripta est: in qua auditoris uel lectoris animum ad id quod uolumus, summa ui trahere nitimur. eius alia in oratione, alia in epistola ratio est. Oratio enim unum aliquod sibi dicendum proponit, Epistola plerunque multa perscribit: illa auditorem, hæc lectorem habet. illa iudicium plerunq; expectat, hæc nunquam: illa certis tantum locis, id est quatuor, conclusione uti potest, in principio, secundum narrationem, secundum firmissimam argumentationem, in fine totius orationis: hæc multis & incertis locis, hoc est ubicunq; aliqua materia finitur, conclusione uti potest. Quapropter neq; ita longa, neq; ita artificiosa conclusione utetur epistola, præsertim si pluribus de rebus scribatur, aut si negotia uel res leuiores contineat. Igitur si epistola unica de re, neq; ualde longa, neq; ualde graui scribatur, satis erit in conclusione, quod uelimus, exponere breui uel amplificatione, uel commiseratione adiecta: quibus de rebus paulo post dicemus. Si grauior erit, pro qualitate materie conclusionem adhibebimus. Aliã enim commendatio, aliã consolatio, aliã simplex narratio conclusionem habeat necesse est. Sin plura uel præcepta, uel negotia continebit epistola, & in singulis breui conclusione, & in fine omnium enumeratione aliqua erit utendum. Quod Cicero s4  
cit

cit ad Lentulum in ea epistola, cuius initium est, Periucundæ mihi fuerunt literæ tuæ. ait enim: Acceperisti quibus rebus adductus, quamq; rem, causamq; defenderim: quiq; meus in repub. sit pro mea parte capeffenda status. Illud in omni epistola seruandum erit, ut ad ea quæ diximus, conclusionem applicemus, & lectoris animum cum in cæteris partibus, tū in hac uel maximè nobis conciliemus. Quoniam autem & enumeratione, & amplificatione, & commiseratione utitur interdum epistola, his de rebus summatim quædam attingemus.

### De enumeratione. Cap. XXIX.

Enumeratio est breuis earum rerum quæ dictæ sunt, repetitio, quæ à Græcis ἀναμνηστικὴ dicitur. ea ita utemur in epistola, ut rerum tantum capita breuiter repetamus, ne res singulas longius prosequamur, ut ad ea quæ legit, animus auditoris reducatur, non redintegretur oratio. Neque uerò uno modo semper enumeratione utendum est, sed uarianda tum ratio, tum oratio, ne uel afferat lectori satietatem, uel artificij suspicionem pariat: quo nihil magis fugiendū est. Varietas autem comparabitur tum ex uerbis, tum ex sententijs, hoc modo: Scripsi ad te de hac & illa re: habes quæ scire cupiebas: hæc habui, quæ de his & illis rebus ad te scriberem: habes epistolam be-

nè longam. quæ quidem plurima legenti & cogi-  
tanti occurrent. Oratio per introductâ uel rem,  
uel personam, interdum enumeratione utitur :  
ut, Si respub. loqui posset, hæc et hæc diceret: aut,  
Si pater ipse iudicaret, quid diceret quum hæc  
probarentur? Sed his modis rarissimè, uel nun-  
quam, epistola utitur.

### De amplificatione. Cap. XXX.

Amplificatio est oratio ex communibus locis  
sumpta ad rem augendam, uel exaggerandam.  
Loci communes sunt, qui ad omnes causas accom-  
modari possunt. hi plurimi sunt. Nos paucos, &  
ad institutionē nostram maximè necessarios pro-  
feremus. Ex his primus ac præcipuus est ab auto-  
ritate Dei in primis, & eorum quos Sanctos ap-  
pellamus, deinde Pontificum, regum, & princi-  
pum, ciuitatum, populorum, magistratuum, præ-  
terea sapientum, iurisconsultorum, legum, cete-  
rarumq; tum personarum, tum rerum, quæ sunt  
maximè inter homines auctoritatem habent : quum  
ostendimus, quid de re, de qua agimus, senserint,  
dixerint, fecerint, curauerint. Alius est locus, per  
quem ostendimus, ad quos ea res pertineat, utrū  
ad omnes, an ad superiores, de quibus modò dixi-  
mus: an ad pares amore, fortunis, corpore : an ad  
inferiores ætate, fortuna, cæterisq; rebus : rursus  
ad optimum quenq; , an ad quemuis: ad uiuos, an  
ad

ad defunctos: ad parentes, an ad posteros. Alius est locus, per quem quid boni, aut mali ex ea re sit euenturum, ostendimus, si hoc nobis, uel alijs siue concedatur, siue negetur. nam in utramq; partem loci communes accipi possunt: quod miror esse à Cicerone, quum de his scriberet, prætermisum. Alius locus est, per quem multos hoc exemplo uel ab ea re territum, uel ad eam rem incitatum iri, siue illa bona, siue mala sit, demonstramus. Alius est, per quem ostendimus cætera uel malefacta corrigi, aut aboleri, uel benefacta in memoriam redire posse, si hoc rectè factum aut iudicatum fuerit: si contrà euenerit, malefacta superiora in memoriam reditura, anteacta bona omnia peritura. Quo loco, ut id quod uolumus efficiamus, aliarum rerum comparatione uti poterimus. Alius locus est, per quem ostendimus uoluntariæ rei, si mala sit, nullam satis dignam poenam: si sit bona, nullam mercedem uel laudem satis dignam reperiri posse. Alius locus est, per quẽ ostendimus, eius generis id factum esse, ut eius causa uel parue res sepe crescant, uel maximæ dilabantur: ex quo item maxima bella uel oriantur, uel extinguantur. Alius locus est, quo factum in alterutram partem uerbis exaggeramus, hominesq; ob id quàm ocysimè uel puniendum, uel remunerandum adhortamur. Alius est, quum pec-

cata

cata inter se, uel benefacta comparamus, ostendimusq; illud, de quo agimus, cetera superare. Alius locus est, per quem negotium breuiter ponimus ante oculos, ut geri uideatur: & quæ uel bonæ, uel malæ consequi eam rem soleant, enumeramus, ut earum rerum enumeratione negotiū ipsum augeatur. Alius est, per quem petimus ab hominibus, ut res nostras ad sese referant, & de se, ac de suis geri putent idq; de nobis, ac de nostris parentibus, liberis, uxoribus, ac de rebus omnibus statuam, quod de suis statui uelint. Alius est, per quem ostendimus hoc facinus etiam hostibus admirandum, uel detestandum uideri. Atq; ab his potissimū locis communibus amplificatio sumi solet. Proprios causæ scriptor ipse iudicabit. Neq; uerò omnibus his semper est utendū, sed ut quisq; ad nostram causam maximè faciet. Illud in primis uidendum est, ut hos locos, siue ad laudem, siue ad uituperationem, siue ad indignationem, siue ad consolationem, siue ad aliam rem quampiam aptè conuertamus, ne in conclusione tantum, sed in cæteris quoq; partibus, præsertimq; in argumentationibus, amplificationem accommodatè collocemus.

### De miseratione. Cap. XXXI.

Miseratio, siue misericordia est, affectus animi, per quem alienos casus dolemus, & ad præstandum

dum

dum illis, quod petunt, inclinamur. Eam in alijs commouebimus, si ostendemus uariam fortunarum commutationem, et bona, in quibus fuimus, cum malis quæ patimur, et passuri sumus, comparabimus: si commoda quæ sperabamus, et incommoda quæ nos consequuntur, proferemus: ut in morte filij, propagatio sobolis, spes honorum, solatium senectutis: contra domus euersio, desperatio, orbitas. Item si turpia atq; indigna genere, ætate, dignitate nostra, ad quæ deuenerimus, uel deuenturi sumus, proferemus. Si calamitates nostras singulas ante oculos ponemus, ut non audire eas, aut legere homines, sed uidere uideantur. Si rogabimus, de se, ac de suis coniecturam faciât, cogitentq; posse eadem omnibus accidere, quæ nobis acciderint: et quum nos uidet, parentum, liberorumq; suorum, sui deniq; ipsorum recordentur. Item si orationem uel ad absentes, uel ad mortuos, uel ad res sensu carêtes, nobisq; charissimas, ut patriam, domum, et cætera eius generis, conuertemus. Item si disiunctionem à rebus nobis charissimis, si patriæ, parentum, cæterorumq; nobis coniunctissimorum amissionem, si orbitatem, solitudinem, si corporis et fortunæ incommoda proferemus. Item si conqueremur nos ab alijs potissimum contumelia et iniuria affici, qui uel nos amare et iuuare maximè debeant, ut propinqui:

uel sint de nobis optimè meriti, ut amici, clientes.  
 uel indigni sint, qui nos offendant, opprimant,  
 subijciant: ut serui, rustici, plebeij, atq; obscuri ho-  
 mines, in primisq; uitiosi. Item si supplicibus &  
 lachrymosis uerbis orabimus, ut nos respiciant,  
 nostræ necessitati ignoscant, subueniant, nostri  
 misereantur: si dicemus nos non nostra, sed pa-  
 rentum, aut liberorum, aut aliorum qui ex nobis  
 pendeant, causa moueri. Postremò, si ostendemus  
 animũ cum in alios misericordem, tum uerò con-  
 stantem, & malorum omnium patientem, atque  
 ad omnia paratum habere, semperq; habituros:  
 & quicquid euenerit, forti atq; excelfo animo to-  
 leraturos. nam fortitudo & constantia in uiro,  
 præsertim graui, plus interdum ad misericordi-  
 am proficit, quàm humilitas & supplicatio. Atq;  
 his potissimum locis misericordia commouetur.  
 Verum, ut in amplificatione diximus, nõ sunt om-  
 nes in omnibus causis aut quærendi, aut collocan-  
 di: sed est ex his optimus quisq;, & ad nostrã cau-  
 sam accommodatissimus quisq; deligendus. Cõmi-  
 serationem enim breuem esse oportet. nam, ut ex  
 rhetoris Apollonij sententia scribit Cicero, la-  
 chryma nihil citius arefcit. Sed quoniã satis multa  
 de his quæ polliciti sumus, explicaui-  
 mus, huic libro modum  
 imponemus.

LIPPI BRANDOLINI AD  
Reuerendiss. patrem, & dominum,  
D. Franciscum Picolomineum Car  
dinalem Senensem, de Ratione  
scribendi, Liber secundus.  
Caput I.

**I**N libro superiore, sapientissime pater, quæ es  
set epistolarum inuentio, quot & quæ earum  
genera, primum exposuimus. Deinde, quoniam  
sunt tria causarum genera, demonstratiuum, de  
liberatiuum, iudiciale, quas causas recipere pos  
set epistola, demonstrauius. Tum de sex parti  
bus orationis, exordio, narratione, diuisione, con  
firmatione, confutatione, conclusione, ut uisum  
est, breuiter disseruimus, easq; partes ad scriben  
di rationem accommodauimus. Nunc, quoniam  
e tribus illis causarum generibus unumquodq; epi  
istolam recipere posse supra diximus, consenta  
neum esse uidetur, ut de singulis aliquid breuiter  
attingamus: & qua ratione unumquodq; in epi  
stola tractari conueniat, aperiamus. deinde ad ip  
sas epistolarum species descendemus. & quo sin  
gule pacto tractandæ sint, quantum poterimus,  
duobus his libris aperiemus. Postremo de disposi  
tione atq; elocutione, quæ maximè necessaria ui  
debuntur, in tertio libro paucis explicabimus, ut  
hec,



hæc, quam suscepimus de scribendi ratione institutio, quoad fieri potest, perfecta absolutaq; sit. Nunc igitur ad causarum genera reuertamur. Ea quoniam tria esse supra diximus: iudiciale, quod & difficillimum est, & minimè nostris temporibus usitatum, primum absoluemus: neque uero id totum superstitiosius exequemur. Nam & longissimum est, & in usum scribendi non ita frequenter uenit. Sed eas tantum illius partes, quæ ad scribendum accommodari posse uidebuntur, explicabimus, reliquas summatim pertransibimus.

### De constitutionum generibus. Cap. I I.

In omni causa primum omnium constitutio inuenienda est, ut quo peracto causa ipsa tractanda sit, facilius cognoscamus. Ea, ne in omnibus decipi amur, ab alijs status causæ, ab alijs quæstio, ab alijs caput, græce uerò *ῥάσις* est appellata. Est autem constitutio, prima deprecatio defensoris, cum accusatoris insimulatione coniuncta: uel, ut Quintiliano placet, prima causarum conflictio. Est enim cōstitutio, siue status, ubi primum propter accusatoris & rei discordiam causa constitit: ut, Fecisti, non feci. hic causa consistit, an fecerit. uel, Fecisti, feci, sed recte feci. hic causa stat, an recte fecerit. Quanquam autem propria est iudicialis generis

generis constitutio, potest tamen in alia etiam genera cadere: in demonstratiuum, ut quum querimus, an is quem laudamus, eo tempore, uel eo loco, uel apud illos laudandus sit: item, an eius magnitudo nostris laudibus possit augeri: item quum querimus, quanta eius uirtutibus præmia: uel in uituperatione, quantæ eius uitij poenæ debeantur. atq; in his rebus omnis nostra uersatur oratio. In quo genere Cicero scribit Cæsarem in Catonem omnibus constitutionibus esse usum. In deliberatiuum genus cadit constitutio, quum disceptamus, an honestum, an utile futurum sit id quod in consultationem uenit. item quum disputamus, an fieri possit, de quo queritur: ut, an eueri possit Carthago, etiamsi eius euersio è repub. futura sit. Iudicialis generis exempla sunt passim: ut quum Vlysses accusatus, quod Aiacem interfecerit: aut quum Orestes accusatus, quod matrem occiderit, iure id se fecisse defendit. Constitutio est in priore exemplo, utrum fecerit. Hoc inferius genus quam rarius, nonnunquam tamen etiam in epistolam uenit: ut cum apud amicū, uel apud principem negligentia, uel ea quæ obijciuntur crimina, per epistolam excusamus. Item quum aliquod nostrum factum, uel innocentiam nostram defendimus. quo in genere pulcherrimæ Ciceronis & ad Appium Pulchrum, & ad Q. Metellum, &

ad alios quàm plurimos epistolæ reperiuntur. In omni autem causa constitutio inuenitur, quæ consideramus id de quo quæritur, an sit, quid sit, quale sit. hic ex tribus temporib. considerari potest, præsentī, præterito, futuro: ut an sit factum, an fiat, an futurum sit: & eodem modo in cæteris, cum quærimus an sit, coniectura est: quum quærimus quid sit, definitio: cū quærimus quale sit, qualitas appellatur. Quoniā autem quum factum defendimus, aut legibus aut rationibus defendimus: qualitas legalem, siue legitimam, & iuridicalem statum efficit. Possunt igitur esse quatuor omnino status, siue constitutiones: Coniecturalis, qua quæritur an sit: definitiua, qua dubitatur quid sit: legalis, siue legitima, qua factum legibus scriptis uel defenditur: iuridicialis, qua factum rationibus comprobatur. atq; hæc sunt constitutionum genera. Nunc quo singulæ modo ad iudicalem causam, quam primam explicandam proposuimus, accommodari debeant, summatim dicemus, à coniecturali potissimum incipientes.

### De coniecturali constitutione, Cap. III.

Coniecturalis constitutio est, in qua utrum aliquid factum sit, quia non constat, signis & coniecturis inuestigatur. Ea quum in causam incidit, is

vit, is qui locum accusatoris obtinebit, narrationem ita suspicionibus sparget, ut omnia rei facta, dicta, consilia, in eius de quo agitur, criminis suspicionem trahat. Qui defensoris loco utetur, plane simpliciterq; narrabit, suspensionesq; omnes, quantum poterit, remouebit. habet hæc constitutio partes sex: probabile, collationem, signa, argumenta, consecutionem, approbationem. Probabile est, per quod ostendimus expedisse reo peccare. Id consideratur in re & persona, siue in causa & uita. In causa accusator considerabit, quæ commoda inde reus consequi, quæq; incommoda euitare potuerit: eaq; omnia reum secutum esse ostendet. Reus contra, se nihil commodi adipisci, nihil incommodi ex ea re euitare potuisse demonstrabit: imò aut incommodum, aut dolorem se ex eo facto cœpisse ostendet. In uita accusator antea actam rei uitam in crimen aut suspicionem aduocabit, ut id de quo quæritur, cæterorum criminum exemplo probetur. Id si non poterit, dicet reum cætera uitia dissimulasse atque occultasse, hoc celare præ turpitudine non potuisse. Reus uel antea actæ uitæ probitatem atq; innocentiam asseret: uel si id non poterit, quæ olim fecerit, ætati, imprudentiæ, ignorantiaq; ascribet: id uerò genus flagitij se magnopere semper euitasse ostendet. Collatio est, in qua accusator per compara-

tionem ostendet, alium neminem id facere potuisse: huic & commodum, & facile, & necesse penè fuisse. Reus & has ab se suspensiones omnes, quantum poterit, remouebit: & alios iisdem de causis id facere potuisse, ostendet. Signū est, quòd facultatem rei perficiendæ quæsitā ostendit. In eo considerabitur, locus celebris, an desertus: publicus, an priuatus: commodus, an incōmodus. item tempus, ut quæ pars anni, diei, noctis. spaciū, utrum satis magnum ad rem perficiendā fuerit. occasio siue opportunitas, quæ fuerit expectata, exquisita, aut omissa: item quæ spes perficiendi, quæ celandi criminis fuerit. quæ quidem omnia accusator augebit, reus minuet atq; attenuabit. Argumentum est, quod certiora signa rei faciendæ uel factæ ostendit: faciendæ, ut quum ante tempus apparatus, instrumenta, et res ad id necessarie proferuntur: quum reus fecisse, dixisse aliquid ad rem perficiendam per se, uel per alios demiratur. Factæ rei argumenta sunt, quum ipso facinoris tempore, uel paulo post ubi reus, aut cum quibus fuerit, aut quo habitu, uultu, gestu fuerit, explicatur. Quæ quidem pro causæ qualitate, tum ab accusatore, tum ab reo uel obijcientur, uel refelluntur. Consecutio est, quum queritur quæ signa nocentis & innocentis rem ipsam consequi soleant. In ea accusator rei fugam, latitationē, timorem, & his.

Et his similia proferet. Reus innocentiam suā ex presentia, conscientia, rebusq; contrarijs comprobatur. Approbatio est, qua suspicionem iniectā locis tum proprijs, tum communibus uel confirmamus, uel infirmamus. Loci proprii sunt, quos secum causa quæq; adducit, de quibus priuatim præcipi nihil potest. Communes sunt, à testibus: ut cum rem nostram iuratis testibus comprobamus, de eorumq; fide, autoritate, constantia, uita, plura dicimus. Contra testes, cum eos ab his omnibus partibus confutamus: eosq; uel scire id non posse, uel cupidè id dicere, uel corruptos, uel parum idoneos esse demonstramus: suspensionesq; ad eam idoneas ex supradicta diuisione asserimus. Contra quæstiones locus est, cum labefactari atq; infringi tormentis ingenuorum corpora, ex leui suspitione, iniquum atq; impium esse dicimus: doli alium alio magis minusue resistere demonstramus, multos dolore uictos fateri quæ nunquā commiserint, suspensionē parum idoneam ad tormenta. Ab argumentis, signis, et coniecturis locus communis est, quum dicimus rem tot signis atq; argumentis patefactam, perspicuam, non suspiciosam uideri debere: hæc plus quàm ullos testes ualere. Testes enim mentiri, corrumpi, ac falli posse, hæc non posse. Contra hæc omnia communis locus est, quum suspensiones attenuamus, et

asq; non minus in alios, quàm in nos conuenire ostendimus: quum iniquum esse dicimus, ex tenui suspitione quemq; iudicari: si sic facere liceat, unumquenq; in ius rapi, atq; in suspitionem multorum criminum trahi. A rumoribus locus communis, quum esse id de reo uulgatum, & in omnium iam ore uersari, neq; temerè uulgari turpem de aliquo rumorem solere: neq; causam hominibus cur id fingant, esse dicimus. Contra rumores locus est, quum uulgo et fama dicimus credi non oportere: rumores ut plurimum falsos esse, idq; exemplo alicuius falsi rumoris ostendimus: item quum fictum aut uerum de aduersarijs rumorem proferimus, quem in ore omnium esse dicamus, eiq; tamen nos fidem ostendimus non habere. Atque hæc in coniecturali causa considerantur: quæ quoniã in epistolam cadere frequenter solent, quum rem uel factam, uel faciendã coniectura inuestigamus, quod Cicero ad Lentulum in causa regia planè ostendit: propterea sunt à me pluribus uerbis explicata. Nunc ad legitimam constitutionem transeamus.

### De legitima constitutione.

#### Cap. IIII.

Legitima constitutio est, quũ ex lege, aut scripto, aut nomine facti controuersia nascitur: ut quum leges, testamenta, uoces ipsæ alio modo ab accusa-

accusatore, alio ab reo accipiuntur. Ea quoniam tota Iurisconsultorum est, neque cadere non modo in epistolam, sed ne in orationem quidem nostra ætate unquam potest, ad susceptam institutionem non pertinet: sed ne uideamur eam aut neglexisse, aut ignorasse, quoniam in ordine diuisionis uenit, eam paucis explicabimus. Habet igitur partes sex: Scriptum, sententiam, contrarias leges, ambiguum, definitionem, translationem, rationem. Ex scripto & sententia controuersia nascitur, quum uoluntas scriptoris cum scripto dissentire uidetur, hoc modo: Sit lex, quæ iubeat eos qui nauem ob tempestatem deseruerint, perdere nauem: si seruetur, eorum esse qui in naui remanserint. Igitur quum tempestate periclitaretur nauis, omnes eam metu deseruere, præter unum ægrotum, qui fugere non potuit. nauis casu seruetur, eam ægrotus lege possidet: repetit is cuius fuerat, quod ægrotum dicat necessitate, non uoluntate in ea remansisse, neque hoc sensisse scriptorem. Nascitur controuersia ex scripto & sententia. Ex contrarijs legibus controuersia constat, quum alia lex quippiam iubet aut permittit, alia uetat, hoc modo: Lex uetat hominem repetundarum damnatum in concione orationem habere. Alia lex iubet, augurem eum qui defuncti locum petat, in concione nominare. Augur repe-



tundarum damnatus, eum qui defuncti locum petit, in concione nominat. petitur ex eo multa ex priorē lege: is se posteriore defendit. nascitur quæstio ex contrarijs legibus. Ex ambiguo controuersia nascitur, quum scriptum duas aut plures inter se sententias uidetur habere, hoc modo: Cicero in testamento sic scribit: Tullius hæres meus dato Terentiæ uxori meæ triginta pondo argenti, quæ uolet. Illa post uiri mortem optimum & preciosissimum petit: hic deterrimum uult dare: uterq; testamenti uerba pro se interpretatur. quæstio nascitur ex ambiguo. Ex definitione controuersia oritur, quum de nomine facti dissensio est, hoc modo: Quidam sacra uasa in loco profano relictâ casu reperit, domum detulit: quæruntur à sacerdotibus, apud hunc inueniuntur: accusatur sacrilegij: defendit se uocabuli definitione: neq; sacrilegum, neq; furem esse: & quid sacrilegum sit, quid furtum, definit. nascitur ex definitione controuersia. Ex translatione causa constat, quum aut tempus differendum, aut accusatores, aut iudices mutandos reus dicit. hæc apud ueteres quoque perrarò in iudicium ueniebat. Ex ratiocinatione causa constat, quum res sine propria lege uenit in iudicium, sed similitudinē aucupatur ex legibus, hoc modo: Lex est, si quis furiosus erit, in eo, & bonis eius cognatorum potestas esto.

esto. Et lex, qui patrem necauerit, in fluuium demergatur. Et lex, paterfamilias uti super familia, pecuniaq; sua legauerit, ita ius esto. Et lex, si paterfamilias intestatus moritur, pecunia eius agnatorum esto. Malleolus per furorē matrem necat: in carcerem truditur: ibi testamentum scribit: mox in fluuium mergitur: hæredes adeunt hæreditatem: frater minor Malleoli, qui eum parricidij accusauerat, suam hæreditatem uocat, quod is ob furorem testari non potuerit. hic certa lex in hanc causam nulla, multæ tamen per similitudinem afferuntur. nascitur ex ratiocinatione controuersia. Ac de legitima constitutione hætenus. nunc ad iuridicalem transeamus.

### De iuridicali constitutione absoluta. Cap. V.

Iuridicalis constitutio est, in qua de facto conuenit: iure, an iniuria factum sit, queritur: ut quum Orestes se matrem fatetur occidisse, sed iure id à se factū esse defendit. Eius partes sunt duæ, absoluta & assumptiua. Absoluta est, in qua factum ita defenditur, ut nulla ad id extranea defensio petatur: ut, Mimus qui Accium poetam in scena nominauit, in ius ab eo uocatus, id solum defendit, licere nominari poetam, cuius scripta dentur agenda. Ea constitutio tractabitur, quum id ipsum,

sum, quod factum esse constat, licere ostendimus. Probatur autem aliquid licere iure naturæ, lege, consuetudine, iudicato, æquo & bono pacto. Naturæ ius est, quod nulla institutione ab ipsa natura nobis insitum est: quale est, ut liberi à parentibus amentur, eosq; ipsi mutuò ament, ac colant. Lex est constitutio, quam populus, uel senatus, uel princeps sanxit: quale est ius ciuile, ius pontificium, quod ius canonicum appellamus. Consuetudo est usus diu inter homines nulla lege seruatus: quale est, ut mortui in monumentis maiorū sepeliantur. Iudicatum est, quod sententia unius, aut multorum iudicum aliqua de re publicè decretum est: quales sunt sententiæ, quæ quotidie à iudicibus in omni ciuitate de causis feruntur. Ex quoniam eadem de re sæpe diuersæ sunt, uidendum est, si quando eas in nostra causa profereamus, ut & plurimas & approbatissimas afferamus. quo loco tum iudices, tum res ipsas iudicatas inter se comparare poterimus. Quod autem de iudicatis in causa iudiciali accidit, id in epistola de rebus ab alio dictis ac factis accidere poterit. in epistola enim omnis generis causæ sæpe incidunt. Sed hoc ab oratione differt epistola, quòd oratio iudices habet, epistola non habet, nisi illum ipsum ad quem scribimus, nostrarum rerum iudicem uelimus. Aequum & bonum est, quod boni uiri omisso

misso iuris rigore, ad communem utilitatem iudicauere: ut si pater filium exheredauerit, & qui heredes constituti sunt, ei dare aliquam partem bonorum paternorum iudicentur. Pactum est id, quod duo pluresue seruandum pepigere: seq; ad id uel solo uerbo, uel iureiurando, uel scripto astrinxerunt. his partibus iuridicalem absolutam tractari conueniet.

## De iuridicali assumptiua.

### Cap. VI.

Assumptiua iuridicalis est, quæ factum accersita extrinsecus ratione defendit: ut quum Orestes dicit, Occidi matrem, qui illa patrē meum occiderat. Hæc partes habet quatuor: concessionē, remotionem criminis, translationem criminis, comparisonem. Concessio est, per quam nobis ignosci postulamus. Ea diuiditur in purgationē, & deprecationem. Purgatio est, quum consulto à nobis factū negamus. Ea diuiditur in necessitatem, fortunam, & imprudentiam. Necessitas est uis, cui à nobis occurri non potest: ut, ille qui ad diem statum in iudicium nō uenit, quod eum morbus, uel uis aquarum impedisset. In ea uidendum est primum, utrum ea necessitas sit satis idonea ad impediendum causa: deinde, num nostra causa acciderit, num uitari potuerit, num consulto in

eam incidisse existimari possumus. Postremo, nū ob eam necessitatem excusari aut absolui debeamus. Fortuna est casus inopinatus, atq; improvisus: ut qui quum scram sagittis peteret, hominem casu prætereuntem interemit. Imprudentia est, inconsiderata dictorum, factorumq; emissio: ut qui criminis culpam in amorem, ætatem, ignorantiam confert. Ac fortunæ quidem & imprudentiæ ijdem penè loci, qui necessitatis sunt. Considerare enim oportet, num id prævidere, aut scire, aut cauere potuerimus: num causam ei rei aut ipsi præbuerimus, aut præbuisse existimari possumus: num satis ea res, quam afferimus, præsidij aut momenti habeat: num ob id nobis ignosci conveniat. Sed hæc omnia erunt pro eius apud quem agemus, qualitate tractāda. aliter enim nos apud amicum, aliter apud superiorem aut principē excusamus. Deprecatio est, declinandæ poenæ gratia facta supplicatio. Ea est, quum reus fatetur se non casu, aut imprudentia, aut necessitate, sed consulto peccasse, & tamen postulat ignosci sibi. Ignoscendi ratio ex personis & rebus maximè sumitur. Ex persona eius qui peccauit, quum eius nobilitatem, uirtutem, meritaq; in patriam, in alios, uel in eos ipsos qui sunt ignoturi, ostendimus: quum eius merita cum peccatis comparamus, & multo plura ac maiora hæc quàm illa esse probamus:

bamus : quum optimam de eo spem in posterum demonstramus : quum eum non dolo , aut odio , aut malo animo peccasse dicimus . A persona iudicum ueniam captabimus , si de eorum humanitate , clementia , consuetudine ignoscendi quam plurima proferemus : si eos , quibus ipsi ignouerint , in exemplum adducemus , & homines homini , causam causæ comparabimus : si ex ea re non modò nullam infamiam , sed maximam etiam clementiæ & mansuetudinis laudem eos , si ignouerint , consecuturos esse ostendemus . A re ipsa captabimus ueniam , si rem ipsam , quantum licebit , omni ex parte attenuabimus : si in re simili alijs ignosci solere , aut ignotū esse ostendemus . Hæc quidem causa in iudiciū nunquam uenit : in priuatum uitæ usum , atq; in epistolam sæpe uenit : proptereaq; est à nobis pluribus uerbis explicata . Remotio criminis est , per quam à nobis nō crimen , sed culpam remouebimus , eamq; aut in hominem quempiam , aut in rem transferimus . In hominem : ut qui hominem occidit , id se magistratus , aut principis iussu fecisse defendit . In rem : ut qui noctu armatus contra edictum inuentus , id se uel inimicitarum , uel grassatorum causa fecisse affirmat . Si culpam in hominem conferemus , primū ostendere oportebit , quam ille iubendi potestatem habeat . Deinde utrum nos honeste

nestè recusare quod iubebatur, poteramus. Postremò, num ea de causa nobis ignosci conueniat. Quum in rem culpam conferemus, & hæc eadem, & ea quæ de necessitate præcepta sunt, erunt seruanda. Translatio criminis est, per quã nos aliorũ peccatis coactos peccasse confitemur: ut Orestes, qui crimen suum in matrem confert, quæ patrem antè interemerit. Hac in parte considerandum erit, primùm, num uerè crimen in alium transferatur: deinde, num æquale sit huic de quo agitur. deinde, an iudicium de illo factum sit: tum, an debuerit reus alio crimine crimen illud uel iudicare, uel ulcisci: postremò, quid futurum sit, si cæteri idem faciant, & sibi ius armis dicant. Quid si idem accusator nunc fecisset? Atque hi sunt accusatoris loci. Reus atrocitatem alieni criminis ponet ante oculos, seq; id coactum fecisse ostendet, neque utile aut tutum fuisse iudicium expectare. Comparatio est, quum de duobus malis minus nos elegisse ostendimus: ut qui obsessus ab hostibus, quum de salute desperaret, exercitum incolumem eduxit, impedimenta hostibus tradidit. In ea primùm accusator quæret, utrum utilius, honestius, laudabilius fuerit, id quod reus fecerit, an aliud quippiam. Deinde habuerit ne is statuendi potestatem, an ab alio petere

tere debuerit. Deinde, fuerit ne aliud remedium,  
ne id fieri necesse esset. Tum inferetur ab accusa-  
tore per coniecturam suspicio auariciæ, doli, me-  
tus, aliarumq; rerum, quæ augere crimen pos-  
sunt. Defensor & suspicionem cupiditatis ac do-  
li omnem tollet, & magnitudinem periculi po-  
net ante oculos: tum ab iudicibus, ab accusatori-  
bus quæret, quid ipsi fecissent, si eo in discrimine  
constituti fuissent. Postremò per comparatio-  
nem malorum ostendet nihil aliud utilius fieri po-  
tuisse. Ac de iudicialis quidem causæ generibus,  
satis pro suscepta institutione dictum puto. Nec  
dubito fore, qui superuacuam hanc partem exi-  
stiment, quum epistola ad amicum, non ad iudi-  
cem scribatur. Sed primùm ita causæ tractandæ  
sunt, ut amicos quoque de illis iudicatu-  
ros existimemus. Deinde ad superiores nonnunquam, in-  
tem ad inuidos & inimicos scribimus: apud quos  
non aliter quàm apud iudices obiectiones refela-  
lere, nostrum factum excusare, accusare alios, sæ-  
pe compellimur. Postremò, nulla de re scribere  
possumus, in quam non aliquis ex ijs quos dixi-  
mus, locis incidat. Sed hæc hætenus.

Nunc ad deliberatiuum ge-  
nus transeamus.

De



## De causis deliberatiuis.

## Cap. VII.

In omni autem deliberatione tria potissimum notare debemus: personas, res, causas. Personæ duæ sunt, nostra, et eorum apud quos agimus. aliter enim ciuis agere debet, aliter peregrinus: item aliter magistratus, uel princeps, uel dominus: aliter priuatus, uel subditus, uel seruus. Sunt præterea dignitatis, loci, ætatis, temporis differentia: ut aliter sacerdos, aliter popularis: aliter iuuenis, aliter senex: aliter in tēplo, aliter in senatu, uel in foro: aliter in bello atq; apud exercitū, aliter domi, cum pax est, uerba faciat. Permagnum quoq; refert apud quos dicamus, uel ad quos scribamus. aliter enim apud senatum, aliter apud populum, aliter apud principem, aliter apud amicum loquimur. Quarum quidem personarum habere rationem prudentia atque usus uitæ potius, quàm ars ulla docere nos potest. Verum tamen nos quoque ea quæ præcipi hac de re posse uidebuntur, suo loco dicemus. Res omnis quæ in consultationem uenit, aut possibilis, quod Græci *Δυνατὸν* uocant, aut utilis, aut honesti rationem habet. Neque uerò utile ab honesto separo, quòd aliud utile, aliud honestum esse censeam: sed quia cum imperitis, ut plurimum, agimus,

qui

qui utriusq; rei rationem in uita communi separare, nobis etiam in dicendo ac scribendo separanda est: ut nunc solam honestatem, nunc solam utilitatem propositam habeamus. Quum deliberamus, utrum aliquid fieri possit, id ex tempore aut presenti, aut futuro consideramus. Ex presenti: ut quum pontifex deliberat, utrum fieri hostie portus possit. Ex futuro: ut idem consultat, si Ferdinando regi bellum inferat; utrum eum possit ex Italia expellere. Quæ quidem deliberatio quoniam in coniectura tota posita est, inde loci omnes nobis petendi sunt. Illud tamen uidentum, ut quæ superius de re facta præcepta sunt, ea nunc ad rem faciendam accommodemus. Illa præterea magnopere consideranda sunt, locus, tempus, modus, occasio, facultates, et cætera quæ aut gerendum negotium præcedere, aut gestum subsequi solent. Quæ quidem omnia quoniam in priori uolumine, quum de confirmatione ageremus; satis, abundeque tractauimus, inde repetemus. Vtilis autem consultatio distribuitur in bonorum, malorumque rationem. Bona in uita communi aut corporis, aut fortunæ, aut animi appellamus. Bona corporis sunt, uires, ualeitudo, forma, celeritas, agilitas, et cætera eius generis. Fortunæ bona sunt, nobilitas, opes, honores, dignitates, potentia, soboles, familia, et quæ his similia sunt.

Animi bona sunt, ingenium, memoria, uirtutes, disciplina, mores, & quæ sunt eius generis. Mala horum omnium contraria sunt, ut imbecillitas, ægrotudo, tarditas, fortunæ obscuritas, paupertas, abiectio. Animi uitia, ignorantia, morū peruersitas. Atq; in bonis quidem adeptionē, conseruationem, incrementumq; considerabimus. In malis, imminutionem, fugam, euasione, immunitatem. Honesti consultatio in recti & laudabilis rationem diuiditur. non quòd laudabile aliquid esse possit, quod rectum non sit: aut rectum, quod non sit laudabile: sed quia rectum nonnunquam sine laude est, laus sine recto nūquam est. Nonnulli uerò sine ulla spe, aut cupiditate gloriæ rectum expetunt: alij solam rerum gestarum tanquam præcium expetunt gloriam. Ideo mihi utriusq; locos tractandos seorsum existimaui. Rectum igitur quatuor ex partibus maximè sumitur, prudentia, iustitia, fortitudine, modestia. Prudentia est, rerum omnium ad usum uitæ pertinentium cum delectu scientia. Eius partes sunt, memoria, intelligentia, prouidentia. Memoria est, per quam ad usum nostrum præterita recordamur. Intelligentia est, per quam præsentia rectè perspicimus. Prouidentia est, per quam futuris occurrimus. Prudentiæ partibus utemur, si præteritis rebus præsentibus, futurasq; comparabimus: si com-

moda

moda cum incommodis cōferemus: si rationibus atq; exemplis quæ sequenda sint, et fugienda, demonstrabimus: si alicuius scientiæ aut artis rationes ad rem, de qua agimus, asseremus: si quò pacto eorum apud quos agimus, dignitati ac salutis consuli in posterum possit, ostendemus. Iustitia est æquitas, ius suum unicuiq; pro dignitate tribuens. Eius partes sunt, pietas, fides, beneficentia, & quæ propriè appellatur iustitia. Pietatis partibus utemur, si in Deum, patriam, parentes, propinquos seruanda esse officia suadebimus. Fidei partibus utemur, si pacta, cōventiones, promissa omnibus inaiolabiliter seruanda esse ostendimus. Beneficentiæ partibus utemur, si opes & copias nō ad luxum, sed liberalitatē conferendas: si socijs, amicis, propinquis, bonis uiris, indigentibus subueniendū esse dicemus. Iusticiæ partibus utemur, si naturæ, gentium, ciuium iura, leges, consuetudinem, iustitiam seruari oportere demonstrabimus: si nemini iniuriam inferendam: illatam, quantum liceat, propulsandam: item si societates & amicitias tolerandas: si ius suum amota omni cupiditate, & perturbatione animi, tribuendū: si omnia deniq; ad communē utilitatē referenda esse censebimus. Fortitudo est, animi in rebus gerendis, tolerandisq; cū periculorū contemptione cōstantia. Eius partes sunt, audacia, patientia, perseuerantia. His partibus utemur,

mur; si magno animo pericula omnia subeunda esse suadebimus: si mortem, exilium, uincula, cruciatus, tormenta, uiro forti nequaquam timenda esse demonstrabimus, ut patria, parentum, et eorum ipsorum salus, incolumitas, dignitasq; seruetur: si nihil turpe, nihil humile, aut indignum mortis, aut doloris, aut periculi metu faciendum atq; dicendum esse ostendimus: si res aduersas fortiter, patienterq; tolerandas: si summam in dictis ac factis constantiam seruandam esse hortabimur. Modestia est, continens in omni re, ordine adhibito, moderatio. Eius partes sunt, continentia, modus, ordo, decorum. His utimur, si cupiditates opum, honorum, libidinis, gulæ, similiaq; rerum uituperabimus: si omnibus in rebus terminum, modumq; statuemus: si, quid in singulis rebus deceat, uidendum ac seruandum esse suadebimus. Atq; his potissimum locis recti ratio tractabitur. Laudabile id dicitur, quod famam et gloriam apud omnes honestam atq; optabilem ex sese parit. Id sumitur uel à maioribus nostris, quum ostendimus, quantam illi ex ea re gloriam consecuti sint: uel à presentibus, quum ostendimus, quanto in precio ea res apud omnes sit: uel à posteris, quum gloriam, uel immortalitatem, uel beatitudinem tum à Deo, tum ab hominibus ex ea re consecuturos illos esse promittimus. Causæ autem considerantur

tur in deliberatione tum ex ipsa re quæ uenit in consultationem, tum ex fine, quæ sequi oporteat. Res autem omnis aut per se deliberationem facit: ut si quis deliberet, det ne operâ philosophiæ, an non. aut propter extraneam causam: ut si Pontifex deliberet, an inferat Ferdinando regi bellum, ut ille id quod Pontifici debet, persoluat. Quibus in causis locus, tempus, modusq; ponitur: ut si quis deliberet, utrum hoc tempore bellum inferendum, aut hoc loco incipiendum, aut hoc modo gerendum sit. Quæ res ipsa faciet deliberationem, omnibus eam modis aut augere, aut extenuare oportebit. Quum autem propter extraneam causam ueniet in consilium, primum causam ipsam uel augebimus, uel minuemus. Deinde quantum momenti ad rem illam, de qua deliberamus, habere debeat, ostendemus, & rem cum causa conferemus. ut, satis ne idonea causa sit \* pro magnitudine rei appareat. tum rei finem spectabimus, ad eumq; nostras argumentationes omnes dirigemus. Finis erit, aut utilitas, aut honestas. Sed quoniam, ut Quintilianus ait, nihil aliud est deliberatio, quam quædam comparatio rationum, si quando res utraq; in dubium & comparationem ueniet, qui utilitatem præponet, his locis utetur. Incolumitatem, & salutem omnibus rebus præferendam esse: uirtutibus neminem rectè uti posse,

qui à periculis tutus non sit: non uirtutem, sed temeritatem esse eius, qui, quum sine periculo possit uiuere, pericula sponte suscipiat: neq; illi Deū adiutorem esse, qui se ultro periculis offerat: honestum nihil existimari conuenire, quod salutem nō pariat. Qui rationem honestatis praeferet, his locis utetur. Virtutem nunquam deferendam, dolorem, mortemq; turpitudine atq; infamia leuiorem esse: mortem honestatis causa ultro esse subeundā. Quo loco eorū exemplis utetur, qui propria & honestate ultro mortem oppetiere: neminem exploratum habere, illo uitato periculo, incolumem se perpetuò & immortalem fore: qui honestè uiuat, eum satis abundeq; tutum esse: qui turpiter, diu incolumem esse nō posse: fortunam quoque uirtuti adiumento esse solere: postremo, quæ laus apud posteros & immortalitas ex rectè factis cōsecutura sit, quæ contrā ex turpibus ignominia. Potest autem deliberatio duplex, aut triplex esse: ut si quis deliberet, det'ne operā iuri ciuili, an medicinæ, an philosophiæ: quæ quum inciderint, finis omnium spectandus erit, uidendumq; quid sequatur is qui deliberet. Quoniā autē deliberatio duplex officium habet, suadendi, & dissuadendi: ex quibus locis suasionē comparabimus, ex contrarijs dissuasionē constituemus. Contrariorū enim eadē est disciplina. Sed de hoc hætenus. Nūc ad demonstratiuum genus transeamus. De

De causis demonstratiuis, dijsq;  
laudandis. Cap. VIII.

Demonstratiuum genus consumitur in laudē,  
& uituperationē. Sed quoniā & potior laudandi  
pars est, & ex laudis contrarijs locis uituperatio  
cōstat, de ea potissimū dicemus. Laus igitur aut à  
personis, aut à rebus sumitur. Personæ in deos &  
homines distribuūtur. Deū ipsum laudare ob eius  
magnitudinē uox humana nō potest: sed singulos  
eius actus laudamus, ut potentiā, sapientiā, prouī  
dentiā, mansuetudinem, ordinē, & cetera eius ge  
neris, quæ ex eius operib. consideramus. Ea præte  
rea, quæ ab homine satis intelligi nō possunt, ad  
miratione et ueneratione prosequimur, ut creati  
onem mundi, coniunctionē humanæ diuinæq; na  
turæ, triū personarū in eadē essentia (sic enim lo  
qui necesse) distinctionē, et quæ sunt eius generis:  
quib. de rebus dicere qui uolet, eas, quas dixi, par  
tes amplificabit, hominesq; in earū admirationē,  
cōtemplationemq; adducet. Hoc loco mihi error  
eorū indicandus est, qui quū diuinū aliquid in con  
suetudine laudaturi sunt, ea de re partim disputant,  
partim præcipiūt, ac docent, quasi in schola apud  
discipulos, non in templo apud populū uerba faci  
ant: quæ ratio tum à loco, tum à tempore, tum à  
personis maximè aliena est. In quod quidem uic  
tium plerique eorum incidunt, qui Romæ apud



Pontificem festis diebus cōcionantur. Quod quidem mihi dicendum putavi, non ut eos reprehenderem, qui in ceteris disciplinis docti sunt, hanc facultatem omnino non attigerunt: sed ut hi qui oratores haberi uolunt, id uitium et planè cognoscerent, et quantū possent euitarent. Sed ut ad institutū redeamus, ita diuinæ res tractandæ sunt, si publicè dicamus, ut oratio, non lectio, aut disputatio uideatur. Epistola quia ius docendi habet, liberior est. Hi uerò quos diuos, uel recepto iam uocabulo Sanctos appellamus, tum ab humanis, tum à diuinis partibus laudandi sunt. Humanæ partes, natura, fortuna, et animo continentur. Naturæ, siue corporis partes sunt, forma, robur, ualetudo, uelocitas, agilitas, proceritas, dignitas, et quæ his similia sunt. Has illi partes si habuerint, aut extenuasse ieiunijs, aut in solitudine abscondisse, aut squalore situq; obdixisse, aut ad diuinarum rerum usum contulisse, dicendi sunt: si non habuerint, non quæsisse, imò etiam contempsisse. Fortunæ partes sunt, genus, educatio, patria, honores, dignitates, inopia, clientelæ, amicitie, affinitates, liberi, nepotes, et cætera eius generis: quæ si fuerint, ab alijs partim relicta, partim egentibus erogata, partim ad diuinum cultum collata esse, dicendum erit: si non affuerint, non esset quæsita, imò etiam omni studio euitata. Animi partes  
sunt,

sunt, prudentia, iustitia, fortitudo, modestia: quarum officia, quia satis abundeque in deliberatiuo genere demonstrauiamus, in presentia attingere non conuenit. Hæ partes ita in his uel uniuersæ, uel singulæ laudandæ sunt, ut rectum illud, perfectumque officium, quod *ναρόρθωµα* Græci uocāt, semper secutos eos fuisse, omnesque actiones suas ad Dei cultum atque amorem retulisse demonstremus. Illæ præterea uirtutes, quas nostri theologicas uocāt, fides, spes, charitas, in summa eorū laude reponendæ. Diuinæ partes sunt, quæ supra hominū positæ, humana ope cōparari non possunt: ut doctrina sine studio, genera linguarū sine earum commercio nationum, curationes ægritudinum sine arte medicinæ, et alia permulta, quæ tum Apostolis, tum alijs sanctis uiris à Deo data esse non dubitamus. Neque uerò hæc in omnibus omnia laudanda sunt, sed alia in alijs, ut quisque uisus est in aliquo genere præstitisse: ut in charitate Stephanus, Laurentius in patientia, in eloquentia et linguarum interpretatione Hieronymus, Augustinus in multarum rerū scientia, Antonius in sanctitate uitæ, et ceteri eodem modo. Multorum mors ipsa insignis atque admiranda est, quos recepto Græco uocabulo martyres appellamus. Aliorum uel inuentio, uel translatio maximè gloriosa, proptereaque consecuti sunt homines eo tem-

pore beneficia. Et de sanctorum quidem uirorum laudatione hæcenus. Quam quidem partem sum paulo latius executus, quoniam et res ipsa, quippe quæ noua sit, usq; ad hoc tempus intacta fuerat, et hoc tempore magno Romæ in usu est. Nunc ad reliqua pergamus.

### De laudandis hominibus. Cap. IX.

Cæteri uerò homines aut uiuētes, aut defuncti laudantur: uiuentes item aut coram, aut absentes. Qui coram laudatur, summa grauitate, summaq; modestia laudentur necesse est, ne scurræ magis et adulescentes, quàm oratores uideamur. dandaq; opera est, ut indicandæ potius, et testificandæ alijs uirtutis eius, quàm hominis laudandi gratia suscepta esse nostra oratio uideatur: iustaq; in primis, atq; honesta, imò etiã, si poterimus, necessaria eius suscepti officij causa ostendenda est. Oratio uerò non nisi ex admiratione quadam ad ipsum qui laudatur, dirigenda est: curandūq; ne id nos munus uel referendæ, uel aucupandæ hominis gratiæ studio suscepisse uideamur. Absentes laudare liberior oratio potest: Epistola, quanquam nō erubescat, tamen ne adulationis suspicionē moueat, nō potest. Defuncti ita mihi laudandi esse uidentur, ut cōsolari magis eos apud quos dicimus, quàm illos laudare uelle uideamur. Quod contrà faciunt pleriq; corū, qui nostro tempore oratores haberi uolunt.

lunt. Ita enim ad laudandū accedunt, ut aperte se  
 laudatores atq; assentatores esse fateantur. Ita ue-  
 rò laudant, nō ut orationē habere, sed ut eius uiri  
 recitare ab se scriptā historiā existimentur. Mihi  
 uerò funebriū orationū ea seruāda ratio uidetur:  
 primum, ut iustissimū esse eorum apud quos dici-  
 mus, dolorem, nostrumq; cum illis communē esse  
 ostendamus. Deinde, ut eos illorum qui defuncti  
 sunt, uirtutibus, rebus gestis, gloria, felicitate, &  
 memoria consolemur. Laudantur autē omnes ho-  
 mines ab his potissimū partibus, quas suprà con-  
 memorauimus, naturæ, fortunæ, animi. Ac duo  
 quidem illa superiora ita cōmemorantur, ut non  
 propterea quòd ea quis habuerit, sed quòd his op-  
 timè fuerit usus, laude dignus existimetur. Vsus e-  
 nim illorum, non possessio, laudem affert. Nam et  
 à malis plerunq; et sine ratione possidentur. Lau-  
 dantur tamen non immeritò ij, qui, quū ignoti ob-  
 scuriq; sint, summas tū opes, tū dignitates sunt uir-  
 tutibus et rebus gestis cōsecuti. Nonnullis contrā  
 uel paupertas, uel cecitas, uel alia corporis fortu-  
 næq; calamitas laudem et gloriā non mediocrem  
 attulit, illustrioresq; eos incommoda reddiderūt,  
 quàm ulla reddere cōmoda potuissent. Animi ue-  
 rò partes ita laudāde sunt, ut et habuisse eas quis,  
 & summa cum dignitate semper exercuisse cōme-  
 moretur. Illa uerò, de qua ueteres scribūt, uirtutū  
 quatuor

quatuor in partes distributio, in excogitando quidem apud animum semper est, meo iudicio, proponenda, in scribendo aut dicendo non semper explicanda. Omnes enim uirtutes in omnibus commemorare si uelimus, irridere eos potius, quam laudare uideamur. In milite enim religionem, in sacerdote bellicam disciplinam laudare non conuenit. Videndum autem est, ut singularum uirtutum partes notas habeamus, ne quid quod in illis laudabile sit, præterire possimus: & quæ unius uirtutis propria sunt, alijs tribuamus. ut si quis opum distributionem, aut incommodorum tolerantiam prudentiæ ascribat, aut consilium in rebus gerendis modestiæ, ac temperantiæ. Neque uerò existimemus eum qui doctus non sit, prudentem, aut sapientem, aut bonum uirum appellari non posse: sed qui ita sit affectus, ut multarum rerum usum habeat, multa ab eo extent uel prouisa prudenter, uel acta constanter, uel responsa acutè, ut de Catone scribit Cicero, eum appellare sapientem non dubitemus. In iustitiæ partibus quædam nostra ætate laudantur, quæ ueteres non commemorabant. Et obseruantia in Deum, ac religionem nostram, & obedientia, in sacerdotibus præsertim, ac religiosi uiris magnam, si a sit, laudem affert: si absit, summam uituperationem. Quid pars illa liberalitatis, quæ egenis succurrit, nobis

ex diuina institutione tradita, quam nos recepto Græco uocabulo eleemosynam appellamus, quam nunc hominibus laudem affert, quæ ueteribus penè incognita fuerat? Clementia erga inimicos, quæ nobis item ex diuino instituto seruanda est, si aſſit, magna laude digna erit: quod præcipue in Stephano laudamus martyre. si absit, sacerdotibus præsertim, uitio dari poterit. Patientiam quoq; religio nostra laudabiliorem atq; illustriorem facit. Castitas apud antiquos tantum in mulieribus laudabatur: nunc uerò etiam in uiris ita, ut intactum se ab omni coitu, mundumq; seruasse, & ut quidem nunc loquimur, uirginem esse, quod de Ioanne apostolo scribitur, summæ laudi ac sanctimonie tribuatur. Quid nobis illæ diuinitus traditæ uirtutes, fides, spes, charitas, quantam cum omnibus, tum uel maxime sacerdotibus uel laudem, si aſſint, uel si absint, uituperationem afferunt? Quantum habent in utraq; parte momentum? Sunt igitur hæ quoq; diligenter, accurateq; tractandæ. Atque hæc potissimum in laudandis hominibus consideranda sunt. Illud in primis uidendum erit, ut proprias unicuique laudes accomodemus: neq; omnes eadem ratione laudemus. aliter enim magistratus, aliter priuati homines laudandi sunt. Aliæ regem, aut Imperatorem, aut belli ducem: aliæ Pontificem, aut sacerdotem

faciendū laudes decent. Quæ quidem omnia; nisi admodum imprudens atq; imperitus fuerit, discernere unusquisque facillimè poterit. Sed de laudibus personarum hactenus. Nunc de rerum laudibus pauca dicam.

## De rebus laudandis.

### Cap. X.

Res autem omnis corporea est, aut incorporea. Corporeæ res sunt aut à natura institutæ, ut elementa: quæq; in illis sunt nata, ut plantæ, metalla, gemmæ: aut hominū industria sunt comparatæ, ut urbes, templa, domus, earumq; ornamenta. Incorporeæ sunt aut artes, ut pictura, sculptura: aut scientiæ, ut rhetorice, philosophia: aut uirtutes, ut iustitia, fortitudo. Corporeæ res omnes, quæ à natura sunt, partim à natura sua, partim ab usu nostro laudantur. A natura quidē sua laudantur, quū earum species, ordo, proprietatesq; commemorantur. Ab usu nostro, quum fructus, commoda, emolumenta, delectationes, quæ ex his percipiuntur, commemoramus. Quod quidē pulcherrimè facit Cicero in secundo de Natura deorum, quū mundi uniuersi pulchritudinē, ornatū, usumq; describit. Facit multis in locis Plinius, quū uel prouincias, uel plantas, uel gemmas, uel alia opera naturæ collaudat. Facit omniū optimè, elegantissimèq; Virgilius, quum in Georgicis Italiæ laudes

laudes describit. Atq; in locis quidem considera-  
tur in primis cœlum, clemens, an asperum sit: salu-  
bre, an pestilens: calidum, an frigidum: pluuium,  
an serenum. deinde solum, fecundū, an sterile: om-  
nium rerum ferax, an aliquarum: uulgariū præte-  
rea, an earum quæ paucis in locis nascuntur: uti-  
lium quoq; an noxiarū. situs præterea loci consi-  
deratur, montanus, an planus: maritimus, an me-  
diterraneus: portuosus, an importuosus: cui præ-  
terea cœli regioni expositus. tū uerò qui montes,  
quæ syluæ, quæ flumina, qui lacus, qui fontes in eo  
sint, cōsiderantur. Postremò quæ urbes, emporia,  
oppida in ea regione sint condita, & à quib. habi-  
tata. Vsus spectatur tū ex his quæ dictæ sunt, par-  
tibus, tum ex cōmercijs, tū ex cōmodis uitæ tradu-  
cendæ, imperij propagandi, rerūq; gerendarū oc-  
casionibus. Voluptas postremò, & delectatio cō-  
memoratur, aucupandi, uenandi, piscandi, tumq;  
non uno modo animum relaxandi. Plantæ, metal-  
la, gemmæ, & cætera eius generis tum à specie i-  
psa, forma, colore, & nitore laudantur. tum ab  
usu, qui inde percipitur: ut emendi, uendendiq;  
ex auro: ex ferro, belli gerendi: ex plantis, uescen-  
di: ex gemmis, cætera exornandi. tum uerò ex ui-  
quadam, & proprietate naturæ, quæ his in re-  
bus multiplex, admirandaq; insit: quam nosse qui-  
cupiet, legat eos qui de earum rerum natura  
perscri-



perscribere, ut ex Græcis Aristotelem, Theophrastum: ex nostris Plinium, Albertum Magnū, aliosq; permultos. Earum uerò rerum, quæ hominum industria comparantur, urbes præcipuè sunt. hæ laudantur tum ab his partibus, quæ locis attributæ sunt: tum à specie, tum figura. ab artificiosis munitionibus, ut fossis, muris, turribus: ab ædificijs tum publicis, tum priuatis: ut uijs, templis, aquæductibus, domibus, eorumq; ædificiorum dispositione, atq; ordine: tum uerò ab antiquitate, conditoribus, alumniis, rebus gestis, imperio, legibus, institutis, exemplis, inuentis, artibus, quæ ibi aut inuentæ primum sunt, aut floruerūt. Cætera porrò ædificia uel ab his omnibus, uel ab aliqua earum parte laudantur. in quibusdam autem utilitas, ut in aquæductu: in quibusdam dignitas, & quasi maiestas maximè consideratur, ut in templis. Cæteræ res omnes, quæ artificio cōstant, partim à materia, partim ab artificio, atq; artifice, partim à forma, partim ab usu, partim à raritate & precio, partim à possessoribus, & dominis commendantur. Ac corporeæ quidem res ita, meo iudicio, tractandæ sunt. Incorporeæ autem res, quæ in laudationem ueniunt, aut artes, aut scientiæ, aut uirtutes sunt, ut supra diximus. Hæ laudantur aut ab antiquitate, & inuentoribus: aut à subiecto, & materia, in qua uersantur:

aut

aut à dignitate, & ſpectatoribus: aut ab utilitate, quam humano generi conferunt: cui eſt nonnunquam adiuncta neceſſitas: aut à fine, propter quẽ inuentæ ab hominibus, cultæq; ſunt. has autem ſingulas partes explicare, quoniam & immenſi operis eſſet, & ad noſtram inſtitutionem non pertinet, in præſentia non eſt uiſum. earum qui notitiam nullã habebit, neq; dicere de his, neq; ſcribere quicquam poterit. Laudantur autem non ſolum ij habitus, uerũ etiam actus, ſiue actiones ipſæ, & quædam quaſi profeſſiones, inſtitutionesq; uiuendi ab his ductæ proſectæq; partibus: ut uita ruſtica, religioſa, ſolitaria, ciuilis, & quæ ſunt generis eiufdem. Atq; huius quidem uniuerſi generis laudandi hæc potiſſimum ratio eſt. Primum, ut uitam ipſam uniuerſam quanta maxima poſſumus diligentia deſcribamus. Deinde, ut eius ſingula commoda enumeremus: tum explicemus ea quibus caret, incõmoda: deinde contrarium uitæ genus deſcribamus, & utriuſq; commoda et incommoda comparemus. quo loco per omnes partes uagari, easq; ſingulas cum illa quam nos laudamus, conferre poterimus. tum exemplis uti licebit eorum, qui id uitæ genus ſecuti ſunt, in eoq; præ cæteris floruerunt. tum finem ipſius uitæ collaudabimus, ad eumq; omnes eius partes referemus. Omnis autem non modò deliberatio, ut

Quintilianus affirmat, uerum etiā laus comparatione mihi maximè cōtineri uidetur. Illa enim siue res, siue persona, maximè cōmendatur, quæ cæteris sui generis præstare maximè demonstratur. Vituperatio uerò, quoniā ex contrarijs laudationis locis, ut superius diximus, conficitur, non est mihi latius explicanda. nam qui rectè laudandi rationem nouerit, uituperandi quoq; rationem tenebit. Humana præterea ingenia ad uituperationem, quàm ad laudem, promptiora sunt. Huc accedit, quòd singulis uirtutibus bina aut plura uitia opposita sunt, quo facilius uituperandi quàm laudandi ratio est. Ac de uniuerso quidem demonstratiuo genere diximus satis. Quod quidem copiosius quàm cæteri scriptores, executi sumus, tum quòd ætate nostra uel solum, uel maximum est, in quo latina uersetur oratio: tum quòd nos scribendi, non dicendi rationē tradimus, quæ quidem latissimè patet, atq; in materia uersatur. Postremò, illa etiam me ratio mouit, quòd hoc genus quasi facillimum & notissimum ueteres magis attigerant, quàm tractauerant. Nunc quo pacto hæc causarum genera ad scribendi rationem accommodentur, aperiemus.

### De personis. Cap. XI.

Igitur qui ad scribendum accedit, duo illa in primis consideret necesse est, personam & causam.

sam. Personæ omniū duæ sunt, eius qui scribit, et  
eius ad quem scribit. Quoniam autem neque om-  
nes, neq; ad omnes scribere eodem modo debent,  
(aliter enim ad pares, aliter ad superiores, aliter  
ad inferiores scribimus) personarum in primis  
habenda ratio est. Sunt igitur in omni persona  
quinq; potissimum considerata: Natura, fortu-  
na, studium, dignitas, affectio. In natura conside-  
randus est sexus: ut, uir an mulier. ætas: ut, puer  
an adolescens, natu grandior, an senex. natio: ut,  
Italus an Gallus. patria: ut, Romanus an Vene-  
tus. In fortuna consideratur: ut, nobilis an ignobi-  
lis. conditio: ut, seruus an liber. ordo: ut, eques an  
senator. opes: ut, diues an pauper. existimatio: ut,  
clarus an obscurus. amplitudo: ut, potens an im-  
potens, alicuius autoritatis an nullius. status ui-  
tæ: ut, pater an filius, maritus an coelebs, priua-  
tus an cum potestate. In studio consideratur ars  
liberalis, ut medicina, pictura, sculptura, merca-  
tura: an illiberalis, ut sutoria, institoria, fulloni-  
ca, lignaria, ferraria, ceteræq; eius generis, quæ  
recepto græco uocabulo Mechanicæ appellan-  
tur. Consideratur præterea disciplina: ut, philo-  
sophus an astrologus, orator an cansidicus. habi-  
tus etiam, & professio quædam: ut, religiosus an  
popularis, siue, ut græcè dicam, laicus. religionis  
præterea professio & ordo non unus: ut, Petri,

Benedicti, Francisci, Dominici. Dignitas consideratur, sacra an profana: ut, pontifex an rex. perpetua, an ad tempus: ut, princeps an prætor. In affectione consideratur notitia, ut notus an ignotus: benevolentia, ut amicus an inimicus: consuetudo, ut hospes an familiaris: propinquitas, ut ciuis an peregrinus: coniunctio, ut cognatus an affinis: officia, ut bene an malè de nobis meritis. atq; hæc in personis considerata esse puto. Mutat autem in his scribendi rationem, earum quas modò nominauimus, partium potissimum comparatio. aliter enim ( ut paulo antè dicebam ) ad similes, aliter ad dissimiles scribendum est. Igitur si ad eos scribere nos continget, qui omni ex parte similes nobis, paresq; sunt, quanquam difficile admodum id quidem uidetur, tamen si quando continget, honorificè de illis loquemur, eorumq; dignitatem, uirtutem, ingenium, iudicium nos magnificere ostendemus. ita tamen loquemur, ut nostræ quoque uel ætatis, uel dignitatis rationem habeamus. Si ad eos scribemus qui nobis aliqua ex parte superiores sint, qua ex parte uidebuntur præstare, ei nos plurimum in scribendo tribuimus: etiam si nos eos cæteris in rebus aut æquare, aut superare uideamur. Nam si ad natu maiores scribemus, eorum ætati plurimum deferemus, præsertim si ei aliqua pars adiuncta sit ex earum

earum genere, quæ honestæ ab hominibus, & laudabiles existimantur. Si ad eos scribemus, qui nos fortuna & dignitate multo antecellant, exordio plerumque utemur: & quum in eo, tum in tota epistola beneuolentiam summam captabimus, nisi forte illis ualde familiares simus. Dabimus autem operam, ut tota epistola tum uerbis, tum sententijs grauis, ornataque sit, eosque omnibus in rebus nos magnificare ostendemus. ita tamen cum illis loquemur, ne nos ipsos contemptos, abiectosque reddamus, praesertim si nos uel ætas, uel nobilitas, uel uirtus aliqua commendabit. Ab omni uero non solum epistola, uerumetiam cogitatione nostra, adulatio atque assentatio in primis abesse debet: libero, ut ego quidem sentio, homine indigna. neque ulla uel temporis, uel personæ, uel necessitatis ratio apud nos ualere tantum debet, ut cuiquam de ipso mentiamur. Nam tametsi credulos et stultos homines, nec non gloriæ cupidos falsis laudibus decipimus, nos tamen mentiri non debemus. Si uero aliquod de se illi iudicium aut ingenium habent, nos stulticiæ & uanitatis accusant, qui quod nobis persuasum non sit, alijs persuadere studeamus. Nominare autem quenquam unum in numero multitudinis, qui recte, atque ex antiquo usu scribere uolet, etiamsi ad pontificem aut regem scribat, non debebit. uox enim illa si ad alterum refertur,

ratur, numerum, non dignitatem significat. Nos ita de nobis, ut de pluribus loqui, uel dignitatis, uel modestiæ ac uerecundiæ gratia planè licet: ut si laus aut dignitas ulla est, eam cum alijs communicare: si magistratus est, eum cum alijs gerere uideamur. Illa uerò epitheta, quibus apud pontifices, aut alios principes uti solemus, ut aliquid uisui & temporibus concedamus, tollenda de nostris scriptis esse non arbitror, ne uel omnem penitus loquendi usum tollere, uel eos ad quos scribimus, qui magna ex parte indocti sunt, cōtemnere existimemur: quorum alterum imprudentis, alterum superbi posset iudicari. Quod si autē eorum res curemus, aut illis aliquo seruitutis uel officij genere astricti simus, familiarius cum illis per literas loqui licebit, præsertim cum res illis suas domesticas perscribemus. Seruabimus tamen eorum in omni scribendi genere dignitatem. Iocari cum illis per epistolas licere non puto, nisi compertum habeamus, eorum naturam iocis & salibus maximè delectari, existimemusq; per eos nos aut illorum gratiam inituros, aut facilius ab illis quod uolumus impetraturos. Quod si quando utilitatis ratio exiget, ut faciamus, uerecundè admodum & grauitè faciendum erit, ut & illis gratificemur, & nostram dignitatē retineamus. Si uerò nobis ad incognitos homines aliqua de  
causa

causa scribendum erit, tametsi quo pacto scripturi simus, ipsa nos causa nostra facile admonebit: (neq; enim ad eundem eodem semper modo scribendum est) dabimus tamen operā, ut quā maximam possumus à persona nostra beneuolentiam contrahamus, eisq; nostrarum literarum causam aut necessariam, aut honestam, aut utilē esse, quantum possumus ostendamus, ad eosq; aliquid eius uel necessitatis, uel emolumenti, uel gloriæ pertinere demonstramus. Docilem uerò in primis, attentumq; reddemus, nostræ tū causæ, tum personæ significatione. tota uerò epistola grauis & accurata sit, ut & ille se etiam in scribendo magnifieri putet, & nos apud eum opinionem nostri quā maximam comparemus. Quum autem ad inferiores scribemus, magnatū sexus, tum ætatis habenda ratio erit: ut non quid nos possimus scribere, sed quid eorum uel sexus uel ætas possit intelligere, putemus. Quid præterea uel sexui muliebri, uel iuuenili ætati conueniat, magnopere considerandum: eritq; id prudentiæ nostræ, ad unumquemq; pro ætate, pro dignitate, pro doctrina, pro materia scribere. Si ipsi in magistratu, uel dignitate aliqua constituti erimus, ita scribemus, ut neq; dignitatis, neq; humanitatis obliui uideamur: quorum alterum humilis, alterum superbi animi existimari posset. Si



autem nos aut reipub. aut principis, aut alieno denique nomine scribere oportebit, qua in re totus scribarum ordo, qui maximus & honestissimus est, assidue uersatur: dabimus operā, ut eius pro quo scribimus, tum naturam, tum dignitatē quā notissimam habeamus; eiusq; personam, quantum possumus, induamus: ad eiusq; naturam, grauitatem, ætatem, dignitatem, officium, orationem nostram omnem accommodemus: rei pub. in primis grauitatem & personam induamus, eiusq; instituta, mores, consuetudines omnes in scribendo seruemus. Illud, ad quemcunque scribamus, in primis meminerimus, propterea nos scribere, ut legamur atque intelligamur. Quòd si uel longiores, uel obscuriores erimus, quā eius ad quem scribimus, siue natura, siue occupatio, siue doctrina postulabit, neutrum assequemur. ex quo fiet, ut & operam omnem in scribendo amittamus, & ab illis tum odio, tum contemptui habeamur. Quapropter orationem nostram, quantum licebit, ad eorum qui lecturi sunt, uoluntatem, doctrinamq; accommodabimus. Atq; hæc circa personas conseruanda esse censeo. nunc ad res ipsas transeamus.

De generibus epistolarum.

Cap. XII.

Omnis

Omnis autem scribendæ epistolæ materia à fine deducitur, qui actionum nostrarum omnium dux & moderator est. Is, ut in superiori uolumine diximus, duplex esse potest, docendi & mouendi. Absentes enim aut doceamus, aut moueamus necesse est. Alia enim scribendi causa, quod ego quidem sciam, esse potest nulla: ideoq; epistolarum omnino genera duo fecimus. unum, quod ad docendos: alterum, quod ad mouendos absentes sit inuentum. Quoniam autem quum docemus, aut res diuinas, mores, uirtutes, disciplinasq; aut negotia uitæ ciuilis, actionesq; tractamus: illud potissimum in duo genera partiti sumus, studiosum seu contemplatiuum, & actiuum siue negotiosum: ac studiosum quidem in duo genera rursus diuisimus: diuinum & morale, quod dilucidandæ rei gratia appellare aliter non possumus. Actiuum quoniam multiplex erat, certa in genera non diuisimus, ne lectorum animos multiplici partitione confunderemus. Mouendi uero genus in duo item genera distribuimus, concitatum, & remissiuum. Affectus enim omnes aut concitamus in absentium animis, aut lenimus, remittimusq;. Horum generum species innumerabiles, atque infinitæ sunt: quas quidem persequi uelle, & infinitum & superuacuum esset. Nos eas quæ maximè insignes & necessarie

H s uide

uidebuntur, tantum persequemur: ceteras, quarum neque inuentio difficilis erit, neque tractatio ab his multum abhorrebit, scribentium ingenij excogitandas, tractandasq; relinquemus.

### De diuino & morali genere epistolarum. Cap. XIII.

Ac duo quidem illa superiora epistolarum genera, in quæ studiosum illud genus partiti sumus, quorum alterum in rerum diuinarum descriptione, alterum in morum ac disciplinarum præceptis positum esse diximus, quanquam minus necessaria nostræ institutioni fortasse uideantur, (nam et eorum tractatio aliarum disciplinarum propria est: & scribere de his qui uolet, maiorem eruditionem habeat necesse est, quam ut ei in dictanda epistola elaborandum sit) tamen omittere penitus esse non censui, uel ob id maxime, ut qui illis disciplinis instituti non essent, quæ rei difficultatem intelligerent, scribere de his quicquam non auderent. Igitur scribere per epistolam aliquid siue de diuinis rebus, siue de liberalibus disciplinis qui uolet, ante omnia eius de qua scribere uolet, disciplinæ summam habeat cognitionem necesse est: neq; ab alijs petat, quod ipse alios docere uult. nam si positionem aliquam uel malè intellexerit, uel non suis uerbis expresserit,

ferit, uel oblitus aliqua ex parte fuerit, euestigio  
et res tota labefactabitur, ac corruet, et ipse su-  
am tum impudentiam, tum ignorantiam indica-  
bit. Neque uero eam tantum quam tractabit, quæ  
fessionem tenere satis erit, sed uniuersæ quoque di-  
scipline fundamenta et uocabula teneat necesse  
est. nam et probetur unumquodque per suæ disci-  
pline principia, suasque in causas atque elementa re-  
soluatur, et proprijs eius discipline, peculiari-  
busque uocabulis explicetur, necesse est: quæ qui  
ignorat, neque efficit quod uult, et disciplinas ip-  
sas confundit. Res itaque primum, deinde uerba ei-  
us discipline rectè teneat, qui tractare uolet,  
quod suæ professionis non sit: deinde ita tractet,  
ut ad quos scribat, meminerit. aliter enim quum  
ad doctos, aliter quum ad indoctos scribimus, res  
uniuersa tractanda est. Videndum est etiam, ut ea  
quæ traduntur, certo ordine ac ratione tradan-  
tur. nam et legentibus iucunda sunt, et discenti-  
bus faciliora. Præcepta uero quanta maxima tra-  
di possunt facilitate, tradenda, ne laboret intelli-  
gendo, qui ea seruaturus est. Ne uero fastidiū fre-  
quentia ipsa moueat præceptorum, in angustum  
contrahenda, et quasi inculcanda non sunt. Exem-  
plis autem crebris utendū. ea enim, quàm præce-  
pta magis mouent. Neque ueteribus tantū, quæ in-  
credibilia uidentur, sed nouis quoque, recentibusque  
utendum.

utendū. ea enim faciliora nobis existimamus, quæ ab alijs nostra ætate facta cognoscimus. Habet autem utrunq; hoc genus cum in principio ea quæ lectores attentos reddere solent, tum in tota epistola digressiones quasdam, quibus animi recreari, & quasi renouari ad legendū possint, præsertim si longior epistola futura sit. nam quum ipsa perdifficilis, seueraq; sit, habeat extrinsecus aliquid necesse est, quod ad legendū animos alliciat, & penè attrahat. In hoc autē uniuerso genere leuissima ac facillima sunt, quæ de moribus disputant. nam & latissime patent, atq; ad omnes pertinent, & liberius tractari possunt. quippe quæ uerbis constent usitatoribus, campumq; habeant ampliorem: in his tamen superior etiam seruanda ratio est. Ac de duobus quidem illis generibus satis in præsentia dictum sit: quæ quoniam & ad alias magis disciplinas pertinebant, et præceptionem communem habebant, coniunctè mihi tractanda esse censiui. Nunc ad alia singillatim genera descendemus.

### De negotioso, siue actiuo epistolarum genere. Cap. XIII.

Sequitur id genus, quod in negotijs positū esse diximus: quod uel actiuum, uel negotiosum appellari licet. Id in duo potissimum tempora distribuitur:

tur: præteritum & futurum. nam præsentia ita tractantur, ut partim præteritis, partim futuris coniuncta sint. In præterito quidem tempore negotia omnia ita tractamus, ut aut quemadmodum gesta sunt narremus, aut laudemus, aut uitupemus, aut de his gratias agamus, aut gratulemur, aut in his aliquid accusemus, aut defendamus, siue excusemus. In futuro res aut certas, aut incertas scribimus. Certas quidem aut imperamus, aut suademus, aut dissuademus, aut cõmendamus, aut petimus, aut quæ his cõtraria sunt facimus. Incertas uerò aut deliberamus, aut optamus, aut prædicimus, aut coniectura opinamur: aut id quod utrisq; commune est, in his consiliũ damus. Quod tametsi ad suasionem & dissuasionem referri potest, separatim tamen tractandũ nobis uisum est. atq; hæ sunt (ut mihi quidem uidetur) huius generis præcipuæ species. Si quæ præterea sunt, aut his adiungi possunt, aut ab his non sanè multum discrepant. Nos has potissimum repetentes singulatim tractemus, & quæ unicuiq; præcepta conueniunt, paucis explicemus.

### De narratiua epistola. Cap. XV.

Igitur quum negotium aliquod per epistolã narrandum est, ante omnia cur id narretur, considerare debemus: ut sine perspecto, ad eum omnis nostra narratio dirigatur. nam si ex ea cognitio  
tantum

tantum rei, & notitia quæritur, ita res primùm  
 proponenda est, lectorisq; animus in expectatio-  
 nem adducendus, ut si id petierit ad se perscribi,  
 sciat nos sibi diligenter, accurateq; satisfacere: si  
 non petierit, nos cupidum rei cognoscendæ facia-  
 mus, ut intelligat nos etiam absentes ea quæ scire  
 is uelle debeat, ultro cogitare atq; afferre. deinde  
 ita narranda res est, ut nihil omittamus de ijs quæ  
 legenti aut cognitionem, aut delectationē possint  
 afferre. Neq; cum ipsa narratione finienda episto-  
 la est, ne inanis & frustra suscepta narratio uide-  
 atur: sed aut eius causa breuiter exponenda est,  
 aut ad aliquam uitæ partem accommodanda, aut  
 inuicē aliquid ab eo ad quem scripsimus, exigen-  
 dum. Si delectationis causa narratio suscepta sit,  
 et omnia quæ id facere possunt, exequenda sunt,  
 & lectoris animus nunc rerū uarietate, nunc iu-  
 cundis digressionibus detinendus est. Omnia uerò  
 lepidius urbaniusq; narranda. Claudenda uerò epi-  
 stola uel aliqua iucunda, acutaq; sententia: uel si-  
 milium nunc rerum pollicitatione, nunc expecta-  
 tione. Si nostræ uel amicorū res domesticæ, famili-  
 aresq; narrentur, simplicē nudamq; narrationē,  
 sermoniq; simillimā esse oportet. Nusquā liberi-  
 or ac solutior epistola est. Licet exordiū uel adhi-  
 bere, uel omittere: licet plura negotia nullo ser-  
 uato ordine narrare: licet ab uno in aliud quàm  
 longe

longe uolumus digredi, atq; ad idem sepius reuer-  
ti: licet seria iocis, iocos serijs immiscere. Sermo fa-  
miliaris & quotidianus esse debet. Finem episto-  
lae finis negotiorum affert. Neq; epilogis, aut transi-  
tionibus, aut occupationibus, aut ullo genere arti-  
ficij opus est. Deniq; summum artificium in hoc  
genere est, ut nullo artificio utamur: ut extem-  
poralis epistola, non excogitata uideatur. Quod ta-  
met si tabellarijs ultro exigentibus fieri necesse  
est, tamen etiamsi nulla nos aut temporis, aut ho-  
minis necessitas cogeret, esset illa in stylo extem-  
poralitas effingenda. Qua de re non defuerunt,  
qui dicerent epistolam redolere incuriam quan-  
dam, & negligentiam oportere. Si uero partim  
gesta, partim gerenda negotia exponemus, ita nar-  
rabimus quae gesta erunt, ut ex ijs facile, quae ge-  
renda erunt, intelligantur, ita ut non solum praeterita  
et praesentia exponamus, sed futura etiam  
coniecturis quodammodo significemus: tum quid  
uel ipsi ab amico petamus, uel illi faciendum ar-  
bitremur, paucis aperiamus. quid in quaque re  
aut boni, aut mali sit, breuiter declaremus. Po-  
stremo, quae in nostra libertate sunt, liberaliter  
polliceamur. Atque his potissimum rationibus,  
quum exponenda erunt negotia,  
exponemus.

De



# De laudandi & uituperandi genere. Cap. XVI.

Proxima est laudandi & uituperandi ratio. Ea quoniam ex iisdem partibus sumitur, locis tantum in contrariā partem cōmutatis, ut suprà fecimus, à nobis coniunctim tractabitur. Igitur quū hæc omnis ratio in res atq; personas conferatur, duo in primis considerāda sunt: quem laudamus, utrū eum ad quē scribimus, an alium quempiā: et qua de causa, utrū cōmendandi, an gratias agendi, an aliquid impetrandi, an hominis conciliandi gratia. plurimū enim refert tū persona, tū causa. Eadem in uituperando sequenda est ratio. Aliter enim eum ipsum ad quē scribimus, uituperamus, aliter de alio ad eum scribimus. Multæ item sunt uituperādi causæ, ut maledictis respondeamus, ut iniurias ulciscamur, ut uitia detestemur: aliæq; permultæ, quarum in scribendo delectus habendus est. Igitur si eum ipsum ad quē scribimus, laudare constituerimus, siue id hominis conciliandi, siue aliquid impetrandi, siue, ut hodie fit, uolumē aliquod dedicandi gratia, faciamus, principium aliunde sumemus: dabimusq; operam, ne ille propterea nos scribere credat, ut laudemus. Nihil enim (ut mihi quidem uidetur) absurdius, atq; oratoris officio alienius, quàm quum nos tantum laudandi gratia uel dicere, uel scribere profitemur.

Assentā=

Assentatores enim euestigio, non laudatores existimamur: nostraq; scripta leuissima ab omnibus, & uanissima iudicantur. quippe quæ placendi studio conficta, nihil ueri, rectiq; contineant. Hoc uitium effugere qui uolet (omnes autem uelle debemus) dabit operam, ut per insinuationem eius ad quem scribit, laudes ingrediatur. id autem commodissime faciet, si ab alterius egregiè factis, aut dictis incipiat: item si ab aliqua sententia, quæ nos ad uirtutis admirationem, inuestigationem, testificationemq; excitet, principium sumat: item si dicat, se admiratione quadam & splendore illius commotum, contemplari ea, non laudare uelle, magisq; ut alij cognoscant atq; imitentur, quàm ut ille res suas legat, ea scribere. Neq; uerò placet illud, quod est in tertio libro ad Herennium scriptum, ut dicamus id nos ex officio facere, quod causa necessitudinis intercedat. Officium enim dictis in utranq; partem omnibus, fidem & auctoritatem detrahit. Nam si laudamus, uel amori, uel meritis id tribuere existimamur: si uituperamus, uel odij, uel iniuriæ gratia facere id credimur. Imò in utranq; partem omnis, meo iudicio, tollenda suspicio est: dandaq; opera, ut aliorum, non nostra causa laudare quempiam, aut uituperare uideamur. Aristoteles in demonstratiua causa, libera maximè principia esse censet, ita ut etiam à re-

bus à causa remotissimis exordiri liceat. Quemadmodum Salustius apud nos fecit in Catilinarij, et Iugurthini belli principio. Id ego in dicendo non probo, in scribendo probo: præsertim si rectè, et per quosdā quasi gradus ad causam descēdamus, ut sequi ea quæ dicimus, nō trahi: cōiunctaq; esse inter se, nō consulta uideantur. Laus enim omnis uel admirationis, uel testificationis uim habeat, neque aperta propositione proponatur, necesse est: ne scribere ea tantū de causa uideamur, neu uenisse in eam mentionē, sed incidisse existimemur. Laudādi uerò ratio ex superiori præceptione petitur, ita tamē ut nō omnia, sed clarissima quæq; et ad causam nostrā accōmodatissima, nobis sciamus esse deligenda. Digressionibus tam in laude, quā in uituperatione crebris utemur, ut et iucundior laus sit sæpe repetita, et aliud agere uideatur oratio. Amplificationib. itē utemur per eas, quos in superiore libro docui, locos cōmunes. Hæ multū ualent etiā ad eas, quas scribimus, siue laudes, siue uituperationes augendas, et ad legentiū animos incitandos. Cōclusionib. breuib. et ad nostrā causam accōmodatis utemur: epilogis raris, ac breuib., ut scribi epistola, nō haberi oratio uideatur. Et quoniā unicuiq; laudādi finis præpositus esse debet (neq; enim ut laudemus, nos tantum ad scribendū adduci cōuenit) dabimus operā summo

mo studio, ut omnes laudes, omnia dicta, epistolā  
deniq; uniuersam ad eū, quē proposuimus, finē ac  
cōmodemus: eō nostras argumentationes tanquā  
ad signū aliquod dirigemus. Eadem omnia in uitu  
peratione spectāda sunt. Causa uerò eius rei, quo  
ad fieri poterit, necessaria afferenda, atq; in homi  
nū animis fundamenta tū causæ, tū beneuolentiæ  
firmissima iaciēda, ne quā de re nobis suspicio ex  
oriri possit, quod ad ea perscribenda uel ira, uel  
odio, uel inuidia, uel maleuolentia adducti simus:  
eoq; magis id uitandū est, quod omnis per se odio  
sa uituperatio est. Vituperādi aut ratio ex laudis  
præceptione sumetur, locis, ut diximus, cōmuta  
tis, uirtutibusq; in finitima uitia detortis. quæ quī  
dem præceptio quoniā per se facilissima est (omnes  
enim ad uituperādū, quā ad laudādū ingeniosio  
res sumus: & nos in uirtutib. quā in uitijs osten  
dendis exerceri malumus) prosequēda latius uisa  
nō est illud in utraq; ratione præcipiēdū, ut nihil  
impossibile, nihil incredibile, nihil nō uerū, aut cer  
tē uero quā simillimū, proximumq; dicamus: ne  
assentatores, si laudemus: si uituperemus, hostes,  
aut maledici uideamur. Si laudare extraneā per  
sonā apud amicū uelimus, tūc licebit ab officio no  
stro principiū sumere, & causas necessitudinis, si  
quæ nobis cū illo intercesserint, cōmemorare. Sūt  
autē causæ necessitudinis, amor, beneficiū, honor,  
I 2 cognatio,

cognatio, affinitas, uicinitas, patria, hospitalitas: item illa, morum, studiorumq; similitudo, praesertim bonorum. Quae si aderunt, in principio commemorabimus: si non aderunt, dicemus nos studio uirtutis, quo praecipue teneamur, uel nobilitatis, uel miserationis, uel pietatis, uel alia honesta ac probabili ratione, ad eum laudandum, siue ornandum, siue iuuandum esse adductos: petemusq; ab amico, ut insignem uirum tum cognoscere, tum complecti uelit: eiusq; rei fructum illi aliquem, uel studij, uel beneuolentiae, uel fidei, uel gloriae, uel utilitatis, uel saltem conscientiae pollicebimur. Quae quidem omnia ad commendatitias epistolas plurimum ualebunt. Si uero rem quampiam laudabimus, ut artem, disciplinam, professionem, uirtutem: danda opera erit, ne id modo studio, quod ea nos maxime res delectet, facere uideamur: sed si ea res amicum delectet, nos eius delectationi inservire ostendemus: si non delectet, dignam nos putasse rem dicemus, qua eius animus delectetur: paulatimq; eius fructus atq; utilitates commemorabimus. Ingressi uero materiam, eius tractandae rationem ex ijs quae supra scripsimus, repetemus. Finem eius conueniet esse, ut eam rem uel amemus, uel capeamus, uel frequentemus, uel certe in precio atq; honore habeamus. Ad eum rationes nostras omnes, argumentationesq; conferemus: idq;

idq; exemplorum in primis tum copia, tum claritate confirmabimus. Eadem in artis, aut uitij aliquius uituperatione, atque execratione sequenda ratio erit, ut eius rei tractationem nos, eius ad quem scribimus gratia, suscepisse uideamur: quod omnium odio ac detestatione dignam iudicemus. eam deinde ijs rationibus, quibus supra laudandam esse docuimus, detestabimur: eius damna, detrimenta, incommoda, ignominiā, labem, & perniciem proferemus: quantum deinde hominibus semper nocuerit, quanto in odio semper habitafuerit, plurimis exemplis ostendemus. Atq; hæc potissimum in laudandi & uituperandi genere seruanda esse iudicauimus.

### De gratiarum actione.

#### Cap. XVII.

Laudi uerò tum gratiarum actio, tum gratulatio, finitima, & penè coniuncta est. Vtraq; enim magna ex parte laudem continet. Et gratiarum quidem actio, tametsi non eodē semper modo tractatur, habet tamen semper tum accepti beneficij testificationē, amplificationemq;: tum aliquam seu uerborum, seu animi, seu rerum remunerationem. Beneficium quidem aut à dantis, aut à recipiētis persona, aut à re ipsa laudabimus. A dantis persona laudabimus beneficiū, si ostendimus illum non rogatum, non coactum, non debentem,

tem, sed ultro, libenter, liberaliterq; cōtulisse. Hoc loco eum à magnificētia, & animi magnitudine laudare poterimus. Si rogatus fuerit, dicere poterimus eū citius spe atq; opinione fecisse, aut etiā plus quā rogatus fuerit, dedisse. eius præterea in re præstanda sedulitatem, fidem, studium, laborem, industriam, operam, diligentiam, benevolentiam, aut horum aliquid cōmendabimus. Plus etiā illum, quā pollicitus fuerit, præstitisse: aut plus quā fuerit opus, oneris & laboris nostra causa suscepisse dicemus. Si uerò nostris beneficijs prouocatus, gratiam retulerit, dicemus eum uel plus quā acceperit, uel melius, uel maius, uel celerius, quā debuerit, reddidisse. A nostra persona beneficium laudabimus, si necessitatem nostram, aut calamitatē profecerimus: si partes, quas ab animo, uel à natura, uel à fortuna habemus, modeste ac uerecundè cōmemorabimus: easq; dicemus sine illo beneficio nos aut retinere, aut seruare, aut exercere nō potuisse. Item si nos ei uel affinitate, uel cognatione, uel patria, uel amicitia, uel ordine, uel studio, uel professione, uel moribus, uel alia huiusmodi re, quæ adducere hominem ad beneficium in nos collocandum potuerit, cōiunctos esse dicemus. A re ipsa beneficium laudabimus, si magnum, si insigne, si insperatum, si incredibile, si perpetuum, si utile, si honestum, si laudabile, si  
 oppor=

opportunitum, si deniq; iucundum nobis, & gratum tum tempore, tum loco fuisse, ostendemus. Mercedem uerò pollicebimur, siue in eadem, siue in maiore, nunquam in minore, nisi fortè aut rerum numerus, aut indignitas, aut labor beneficiũ augeat. Si facultas referendæ gratiæ non erit, nos, nostraq; illi perpetuò debere ostēdemus, animũ præterea, & uoluntatē nostrā erga illũ optimam aperiemus. Eum nos animũ si ostendere aliter non possumus, dicemus nos eius beneficijs & laudibus prædicandis omni loco, omni tēpore, omnibus hominib. ostensuros, eoq; pacto beneficia eius cumulatione, illustrioraq; reddituros. Neq; ab re interdũ fuerit, huius gratiæ relationē ad Deũ bonorũ omniũ largitorē, remuneratorēq; reijcere, ut ipse, qui solus et potest, et solet, meritis illius præmia digna restituat. Atq; hoc pro personarũ, quibus gratiæ agentur, qualitate faciendum erit.

### De gratulatione. Cap. XVIII.

Gratulatio quoq; non est à laudandi ratione disiuncta. Nam & rem, de qua gratulamur, & personam, cui gratulamur, laudemus necesse est. Neque hæc eadem semper ratione tractanda est. Nam & sola epistolam separatim facit, & cum alijs negotijs sæpe coniungitur. Item aliter amico, aliter principi, aliter in re magna, aliter in parua gratulamur. Seruare tamen hæc plerunq;



debemus, primum, ut lætitiā nostrā & ampliſſi-  
 mis uerbis explicemus, & ueram solidamq; esse  
 optimis rationibus doceamus. deinde ut rem, de  
 qua gratulamur, collaudemus: ostendamusq; si  
 res magna sit, dignam ea re fuisse personam: neq;  
 aliam, cui tantopere res ea, conueniret, facile  
 inuentū iri: neq; minus rei, quā personæ fuisse  
 prospectum. Si parua res sit, dicemus, eum qui-  
 dem multo maiora atque ampliora meruisse, sed  
 hunc ad cætera quendam quasi gradum atq; adi-  
 tum esse. Si restitutio uel fortunæ, uel dignitatis  
 sit, nō tam amissio deploranda (quanquam possit  
 ea culpa uel in homines, uel in tempora, uel in for-  
 tunam, uel in casum aliquem iurē conferri) quā  
 restitutio laudibus & lætitiā prosequenda, quod  
 eius uirtutis, dignitatis, nobilitatis, salutis habita-  
 tandem ratio sit. lætitiā uerō nostram aut à spe  
 cōfirmabimus, quod de illo sperasse tum nos, tum  
 alios multos antè dicamus. aut ab insperato auge-  
 bimus, quod rem tantam tam citò, tam prosperè  
 succedere potuisse, tum ob rerum temporumq;  
 difficultatem, tum ob peruersitatem hominum,  
 nunquam putauerimus. Quo loco eius uirtutem,  
 diligentiam, industriam laudabimus. optabimus  
 deinde illi, uel ei rei quam adeptus est, conserua-  
 tionem: tum cæterarum, aut similium, aut maio-  
 rum accessionem. Si magistratus fuerit, tum ad  
 illius

illius rectam, integramq; administrationē cohortabimur, si modò dignitas personæ patietur. sin maior erit personæ, quàm ut eam amicè cohortari atq; monere possimus: scire nos dicemus, eum se optimè atq; integerrimè, & ut in cæteris solet, in eo magistratu gesturū: magnamq; ex eo uel fidei, uel industriæ, uel diligentie, uel integritatis laudem reportaturum. dabimusq; operā, ut quæ facere debet, ea nos facturum esse eum dicamus. Si uerò is sit, quem admonere possimus, eum fideliter amicèq; quo pacto se gerere oporteat, admonebimus: dicemusq; eius rei uel gloriam, uel ignominiam non minus ad nos, quàm ad illum, pro nostra amicitia pertinere. Hæc (ut dixi) sunt pro rerum & personarum qualitate seruanda. Apud amicum enim breuius, & familiarius, imò etiam leuius tractanda sunt: dandaq; opera, ut nihil fictum, nihil fucatum, excogitatumq; nihil appareat, sed ut uerè nos gratulari, amicèq; intelligat. Apud principem omnia grauius, uberius, artificiosiusq; agenda, ut se magnifieri à nobis, colliq; cognoscat. Illud tamen in primis obseruandum, ut uel uera gratulatio nostra, uel ab omni certè assentationis suspicione aliena uideatur. sed de his hætenus.

De accusandi genere.

Cap. XIX.

I 5

Sequitur

Sequitur ex ijs quæ ad præteritū tempus pertinent, accusandi genus, quod multas in species distribuitur: quas quidē ut cōplecti facilius, atq; explicare possimus, tria potissimū considerabimus, causam, personam, actionē. Causa in crimen, iniuriā, uitiumq; diuiditur. Quicunq; enim à nobis accusandus est, aut deliquerit, aut offenderit, aut errauerit, necesse est. Aliud enim, quod ego quidem sciā, accusationi subiectū esse non potest. Persona uerò duplex est, rei, & iudicis: quæ nunc eadē est, nunc diuersa. Aut enim eum ipsum, ad quē scribimus, accusamus, & sue causæ quasi iudicē constituimus: aut aliū apud aliū accusamus. Actio quoq; species complures habet. Aut enim quasi apud iudicē accusamus, aut quasi apud amicū expostulamus, aut de iniuria nobis illata cōquerimur: quod etiam pro rerū personarumq; qualitate diuersis modis facimus. Iam uerò subditos per literas obiurgamus, increpamus, monemus. Quæ quidē omnia pro causæ et personæ qualitate non una ratione tractantur. Namq; (ut de causa primū dicamus) si leue & tolerabile crimen erit, quale est intermisisse scribendi officium, amicitiae consuetudinem aut leges non seruasse, nō respondisse amori, aut literis nostris, & quæ similia sunt: primū cum admiratione quadā id crimen explicabimus, deinde per confutationem omnes ei excusationes

nes auferemus: tū crimen ipsum augebimus, nosq;  
id magnificare ostendemus: nihil deinde à nobis  
tale commissum esse demonstrabimus, nostrumq;  
officium cum illius officio comparabimus. Quum  
autem illum quasi cōuictum nostris argumentis,  
rationibusq; tenebimus, illum quasi condemnan-  
tes mulctabimus, iucundissima mulcta officij in po-  
sterum duplicandi, cōsuetudinisq; cumulatiue re-  
sarciendæ. Si grauius crimen erit, cuius accusare  
amicum statuerimus, quale esset perfidiæ, doli,  
insidiarū, cuius rei ad nos iniuria pertineat, pri-  
mum à nostro in eum amore, nostrisq; meritis ini-  
tium capiemus: nostram in eum fidē, studium, be-  
neuolentiā, integritatemq; cōmemorabimus: nul-  
lāq; illi perpetrandi criminis causam fuisse osten-  
demus; deinde crimen ab eo commissum esse doce-  
bimus. Et quū diu illud auxerimus, tū qua de cau-  
sa cōmissum, inuestigabimus: causisq; omnibus cō-  
futatis, quæ illum quoquo modo cōpellere possent  
ad faciendū, aut nullā, aut turpißimā, minimeq;  
eius dignitati conuenientē illi causam fuisse osten-  
demus. tum quali pœna dignum sit crimen, inqui-  
remus: atq; illum quasi causæ iudicem statuentes,  
queremus ab eo, quid ipse de alio iudicaturus fue-  
rit, quo supplicio dignum existimaturus, qua in  
eū clemētia usus. Quod si seruare amicū statue-  
rimus, quā id sit ab amicitiae legibus et sanctita-  
te alien-

te alienum, ostendemus: dicemus tamen nos illi libenter ignoscere, modò uelit in posterum abstinere. Atq; hoc loco illum liberius monere, et si personæ qualitas patietur, etiam obiurgare poterimus. Postremò cum amicitia quadā quasi instauratione epistolam concludemus. Si crimen ad nos non pertinebit, quū diu illud auxerimus, detestatiq; fuerimus, satis erit pro nostra amicitia amicum, ut in posterum abstineat, admonere: eiq; infamia, pericula, poenas, ceteraq; quæ ad deterrendum hominem ualent, amicè, seuerèq; proponere. Si uerò alterius crimen apud principem, uel apud aliquē qui indicandi de illo ius habeat, defecerimus, exordium ab ingenti beneuolentiæ captatione sumemus. eam tum à nostra, tum illius ad quem scribimus, persona captabimus. Id quomodo faciendum sit, ex superiore libro repetemus. Deinde ad causam pedetentim accedentes, suspicionē odij, maledicentiæ, inuidiæ, calumniæq; omnem à nobis remouebimus: imò, si poterimus, amicitia inter nos intercedere dicemus, officiaq; ultro citroq; collata commemorabimus. His iactis fundamentis, crimen narrabimus: tum pro constitutionis genere, causam nostram argumentis, rationibusq; confirmabimus, confutabimusq; ea, quæ contrā aut dicta essent, aut dici potuissent. deinde petemus ab eo ad quem scribemus, ut hac

de re iudicium faciat : neq; inultum, aut impunitum tantū scelus patiatur. Tum quid futurū sit, si hoc impunē facere liceret, ostendemus : remq; omnes per locos amplificabimus. Conclusionibus ad finem, quem nos proposuerimus, accommodatis utemur. Nam si ea de re iudicium futurum sit, epilogo utemur : causaq; confirmata, exaggeratoq; crimine, quid de eo iudicij fieri oporteat, ostendemus : idq; ut fiat, rogabimus. Si de ea iudicium futurū non sit, crimen ipsum atrocibus uerbis detestabimur : & cum tempore querela, & hominum peruersitate, aut aliqua utili ad bene beateq; uiuendum sententia concludemus epistolam. Atque hæc quidem causa quo pacto tractari debeat, quoniam satis abundeq; superius à nobis dictum est, quæ hîc conueniunt, inde repetantur.

### De iniuriarum, uitiorumq; accusatione. Cap. XX.

Si apud amicum de iniuria exposulabimus, initium capiemus à nostræ amicitiae antiquitate, stabilitate, magnitudine, coniunctione : item à nostris in eum officijs, studijs, à nostra optima constantiq; uoluntate. aut si hic nos uel ætate, uel dignitate anteibit, à nostra in eū obseruantia, perpetuaq; uoluntate ordiemur : quamq; sit uel indecorum, uel turpe, amicum immeritò offendere, ostens

ostendemus: deinde iniuriam acceptam indigne  
atrociterq; explicabimus: atq; ab eo ipso profe-  
ctā esse docebinus. Duplex inde agendi ratio est.  
Nam si amicum grauius accusare statuerimus, o-  
stendemus illum tantum gratia offendendi fecisse,  
quod fecerit, siue ut nobis apertē noceret: quod  
inimici, non amici animi est: siue ut ipse ex ea re  
commodum aliquod consequeretur. Quarum re-  
rum utranq; ab amicitie legibus atq; officijs alie-  
nissimā esse demonstrabimus: atq; ad alterutram,  
siue utranq; rem cōprobandā uim argumentorū  
omnē cōferemus. Quod si is in officio uelit perma-  
nere, quō pacto nobis satisfacere possit interroga-  
bimus, idq; nos maximē expectare dicemus. Sin  
aliqua ex parte amicū accusare statuerimus, cau-  
sam illius iniuriæ causis multis allatis, cōfutatisq;  
ignorare nos omnino dicemus: neq; tamen existi-  
mare nos, illū nostri offendendi gratia, ut id face-  
ret, adductū esse, quod esset et ab eius natura, con-  
suetudine, humanitate, et à nostra amicitia, obser-  
uantia, meritis penitus alienū. Expectare aut nos  
magnopere dicemus, ut quoquo modo et suæ di-  
gnitati, et nostræ amicitie satisfaciat. Quod si is  
nos etate ac dignitate antecedit, quā indignum  
sit iuniorē à seniori, à potente impotentē, ab opu-  
lento inopē, à maiore deniq; minorē offendi, deci-  
pi, uexariq; per locū communē ostendemus: tunc  
nostram

nostrā ætatem, impotentiā, inopiam, imbecillitatem, cum illius ætate, potentia, opibus, & robore cōparabimus: deinde nostrā erga omnes innocentia, mansuetudinē, clementiā, benignitatēq; ostendemus: quamq; indignē nobis, & præter spē atq; opinionem accidat, conqueremur. Hic cum locis cōmunibus ad commouendā misericordiā usi fuerimus, rogabimus hominē, ut si prodesse aut non uult, aut nō potest, nocere certē non uelit. Si uitiorum aliquē reprehendere, aut accusare statuerimus, quoniā id ferē à superiori in inferiorē proficisci solet, uel monendo, uel obiurgando faciendū erit. Ab hoc tamē posteriori semper abstinendū, quū superiori uti licet: quū res grauior est, quā ut superius illud satis esse possit, ad posterius cōfugiendū est. Quū monere aliquē statuerimus, primum ostendere oportebit, nos eam rē, de qua agitur, probē scire: ne ille securius se excuset, quod à nobis ignorari putet: deinde eius rei admonitionem ad nos potissimum pertinere, uel ætatis, uel amicitia, uel sanguinis, uel aliqua iusta eius generis ratione: tum rem ipsam, uti gesta est, atrocius etiam atq; indignius, quā gesta est, exponemus. Deinde interrogabimus eum, nū ita res se habeat: num ipse eius rei autor fuerit: num rectē fecerit: num quum id faceret, consilium, prudentiam, aut iudicium adhibuerit: num suæ uel ætatis, uel nobilitatis,



litatis, uel dignitatis, uel salutis rationem ullam habuerit. Quum autem uidebitur his uerbis esse commotus, tunc admonitio sequi debet: ea se uera, grauis, recta, fidelis, et paterni aut fraterni affectus plena sit necesse est, quæ poenitentia, aut pudorem facti afferat, desperationem nequaquam: neque minus incitet ad futurorum cupiditatem, ac spem, quam ad dolorem et poenitentiam præteritorum. Admonebimus autem tum à persona, tum à causa. à persona, quum ostendemus eum fecisse rem indignam suis maioribus, sua cognatione, patriâ aut, si nihil horum habeat, sua ætate, nostra consuetudine, professione, amicitia eorum quibus cum uiuat. À causa admonebimus, quum ipsius rei per se indignitatem, sceditatem, abiectionem, uitiaque ostendemus: quantumque absit à uirtute, et recte facti ratione, atque honestate, docebimus: tum quid eum fecisse oportuerit, et quanto id facilius, honestius, ac laudabilius futurum, ostendemus: eumque in posterum ab eo uitio deterrebimus, atque ad uirtutem, et bene uiuendi rationem cohortabimur. Si obiurgabimus aliquem, ab iisdem ferè locis personam commouebimus, remque exaggerabimus, sed atrocius atque iratius agemus. anteaquam illi uitam cum exprobratione commemorabimus. qualis sit de eo spes in posterum, per irrisionem ostendemus. poenas ei multiplices impendentes proponemus.

nemus: eumq; tum ignominia, tum supplicijs deterrebimus: quantaq; eum incommoda, quanta pericula, quanta à Deo atq; hominibus supplicia maneant, aperiemus. Postremò eum tum à rebus, tum ab hominibus, quibus maxime fretus uiuat, tum etiam à nobis ipsis destitutū iri ostendemus, spemq; illi omnem rerum atq; hominum, quantum fieri poterit, adimemus. Sed hæc materia rariùs cadit in epistolam, nisi à patre in liberos proficiscatur. tamen quòd erat cognitu non inutilis, relinquenda non est uisa. Nunc ad defendendi genus transeamus.

### De excusandi, siue defendendi genere. Cap. XXI.

Defendendi atq; excusandi eadem, quæ accusandi ratio est. Partes easdem habet, causam, personam, actionē: quæ quoniam inter se ita coniunctæ sunt, ut separari nequeant, coniunctim quoq; à nobis tractabuntur. Omnis igitur causa aut excusatur, ut non facta: aut tanquam facta defenditur. Si culpa omnino carebimus, remq; excusare, ut non factam, apud amicum uoluerimus, ab admiratione eius, qui ita de nobis credat, aut scribat, incipiemus: nostram in eum beneuolentiam, obseruantiam, fidem commemorabimus: antea etiam ei uitam in memoriam redigemus: nunquid simile aut de maioribus nostris, aut de nobis ipsis

unquam audierit, interrogabimus. rem deinde à coniecturæ partibus, quas suprà docuimus, ab illisq; præsertim quas ipse ad probandū attulit, infirmabimus: omniq; ex parte incredibilem, inutilē, incommodam, indignam, difficilem nobis, & si poterimus, etiā impossibilem reddemus: quæq; is firmissima contra nos argumēta collocauerit, ea potissimū aut dissoluemus, aut infirmabimus, aut eludemus: deinde, si poterimus, quis autor eius rei fuerit, uel aperte ostendemus, uel coniecturis significabimus. Id si non poterimus, alios in suspicionem adducemus. Rogabimus postremò, ut omnem de nobis suspicionem abijciat: nostramq; amicitiam in posterum optima spe, multisq; pollicitationibus confirmabimus: rogabimusq; eum, ut animi atque amoris nostri quoduis periculum faciat. Si rem non factam apud superiorem excusabimus, in principio, quantum poterimus, nos in eius beneuolentiam insinuabimus, uereriq; nos dicemus ei quoquo modo aduersari: sed fretos eius humanitate, prudentia, beneuolentia, æquitate, sperare plus apud illum uel nostram innocentiam, uel ipsam per se ueritatem, quàm inuidorum criminationem aut perfidiam, tum fidei, tum auctoritatis habiturā: cui nostra in primis uita, consuetudo, & in eum obseruantia nota sit. quarum rerum utilis cōmemoratio erit. Culpam omnē in delatores, inuidos, calumniatores, maledicos trāsferemus:

feremus: ab eisq; hanc in nos fabulam uel ex sua natura, uel ex odio nostri, uel ex aliquo commo- do, quod se consecuturos sperent, uel eius ipsius fallendi gratia confictam esse dicemus: illis eum nullo modo credere oportere. Tum nostram in- nocentiam probabimus, & ea quæ in superiore excusatione præcepta sunt omnia, sed summissius & circumspectius exequemur: quæq; superius de amicitia diximus, ea in obseruantiam, fidem et ue- nerationem commutabimus: eademq; clausula e- pistolam concludemus. Si facta res apud amicum defendenda erit, aut per se rectè facta ostende- tur, aut accersita extranea causa cõprobabitur. Si per se rectè factam defendemus, aut iura, aut leges, aut instituta, aut consuetudines, aut ratio- nes, quibus id fieri liceat, afferemus: ostendemusq; nihil à nobis contra officium, contra amicitiam, contra æquitatem, aut contra eius uel salutē, uel dignitatem esse factum. quid autē factum sit, post breue exordium cum rei extenuatione narrabi- mus. Exordium aut tum admirationem eius qui rectè factum uel ignoret, uel accuset, tū proposi- tionem causæ iustam atq; honestā continebit. Pro- bata autem his, quas modò dixi, rationibus causa, nihil de nostra amicitia propter id minui debere ostendemus: quanti- q; nos eum semper fecerimus, atq; in posterum facturi simus, demonstrabimus: rogabimusq; eum, ut amicitiam, beneuolentiam,

fidem, diligentiamq; nostram omnibus suis in rebus experietur. Si defensio per se infirma erit, atque adiuncta extraneæ causæ uidebitur indigere, primum non id factum, quod ille opinetur, dicemus, atq; esse eum uel ab alijs, uel ab ipsa rei specie deceptum ostendemus: deinde quid nos fecerimus, quid factum esse dicatur, alterum extenuando, alterum augendo, exaggerandoq; , narrabimus: factaq; utriusq; comparatione, quid hoc ab illo differat, ostendemus. Si facti species mutari non poterit, mutabitur magnitudo, modus, tempus, locus, aut aliquid ex his quæ negotium possunt extenuare. Sin horum quoque nihil mutari poterit, finis saltem mutabitur: ostendemusq; nos id non eius offendendi gratia suscepisse, neq; fuisse unquam suscepturos, si qua ex parte illum offendi posse suspicati essemus. tum de nostra innocentia, natura, consuetudine, professione, de nostra item amicitia pluribus tum rationibus, tum exemplis agemus: nullamq; eius offendendi causam fuisse dicemus. Hoc loco assumptiue iudicialis partib. utemur: culpamq; , ut supra docuimus, uel in hominē, uel in rem quampiam transferemus. Postremò rogabimus, ut nobis ignoscatur omniaq; in posterum, quæ de amico sperare fas est, de nostra fide, diligentia, beneuolentiaq; pollicebimur. Si crimen, de quo aliquod iudicium futurum sit, apud superiores defendemus, utemur eadem,

dem, quam modò docuimus, tum distribuendi, tū defendendi ratione: sed omnia & circumspectius propter personæ dignitatē, & uehementius propter rei periculum tractanda sunt. Primum quidem ea dicenda, quæ beneuolentiā omni ex parte contrahant: deinde, quæ causam nostram omnibus modis probent: postremò, quæ ad ueniam & misericordiam impetrandā sint accommodata: quæ quo' nam modo facienda sint, quoniam superius satis abundeque dictum est, hoc loco non commemoro. Si uerò nostræ causæ maximè diffidemus, ad deprecationem fugiendum est: eiusque ad quæ scribemus, æquitas, mansuetudo, clementiaque laudanda. Peccatum si extenuari non possit, planè confitendum, atque omnis nostra spes in eius clementia, misericordiaque reponenda. quàm sepe, & quàm multis uel alij, uel ipse, simili, aut maiori de causa ignouerit, exponendum: quantamque ei apud Deum, qui etiam hostibus ignosci uoluit, uel apud homines ea clementia sit laudem allaturā. Proderit etiam per locum communem de humane naturæ imbecillitate & fragilitate differe re. Misericordia postremò, per eos quos supra docui, communes locos, quoad fieri poterit, est commouenda: omnisque fides, integritas, probitas, uirtusque in posterū promittenda. Atque in excusandi quidem, & defendendi genere, hæc scribenti seruanda sunt.

## De certis &amp; incertis rebus.

## Cap. XXII.

Et præteriti quidē temporis in hunc modū ratio se habet. Futurū tum in rebus certis, tū incertis uersari diximus. Certas res uoco, quas aut facienda, aut nō faciēdas esse, certa quadā animi sententia iudicamus: ut ea quæ uel principiū aliquod habent, uel cursu aliquo nataræ, aut consuetudinibus, certo quoq; temporis spacio redeunt, et quasi referuntur: ut si apparatus belli uideamus, bellū futurum esse tanquā certā rem dicimus. Item quū hyemem atq; æstatē ex ipso naturæ cursu recurrere singulis annis uideamus, de his quasi de certis rebus loquimur. Item quū annuos Romæ creari magistratus longa iam cōsuetudine compertū habeamus, futura comitia tanquā rem certā expectamus: magistratusq; ante tempus quasi certos statosq; petimus. Incertas uerò res appello, quæ neq; principiū, neq; tempus quo gerantur, certū habent, sed in spe, aut opinione, aut cōiectura, aut rerū uoluntatumq; mutatione uniuersæ sunt positæ. Et quoniā in utramq; partē sine ullo discrimine possunt euenire, iudicia nobis libera nō relinquūt. huius generis exempla sunt. Vtrū ego anno proximo Romæ sim cōmoraturus, utrū Venetias, an aliā Italiæ ciuitatē petiturus: Vtrum hoc anno Pōtifex moriturus sit. et quæ sunt generis eiusdē, quæ possunt in utramq; partem euenire, ut diximus.

mus. nos igitur à certis rebus incipientes, species singulas, quantū necesse uidebitur, percurramus.

De imperandi & prohibendi genere. Cap. XXIII.

In his prima est imperandi ratio, quæ superiorum, aut magistratuum, aut potestatem aliquā gerentium est. Sed quum illi per alios ut plurimum scribant, utrisq; præcepta tradenda sunt. Omnibus igitur, qui per literas aliquid imperaturi aut mandaturi sunt, siue suo, siue alieno nomine id agant, tria potissimū consideranda sunt, quibus imperetur, quid imperet, quomodo imperent. Nam etsi omnibus benignè mansueteq; imperandū est, (omnes enim humanitati quàm superbiæ libentius obtemperant) ingenuis tamē, & generosis animis mansuetius & consideratius imperandū est: sponte enim quæ agenda sunt, agunt. Retinenda tamē est semper maiestas imperantis, ne cui præest, subesse: aut quem cogere potest, rogare uideatur. In hoc genere aut nullo, aut quàm breuissimo exordio utendum est. Id, si res postulabit, ad ea quæ facienda sunt, lectorum animos præparabit, rationemq; , qua ipse ad imperandum ductus sit, aut utilitatem exponet. nonnunquā rei magnitudinem, difficultatem, necessitatem, honestatē, laudem, præmiūq; proponet. Id si opus non erit, à narratione incipiet eius rei, de qua imperaturus est. rem autem, quam imperabit, primū possibi-



lem ostendat necesse est: deinde etiā facile, aut certe non difficilem: honestam præterea & utilem, non ei qui imperat solum, sed ei quoq; qui imperium sustinet: & si poterit, etiam necessariam. Modum quoq; rei gerendæ, facultatemq; præbeat. Postremo, quid ex ea re emolumēti uel laudis sit uterq; consecuturus, ostendat. Mandandi eadem penē quæ imperandi ratio est: nisi quod qui mandat, rogare potest: qui imperat, si modò imperat, non potest. Precum tamē loco adhortationes atq; incitationes succedunt: quæ imperanti nunquam inutiles, sæpe etiam necessariae sunt. Præterea qui mādāt, familiarius ac lenius: qui imperat, grauius ac seuerius agat. Prohibendi quoq; ratio non sanē ab imperando multum discrepat. Quibus enim rationibus imperamus, iisdem quoque prohibeamus necesse est. Sed prohibemus asperius, et præmij loco pœnā, ignominiamq; proponimus. Plus tamē in omni re humanitas & æquitas, quàm ius ullum aut seueritas ualet. Sed de hoc toto genere hætenus.

### De suadendi & dissuadendi genere. Cap. XXIII.

Sequitur suadendi & dissuadendi, siue hortandi & dehortandi genus, quod in scribendo latissimè patet, atq; ad res plurimas est accommodatū. Nulla enim ferè epistola est, quæ non aliquam suasionem & dissuasionem habeat. Ea cuiusmodi esse

esse deberet, aut à quibus locis petenda esset, satis est à nobis in deliberatiuo genere demonstratū. Quum igitur aliquid nobis per epistolas suadendum aut dissuadendum erit, exordiū à nostra in quem scribimus, perpetua uoluntate & beneuolentia capiemus: ostēdemusq; quā in cæteris rebus nostrum studium perspectū, probatumq; fuerit. & quā nos cupidi simus, ut ei fiat aliqua uel uirtutis, uel gloriæ, uel fortunæ, uel dignitatis accessio: nosq; ad id summo studio dare operā, atq; inuigilare dicemus. deinde rem de qua agendum erit, honorifice proponemus, eamq; omni ex parte, ut intelligemus opus esse, laudabimus: aut si dissuadendū erit, uituperabimus. Tū eius, si suadebimus, utilitatem, honestatem, gloriamq;: si dissuadebimus, detrimenta, turpitudinem, atq; ignominiam, & quæ sunt superioribus rebus contraria, proferemus. deinde exemplis in utranq; partem utemur multis: tum superiora omnia ad eum ad quē scribimus, accommodabimus. ostendemusq; illum præ cæteris ea quæ diximus, consecuturum: hominemq; multis uerbis ad eam rem cohortādo incitandoq; inflammabimus, uel ab ea deterrendo ac dehortādo auertemus. Postremo, si opus esse uidebimus, preces etiam nostras in utranq; partem interponemus: & quā grata nobis ea res futura sit, omni ex parte declarabimus. Hæc erit meo iudicio, suadendi & dissuadendi ratio in scri-

bendo plerunq; seruanda. Mutabit ex hac fortasse aliquid ratio aut personarum, apud quas non semper eodem modo loqui licet: aut rerum, quæ non semper eo ordine modo ue tractandæ. Sed hæc omnia, quia certis legibus includi non possunt, scriptoris prudentia moderabitur: nos ad cætera genera transeamus.

## De commendandi genere.

### Cap. XXV.

Proxima est huic commendandi ratio, quæ quidem & epistolarum propria est (ea enim in alio scribendi genere non utimur) & ab omnibus qui quoquo modo scribunt, frequentissimè usurpatur. Nemo enim ferè est, qui uel se, uel alium aliquando non commendet. Itaq; tam uaria, quàm frequens est. Pro personarum enim rerumq; qualitate aliter atq; aliter ab omnibus tractatur. Personæ in hoc genere duæ potissimum considerantur: eius qui commendatur, & eius cui commendatur. Aliiter enim nos ipsos, aut liberos nostros, aliter familiares atq; amicos, aliter hospites & incognitos commendamus. Magna præterea doctrina, uirtutis, dignitatis, professionis, nobilitatis, fortunæ, cæterarumq; rerum in commendatione habenda ratio est: ut non eodem modo doctum et indoctum, sacrum ac profanum, magistratum, aut dignitatē aliquam gerentem, ac priuatū: item diuitem atq; inopem, liberum ac seruum, nobilem atq; ignobilem commendemus. Danda enim opera est, ut de

unoquoq; cōuenienter atq; accommodatē loquamur. Eorum quoq; quibus cōmendamus, delectus habendus est: ut non eodē modo principi atq; amico, item magistratui, ac priuato rem quampiam aut hominē commendemus. Cum amico enim & priuato homine agere utcunq; iure amicitiae & fortunæ possumus: Principi uerò & magistratui neq; omnes, aut omnia cōmendare, neq; sine summa æquitate aut necessitate, fas est. Cū amico præterea liberius omnia loqui licet: cum principe & magistratu, etiamsi nobis ille amicissimus sit, non licet. Habenda est enim ratio eius quā obtinet dignitatis, omniaq; apud eum grauitè seuerèq; agenda. Rerum quoq; non mediocris habenda ratio est. Et primum quidem nō nisi iusta, aut honesta, aut necessaria cōmendatio suscipienda est. deinde uidendū, ut res sit eius cui cōmendatur dignitati, facultati, naturæq; accommodata. quæ quidē ut cognoscere planē possimus, ante omnia eius quē commendare uolumus, tum rei, tum personæ habenda cognitio est, ne aut iniustā causam pro iusta, aut pro bono uiro pessimū commendemus. Commendatio autē omnis in duas potissimū partes consumitur, in laudem & suasionem. Nam & dignam nostrā commendatione eam, de qua scribimus, uel causam, uel personā ostendamus: & ei ad quem scribimus, quod uolumus, suadeamus necesse est. Et quanquam tam uaria est, ut diximus, commendandi ratio, ut præcipi in ea proprij, aut

certi nihil posse uideatur: hæc tamē in omni ferē commendatione seruanda esse uideo: primū, ut causas quæ nos ad cōmendandum duxerint, ostendamus: deinde rem ipsam breuiter explicemus: tum ei possibīlē, facilē, commodā, utilē, honestā, laudabilēq; reddamus. deinde rationes afferamus, quibus ille ad id faciendū adduci debeat. tum cohortationes & preces adiungamus: & si necesse uidebitur, misericordiā commoueamus. Postremo aliquod ei præmiū proponamus: deniq; alijs cum precibus epistolā concludamus. Quæ omnia quo pacto facienda sint, quanquā ex superiorib; præceptis magna ex parte colligi potest: tamen quoniā hæc adolēscētibus scribimus, ut cognitu facilia sint, paulo altius explicabo. Causam commendationis uel à nostra, uel ab eius quē cōmendamus, uel ab eius ad quē scribimus, persona sumamus necesse est. A nostra, quā nos eius quē cōmendamus, necessitudine, familiaritate, cognatione, officijs adductos esse dicamus. Ab eius quem commendamus, persona causas sumimus, cū eius probitatem, uirtutem, doctrinam, nobilitatem, inopiam, calamitatem, aut necessitatē aliquam uel à natura, uel à fortuna profectā commemoramus: à natura, ut corporis totius, uel mēbri alicuius imbecillitatem, item ætatis aut sexus infirmitatem, aut rerum omnīū ignorantia: à fortuna, ut membrorum, aut liberorum, aut rei familiaris, aut libertatis,

bertatis, aut ceterarū rerum nobis charissimarū  
amissionem. Ab eius ad quem scribimus, persona  
causam sumimus, quum eius naturam, humanita-  
tem, uirtutem, beneuolentiam & studium in om-  
nes bonos: item quum benemerendi de omnibus  
consuetudinem, cupiditatemq;: quum uel nostrā  
amicitiam, uel eius dignitatem, opes, copias, au-  
toritatem, magistratumq; cōmemorabimus. Atq;  
in has ferè causas exordiū consumitur. danda ta-  
men opera est, ut pluris eum ad quem scribimus,  
quàm eum quem cōmendamus, facere uideamur,  
ne ille aut obtundi à nobis, aut defatigari, aut par-  
uipendi, aut impediri putet, quo minus officium  
& magistratus rectè atque ex sententia admini-  
stret: plusq; nos illi tribuere, quàm aut ei quē com-  
mendamus, aut nobis ipsis, maioriq; nobis curæ  
dignitatem suam esse, quàm amici necessitatem  
ostendamus. Atq; hæc potissimum in exordio fa-  
cienda sunt copiosius, aut breuius, item accura-  
tius aut remissius, pro rerum personarumq; qua-  
litate. Narrandi suadendiq; rationem ex superio-  
ribus repetemus. Rationes, quibus ille ad rem  
quam uolumus faciendam adduci debeat, ab ijs-  
dem locis sumemus, à quibus causas cōmendatio-  
nis sumendas esse demonstrauimus. Sed uidendū  
erit, ne easdem sæpius, aut eodem modo repeta-  
mus. In exordio enim ad nos, hic ad illum omnia  
referenda sunt: ut ostēdamus eum uel nostra, uel  
eius

eius quem commendamus, uel sua ipsius causa moueri oportere. Preces atq; adhortationes ex communibus amplificationis locis, item misericordiae commouendae rationem ex superioris uoluminis praeceptione repetemus. Praemij proponendi ratio ab iisdem omnibus, quas modo dixi, personis petenda est: à nostra quidem, si nos eius beneficij gratos, memoresq; futuros esse promiserimus: si beneuolentiae, obseruantiae, et obligationis, aut etiam seruitutis incrementum pollicebimur: si in suis atq; amicorum rebus omnem operam, studium, industriam, diligentiamq; adhibituros nos esse dixerimus: deniq; si certum aliquod praemij genus offeremus, quod nostra eiusq; persona dignum uideatur. Ab eius quem commendabimus, persona praemium offeremus, si eadem fere de eo quae de nobis promittimus. Item si ostendemus eum ob suas uirtutes dignum eius, cui commendabitur, notitia, beneuolentia, familiaritate, beneficijs, gratia, consuetudine, domo, coniunctione, et ceteris rebus quae hominem homini conciliare possunt. Ab eius ad quem scribimus, persona praemium offeremus, si ei gloriam, famam, existimationem, autoritatem, immortalitatem, beatitudinem, aut si cetera omnia desint, conscientiam recte factorum, qui bono uiro fructus est maximus, proponemus. haec uero non omnibus omnia, sed ut cuiq; maxime conueniunt, ita maxime proponenda sunt. ac de commendandi quidem genere

genere hæc in præsentia dicta sufficiant. Cætera ingeniorum uarietas & prudentia excogitabit.

De petendi, concedendi, & negandi genere. Cap. XXVI.

Commendationi finitima, & penè coniuncta petitio est. Altera enim alterius auxilio maximè eget. Nam & cōmendatione petimus, & in petitione sæpe commendamus: sed quoniam utraq; locos habet peculiare, ac suos, tractanda mihi separatim est uisa. Igitur ad quemcunq; scripta sit petitio, exordium aliquod habeat necesse est: id causæ maximè coniunctum, rei q; quam petimus, ac commodatū esse debebit. In eo personam ad quā scribimus, nobis conciliare omnibus modis studemus. Id à nostra persona faciemus, si nostram beneuolentiam, obseruantiam, seruitutem, officia pro personarū qualitate commemorabimus. Ab eius ad quē scribimus, persona: si eius in nos, & in omnes bonos beneuolentiā, uoluntatem, merita atq; officia proferemus: si hominem ab illis maximè uirtutib. rebusq; laudabimus, quarū nos maximè indigebimus: ut si dignitates impetrare cupimus, potentiā eius laudabimus: si opes, liberalitatem: si patrociniū, pietatē, auctoritatēq; commemorabimus: eodemq; tempore duo asequemur. Nam & beneuolum nobis ipsum reddemus, et rei quā petimus, præstandæ facultatē illi esse ostendimus. A re ipsa beneuolentiā captabimus, si honestā, si laudabilē, si dignā, in qua ipse laboret, osten-



demus : præterea, si eius studio illum teneri dicemus. Exordium narratio statim subsequetur eius rei, in qua fundanda petitio est. Narrabimus autem ita, ut rem honestam, possibilem, facilem, opportunam, et quantum possumus, necessariam reddamus. Huic petitionē subiungemus: quæ, quo ad fieri poterit, brevis atq; attenuata sit, necesse est, ne multa et difficilia petere uideamur. Danda itaq; opera est, ut in uno potius uerbo plura, quam in pluribus unū petamus. tum, quibus id rationibus facere cōmodissimè possit, quibus etiā de causis debeat, aperiemus. Causæ autē uel à necessitate, uel ab honestate, uel ab utilitate, uel à laude et gloria, tum à nostra, tum à lectoris persona, tum etiā à rebus ipsis ducendæ sunt: quæ quoniā sunt à nobis superius pluribus uerbis explicatæ, non sunt hic latius repetendæ. Pollicebimur ei postremò aliquid loco præmij: cuius offerendi ratio satis à nobis in cōmendatione est posita. Quoniā uerò petita per epistolā aut negamus, aut concedimus, de utroq; genere mihi paucis est dicendū. Concedēdi ratio duplex est. Aut enim facilia, aut difficilia concedimus. si difficilia concedimus, primum amici petitionē exponemus: deinde rei difficultatē uel ab ipsius rei natura, uel à nostra facultate demonstrabimus: deinde difficultates omnes superatas à nobis eius causa, ostēdemus. Dicemus nos id uel amicitie nostræ, uel eius uirtuti, uel nobilitati, uel

bilitati, uel necessitati tribuisse. Si præmiū beneuolentia fuerit, id nos cupidè accipere dicemus. si debitis gratiæ, non recipiemus: sed nos magis his, quas modò dixi, partibus omnia debere ostendemus, nostrāq; operā omnibus in rebus offeremus: suisq; contrā, quum aliqua in re nobis opus fuerit, usuros nos esse dicemus. Si rem facilē, aut tanquā facilem cōcedemus, gaudere nos dicemus, oblatam nobis esse facultatem ei gratificandi, sed nostram in eum uoluntatem aliqua magna in re nos ei ostendere uehementer cupere. Tum de nostro in eum animo, de sua contrā in nos beneuolentiā, de uirtutibus, in primisq; de modestia, qua in petendo sit usus, aliquid dicemus. Deinde rem ipsam ut minimam, facillimamq; concedemus: rogabimusq; hominem, ut nostra opera frequentius, & maioribus in rebus uti uelit: nosq; idem facturos, quum opus fuerit, ostendemus: eaq; omnia dicemus, quæ animi nostri bonitatem, liberalitatemq; ostendant, ut libentissimè, quicquid fecimus, fecisse uideamur. Si quid amico negabimus, primū eius petitionem exponemus: deinde rei difficultatem, tum ab ipsius rei natura, tum à nostra impotentia, siue imbecillitate, tum etiam à loci, temporis, facultatum, instrumentorum, & ceterarum rerum culpa proferemus. Rem quoq; si poterimus, ei uel inutilem, uel incommodam, uel indignā eius

L persona

persona ostendemus. Rogabimus deinde, ut æquo animo ferre uelit: atq; ita rem negabimus, ut ille per nos non stetisse, quo minus efficeretur, existimet, nostrāq; in eū uoluntatē, beneuolentiā, fidē, diligentiaq; et præteritorū officiorū exemplo stebimur, & in posterū omnib. in rebus cupidissimē pollicebimur: dabimusq; operam, ne quid ex hac negatione nostræ amicitie detrahatur. Atq; his ferē modis in scribendo res certæ tractantur.

De cōsultandi genere. Ca. XXVII.

Incertæ uerò res aut nostræ, aut alienæ sunt: nostræ ferē omnes in cōsilio capiēdo, petēdoq; uersantur. Alienæ magis uariæ, multiplicesq; sunt. In illis enim, ut superius diximus, aut optamus, aut opinamur, aut interpretamur, aut id quod tam certis quā incertis reb. commune est, cōsiliū damus. Omnis igitur cōsultatio (ut à nostris incipiamus) partim talis est, ut sciamus quid nobis agendū sit: partim talis, ut dubitemus, atq; ab alio quæramus. Quā incertæ rei certum nobis cōsiliū propositū erit, uidēdū erit quā de causa id ad amicum scribamus. permagni enim refert, quā de causa quicq; scribatur. Nam si nostri cōsiliij rationem ad amicū cōmunicandi tantū gratia perscribemus, si is hoc à nobis petierit, dicemus nos ei satisfacere, aut gratificari uelle: nihilq; esse, quod cum eo de nostris rebus per nostram amicitiam

commu-

cōmunicare nōn debeamus. Si is à nobis nihil pē-  
tīerit, dicemus nihil esse, quod illū pro mutua nō-  
stra beneuolentia latēre debeat: uictosq; nos illius  
fide, prudentia, taciturnitate. si secreta res erit, ad  
eum nostri consilij rationem perscribere statuis-  
se: deinde si res ei penitus ignota fuerit, eam al-  
tius repetemus: si nota fuerit, breui narratione in  
memoriam redigemus. Tum causa posita, quid  
faciendum constet, quid in deliberatione relin-  
quatur, aperiemus. Deinde, si latē omnia pē-  
scribere statuerimus, singulas rationes, quibus ea  
res nōn facienda esse uidebitur, confutabimus: do-  
nec ad eas ueniamus, quibus ipsi, ut hoc consilium  
caperemus, adducti sumus. Deinde consilium ex-  
plicabimus, idq; rationibus confirmabimus, ut re-  
ctē nos deliberasse appareat. Deinde breui epilo-  
go epistolā concludemus: et quid ex ea cōmunica-  
tione uelimus, aperiemus. Si summatim nostrū cō-  
siliū describemus, nulla confutationū utemur: sed  
cōsiliū tantū ipsum aperiemus, breuiterq; cōfir-  
mabimus, et sine epologo concludemus: et quid ex  
ea cōmunicatiōe petamus, aperiemus. Si nostrū  
cōsiliū exponemus, ut amici iudiciū audiamus,  
eius fidē, prudentiā, ingeniū, iudiciū in principio  
cōmendabimus, resq; ab illo prudenter iudicatas  
proferemus: et rē, de quā capiendū cōsiliū est, gra-  
uiter proponemus: rogabimusq; hominem, ut di-

ligenter rem cōsideret: attentumq; his locis, quos  
 in superiore libro exposuimus, faciemus. ostende-  
 musq; nos nequaquā prudentiæ nostræ iudicioq;  
 confidere: ideoq; rem ad eum integram detulisse.  
 deinde causam, ut paulo antè dixi, narrabimus,  
 confutabimus, confirmabimus, nostrumq; consi-  
 lium exponemus: tum breui epilogo amici memo-  
 ria recreata, iudicium eius requiremus: ostende-  
 musq; quantum ei tribuamus, quantumq; in eo  
 spei reponamus, dicemusq; nos consilium nostrū  
 ex eius iudicio uel executuros, uel omisso. Si  
 uerò consilium nostrum incitandi ad idem amici  
 gratia perscribemus, ostendemus nos eum mone-  
 re non audere, prudentiamq; hominis, iudicium,  
 doctrinam, experientiamq; laudabimus. sed tamē  
 beneuolentia motos nos dicemus, ut quid ipsi uel  
 fecerimus, uel facere constituerimus, conscriba-  
 mus: ut nostrum consilium cum suo comparet, no-  
 strumq; si improbet, reprehendere: si probet, se-  
 qui possit. Si autem à nobis is alio consilio, quod  
 ipsi non probemus, utatur, nosq; eum in nostram  
 sententiam traducere studeamus, laudabimus in  
 principio prudentiam & sapientiam hominis, di-  
 cemusq; non audere nos, aut eius consilia repre-  
 hendere, aut suis nostra præponere: sed tamē uim  
 nostri amoris efficere, ut ei nostrum consilium ue-  
 limus perscribere, ut quum ipse suum, nostrumq;  
 habeat.

habeat, utrū placeat, sequi possit. Deinde rem, si opus erit, narrabimus: si non erit, omni ex parte confutabimus, ita ut nulla ex parte consilium eius procedere posse uideatur. Tum nostrum consilium exponemus, multisq; id rationibus confirmabimus: & quid inde boni sequatur, & mali declinetur, aperiemus. Tum ad id paulatim hominem alliciemus, cohortabimurq;: & quid inde cōsecuturus sit, multis uerbis colligemus. Quanquam aut hęc præceptio existimari possit magis ad alienas res, quàm ad nostras res, potiusq; ad dandi, quàm ad capiendi consilij rationem pertinere: tamen quoniam nostri consilij continet expositionem, in eaq; magna ex parte uersatur epistola, hoc potissimum loco tractanda mihi est uisa. Sed redeo ad incœptum. Quum consultatio talis erit, ut quid facturi simus, omnino dubitemus, consiliumq; ab amico requiramus, eius in principio prudentiam, fidem, probitatem, ceterasq; partes commendabimus, quæ ad consilij dandi rationem pertinere uidebātur: dicemusq; et quo pacto ipse alijs consulere soleat, & quantum nos in eius consilio spei, fideiq; repositum habeamus, quantūq; in omni re homini semper tribuerimus: deinde, quanti momenti ea res sit, de qua consilium petimus, exponemus: attentumq; ad eam cognoscendam, considerandamq; reddemus. Deinde rem de-

lucidè, breuiterq; narrabimus, omnesq; causæ partes, & quasi latebras, ut inde consiliū elici possit, referabimus. Tum ea cōsilia, quæ capi posse uidebuntur, per cōsultationē excludemus, remq; ipsam omni ex parte ambiguā, difficilēq; reddemus, ita ut quemadmodum in superiori consultatione, tanquam in comœdia, certa omnia & parata relinquebamus: nūc incerta atq; implicita omnia, tanquam in fine tragœdiæ relinquamus. Rogabimus deinde amicum, & per res ei charissimas, ut per deum, per suam fidem, per nostram amicitia obtestabimur, ut rectè nobis & fideliter consulat, nostræq; huic uel sollicitudini, uel curæ, uel dignitati, uel saluti subueniat. Quantum momenti sit in consilio capiendo ad res uel bene uel malè gerendas, ostendemus. Postremò, quantum illi debituri simus, quantiç; hoc cōsiliū facturi, declarabimus, nosq; illi uicissim & nostra omnia singillatim pollicemur. Atq; hæc ferè in nostris reb. seruāda sunt.

### De optandī ratione.

#### Cap. XXVIII.

In alienis porrò, quæ futuræ, incertæq; sint, uariè afficimur. Sed (quod ad hūc locum spectat) in primis optamus. Optandi autem ratio duplex est. Aut enim rem quampiam optamus, ut opes, dignitates, ualeitudinem, uitam: aut in re, quæ parta iam sit, aliquid euenire cupimus, ut in opibus conseruare

seruationem, incrementum, usum; in dignitatibus gloriam, honorem, auctoritatē: in uita tranquillitatem, letitiam, felicitatē, & quæ in cæteris rebus optari solent. Atq; in priori quidem genere ante omnia uidendum est, ut boni aliquid optemus, ne ei cui optamus, aut noceat, aut certè non prosit: quale esset, si auaro pecuniæ magnitudinem, aut furioso insanix materiam optarem. Deinde, ut id quod optamus, possibile & uerisimile sit, ne aut non sacerdoti pontificatum, aut priuato homini summum imperium optemus: quæ quidem tametsi fieri quoquo modo possunt, tamen quoniam ijs ordo rerum humanarum, cursusq; repugnat, ut à uero longissimè absunt, ita debent à boni uiri tum animo, tum scriptis abesse quàm plurimum. Danda præterea opera est, ut non uerisimilia modo, sed conuenientia etiam personis optemus: ut ciui in sua patria magistratus, principi regnum, pontificatum maximum episcopo: quæ nõ solū esse possunt, sed frequenter quoq; eueniunt. In primis uerò in optando modesti esse debemus, ne blandiri magis, quàm optare uideamur. Gratissimum autem fecerimus, si ut cuiq; aliquid maxime cordi est, ita id illi optabimus. Nobis tamen in optando grauitas est, & prudentia retinenda: ut si quis falsa de se persuaserit, nos illi continuò uana optemus, hominemq; in falsa de se persuasionem



suasione confirmemus, et spe uana impleamus. In posteriori genere & eadem honesti, possibilis, uerisimilis, & congrui ratio seruanda est: & precesiones illæ partim ex ipsarum rerum natura, partim ex uirtutum officijs, & bene beateq; uiuendi ratione ducendæ sunt. Ex ipsarum rerum natura, ut quum opes ad usum, non ad possessionem optantur: quum magistratus ad publicam utilitatem, non ad eorum qui illos gerunt, cupiditates explendas bonis ciuibus optantur. Ex uirtutum officijs, & bene uiuendi ratione ducimus precesiones, quum opes ad liberalitatem, magistratus ad iustitiam, dignitates ad uirtutem quampiã exercendam, siue ad gloriam, aut beatitudinem comparandam optamus. Atq; hæ potissimum nostris precesionibus subijci rationes debent. frustra enim optamus, nisi rationes quoq; nostrorum uotorum subiungamus. Precesionibus autem cohortationes adiungi debent, ne optare tantum eius rei, quam uolumus, euentum, sed iuuare quoque amicũ ad eam rem consequendã, & manuducere quodammodo uideamur. Hoc aut genus raro epistolam per se facit: sed aut gratiarum actioni, aut gratulationi, aut laudi, aut alijs generibus adiungi, atq; admisceri solet. tamen si quando accadat, ut hac solum de causa scribere uelimus, si qua de re certa spes, aut opinio erit, dicemus nos ea de re  
audiſſe

audisse aliquid: ut, proximis comitijs eum Præ-  
torem, Pontificem uel creandum. Quo loco, quàm  
gratum id nobis, si euenerit, futurum sit, tum ab  
eius, tum à nostra persona, tum à re ipsa ostende-  
mus: ab eius persona, si eius uirtuti, dignitati, no-  
bilitati, meritis consultum iri dicemus: si quæ eum  
dignitas, autoritas, gloria, item quæ opes, copię,  
facultates, quæ deniq; rerum omnium actiones con-  
sequentur, indicabimus: à nostra persona, si quæ  
utilitas, dignitas, lætitia, fortuna, dignitatis uel ac-  
cessio sit inde consecutura, demonstrabimus: à re  
ipsa, si tum demum rectè administrandam, curan-  
damq; ostendemus: si dicemus rem illam tali uiro  
indigere, neq; tam uiro quàm rei consultum iri.  
Quæ quum fecerimus, optabimus, ut ita ueniat:  
rationesq; quas superius docui, subiungemus. tū  
hominem hortabimur, rogabimusq; ut spem at-  
que expectationem tum nostram, tum eorum per  
quos dignitatem, aut rem illam consecuturus est,  
tum cæterorum omnium non modò non frustretur,  
uerumetiam augeat atq; accumulet. Quòd si  
nulla certa res uotis nostris erat præposita, eum  
initio laudabimus ab his potissimū partibus, quæ  
consentaneæ uidebuntur ei rei, quam illi opta-  
re uolumus: ut si magistratum optauerimus, ab  
iustitia & integritate laudemus: si sacerdotium,  
à uitæ, morumq; probitate, à religione, & cæte-

ris eiusdē generis rebus : deinde ostendemus, quid meruerint, atq; illi uirtutū et uitę pręmia digna optabimus: neq; optabimus solū, sed spem quoque eadem de re ostendemus; tum ob cognitam omnibus eius uirtutem, & probitatem: tum ob temporum principūq; naturā: tum ob alias causas, quę in unaquaq; persona excogitari possunt. Hortabimur postremo eū, & rogabimus, ut ab eo uitę instituto non discedat. Nam & satis magnū pręmium rectę factorum in pręsentia conscientiam esse, & in posterum à Deo omni spe aut cogitatione maius atq; augustius expectari. Ac si quando separatim est per epistolam optandum, hac ratione, meo iudicio, optandum est: sin uota nostra cum laude, aut gratulatione coniungemus, hæc eadem ferē, sed breuius, contractiusq; seruabimur. Sed de optandi ratione hætenus.

### De prædicendi, interpretandi, opinandiq; ratione. Cap. XXIX.

Illā quoq; prædicere, cōiungere, interpretari, et si quę sunt alia eius generis, quę in opinione posita sunt, quanq̃ rarò per se epistolā, aut aliud scribendi genus faciunt, possuntq; epistolarū magis loci quàm genera uocari, tamē & quoniā possunt aliquando per se epistolā facere, & habent sub se (ut docebimus) alios atque alios locos, separatim mihi breui-

Breuitè tractāda uisa sunt. Igitur prædicere qui uolet, siue ille arte aliqua, & scientia, siue ex prudentiæ ratiocinatione prædicat, ante omnia meriti se nihil certi, nihil particularis prædicere uel debere, uel posse. Atq; maximū imprudentiæ argumentum est, quum ea quæ uel in hominū uoluntate, uel in uarietate fortunæ tota sita sunt, putat se quispiam aut prudentiæ, aut scientiæ ratione prædicere posse. Itaq; uidendum in primis est, quid possimus, quid debeamus prædicere. Quū autem ad scribendum accedimus, tria in exordio faciendū sunt: proponenda res, de qua dicturi sumus, cum allectione lectorum: quo pacto eam aut prædicere possimus, aut uelimus, ostendendum: remouenda omnis tum temeritatis, tum diuinationis suspicio, ne aut ea quæ sciri à nobis non possunt, temerè nobis arrogare: aut diuinandi peritiam, quæ ab homine docto & sapiente dissidet plurimum, simulare uelle uideamur. Sed ostendendum, quicquid nos dicimus, amici gratia, & beneuolentiæ magnitudine adductos dicere, ut ille uel tutior in periculis, uel in rebus gerendis consideratior, & prudentior possit esse. Deinde ad causam paulatim accedendum, et partim ex antea factis, partim ex præsentibus futura per similitudinē, et comparationē rationū, quodā quasi digito demonstranda. addendæ singulis rebus probabiles

babiles rationes : addenda signa , argumenta , &  
 cetera omnia , quæ possunt id quod uolumus , ali-  
 qua ex parte comprobare. Quòd si discriminẽ aut  
 periculum amico prædicamus , omnia metu au-  
 genda sunt : exemplis præterea eorum , quibus idẽ  
 accidit , multis , illustribusq; utendum. His , prout  
 opus esse uidebitur , suasio , uel dissuasio , uel admo-  
 nitio subiungenda. Proxima , & penè coniuncta  
 prædictioni coniectura est , in qua primùm nos  
 rerum incertitudinem , & ignorationem excusa-  
 bimus. Deinde in eam , quam superius dixi , amici  
 gratiam & beneuolentiam , ea quæ scribimus , re-  
 feremus. Nonnunquam illa Ciceronis sententia in  
 exordijs uti poterimus , ut dicamus , Illũ præsentĩũ  
 quidem rerum uel publicarum , uel domestica-  
 rũ habere alios & scriptores , & nuncios : à nobis  
 uerò , quæ in cõiectura posita sunt , quæq; nobis ui-  
 dentur fore , tanquam ab homine eius amãtissimo  
 & non imprudenter monente , expectare oport-  
 tere. Deinde res , si qua incidit , narranda , conie-  
 cturæq; explicandæ , & signis , argumentis , cete-  
 risq; locis , quos in causæ genere docuimus , confir-  
 mandæ. Quo loco magna tum prudẽtia , tum mo-  
 deratione utendum , ne quid temerẽ , aut arrogan-  
 ter , aut inconsideratẽ , aut imprudenter de rebus  
 personis ue dicamus : ne non tam amici rem age-  
 re , quàm damnare aliquem , et in odium adducere  
 uelle

nelle uideamur. Tum res similibus, atq; exemplis, si opus fuerit, confirmabitur: si periculosa erit, suspicionibus tota respergetur. Deinde omnia ad eum, qui propositus erit, adhortandi, dehortandi, rogandi, aut rem aliquam obtinendi finem accommodabuntur. Eiusdem quoq; generis est interpretatio non questionum, quæ ad studiosum illud, & contemplatiuum scribendi genus pertinent, sed negotiorum: quum aliqua signa rerum futurarum uidemus, quæ dubios atque ancipites rerum euentus faciunt: ut quum uel hominum uoluntates, uel actiones aliquæ, uel sententiæ ita dubiæ atq; obscuræ sunt, ut in utranq; partem accipi possint. Quæ quum inciderint, ut amici gratia interpretaturi simus, primum quidem de ea re, siue persona in uniuersum differemus: & quid in ea boni, quid mali cognoscamus, ex ipsius natura, & consuetudine ostendemus. ut si quis taciturnus sit natura, & nobis de amici causa breuiter, obscureq; responderit: id nos non superbiæ, aut iracundiæ, aut malæ in nos uoluntati, sed naturæ tribuemus. item si qua res ob difficultatem, aut ob naturam sui generis, tardius quàm uolumus expediat, id nos, quum ad amicum scribemus, non odio personarum, aut rei tædio, sed ipsius naturæ, difficultatiq; tribuemus. omnia uerò in meliorem partem semper interpretabimur, ne ami-

cum in discrimen, aut desperationem adducamus. Quod si quid in peius interpretari necesse sit, quoad fieri poterit, bono animo amicum esse iubebimus, nostramq; illi fidem, operam & diligentiam pollicebimur. Si autem incerta sint omnia, ut neq; coniectura, neq; interpretatione aliquid cōsequi facile sit, de toto rerum aut personarum genere in uniuersum disputabimus: & quid in similibus rebus euenierit, aut quid aliæ personæ in ijsdem rebus, aut quid in alijs eadem personæ fecerint, ostendemus: & quantum licebit, per similitudines, aut comparationes idem fore argumentabimur. Tum quid inde euenire possit, omni ex parte considerabimus: & quid nobis faciendum, aut quo pacto cuiq; parti occurrendum uideatur, quantum opinione asequi poterimus, ostendemus: ad eamq; rem nos, nostraq; omnia, ut supra docuimus, offeremus. De ijs quidem quæ in coniectura & opinione posita sunt, hæc mihi præcipi uidentur posse. Cætera tum ætas, tum doctrina, tum prudentia (optima rerū omnium, actionūq; magistræ) facile ad scribendi rationē accommodabit.

De cōsiliij dandī ratione. C. XXX.

Reliqua est ex hoc uniuerso genere dandi consilij ratio tam certis quàm incertis rebus communis: quæ quidem tametsi cū suadendi & dissuadendi ratione coniuncta est, tamen quoniā aliā quam

dam

dam in scribendo rationē habet, diuersaq; præceptione continetur, consulto à nobis in hunc locū, ut separatim tractaretur, dilata est. Constat igitur hæc quidē tota ratio suasionē, & dissuasionē: sed habet differentias plurimas. Plurimū enim refert, sponte an requisiti, in re certa an incerta, itē integra an inchoata, consiliū demus. Multa etiam sunt personarū discrimina. Neq; enim eodē modo superiori, atq; æquali, aut inferiori consilium damus. Atq; hæ differentie quū inter se miscētur, cōmutanturq; innumerabiles penē uarietates ex sese pariūt. Possumus enim ad superiorē tum sponte, tum requisiti, de rebus nūc certis, nūc incertis, uel integris, uel inchoatis scribere. isdē apud æquālē atq; inferiorē differentiis uti possumus: quas quidē omnes persequi & infinitū, & superuacuum esset. Nos quæ omnibus maximē communia præcepta iudicabimus, ea potissimum persequemur: cætera scribentium ingenijs inuenienda relinquemus. In omni igitur dando consilio, siue id sponte, siue requisiti faciamus, primū uidendum est, ne aut nos temerē alienis rebus ingerere, aut nostræ prudentiæ plus arrogare, quàm æquum sit, aut aliorum consilia contemnere, et nobis tantum credi uelle uideamur. Quod quidē facile assequemur, si aliorū prudentiā, iudiciū, cōsiliū in principio collaudabimus, nostra omnia extenuabimus.

Item



Item si nos uel eius precibus, uel nostra in eum  
 incredibili beneuolentia, uel magnitudine suorū  
 erga nos meritorū, uel aliquo nostro officio ad-  
 ductos, non quidem ad consilium dandum (quod  
 id fieri à nobis posse non putemus) sed ad nostrā  
 sententiam aut uoluntatē declarandam nos esse  
 dicemus. Quo loco pulcherrimæ illæ insinuationes  
 fieri solent, quā beneuolentiam nostram cum  
 illius sapientia atq; autoritate cōmittimus, & in  
 aliquod quasi certamen, pulcherrima atque ho-  
 nestissima sententiarum colluctatione produci-  
 mus: et id nunc ab eius prudentia retrahi, nunc à  
 nostra beneuolentia concitari, hinc non audere,  
 hinc cogi nos dicimus: & plurimis uerbis uim no-  
 stri amoris, quæ continere se non possit, excusa-  
 bimus. Quē locum totum pulcherrimè exequitur  
 Cicero, cum sæpe aliàs, tū in illis ad M. Marcellū  
 epistolis. Illud deinde obseruandum est, ut quan-  
 tum nobis prudentiæ, autoritatisq; detrahimus,  
 tantum fidei atq; amoris addamus: ut si pruden-  
 ter, aut maturè, aut efficaciter non possimus, fi-  
 delissimè certè illi & amantiissimè consulamus.  
 Atque hæc in exordio, in quo summa uis est, ple-  
 runq; seruanda sunt: nisi uel ad inferiores, uel ad  
 amicissimos scribamus: quibus cum omnia fami-  
 liariter agemus ut amicitie & personæ ratio po-  
 stulabit. Exordio, si qua inerit, narratio subiūgen-  
 da erit:

da erit : si nulla res erit, quæ narretur, in causam latenter ingrediendum: atq; ita cum exordio causa coniungenda, ut continuari res eadem, nō alia incipi uideatur. Si in re certa consilium dandum erit, causa primū tota explicanda: partesq; uniuersæ, quasi latebræ, aperiendæ sunt. Tum quid in ea honestum, quid turpe sit, quid utile, quid inutile, quid deniq; boni, quid mali, oratione peruestigandum ac discutiendum est. Si unicum in ea consilium sit, ad id oratio tota & persuasio dirigenda: et quo pacto id optimè atq; honestissimè succedere possit, ostendendum. Si plura sint cōsilia, optimū atq; honestissimum quodq; deligendū: cætera omnia confutanda, ne dubius atq; incertus amicus animus relinquatur. Si quando pugnare inter se utilitas atq; honestas uidebuntur, utili semper honesta ratio præponenda: dandaq; opera, ut amicus intelligat, quā ipse rem utilem putet, eam nisi honesta sit, non esse utilem, neq; posse utilitatem ab honestate separari, sed specie atque ignoratione boni homines decipi, atq; adduci ut alterum ab altero separent; quod reuera non possit. Si autē res integra non fuerit, & aliquid sit contra nostram sententiam inchoatū, maxima uis in confutatione ponenda erit: dandaq; opera, ut id quod inchoatum est, plurimā & maxima tum mala, tum inconuenientia consequi, si perficiatur, ostenda-

M      mus:

mus: atq; id tum aliorū, tum nostro, si poterimus, exemplo cōprobandū erit: et quid uel alij, uel nos ipsi in re simili fecerimus, proponendū. Magnā enim uim habebunt ea cōsilia, quæ uel nobis ipsis, uel alijs profuisse demōstrabimus. Si uerò res incerta fuerit, uniuersum amici statū optimē antea cognitū ante oculos proponemus: atq; hinc quid illi cōueniat, hinc quid fieri possit, ostendemus. et tunc quidē non unū tantū illi consiliū dabimus, ne si id fortē nō successerit, omni ex parte destitutus sit: sed multa in omnē euentū cōsilia, quasi quædā præsidia, locis ipsis singulis disponemus: ut quocunq; res reciderit, aliquid habeat amicus, quod sequi possit: omnibusq; indagatis, ac peruestigatis partibus, quid in unaquaq; re boni, uel mali, uel declinetur, uel insurgat, ostēdemus: nosq; semper ad id, quod antē dixi, honestatis fundamētū, quantum poterimus, referemus. Sed si omni ex parte incommoda ostendantur, minima quæq; toleranda esse suadebimus. Conclusiones autē ex ipso cause fine assumemus, ut ostendamus, quid ex eo consilio secuturum sit. aut ab officio nostro, beneuolentiaq; ducemus, ut nos testificandi amoris nostri, aut seruandi officij, non dandi consilij gratia, nos ea commemorasse dicamus: nosq; consiliorū omnium ministros, effectoresq; quantum licebit, præbeamus. Ac de hoc quē toto genere satis in præsentia dictum

dictū puto. Quoniā aut huius uoluminis magnitudo satis creuit, reliqua in proximū referuabimus.

LIPPI BRANDOLINI AD REuerendis, patrem & D. Franciscum Picolmineū Card. Senensem, Deratione scribendi Liber tertius.

De affectibus. Cap. I.

**A**bsoluto in libro superiore maximo illo, ac difficillimo docendi genere, sapientissimè pater, superest alterū illud, quod in mouendis affectibus positū esse diximus. quod quidē, et quia latè patet, atq; ad omnes pertinet, et quia magnā scriptis omnib. uim atq; autoritatē affert, nō modo cognitione dignissimū, sed maximè etiā necessarium nobis est uisum. Id nos in duo genera partiti sumus: alterum quod ad concitandos, alterum quod ad leniendos, sedandosq; affectus pertineret. De quo quidem toto genere antequam dicere incipio, pauca mihi de affectibus in uniuersum dicenda sunt. Mouere enim affectus non possumus, nisi quid affectus sit, & unde originem habeat, cognoscamus. Id ego nunc, quantum ad nostram hanc institutionem necesse uidebitur, paucis explicabo. Est igitur affectus, uehemens quædam in rem quampiam animi commotio. id Græci πάθος uocant. Ex nostris, qui uerbum de uerbo ex-

primere conati sunt, passionēs appellauere. Cicerō nunc eos morbos, nunc ægritudines, nunc affectiones uocat. Nos de uerbo magnopere solliciti non sumus, modò constet, id esse uehementem quandam, ut diximus, animi passionem, et commotionem. Ea ex opinione quadam in animos nostros proficiscitur. Quoniam autem omnis opinio, aut boni, aut mali est, ut species affectionum duæ sint, una quæ bonum, altera quæ malum quadam opinione concipiat: his nos bonum aut malum, aut præsens, aut futurum, opinari possumus. Hæ duæ species alias rursus totidem ex sese pariunt, quatuorq; omnes efficiunt: quarum duæ bonum, aut præsens aut futurum: duæ malum, sub eadē temporis ratione, respiciunt. Ac futuri quidē boni, cupido, siue spes: præsentis, uoluptas, siue lætitia nominatur. mali uerò futuri, metus, siue timor: præsentis, dolor, siue tristitia esse dicitur. Ex his uerò quatuor, quasi fontibus, species penē innumerabiles oriuntur: quæ quoniam non huius institutionis sunt, non sunt à nobis omnes hoc loco explicandæ. Insignes enim attigisse, satis erit. ex illis certè cognoscentur. Sunt igitur insignes ex eo genere, quæ ad futurum bonum pertinent, amor, cupido, spes, audacia, ira: his contrariæ, quæ ad futurum malum spectant, sunt, odiū, abominatio, desperatio, metus. Iræ uerò nullus affectus

fectus est cōtrarius: propterea quòd illa omnium iniuriarum patiens, siue, ut rectius loquar, non sentiens natura inueniri nequeat. Præsentis boni sola lætitia, mali sola tristitia, seu dolor inuenitur. Quoniam autem hi affectus omnes tum dicendo, tum scribendo uel cōcitari, uel sedari possunt, sed alij frequentius concitandi, alij frequentius sedandi sunt: de singulis nunc, ut necesse uidebitur, differemus: eodemq; tempore, ut breuiiores, dilucidioresq; simus, concitandi, sedandiq; rationem persequemur, à prioribus potissimum incipientes.

### De amore concitando, & sedando. Cap. II.

Quum autem affectus omnes eiusmodi sint, ut & ad uirtutes, & ad uitia detorqueri possint, ut amor, qui tum ad studium uirtutis & amicitie, tum ad libidinem & impudicitiam applicari potest: & cupiditas, quæ tam honorum, aut pecunie, quàm scientiæ, aut religionis, aut optimarum rerum est: ante omnia de ijs concitandis qui ad uitia pertinent, aut de ijs qui ad uirtutem spectant reprimendis, nihil mihi dicendum est omnino. Nam & homines per se satis abundeq; ad uicia procliuēs sunt, & nos uirtutes docemus, non uitia: sed omnis nostra præceptio tum ad utiles concitandos, tum ad noxios restringendos est ac-

commodanda. Id autem per communes locos faciendum: nam proprios cuiusque uel affectus, uel materiæ referre infinitum esset. Igitur, ut de amore primum dicamus, si quem ad amorem cuiusquam uel hominis, uel rei statuerimus allicere, dabimus in principio operam, ut quàm maximam possumus beneuolentiam, fidem, atque autoritatem nobis apud lectorem comparemus. Quæ quidem tametsi in omni persuasione, atque adeò in omni materia facienda sunt, in affectibus tamen mouendis præcipua esse debent. Amicus enim, nisi assentiatur ijs quæ dicuntur, eumq; qui dicat, quodammodo uereatur, non facile mouetur. Ac de beneuolentia quidem comparanda superius satis abundeq; diximus. Fidem comparabimus, si nos eius rei, de qua scribimus, scientiam, aut experientiam habere ostendamus: si nos ab omni adulandi, aut fallendi suspicionem liberabimus: nostramq; naturam ab his rebus semper alienissimam, idq; illi exploratum esse, aliquo, si opus erit, exemplo, aut testimonio demonstrabimus. Item, si nostram in eum uoluntatem, beneuolentiam, fidem, si nostra officia, nostram amicitiam commemorabimus: si quantum ei nostra consilia, nostræ admonitiones hactenus profuerint, commemorabimus. Item, si nobis eum semper credidisse, & de nostra fide periculum

culum sæpe fecisse, proptereaq; debere nunc etiam nobis credere ostendemus. Item si rem ipsam à loco, à tempore, magnitudine, occasione, facultatibus, & cæteris locis credibilem faciemus. Autoritatem comparabimus, si honestatem, uirtutem, probitatem, doctrinam, grauitatem, modestiam in scribendo proferemus. Hæc autem omnia tum fidem, tum autoritatem summam nobis apud omnes comparabunt, si uos uel ætas, uel dignitas, uel potentia, uel hominum existimatio, uel nostra doctrina, uel uita commendabit. Hæc quum fecerimus, paulatim ad causam ipsam uel apertius, uel occultius, pro causa ipsius qualitate descendemus: eiusq; uel dignitatem, uel iucunditatem, uel utilitatem, uel commodam, uel laudem lectori proponemus: nosq; de eius dignitate, salute, commodis, gloria semper sollicitos fuisse, proptereaq; nunc ad eum scribere dicemus. Atque hi in omni penè affectu mouendo ( ne eadem sæpius repetenda sint ) communes exordiorum loci sunt. Nec tamen omnibus omnes, sed qui maximè necessarij uidebuntur, singulis affectibus sunt accommodandi. Si qui erunt alicuius affectus proprij, suis locis dicentur: nunc ad amorem redeamus. Igitur quoniam amor aut in hominem, aut in rem conferri potest, si amicum attrahere ad ho-



minem quempiam amandū statuerimus, primum quidem hominē illum magnopere cōmendabimus cū ab alijs partibus, à quibus præ cæteris cōmendari posse uidebitur : tum uerò ab illis, quibus is ad quem scribimus, maximè delectatur. deinde ea persequemur, quibus amor maximè conciliatur, morum, studiorumq; similitudinem, humanitatē, fidem, modestiam, urbanitatem, suauitatē consuetudinis, cæterasq; uirtutes, quæ hominem homini conciliare solent, in quibus materia latissimè patet. Illa quoq; nos ad amandum quempiā sæpenu-mero incitant, ætas, patria, nobilitas, dignitas, fortuna. Nam & æquales, & ciues, & nobiles, & honore, dignitate, atq; autoritate insignes, & opibus, fortunisq; affluētes, libentius amamus, quàm eos qui cōmune nobiscum omnino nihil habeant, aut nulla in re nobis uel præsidio uel ornamento esse posse uideantur. Itaq; quum hæc, uel omnia, uel magna ex parte illi inesse ostenderimus, utilē, honestam, laudabilem, iucundam, stabilem, perpetuamq; eius amicitiam fore demonstrabimus; atq; in ea re innumerabiles amicitie fructus, commoda, ornāmēta, suauitates, uoluptatesq; afferre poterimus: quas persequi, quū & latissimè pateant, & ex Lelio Ciceronis facillè disci possint, necesse non arbitror. Illud nō omittemus, à quàm multis & magnis uiris sit is de quo loquimur, eorū amicitia

citia, & familiaritate dignissimus iudicatus, ut eo-  
rū uel exemplo, uel æmulatione, uel opinione ad  
amandum hominem moueatur. Si ad rei cuiuspiā  
amorem incitare statuerimus, eius dignitatē, uti-  
litatem, iucunditatem pro rei qualitate explicabi-  
mus. Locos cuiusq; materiae proprios ex demon-  
stratiui generis præceptione sumamus: deinde  
partes eas, quas modò diximus, ad lectorē ipsum  
accōmodabimus, easq; modis omnibus expetēdas  
esse ostendemus. Deinde quid alij de illa re sense-  
rint, quid ipsi sentiamus, quanto in precio cū ab  
alijs, tum à nobis ipsis & olim habita, & nunc ha-  
beatur, multis atq; illustribus exemplis docere co-  
nabimur. Postremò quantū ea res ad illius uel ra-  
tiones, uel consilia conferat, quæ sit ad bene bea-  
teq; uiuendū uel utilis, uel necessaria, demonstra-  
bimus. Si aut reuocare amicū ab indigno aliquo,  
& turpi amore, aut consuetudine studebimus, da-  
bimus in principio operā, ut intelligat quā stu-  
diosi salutis ac dignitatis eius, quā solliciti sem-  
per fuerimus, atq; hodie quoq; simus: causasq; hu-  
ius nostri studij, uel ueterē amicitia, uel clientelā,  
uel uirtutem, uel nobilitatē eius, uel aliā quamuis  
honestam causam explicabimus: idq; ita fuisse, ali-  
quo insigni exemplo aut testimonio comprobabi-  
mus. Deinde ad causam pedetentim accedemus,  
ostendemusq; nos, ut id scribamus, neq; odio, neq;

inuidia, neq; tædio, neq; satietate, neq; imprudentia, neq; temeritate, neque ulla malignitate animi esse adductos: sed abundantia quadam beneuolentiæ, quod illum magnam infamiam, magnum detrimentum, ac periculū fugere cupiamus. Deinde in uniuersum de toto eius turpitudinis, aut amoris genere disputabimus: genusq; ipsum summopere detestabimur. Tum ad rem, de qua agitur, uenimus: quantumq; in ea uel obscœnitatis, uel turpitudinis, uel flagitij sit, quantū poterimus, aperiemus. Deinde quas partes superius ad amorem conciliandum adduximus, earum contrarias ad reprimendū adducemus. Ostendemus enim, quanta in re sit turpitudine, quantum detrimentum, quanta perniciēs, ignominia, molestia, inconstantia, quanta præterea sit rerum omnium dissimilitudo, quanta inæqualitas. Deinde quid ex ea re euenire soleat, exemplis ostendemus. Quid illi euenturum sit, ex aliorum comparatione demonstrabimus. Postremò quātopere cū ab alijs, tum à nobis ea res semper euitata sit, quantoq; studio sit ei quoq; si modò suæ dignitati, salutiq; consuleret, euitanda, multis atq; acribus uerbis aperiemus: atq; ita rem in summum odium adducemus. Quemadmodū autem amor odio, ita odium amore sedatur. Contraria enim contrarijs, ut frigus calore, lux tenebris, expelluntur. Si cuius autē  
odium

odium in nos, aut in alium sedare, et amicos inter se reconciliare statuerimus, primum quidem odij causas persequemur, easq; fictas, falsas, inanes, paruasq; esse docebimus: et nostram, uel illius de quo agetur, innocentiam ostendemus. Deinde turpe esse dicemus, eum quem amaueris, odisse: quem laudaueris, uituperare: et quale amici indicium de altero esse debeat, quale illud uideri possit, ostendemus. Tum quid in odio mali, quid boni in amore sit, quid ex utroq; sequi soleat, aperiemus. Si uero susceptum odium iure uidebitur, ad misericordiam et clementiam confugiemus; utcunque sit, amicitiam in posterum firmam pollicebimur; ostendemusq; nostrum, uel eius de quo scribimus, amorem in amicum, etiam ipso odij tempore non esse imminutum, nosq;, aut illum in officio semper fuisse, atq; in posterum fore. Ac de amore quidem, et odio, satis.

### De cupiditate incitanda. Cap. III.

Amorem cupiditas sequitur ordine, non præceptio- nis modo, sed ipsius quoq; naturæ. ita enim à natura comparatum est, ut id quod bonum esse ducimus, primum quoquo modo cognoscamus, deinde amemus (amare enim nisi nota non possumus) tum cupiamus (ea enim quæ amamus, facile cupimus) postea speremus (cupiditas enim assequendi, spe potiundi erigit) deinde aggredi audeamus. quod nisi successurum

cessurū speraremus, à nobis nunquam fieret. Spes enim potiundi, aggrediundi audaciā ex sese parit. postremò uoti cōpotes, eo quod quæsiuimus, perfruemur : unde lætitia illa gestiens proficiscitur. Igitur, ut ad cupiditatē redeamus, ea partim laude, partim uituperatione digna est, ita ut & uirtutum et uiciorum quidam quasi fons existimari queat. Nos enim nunc ad scientiam, uirtutem, gloriā, immortalitatem, beatitudinē, & cætera laudabilia studia & ducit, & trahit : nunc ad pecuniā, honorum & uoluptatum studium, hoc est, ad auariciā, ambitionem, libidinē, & cætera uitia humano generi perniciosissima, stimulis quibusdam, & quasi flammis incendit. Si quem igitur ad priorum rerum studium inflammare uoluimus, superiori præceptione utemur, atq; eas, quas suprā dixi, partes, dignitatem, utilitatem, iucunditatē in ea, de qua agetur, re considerabimus. Nam si quempiam ad scientiæ studium incitabimus, ipsius dignitatem tum ab antiquitate, tum ab inuentoribus, tum à subiecto, tum à fine, tum ab his qui eam studio, uel honore, uel præmijs prosecuti sunt, poterimus demonstrare. Vtilitatem ab omnis uitæ ætatisq; institutione, ab omnium artium inuentione, ab omnium rerum tum notitia, tum administratione sumemus. Quæ partes singule si diuidantur, atque amplificentur, maximam

maximam uim argumentorum, materiamq; ad  
 scribendum amplissimam præbebunt. Iucunditas  
 eodem modo ab omni uitæ ac fortunæ genere, &  
 rerum omnium cognitione petetur. Ostendemus  
 præterea cognitionis & scientiæ cupiditatem ho-  
 mini non ab homine, aut casu aliquo, sed ab ipsa  
 rerum omnium parente natura, hoc est ab Deo  
 datam. Exemplis postremò clarorum omnis ge-  
 neris uirorum agemus: lectoremq; ad eorum  
 quos audierit, uiderit, legerit, æmulationē, quan-  
 tum poterimus, incitabimus. Eadem de omni uir-  
 tute ratio erit. Gloriam uirtutum, & rerum ge-  
 starum in hac uita præmium esse, oportebit osten-  
 dere: eam non ab hominibus tantum, sed à cæteris  
 quoq; animantibus expeti, equorum maximè ex-  
 emplis comparabimus. Tum quid gloriæ causa  
 homines in omni uita & fortuna gesserint, quæ  
 pericula adierint, quàm multi etiam ultro mor-  
 tem oppetierint, ostendemus: lectoremq; eorum  
 exemplis & imitatione ad aliquod præclarum fa-  
 cinus inflammabimus. Ad eam rem ingenium, ma-  
 teriam, tempus, opportunitatesq; omnes illi ad-  
 esse ostendemus. Immortalitatem non ab anima-  
 libus tantum, ut gloriam: sed ab inanimatis quo-  
 que rebus, ut plantis ac lapidibus expeti, opta-  
 riq; docebimus. Omnia enim quantum natura li-  
 ceat, diuturnitatem, & sui conseruationem affe-  
 rant.

stant. Ad eam nos genitos esse, ex intellectus et rationis magnitudine, & cæteris animæ partibus demonstrabimus. Posse autē uirtutibus, rebus gestis, & literarum monumentis facillimè comparari, clarorum omnis generis uirorum, quorum memoria sempiterna sit, exemplis ex antiquitate repetitis ostendemus: ad eamq; consequendam lectorē propositis facultatibus incitabimus. Ad beatitudinis cupiditatem tum præsentium miseriarū enūmeratio, tum futurorū explicatio lectorem satis abunde q; eriget. Vtrāq; rem, quoniā latissimè patet, neq; huius institutionis est, pro sua quisque prudentia & cognitione tractabit. Ac hæc ad incitandam cupiditatem pertinent.

De contemptione pecuniæ, honorum, gloriæ, & uoluptatis.

Cap. IIII.

Sedatur autē hic affectus, restringiturq; contrario, ut de amore, odioq; docuimus. Contrarius porro cupiditati affectus ab alijs contemptio, ab alijs abominatio, ab Aquinate Thoma fugam nuncupatur: quæ quidem ad uiciorū destitutionē maximè pertinet. Habent autē uitia locos tum communes omnibus: tum singulos, & proprios. Communes sunt: nos ad uirtutem, non ad uitia esse natos: animā nostram optimò quoq; habitu imbuedam.

dam, & tanquam pulcherrimum agrum optimis  
frugibus ac plantis excolendā esse: fruges animæ,  
uirtutes: uitia, dumos, carduos, herbas esse, quæ  
non animam solum, sed corpus etiā excrucient, ue  
xent, atq; enecent: uirtutibus præterea honores,  
dignitates, opes, imperia, nobilitatem, et præmia  
ingentia comparari: uitij ignominiā, inopiā, ob  
scuritatem, seruitutem, & sordes sempiternas ac  
quiri: pœnas deniq; & nunc multis modis graues  
persolui, et post mortem æternas expectari. Alia  
item multa huius generis excogitari possunt: quæ  
si amplificentur, latissimum ad scribendum eam  
pam patefacient. Proprij singulorū uitiorū loci  
& innumerabiles sunt, et ad philosophum magis  
pertinent: nos tamen susceptæ institutionis gra  
tia paucos, atque insignes persequemur. Igitur si  
pecuniæ cupiditatē detestabimur, de usu pecuniæ  
disputabimus, finemq; eius rei usum, non accumu  
lationem esse docebimus: eum neq; maiorem ex  
ingenti, neq; ex paruo minorem capi posse osten  
demus. Deinde quanta sit in mediocritate, & li  
beralitate animi alacritas, tranquillitas, securi  
tas: quanta inde commoda tum corporis, tum a  
nimi consequamur. Quanta contrā in pecuniæ  
appetentia sollicitudo, quanti labores, pericula,  
incommoda, iurgia, tormenta subeantur: quam  
multi ob eam rem seruitutem, cruciatus, mor  
ten: q;



temq; subierint: quàm multorum malorum causa & fomes pecunia sit: quantopere corpus, animusq; effœminet. quàm infinita, insatiabilis, & importuna sit: eam à sapientibus nunquam expetitam, propterea quod & uirorum, & cupiditatum, & curarum omnium quasi parens sit existimata. Postremò quis eius finis esse possit, indagabimus. quàm multis modis partæ diuitiæ dilabantur. quo pacto ab inuitis relinquantur, ostendemus: ita ut auaro tam defuisse quod habuerit, quàm quod nō habuerit, doceamus. Si ad honorum aut gloriæ contemptionem impellere quenquam studebimus, primùm ostendemus quanta in ea re comparanda sit difficultas, quantis laboribus, periculis, incommodis, curis, ac molestijs obnoxios nos esse oporteat, quàm grauiem, quàm diuturnam, quàm indignam seruitutem subire, quàm turpiter atq; ignominiose agere, quibuscū uersari, quibus adulari, quibus subijci honoris & gloriæ causa compellamur. Deinde quàm sepe hæc omnia frustra suscipiamus, quum ea quæ uolumus non consequamur. Atque hæc exemplis eorum docebimus, qui suæ ambitionis poenas dedere. Deinde quàm ea res inanis, fluxaq; sit, tum ab ipsius rei natura, tum ab his à quibus proficiscitur, ostendemus. honor enim per se uana quædam & inanis hominum existimatio,

tio aut confessio est, quæ laudem aut dignitatem, alicui tribuit. Ea nunc ficta, nunc falsa, nunc uana, nunc etiam inuita est, pro eorum qui deferunt mente. alij enim honorem hominibus suæ utilitatis gratia tribuunt, quòd inde se aliquid consecuturos sperent: alij sui honoris gratia, quòd quum illos ornent, ornari se putent: alij falso quodam, uulgariq; iudicio, quòd illos honorari ab alijs, et apud principes gratiosos esse uideant: nonnulli etiam metu, quòd illorum potentiã reformident. Quas causas cum omnẽx parte indagauerimus, qualis honor sit, qui ab illis proficiscitur, ostendemus. Tum à quibus honor expectetur, inquiremus: et quàm stultum sit ex imperitiæ multitudinis iudicio pendere, demonstrabimus. Deinde etiam quàm falsum, quàm inane, quàm instabile uulgi iudicium esse soleat, aperiemus. Hic exempla eorum afferemus, qui ex summis honorib. in summam ignominiam deuenere. Postremò, quis honorum aut gloriæ sit finis, indagabimus: quem quum aut laudẽ, aut famam, aut uulgi cõsensum, beneuolentiamq; aut uanum aliquid esse constiterit, ostendemus, neq; in nostra potestate, ut eum uel mereamur, uel retineamus, situm esse. Nam et datur sæpe nõ merenti, et habenti sine causa auferitur. Neq; eum ad nos post mortẽ pertinere. nam si anima cum corpore extinguatur, nihil sentiet:

sin immortalis sit, uel non curabit hæc, quia bonis maioribus perfruetur: uel hac de causa magis dolebit, quia pœnas suæ stultitiæ & cupiditatis dabit. Deniq; fama paucorum annorum, si cum æternitate comparetur, non modò non appetenda, uerum etiam contemnenda, ut res leuissima ac breuissima, iudicabitur. Si uerò corporis uoluptatum cupiditatē sedare scribendo studebimus, primum eas quæ ab hominibus existimantur, non esse uoluptates, sed naturæ necessitatem contendemus. naturam enim uel exinanitam repleri, uel repletam exinaniri cupere. Deinde etiam si uoluptates sint, tam breues esse, ut prius abeant, quàm uenisse sentiantur. tantis uerò laboribus, in commodis, periculisq; parari, ut uel ob id solum optabiles esse desinant. deinde etiã noxias ac perniciosas non animis modò esse, sed corporib. quoque, multis rationibus atq; exemplis ostendemus. Postremò, turpe atq; indignū esse dicemus, quas uoluptates communes cum belluis habeamus, in quibusq; ne ipsæ quidem belluæ uolulentur, his potissimum nos obrui atq; immergi. His atq; alijs huius generis rationibus non modò non optandas, sed fugiendas etiam uoluptates esse demonstrabimus. Sed de cupiditate quidem & contemptione hæc lenius. cætera petantur à philosophis.

De spe

## De spe ac desperatione. Cap. V.

Sequuntur spes ac desperatio, quæ coniunctam cum cupiditate tractationem habent. ijsdem enim penè rationibus spes & cupiditas & augetur, et diminuitur. Quemadmodum autem contemptione cupiditas, ita spes desperatione: item ut cupiditate contemptio, ita spe desperatio tollitur. Sed ne omnino præterijisse hos affectus uideamur, de his quoq; pauca dicamus. Igitur si quem ex desperatione rerum suarum in spem adducere atq; erigere conabimur, primum quidem eius infortunium extenuabimus, & accidisse alijs sæpenumero plura & grauiora ostendemus. Deinde magnò animo quamcunq; fortunam, quæcunq; ea sit, tolerandam esse docebimus: neque forti uiro unquam aut desperandum, aut cedendum. Tum esse illi malo remedium ostendemus: & quo pacto id inueniri possit, aperiemus. deinde hominem paulatim quasi ad certamen reuocabimus, & in spem uictoriæ paulatim erigemus. Ad eam rem commodas facultates, occasiones, instrumenta, adminicula omnia quasi facies quasdam, & aditus patefaciemus: eumq; ad inceptum capeffendum certo rei euentu proposito, magnis ostensis præmijs, cohortabimur. Si quid difficultatis aut incommodi inesse uidebitur, aut consutando diluemus, aut extenuando minuemus, aut dissimulando reticebi-

mus. omnia leuia, facilia, & certa reddemus. Si nihil ei acciderit mali, quem erigere in spem summam statuerimus, omiſſis prioribus locis, nihilominus ſequentibus utemur. Si autem minuere ac labefactare ſpem cuiuſquam, ut falſam, inanemq; uelimus, ſuperiores locos in contrariũ ducemus: atq; omni ex parte rem duram, difficilem, incredibilem, dubiam, impoſſibilemq; reddemus: oſtendemusq; pro noſtra in eum beneuolentia nolle eum in re incerta ſpem certam collocare. atq; ita nobis eſſe uiſum dicemus. Atq; hic optimus quidẽ in principio locus erit. Exemplis præterea utemur eorum, qui ex ſpe magna, & penẽ certa deciderunt. neq; credendum aut principibus, aut opibus, aut coniecturis, aut meritis, aut ullis deniq; adminiculis eſſe dicemus. Contentum ſua quenq; fortuna eſſe oportere: imponendum autem ſpei & cupiditati modum: atq; hoc in primis eſſe ſapientis. Hoc loco tum de fortunæ leuitate, tum de continentia & moderatione differemus, & quantum in mediocritate boni, quantum contra mali in luxuria et cupiditatibus ſit, pluribus argumentis oſtendemus. Atq; hæc ad ſpem minuendã pertinent. Si quæ præterea ſunt, quæ ad leuandam deſperationem pertineant, ea à nobis in conſolandi ratione dicentur.

De auda=

## De audacia &amp; metu. Cap. VI.

Proximi sunt his audacia & metus, quorum alter magis excitandus, alter magis reprimendus est: uterq; tamen pendet ex altero. Igitur si metum repellere, atq; audaciam accendere constituerimus, primum quidem dabimus operam, ut metus causam diligenter indagatam, quantum possumus, extenuemus: eamq; uel falsam, uel inanem, uel ineptam, uel paruam esse ostendemus: neq; debere ullum his rebus aliquo pacto commoueri dicemus: & quam turpis sit in homine, tum formido, tum ignauia, utriusq; effectibus atq; exemplis demonstrabimus. Deinde hominem ad id quod uolumus, audendum, proposita rerum gerendarum, siue uirtutum mercede ea, quam ille dignissimam & cumulatissimam putet, incitabimus. Tum de animi magnitudine & audacia in rebus gerendis disputabimus, eamq; re pulcherrimam atq; honestissimam rationibus & exemplis maxime illustrib. faciemus. Labores et pericula omnia, tum extenuanda, tum contemnenda esse dicemus: neq; deterreri fortem uirum aut laborum, periculorumue magnitudine, aut uinculorum tormentorumq;, atq; ipsius deniq; mortis metu oportere. Hoc loco exemplis equalium; aut etiam si poterimus, minorum, qui uel eadem, uel similia gesserint, hominem inflammbimus: atq; ad eos emulandos, aut etiam superandos

randos instigabimus. Quòd si is claris maioribus  
 ortus sit, ut uel illos uirtute superet, uel ab illis  
 certè non degeneret, admonebimus. Postremò etiã  
 ad clarissimi cuiuscunq; æmulationẽ prouocabi-  
 mus. Si uerò temeritatẽ cuiusquam atq; audaciã  
 reprimemus, his locis in cõtrarium uersis, omnia  
 aspera ac difficilia facimus. Dicemus enim, neque  
 pericula temerè suscipiẽda, aut labores frustra su-  
 mendos esse: neq; fortunam cœptis nostris sem-  
 per arridere, aut audaciam nostram prosperum  
 semper euentum sortiri: neq; nostris uiribus, aut  
 nostro ingenio usq; adeò confidendum esse, ut nō  
 plurimum etiam in aliorum consilio & pruden-  
 tia reponamus. Quo loco quanta uis sit consilij et  
 prudentiæ, disseremus: hominemq; ad consilium  
 & rationem reuocare conabimur. neq; enim for-  
 titudinem eam esse, quæ consilio & ratione care-  
 bat. Et in hanc sententiam plura dicemus, osten-  
 demusq; ita maiores eius, ita clarissimum quenq;  
 fecisse, ita illum quoq; facere oportere: quantaq;  
 eum uitæ laus, & uitæ tranquillitas, si ita fecerit,  
 quanta contrà ignominia, quanta incommoda ac  
 pericula consequantur, si contrà fecerit, ostende-  
 mus: metumq; illi tum infamiæ, tum periculorũ,  
 tum tormentorum, tum etiam mortis, quantum  
 poterimus, iniiciemus. Si uerò aut cæterarum re-  
 rum, aut mortis metum sedare & repellere de-  
 creueris

creuerimus, nihil esse in illis mali, aut etiã aliquid  
inesse boni contendemus: locisq; communibus, at  
que exemplis constantiæ id comprobabimus: om  
nia uirtuti & gloriæ tribuemus: pro ea neq; exi  
lium, neq; uincula, neq; tormenta, neq; ullum ge  
nus mortis timendum esse: idq; multis atq; illustri  
bus exemplis eorum, qui hæc pro patria, aut fide,  
aut pro uirtute pertulerunt, abundè docebimus:  
quanta eos gloria atque immortalitas consecuta  
sit, quanta nos quoq; apud posteros maneat, ape  
riemus. Mortem uerò naturæ finem esse: qui quã  
& certus, & communis omnibus, & necessarius  
sit, timeri nõ debeat. Ita enim aut nihil mali, si om  
nia dissoluantur: aut plurimũ boni, si animæ ma  
neant, existere necesse est. tum hominem ad con  
scientiam bene actæ uitæ, & ad nostræ religionis  
ueritatem ac iusticiam reuocabimus: eumq; cer  
tissimam atq; amplissimam uitæ suæ mercedem  
sperare atq; expectare iubebimus. Atq; de metu  
sedando in præsentia hæc satis sint. Si qua deesse  
uidebuntur, in doloris & mortis consolatione  
dicentur.

### De ira. Cap. VII.

Audaciæ finitima ira est, quam diximus affe  
ctu carere contrario, propterea quòd stupida il  
la, & omni iniuriarum sensu carens natura non  
reperiatur: sed eius loco uirtutes habet, mansuetu



dinem & clementiam. Iræ autem duo genera ple-  
 riq; fecere: alterum, quod ad puniendâ errantî  
 delicta: alterum, quod ad ulciscendas iniurias di-  
 cant pertinere. Superius illud genus humano ge-  
 neri utile admodum & necessarium putant, ita  
 ut Deo quoq; concedere id nostri non dubitent:  
 posterius noxium omnino ac perniciosum est. Il-  
 lud itaq; nobis excitandum, hoc reprimendum  
 atq; extinguendum est. Si quem igitur ad punien-  
 da delicta, pœnâq; de reis sumendis incitare de-  
 creuerimus, duo potissimum considerabimus, cau-  
 sam & personam. In causa de criminis specie &  
 magnitudine disputabimus: idq; à tempore, loco,  
 modo, socijs, facultatibus, instrumentis, et cæteris  
 partibus, quæ augere aliquid possunt, maiorem  
 in modum augebimus. Quod si plura crimina fue-  
 rint, ea cum accumulatione & atrocitate enume-  
 rabimus: sin unum fuerit, id plures in partes am-  
 plificando diuidemus, & ex uno plura faciemus.  
 Persona duplex est, rei et iudicis: hoc est, eius qui  
 puniendus est, & eius qui puniturus est, ad quem  
 ipsi scribimus. In reo considerabimus sexum: alia  
 enim maribus, alia fœminis fœdiora sunt. ætatē:  
 non enim omnia omni ætati concessa sunt, atq;  
 alia alijs ætati turpiora. conditionem: nam seruo-  
 rum & subditorum in superiores crimina gra-  
 uiora sunt. statum: ut liberorum crimina in pa-  
 rentes

rentes atrociora esse dicamus. fortunam: quanto antecellit, tanto eius crimina grauiora insignioraq; sunt. Considerabimus præterea uoluntatē, atq; inde, si malo animo fecerit, causam augebimus. consuetudinem, ut si id crimen se penumero commiserit. audaciā: quo loco & quantum facinus aggredi ausus sit, & quid in posterum ausurus esse uideatur, crescente semper audacia, ostendemus. Ab eius ad quem scribemus, persona, iisdem rationibus crimē augebimus, indignumq; esse dicemus eū, qui grandior natus, qui dominus, qui pater, qui magistratus sit, qui deniq; punire & possit, & soleat, sceleratis impunitatem permittere: quantumq; ex eorum supplicio uniuersis commodum, quanta ciuitati quies, quantus improbis in posterum terror, quanta illi ipsi iusticiæ & seueritatis fama accessura sit: quam contraria omnia sint futura ex eorum impunitate, singillatim explicabimus. Si autem posterius illud iræ genus, quod ad ulciscendas iniurias spectare diximus, compescere ac sedare statuerimus, eadem rerum & personarum diuisione utemur: atq; in rebus quidem à quibus partibus crimen augendum esse diximus, ab iisdem iniuriam extenuabimus. Personarum quoq; eadem facienda distinctio erit: atque ab iisdem locis minuenda iniuria, omniaq; ad animi mansuetudinem, cle-

mentiam, & animi magnitudinem referenda: ostendendumq; esse maiorem in condonanda iniuria clementiæ, atq; animi magnitudinis laudem, quàm in persecutenda ultionis uoluptate. Ad hanc illum etiam rationibus & exemplis clementium uirorum, quoad fieri poterit, incitabimus: ostendemusq; cum superioribus quidem, quibus par esse non possis, certare stultum esse: cum paribus, ambiguum: cum inferioribus, uile, & indecorum. Illud præterea esse ultionis genus, quum is se contemni, & pro nihilo haberi uidet. quæ quidem et alia eiusdem generis quàm dixerimus, exemplisq; confirmauerimus, eius animi magnitudinem & clementiã commendabimus, ad eiusq; laudem appetendam hominem summo studio atq; omnibus orationis uiribus inflammabimus, & cum deprecatione misericordiam à communibus locis commouebimus. Atq; hæc de ira satis. nunc ad reliquos affectus pergamus.

De læticia & iocis excitandis.

### Cap. VIII.

Restant ex omni affectuum ratione duo, qui à præsentis boni & mali opinione proficiuntur: lætitia illa gestiens, quæ ab alijs gaudium, ab alijs uoluptas appellatur: & dolor, siue ut Cicero appellat, ægritudo. Horum uterq; reprimendus est: læticia uerò nonnunquã etiam excitanda.

Igitur

Igitur de ea primū dicamus. Excitatur scribendo letitia, aut uniuersa re, aut partibus: uniuersa, quum aliquid amico per literas nunciamus, quod illi iucundum atq; optatum esse scimus: ut opum, honorum, dignitatumq; accessio, patriæ, fortunarum, ornamentorumq; restitutio: liberorum, propinquorum atq; amicorum salus, ualetudo, dignitas, & quæ sunt generis eiusdem: quæ gratissima esse audienti solent, præsertim quū præter spem atq; opinionem acciderunt. Excitant etiam illa uoluptatem audienti, quæ uoluptatem attulere spectanti: ut quum triumphus, conuiuia, nuptiæ, ludi, spectaculaq; omnis generis uisa narrantur. in quibus tum res ipsæ, tum narrandi modus delectationem affert. nam si nudam & simplicem narrationem habeant, lectorem uō sanè multum mouent: sin in illis crebræ digressiones fiant, quædā incredibilia, subita, inopinata, ridicula referantur: si tota narratio lepore quodam & salibus respergatur: si singulorum mores, sermones, actiones cum eorum imitatione narrentur: si deniq; singula quasi oculis spectanda proponantur, ea demū narratio uoluptatem affert. A partibus uoluptas excitatur, quum uel in uerbis, uel in rebus iocamur. Iocandi in rebus Cicero duo genera libero homini digna esse dicit, narrationē atq; imitationem. Narratio est, alicuius factæ uel fictæ rei

cum

cum lepore expositio ad id de quo loquimur, accommodata: ut apologus, simile, exemplum, comparatio, res gesta, quæ aliqua de causa ridicula, iocosaq; sit. locus autem & risus excitatur multis modis. ex ambiguo, quum aliud dicimus, & aliud dicere uidemur, uel aliud intelligi uolumus: ut si quis de seruo furace dicat, hic est cui nihil domi occlusum, obsignatumq; sit: quod etiam fidei seruo conuenit. Ex imagine, quum eius rei de qua loquimur, imaginem à re quadam inopinata & dissimili ducimus: ut si quem pessimè canentem asino rudenti, aut si præpinguem hominem dolio comparemus. Ex errore, quum uel ipsi nos errasse fingimus: ut si auarum, qui se uenisse dicat, interrogemus, quanti? quasi uenalem existimauerimus. uel alios in errorem ducimus: quale est illud Martialis in Codrum: quam plurimum credere, non quia pecuniosus esset, sed quia cæcus amaret, affirmabat. Sed ex his rebus iocus potissimum existit, quæ præter spem atq; opinionem uel dicuntur, uel accidunt: cuius generis infinitæ penè species reperiuntur. Imitatio est, quum alterius sermonem, mores, naturamq; effingimus: ea dicendo atq; agendo magis quam scribendo utimur. licet tamen scribendo quoq; apud familiarissimos quorundam sermones, qui nobis ridiculi uideantur, effingere. Mores uerò & naturam aliquorum

quorum quadam cum uenustate describere, ridiculum in primis, & iocosum est. Verba uerò tam multis modis iocum & risum excitant, ut difficile atq; incredibile dictu sit. nunc enim transferuntur, nunc inuertuntur, nunc mutantur, nunc transmutantur, nunc aliam in partem, nunc in aliam significationem accipiuntur: nunc uocalibus tantum mutatis, eadem consonantes seruatae, in aliam, quæ à præposito non discedat, sententiam transferuntur: atque omnia aut fallunt, aut alludunt, aut derident, aut mordent, aut contemnunt, aut in alium sensum detorquentur. Sed quoniam hæc natura, non arte perficiuntur, superuacuum de his præcipere quicquam uidetur. nam si quis ineptus natura sit, atq; ex arte iocari uolet, non magis id prosperè ac decenter faciet, quàm asellus is qui est apud Aesopum: qui quidem blandiri domino quum uellet, eum prioribus pedibus, & ruditu immenso atq; intempestiuo inuasit. Iocari itaq; unumquenk; natura & consuetudo doceat, necesse est. Materiam inter amicos pro cuiusque natura res, quæ quotidie accidunt, satis abundeq; præbunt. Modus ex amici natura, & nostra consuetudine ac familiaritate statuetur. illud non in scribendo modò, sed in omni quoq; oratione & sermone cauendum, ne aut scurrilia, aut obscœna proferamus: ne, dum urbani esse cupimus,

mus, scurriles, impudiciq; habeamur. Ac de iocis quidem hactenus.

### De lætitia reprimenda. Cap. IX.

Si autem reprimere gestientem illam, atq; inmodicam lætitiā moderari tentabimus, quā rationē nostri consilij atq; admonitionis nostræ in principio aperuerimus, omnesq; inuidiæ suspensiones à nobis, ijs quas suprà ostendimus, rationibus amouerimus, de immodica lætitia in uniuersum disputabimus: ostendemusq; primum, quā multorum malorum ea causa radixq; sit. quippe quæ insolentiam, superbiam, iactationem falsæ gloriæ, cupiditatem, impatientiam, leuitatem, luxuriam, segnitiam, ignauiam, inertiam, atq; innumerabilia uitia ex sese pariat. Deinde quā ea res inanis, breuis, caducaq; sit, aperiemus: & quā sæpe in contrarium uerti soleat, ex quacunque re profecta sit, multis ac uarijs exemplis comprobabimus: idemq; in omni lætitiæ ac prosperitatis genere accidere, singillatim per omnes uitæ status ac species discurrentes, ostendemus. Inde ad causam pedetentim accedentes, eam rem de qua ille gestiāt, maximè fluxam atq; inanem esse ratione aliqua demonstrabimus: & quid eum ad insolentiam superbiamq; efficerat, quæ contrā in eā re pericula atq; aduersa metuenda sint, ex aliorum, quibus idem acciderit, exemplo perscrutabimur:

mur: timendaq; omnia quæ accidere possint, illi esse dicemus: quæ si accidant, quid factururus sit, & quàm turpiter de summo gradu in infimum sit casurus, interrogando inuestigabimus. Quum autem quid in ea re mali sit, atq; esse possit, ostenderimus, quid in moderatione boni sit, quæ inde quies, quæ salus, quæ autoritas, quæ gloria, qui deniq; fructus proueniant, explicabimus, ad eosq; percipiendos atq; amplectendos illum, & eius, et nostræ, & ipsius rei causa cohortabimur.

De mœrore, siue ægritudine sedanda. Cap. X.

Mœror autem, siue ægritudo, quæ una ex omnium affectuum ratione reliqua est, quum animû præsentis mali opinione conficiat, non excitanda stimulis, sed consolatione aut tollenda omnino: aut, quantum fieri potest, sedanda, comprimendaq; est. Quoniam autem ægritudo multiplex est, multiplex quoque consolatio adhiberi solet. quæ quidem res quum & ad philosophos tota pertineat, & ita latè pateat, ut de singulis eius generibus singula tum à Græcis, tum à nostris uolumina & olim scripta sint, & (ut ego compertum habeo) nunc quoq; scribantur, tractari à nobis pluribus uerbis nec debet, nec potest. Sed ne reliquisse pulcherrimam operis partem inta. Tam uideamur, capita tantum quædam in singulis generibus



ribus summam attingemus, ut ex ijs unicuiq; additus ad cætera præbeat. In omni autem consolatione tria illa potissimum, quæ Cicero docet, quasi fundamenta quædam nobis sequenda etiam censeo: primum, ut in re boni plurimum, aut nullum malum, aut quàm minimum malum esse doceamus: Deinde, ut de communi uitæ conditione, aut de eius ipsius ad quem scribimus, propria disputemus: Tertiò, ut summam stultitiam esse doceamus, frustra cõfisci mœrore, quum intelligamus ea ratione profici nihil posse. quæ quidem quum omni ægritudine communia sint, qua ratione possint singulis generibus accommodari, nunc breuiter subiiciemus.

### De consolatione paupertatis.

#### Cap. XI.

Omnis igitur ægritudo, ut breuiter completamur, aut ex opum, aut ex honorum, aut ex patriæ, aut ex suorum, aut ex uoletudinis amissione suscipitur. Si quem aut ex opum amissione, aut etiam inopia mœrentem consolabimur, primum quidem ostendemus, quàm multa ac magna ex diuitijs mala nascentur: ut ignauia, luxuria, libido, auaricia, odia, contentiones, cædes, bella, urbium euersiones, et quæ sunt generis eiusdem. quantas etiam hominibus curas, sollicitudines, molestias, quantos labores opum tum comparatio, tum

conserua

conseruatio afferat. Per pauca uerò ad usus uitæ necessaria sunt, ut nihilo plus diues, quàm pauper uel uiuens consumat, uel moriens secum auferat: quanto uerò cum dolore opes à morientibus relinquuntur, et quibus sæpe relinquuntur. Deinde paupertatē omnibus his malis carere, singillatim ostēdemus, eiusq; innumerabilia bona superioribus malis contraria explicabimus. Quæ uerò in ea uel mala, uel incōmoda esse existimātur; ea nos partim negando, partim confutando, partim extenuando, partim bonorū magnitudine cōpensando, aut omnino dissoluemus, aut quàm maximè leuia et tolerabilia faciemus. Deinde ad cōmunem uitæ conditionem cōuersi, iubebimus cōsiderare, quàm pauci diuites, quàm multi pauperes sint. quo loco plurimos in eadē, qua illi quos cōsolamur, sunt, fortunā, plurimos etiam in deatereiore constitutos omnis generis uiros ostendemus. neq; uerò diuitias, ut præmium uirtutis, optandas esse, quibus pessimus quisq; maximè affluat: neq; paupertatem, ut crimen aliquod, aut turpitudinem refugiendā, quàm optimus quisq; semper ad amauērit, esse dicemus. Atq; hoc exemplis tum sanctissimorum uirorū, tum doctissimorum hominum demonstrabimus: qui opes non modò, quū abessent, nō quaesiuere: sed, quum adessent, etiam alijs atq; alijs rationib. abiecere. Ex quo fiet;

ut opes, si non contigerint, non sint appetendæ: si amisse sint, non sint requirendæ. Deinde eum ad quem scribimus, suorum bonorum enumeratione consolabimur: atq; ad eorum contemplationem, fruitionemq; cohortabimur. Postremò dicemus, facultates illi ad uiuendum necessarias neq; pro sua uirtute deesse posse: neq; si desint, magno esse labore conquirendas.

### De consolatione amissorum honorum, & patriæ. Cap. XII.

Eadem in honorum, dignitatum, ac potentia, quæ in opum amissione, consolandi ratio erit. Primum enim ostendemus, quantis illa laboribus, curis, molestiis, & periculis comparentur, quantisque seruentur: quàm uerò fluxa, inania atq; instabilia sint, & in quorum potestate constituta. Quæ contrà sit priuati hominis uita, quæ quies, quæ securitas, quæ tranquillitas, quæ deniq; beatitudo. deinde nihil esse mali in earum rerum amissione, contendemus: quæ neq; uirtutibus cõparentur, neq; uitis amittantur. Culpam omnem tum in fortunæ uarietatem, leuitatemq; tum in ipsarum rerum naturam conferemus. Ei rei constantiam, patientiam, prudentiam, & cæteras uirtutes opponemus, quarum exercendarum genera hæc accidere diuinitus permittantur. His exemplis illustrium uirorum, quibus idem in omni genere

nerē acciderit, nullis utem tr. Hominem deinde  
tū, ad inferioris fortune contemplationē, tum ad  
priuate uite commoda, tum ad eorum quę eripi  
non possint, bonorum, si non habeat, adeptionē:  
si habeat, fructum & conseruationem, omni alia  
sublata cogitatione, reuocabimus. Si quem autem  
patrię amissione mœrentem consolabimur, pri-  
mū de populorum leuitate, stultitia, & iniqui-  
tate in uniuersum disputabimus: ostendemusq;  
quā multi sint à suis ciuibus immeritò eiecti,  
qui paulo pōst aut frustra desiderati sunt, quum  
in patriam reuerti nollent, aut cum magna sua  
gloria reuocati. Hic optimū etiam exilium esse,  
cum à malis & factiosis ciuibus disceditur: ita, ut  
ultro etiam sit ex tam iniqua aut ingrata patria  
migrandum, demonstrabimus: exemplisq; eorum  
utemur, qui ciuium suorum aut uitij, aut factio-  
nibus, aut ingratitude offēsi, patriam ultro re-  
liquere. Deinde si quid proprium de eius ipsius  
patria, ciuibusq; habebimus, in medium affre-  
mus. Nominis autem ignominiā, præsertim si in  
iustē damnatus sit, non esse timendam. illic enim  
exilium esse, ubi uirtuti locus non sit. Exemplis  
eorum utemur, qui multo clariores exilio, illu-  
striorēsque fuere, quā si in patria perpetuò man-  
sissent. Quo loco uirtutem eius collaudabimus,  
cumq; multo clariorem acceptioremq; apud om-

nes nationes hoc exilio fore ostēdemus. Exilij quoque nomen in peregrinationem commutabimus: atq; eo modo leuius atque tolerabilius faciemus. Quòd si is propterea doleat, & se miserum arbitretur, quòd sibi extra patriam uiuendum sit, primum quidem ostendemus, si ita esset, plenas omnes prouincias miserorum futuras esse, in quibus tam multi, ac tamdiu peregrinentur. hic ostendemus, quàm multi mercaturæ, quàm multi doctrinæ, quàm multi etiam uoluptatis gratia & olim peregrinati sunt, & hodie peregrinentur. nostri enim temporis exempla ad omnem consolationem ualebunt plurimum. nam ueterum facta tanquam incredibilia, & à scriptoribus ficta leguntur. Eos itaq; potissimum commemorabimus, qui noti illustresq; sint: et aliqua de causa semel egressi, in eam postea nunquam reuerterint: illum uero nullo modo patriam amisisse dicemus, sed in earum gestarum gloria, & multarum uirtutum memoria & nunc permanere, & perpetuò permanensurum. De habitatione modici temporis, aut de sepultura corporis sollicitum illum esse non debere. Si bonorum amissionem doleat, & exiguarum opum gratia illum cōmoueri non oportere dicemus, qui maioribus rebus nō commoueat: & opes illi nullo loco de futuras. Si suorum uel ciuium, uel propinquorum desiderio teneatur, eos extra

extra patriam uidere facile posse. Si patriæ cōmo-  
da aut uoluptates desideret, ubiq; illi eadem aut  
maiora commoda fore demonstrabimus. Quod si  
extra patriam & melius & quietius & commo-  
dius possit uiuere, omne solum uiro forti patriū  
existimandum: exemplo Teucris, qui patriam illic  
esse aiebat, ubicunq; esset bene. deniq; stultū esse  
dicemus, se, suamq; uirtutem mœnibus unius ciui-  
tatis claudere, eiq; se addictum ac deuinctum esse  
existimare, quum possit uniuersum terrarum or-  
bem sibi patriam facere: ut Socrates, qui quum in-  
terrogaretur, cuiatem se esse diceret, mundanum  
se esse aiebat.

## De consolatione mortis.

## Cap. XIII.

Sequuntur ea quæ aduersus dolorē ex alicuius  
morte susceptum dici solent: quæ quidem, quoniā  
res ipsa quotidie accidit, atq; in omniū ore uersa-  
tur, partim tam multa sunt, ut breui comprehen-  
di nō possint: partim tam latè patentia, ut facile  
ab omnibus excogitari queant. nos tamen, ut adi-  
tum ad cætera inuenienda faciliorem omnibus, et  
latiorem præbeamus, quædā breuiter perstringe-  
mus. igitur si consolari quenquā morte lugētem  
statuerimus, oportebit, nos initio scribendi ora-  
tionem nostrā ad illius dolorē parumper accom-  
modare, ita ut & iurē dolere, & nos ad eius dolo-



rem quàm proximè accedere ostēdamus. Ex quo fiet, ut ille facilius nostram consolationem admittat, & nos fidem apud eum & benevolentiam ad ea quæ dicturi sumus, maiore comparemus. nam & genus quoddam consolationis est, habere aliquem nostris calamitatibus nobiscum pariter dolentem. Videtur enim ille, quū ex eadem re dolorem capit, nos aliqua ex parte nostro leuare. & adhibere statim acrem recenti atq; acerbo uulnere medicinam, minimè accommodatum est. recrudescunt enim uehementiori contactu recentia uulnera: & non modò ferrum, sed manum quoq; medici in principio reformidant. necesse itaq; est, ut dolori paululum concedamus, & tum oratione, tum etiam significatione nostri doloris obsequamur. quod quum aliquandiu fecerimus, & animū hominis beneuolum nobis atq; obsequentē reddiderimus, ita ut nos putet iam æquè ac se ipsum dolere, nihilq; posse nos quod ille refugiat, dicere, consolationem ipsam paulatim ingrediemur: & primum quidem doloris causam aut interrogando, aut indagando, aut confutando inuestigabimus. ea aut in morte ipsa, aut in eo qui mortuus est, aut in eo qui luget, inueniatur necesse est. In morte quidem aut boni plurimum in esse ostendimus, tum earum à quibus discedimus, iniuriarum explicatione, tum eius quæ diuinitus promittitur

immor-

Immortalitatis ac beatitudinis cōmemoratione;  
aut certè nihil etiam mali, etiam si id quod credere  
prohibemur, animæ cū corporibus extingueren-  
tur. Mortē præterea naturæ finem esse, non pœ-  
nam, tum ex singularū ætatum ordine, tum ex ip-  
sa compositione ac resolutione demonstrabimus.  
Exempla eorū adijciemus, qui cum senio confecti  
essent, paulatim sine morbo, sine dolore, quasi  
sponte decesserunt: aut eorū qui mortē suam ali-  
quo tempore prædixere, quod se deficere dissola-  
uīq; sentirent. mortē itaq; doloris causam cuiquā  
esse nec debere, nec posse. Defuncti etiam gratia  
lugendum non esse, cui aut ingens bonum, aut nul-  
lum malum acciderit, ostendemus. deinde ex eius  
uirtutibus, rebus gestis, moribus, & anteacta uita  
non posse eum immortalē beatumq; non esse. tū  
quibus in uita bonis perfructus sit, à quibus cōtrā  
malis tum præsentibus, tum imminentibus sit ere-  
ptus, demonstrabimus: atq; utraq; et bona et mala  
cōmemorabimus, ita ut neq; maioribus bonis eū  
perfrui potuisse, si diutius uixisset, et mala ingen-  
tia quæ imminebant, euitasse dicamus: ita ut uel  
sponte eum decessisse, uel diuinitus sublatum esse  
monstremus. Mortē autem illi utilem fuisse non  
modò ex instantibus, & penè præsentibus malis,  
sed ex his etiā quæ accidere diutius uiuentibus so-  
lent, ostendemus. Affertremus huc exempla eorū,



qui quū multos annos felicissimè uixissent, infelici-  
 cissimum exitum uel suorū morte, uel patriæ ca-  
 lamitatibus, uel alia fortunæ mutatione, habue-  
 re. Eum uerò qui lugeat, si hominē ad tanta bona  
 ab his malis profectum lugeat, nō rectē facere. id  
 enim inuidētis potius, quā amantis esse, osten-  
 demus. Sin sua cōmoda lugeat, quæ ex illo uiuen-  
 te capiebat, non illū, sed se ipsum amasse dicemus.  
 Quod si filius eius fuerit, qui defunctus est, osten-  
 demus commodatū à Deo, nō datum fuisse. quā-  
 diu illi collibitū fuerit, eum patri concessisse: quū  
 uisum sit, quod suum erat, recepisse: omnia in me-  
 liorem partē accipienda. Deum, cū optimus atq;  
 æquissimus sit, nihil nisi summa ratione aut age-  
 re, aut permittere: nihil non optimum nobis, atq;  
 utilissimū, pati euenire. quippe qui multo magis  
 nos amet, quā ipsi: sed nostri commodi gratia  
 permittere, ut non omnium rerum scire rationē  
 possimus. et alia multa, quæ in hanc sententiā à  
 theologis dici solent. Deinde lugentē exemplis eo-  
 rum, qui & plures & clariores filios amisere,  
 consolabimur: cumq; tum malorū, quæ plura &  
 maiora pertulerit, comparatione, hāc calamitatē  
 contemnere debere, quū animus iam in malis ob-  
 durauerit, ostendemus: tum bonorū, quæ ei pluri-  
 ma & maxima reliqua sunt, explicatione homi-  
 nem ad eorum contemplationē, perfruitionemq;  
 reuocabi-

reuocabimus. Illa præterea quanquã cõmunia et  
uulgata sint, nonnunquã tamẽ, si suo tempore as-  
ferantur, animũ lugentis nõ mediocriter recreat:  
hominẽ eum natum fuisse: hanc esse humanæ uitæ  
conditionẽ, ut omnia orta occidant, & aucta sene-  
scant. neminem debere peculiariter lugere, quod  
cõmune sit, atq; omnibus accidat. sapientẽ uerò,  
qui causas rerũ intelligat, multo minus angĩ, com-  
moueriq; debere. Poterimus hic cõmemorare tot  
regũ, ciuitatũ, nationũ, ædificiorumq; interitus:  
hominemq; ab unius morte ad tantarũ rerum in-  
teritũ contemplandũ exemplo Seruij Sulpitij re-  
uocare. Accedent his, si qua de cõditione defuncti  
dici possint, quæ illi propria sint: quæ quidẽ uitã  
eius aut acerbã, aut minus iucundã reddere potu-  
issent: ut cæcitas, surditas, siue alterius membri,  
aut etiã totius corporis debilitas, aut ægritudo, in-  
tem orbitas, humilitas, paupertas, infortuniaq; a-  
lia, quæ hominibus præter opinionẽ solent accide-  
re: quarum rerum si afferre aliquam poterimus,  
mortem illi fuisse utilem concludemus. Postremo  
stultũ esse dicemus, luctu ac mœrore confici, quũ  
intelligat proficere se nihil posse. quo loco homi-  
nem ad patientiã, constantiã, uirtutem, quam in  
cæteris rebus semper habuerit, ostendendã cohor-  
tabimur: eamq; medicinã se sua sibi prudentia af-  
ferre oportere dicemus, quã ipsa sit omnino tem-  
poris

poris lōginquitas allatura. Deniq; barbaras quasdam nationes luctu nascentes, morientes cantib. et letitia prosequi consueuisse: cogitātes, alteros in magnas miseria, alteros à maximis malis liberari. Turpe itaq; esse nobis, qui literas & sapientiam profiteamur, à barbaris hac in re una superari, qui eos in cæteris superemus. Quòd si letari morte nostrorum non possumus, luctum certè omnem cohibendum esse. Sed de morte quidem satis. cætera ex libris philosophorum petentur.

### De consolatione cæcitatis, & totius corporis imbecillitatis. Cap. XIII.

Superest ut eos cōsolemur, qui aut aliqua corporis parte, aut toto etiā corpore debilitati sunt. In his primū locum obtinet cæcitas, quæ propter illius sensus excellentiā maximè uidetur detestanda. Igitur si cæcum hominē consolabimur, primū ostendemus, quare sint singuli sensus à natura dati: docebimusq; eos non ad scelera, aut uoluptates perfruendas, sed ad institutionem animi, ac perfectionem corporis, tanquā duces et comites esse datos. deinde quàm multa ex his mala, tū in corpore, tum in animū ipsum proficiscātur, explicabimus. Et quoniam hæc ratio ad omniū sensuum amissionem consolandā ualebit, quæ ex singulis mala oriari, quæ à singulis scelera cōmitti soleant, ostendemus.

mus. Deinde his malis omnib. liberū atq; immunē esse, qui illorum incitatore atq; autore sensu careat, demonstrabimus. tum eorum qui sensibus his priuati sunt, quietē, simplicitatem, securitatē, & commoda proferemus: incōmoda, si qua inesse uidebūtur, docebimus ea uel per alios sensus supplēri, uel per ministros ac seruos euitari posse: ac cæcis quidem colorum, surdis uerò sonorum notitiā, quæ utrisq; deesse uideatur, neq; ad capiendas uoluptates, neq; ad res gerendas obesse. quo loco eos neq; corporis, neq; animi uoluptatib. carere, excepta duntaxat colorū in cæcis, in surdis sonorum uoluptate, multis rationib. atq; exemplis demonstrabimus. Eas uerò uoluptates neq; tanti esse faciendas, ut earū gratia tot uitijis atq; sceleribus subiacerē, inuoluiq; uelimus: et tam multis contrā bonis ac uirtutib. cōpensatas esse, ut etiam si magnæ essent, contemnendæ tamē, ac pro nihilo habendæ uideantur. A rebus uerò gerendis neq; cæcos, neq; surdos, neq; alio sensu debilitatos abduci, singulorum exemplis, qui in omni genere claruerūt, comprobabimus. tum quæ disciplinæ, quæ uirtutes, quæ artes in cæcis, surdis, mutisq; & esse possint, et semper fuerint, ostēdemus: nonnullosq; altioris contemplationis gratia, ne à sensibus distraherentur, aut se in altissimos recessus abdidisse, aut etiā sponte sibi oculos effodisse. atq; hæc cōmunes consolationes sunt. Proprias unicuiq; pro eius ingenio,

nio, natura, disciplina, uirtutibus, moribus, rebus gestis, & cæteris partib. quæ personis attribuuntur, accommodabimus. quæ præterea de cõmuni humane uitæ conditione, de patientia, de constantia, de omni uirtute dici possunt, in hanc poterimus consolationē conferre. Quæ de his sensib. diximus, tum in alias corporis partes, tū ad uniuersum corpus, atq; ad omnes eius morbos accommodari poterunt. ostendemus enim pernicitatē pedum, corporis totius formam, agilitatē, robur, sæpe homini obfuisse, profuisse frē nunquā. malaq; omnia colligemus, quæ ab his quas dixi partibus proficiuntur. Commoda uero, quæ ex corporis integritate capiuntur, partim extenuabimus, partim nobis per alios præstari posse ostēdemus: ita, ut ex infirma corporis ualetudine aut nulla, aut quàm minima incōmoda suscipiatur, eaq; omnia seruorum ac iumentorū ministerio resarciantur. Dolorem uero corporis ad patiētiae, constantiae, uirtutumq; omnium exercitationē, item ad animi præstantiam, ad immortalitatis ac beatitudinis spem atq; expectationē reuocabimus: exempla q; afferemus eorum qui minima quaq; de causa, ne proderent quod celari uolebant, grauissimis cruciatibus resistere: item eorum, qui nostræ religionis tuendæ, Christianiq; nominis profitendi gratia, ultro se maximis atq; exquisitissimis tormētis obiecere. Auget hanc consolationē & communia

& para

Et particularium, uniuersarumq; miseriarum commemoratio, ut intelligat is qui morbo aliquo laborat, calamitatibus atq; ærumnis immunem esse neminem. quod si palam singula ostendi, et cum alienis conferri possent, neminem suas cum alienis commutaturum. Maximè autem proderit illa corporis, animiq; comparatio, et utriusq; officiorum, uirium, partium, utriusq; deniq; finis explicatio: quam quum accommodatè fecerimus, et animi præstantiam ostenderimus, ad eius uires exercendas, gloriam atq; immortalitatē, doctrina, ingenio, et uirtutibus comparandam summo studio cohortabimur: et huius uitæ breuitate atq; imbecillitate contempta, ad beatam illam æternamq; appetendam, et origine et mercede proposita, incitabimus. Sed hæc hætenus.

## De inuentione in uniuersum.

### Cap. XV.

In omni scribendi genere quo pacto materia inuenienda esset, satis abundeq; uideor exposuisse: quæ quidem pars, quoniam et difficillima erat, et à nostris scriptoribus in hoc præsertim genere minimè tractata, pluribus uerbis à nobis explicata est. Nemo enim ferè est, qui conceptus mentis exprimere atq; eloqui non quoquo modo possit: sed difficillimū ab omnibus existimatur, quid dicas, aptè accommodatèq; inuenire. nam etiamsi minus ornatè dicas, quod uelis, si animo aliquid  
non

non uulgare dicas, poteris tamen nō mediocriter  
 lectorem delectare. Quemadmodū enim pulchri-  
 tudinis in corpore potissima pars nō uestes sunt,  
 sed ipsa corporis habitudo & forma: ita in ora-  
 tione nō uerba, sed sententiæ, & materia ipsa pul-  
 chritudinis & roboris causa potissima sunt. Atq;  
 ut uestes induendi atq; exornandi corporis gra-  
 tia inuentæ sunt: ita uerba enunciandi atq; elo-  
 quendi mentis conceptus gratia sunt excogitata.  
 Deniq; res ipsæ sine ornatu uerborum quasi nu-  
 dum corpus esse possunt: uerba sine rebus, ut sine  
 corpore uestes, subsistere atq; esse non possunt.  
 Huc accedit, quòd de elocutione multi & ueterū;  
 & recentium perscripsere: de inuentione ea quæ  
 extra iudicium in demonstratiuo et deliberatiuo  
 causarum genere uersaretur, exactè atq; accura-  
 tè adhuc nemo. Hanc enim partem ueteres, ut exi-  
 stimo, partim ut notam, partim ut ad aliam insti-  
 tutionem attinentē, penè intactam reliquere: re-  
 centiores adhuc non attigere. Postremò omnes  
 qui ad dicendi facultatem accedunt, quo pacto di-  
 cant, querunt: quid dicant, non querunt. His igi-  
 tur de causis ego mihi in hac potissimum parte in-  
 sistendum atq; elaborandum putauī. reliquas du-  
 as, dispositionem atq; elocutionem breuiter sum-  
 matimq; perstringam. Altera enim & per se fa-  
 cillima est, & à nobis in ipsa rerum inuentione  
 magna ex parte tractatæ. Altera partim est iam  
 à nobis

à nobis nonnullis libris conscripta, partim in aliud tempus, opusq; conseruatur.

### De dispositione. Cap. XVI.

Dispositio igitur est ordo rerum dicendarum, ad nostram causam certa ratione accommodatus. ea nos in scribendo plurimū iuuabit. Is enim qui scribit, si rectè materiam disponat, et facilius scribet, quum res inter se non implicet, atq; ad idem sepe non redeat: & utilius atq; aptius ad persuadendum scribet, quum rationes singulas locis suis, quasi milites in acie collocauerit. Is uerò qui leget, & omnia melius intelliget, & facilius memoria retinebit. Igitur qui ad scribendum accedit, quasi corpus aliquod compositurus, materiā omnem animo quasi oculis subiiciat ac proponat: & primum quidem eam in caput, & maxima membra, hoc est. in exordium, et ceteras maiores partes distinguat: neq; solum quantum satis est, unicuiq; parti tribuat, ut omnia pro corporis magnitudine sibi equaliter membra respondeāt: ne si caput aut aliud membrum à ceteris magnitudine discrepet, monstrosum corpus esse uideatur: uerum etiā eius generis materiam parti cuiq; tribuat, quam illi maximè intelligit cōuenire: ne uel ea quæ confirmationis sunt, in exordiū conserat: uel quæ in narratione dicenda sunt, in conclusionem differat. Deinde in exordio semina quædam & principia cause totius, tanquam nervos in ca  
pito



pite collocet: à quibus uniuersa oratio manari de  
 diffundi uideatur. Ea uero prima in exordio lo-  
 cet, quæ ad conciliandos animos tunc maximè li-  
 beros, & in nullam adhuc partem inclinantes ua-  
 lere plurimum existimabit. Ea enim quæ nudis ad-  
 huc & liberis animis imprimuntur, maximè in-  
 hærent. Sunt itaq; lectorum atq; auditorum ani-  
 mis potissimum, & primo quoq; tempore impri-  
 menda, quæ neq; deleri facile possint, & reliquis  
 rebus dicendis fidem maximam atq; attentionem  
 parent. Exordio, si res postulabit, statim narra-  
 tio subiicietur, nisi aut lectoris animus maiori  
 præparatione, aut nostra causa maioribus funda-  
 mentis indigeat: quod accidere poterit, si defen-  
 dere turpē causam existimabimur. Narrationis  
 uero dispositio qualis esse deberet, diximus; quæ  
 de narrationis uirtutibus tractaremus. post eam  
 diuisio earū rerum quas tractaturi sumus, si lon-  
 gior causa fuerit, collocabitur. Sæpenumero ta-  
 men, in epistolis præsertim, quæ artificium omne  
 dissimulant, diuisione supersedemus, aut id quàm  
 occultissimè facimus. In confutatione ea prima di-  
 luere ac refellere oportebit, quæ uel lector, uel ad-  
 uersarius tanquā firmissima suæ causæ adiumen-  
 ta ex aduerso uel collocauerit, uel collocare po-  
 terit. Cetera partim eludere, partim cōtemnere,  
 partim transferre, partim subterfugere faciliè po-  
 terimus. In confirmatione firmissimam quamq;

argumen-

argumentationem cum in principio, tum in fine collocabimus, ut et nostræ causæ fundamenta constituamus, & lectoris siue auditoris animum in fine quasi obseßsum, ac deuictum nostris rationibus relinquamus. In medio leuiora collocabuntur: quæ quum per se satis firma non sint, ualidioribus utrinq; uallata, robur ab antecedentibus consequentibusq; accipient. Conclusio tametsi multis in locis disponenda est, in fine tamen maximè, artificiosissimeq; adhibenda. Cuius ratio satis abundè; à nobis in primo libro est tradita. Dispositio in epistolis, si perpetua materia fuerit, hæc potissimū seruanda est. Si plures erunt res, quæ tractentur, à maximis & grauissimis incipiemus. Licebit tamen pro qualitate eorum ad quos scribimus, à leuioribus tanquam ab exordio incipere, ut illis aditum quodammodo nobis ad grauiora præparemus. Si pluribus epistolis unica epistola respondendum erit, licebit uel acceptarum epistolarum ordinem, uel negotiorum grauitatem sequi. atq; in hac quidem re nos ratio temporis admonebit. Ac de dispositione quidem satis in præsentia dictum sit. Nunc ad elocutionem, quæ una reliqua est ex suscepta institutione, transeamus.

De elocutione in uniuersum, & de scribendi materia, Cap. XVII.

P Elocutio

Elocutio est, elegans & ornata uerborum sententiarumq; compositio: quam quidem adipisci qui uolet, ante omnia considerabit, num poemata, an solutam orationem uelit scribere. Plurimum enim tam apud nos, quàm apud Græcos differt, poetarum ac oratorum inter se lingua, non numeris modò, sed toto, etiam dicendi genere. Poetæ enim omnia magna atque admirabilia dicendo faciunt: quippe qui res heroicæ, diuinæq; narrent. Oratores, quum ueras causas agant, causæ, non admirationi inserviunt: proptereaq; circumspectius loquuntur. Præterea poetæ omnia adiectiuis exornant, illustrent, uestiunt, circumfundunt. Oratores omnia simplicius atq; absolutius agant necesse est, & res ipsas apertas, expeditasq; proponant. Postremò illi tum in singulis uerbis, tum in sententijs ordinandis, componendisq; audacia ac licentia maiore utuntur: figuræq; tam uerborum, quàm sententiarum sibi proprias atq; accommodatas habent, quæ orationi minimè conueniunt. Hi uerò, cum numeris illis non arctent, neq; sibi figuras arrogant, neq; illam in transferendo & componendo licentiam assumunt. Suos utrique fines habent, quos egredi nefas est. Quisquis igitur ad scribendum accedet, hos in primis fines, atque hanc differentiam teneat necesse est, memineritq; se in oratione

tionem poetam, in poemate oratorem figuris & genere ipso dicendi esse non posse. Quo quidem in genere duo maxime uitia fugienda sunt: unum, ne omnia promiscue, uel quum discimus ab alijs, audiamus: uel quum docemus, alijs enarremus. Nam (ut ait Flaccus) quo semel est imbuta recens seruabit odorem Testa diu. Quod si futuri oratores poemata à principio imbibant, illisq; animum adhuc tenerum & mollem imprimant, semper postea strepitum illum uerborum, & tumorem orationis affectabunt: quod in oratore non mediocre uitium est. Atq; hoc quidem uitio uideo plerosq; laborare, non eorum modò qui rhetoricen, sed eorum etiam qui grammaticen docent. Pueris enim statim post prima grammatices rudimenta Virgilium, Ouidium, Lucanum, Iuuenalẽ, Martialemq; apponunt: secuti, ut arbitror, Quintilianum, qui à sermone Græco incipiendum, & Homerũ pueris enarrandũ esse præcipit: neq; reputantes hanc temporum mutationẽ, et linguæ amissionem, quæ tunc patria erat, nunc peregrina dici potest. Imò etiam magis tunc Romæ uigebat Græca lingua, propter hominum, librorumq; copiam, quàm nunc latina: cuius quidem non usum modò naturalem, quem ueteres habuisse non est dubium, sed scripta quoque, quibus retineri poterat, magna ex parte amissimus.

Difficilius itaq; & laboriosius nunc latina discuntur, quàm olim Græca discebantur. Mutata igitur linguæ consuetudine, ratio quoq; docendi ac discendi mutetur necesse est: neq; pueris, ut olim, poetæ à principio tradi possunt. Moribus uerò illa lectio quantum noceat in tenera illa & molli ætate, nequeo dicere. Perniciosius enim nihil esse, meo iudicio, potest, quàm nudum adhuc animum, qui optima quoq; re primùm imbuendus esset, amoribus, lasciuijs, fabellisq; imbuere. Alterum est uitium, quod magnopere fugiendum esse diximus, ne in soluta oratione poeticam grandiloquentiam, & circuitus illos uerborum initemur: aut nostram orationem adiectiujs, translationibus, & figuris immodicis repleamus, quæ tumidam atq; obscuram orationem reddunt. Quo in genere Apuleius, Petronius Arbiter, Martianus Capella, & alij nonnulli magnopere peccauerunt: qui in oratione poetæ quodammodo esse uoluerunt. Quod quidem uitium optimè uitabimur, si in principio eius lectioni assuescimus, cuius in dicendo similes esse cupimus. Quum autem sint plures etiam in soluta oratione scribendi differentiae, considerandum deinceps est, in quo potissimum genere uersari uelimus. Habet enim res singulæ non solum distincta genera dicendi, uerum etiam propria, peculiariaq; uocabula. Nam si histo-

si historias, & res gestas scribere instituamus, grandiores, tumidioreſq; & poetis quodammodo ſimiliores eſſe poſſumus. Si orationes aut ſcribere, aut etiam pronunciare uelimus, graues quidem cū in uerbis, tum in ſententijs eſſe nos neceſſe eſt: ſed tamen ita faciles & perſpicuos, ut totam orationem noſtram ad eorum qui audiunt peritiam, ſiue intelligentiam, accommodandam eſſe ſciamus. Quo loco reprehendendus nobis error eſt eorum, qui quum apud imperitos uerba faciant, ita in dicendo affectati, obſcuriq; ſunt, ut uix à doctiſſimis per otium intelligi poſſint. Non nulli quum græcè aliquid ſciant, in latina, populariq; oratione Græcis ſæpenumero uerbis utuntur: ob id uel maximè, ut à nemine, uel à quàm pauciſſimis intelligantur, ſcilicet ut errare impune poſſint: & quum maximè errant, quàm optimè dicere exiſtimentur. quod quidē nequaquam facerent, ſi aut ſuæ, aut audientium perſonæ rationem haberent, aut ſi Ciceronem optimum fuiſſe oratorē exiſtimarent: qui, quū & ipſe in utraque lingua doctiſſimus eſſet, & ad doctiſſimos plerunq; loqueretur, non ſolum tamē Græcis uerbis abſtinuit, ſed latinis quoq; non niſi communibus atq; uſitatiſſimis uti uoluit. Nihil dico de illis, qui apud populum altiſſimas philoſophiæ ac theologiæ queſtiones tractant: quas neq; ſi ab alijs audi-

rent, ipsi aut intelligerent, aut probarent: neque quum eas dicunt, satis intelligunt. Igitur qui orationes uolet scribere, ante omnia eam materiam sumet, quam non ipse modò planè intelligat, sed ab auditoribus quoq; intelligi facile posse confidat. Deinde eo orationis genere utetur, quod & uerbis sententijsq; grauissimū erit, et ad usum atq; ingenia auditorū quàm maximè accommodatū. si quis autem in aliqua disciplina præcipere, aut scribere quicquā uelit, æquabile illud et temperatum dicendi genus, de quo Cicero loquitur in Officijs, sequatur necesse est: ita ut neq; figuris multis orationē distinguat, neq; longo ambitu uerborū utatur: & quod in primis necessariū est maximè, dilucidus, apertusq; sit. Nam si ad materiæ difficultatē accedat etiam obscuritas uerborū, & affectatum dicendi genus, neq; libenter legetur, quicūq; is sit, neq; facile intelligetur. Quo in genere Quintilianus in uitio est: quanquam id temporū, quàm hominis, uitium dici magis potest. Si quis aut epistolas tantum, & leuiora quædā uelit conscribere, is pro subiecta materia tum grauius, tum leuius, tum affectatius, tum remissius, tum copiosius, tum breuius, deniq; quod ipse maximè amauerit, genus dicendi sequi poterit, modò materiæ, lectoriq; satisfaciat. Postremò, qui ad scribendum accedit, non solū quid potissimum uelit scribere,

quo

quo potissimum modo uelit scribere, sed cuius inscribendo similis esse, consideret necesse est. Nam quā aliter Catonis, aliter Ciceronis, aliter Quintiliani, aliter Macrobij, & Boethij seculū locutum sit, omnesq; in suo genere, quanquam bene dicāt, tamen inter se maximè discrepent, uidendum est, cuius maximè similes esse cupiamus. Nam si Ciceronem nobis imitandum proponimus, ceterorū tum modos, tum uocabula uitemus necesse est. Non enim secula modò inter se discrepant, sed eiusdem quoq; seculi homines dissimiles in dicendo sunt. Nam, si diligenter aduertimus, aliter Cicerō, aliter Salustius, aliter Cæsar loquitur, qui tamen æquales propè fuere. Permixtio uerò illa, & confusio generum dicendi, quæ ex omnibus seculis atque hominibus fit, tantam orationi inæqualitatem ac dissimilitudinem affert, ut monstrosa penè uideatur. quod in Aulo Gellio maximè intueri licet: qui quum priscam illam eloquentiam imitari conaretur, neque id pateretur consuetudo seculi sui: item quum Græcos, apud quos illa conscripsit, effingere atque exprimere, natura linguæ latinæ repugnante, stūderet: pessimum, meo iudicio, & minimè imitabile dicendi genus affecutus est. Is igitur, qui ad scribendum accedet, uni seculo, atq; adeò uni uiro se addicat, necesse est: eumq; quum optimum elegerit, (stul-



tum est enim, ut ait Plinius, ad æmulandum non optima quæq; proponere, tum sibi summo studio imitandum, atq; effingendum curet. neq; diffidat se dicendo quemcunq; uoluerit æmulari, & consequi posse, modo se diutissimè in scribendo exerceat. Nemo autem est siue ueterum, siue nostrorum, qui Ciceronem in omni genere nõ optimum atq; præstantissimũ esse putet. Quod quidem qui existimabit, ad eius imitationem se totũ conferre, eius orationem effingere, eius uirtutes in eloquendo, quoad fieri poterit, sibi comparare uelle debet.

### De figuris orationis. Cap. XVIII.

Quum aut sint figuræ tres orationis: Vna grauis, quæ uerbis & sententijs grauissimis constat, & luminibus ac coloribus tota distinguitur: quales in orationibus Ciceronis loci quàm plurimi, præsertimq; in accusationibus, & inuectiuis: Altera mediocris, quæ de altitudine illa, & sublimitate multum detrahit, non tamen ad ima descendit: quales sunt magna ex parte Ciceronis orationes, & philosophiæ uolumina: Tertiã infima, quæ sermonem purum, popularem, ac nudum, sed tamen proprium, & latinum habet: quales sunt multe eiusdẽ Ciceronis epistolæ tum ad uxores,

rem, tum ad Atticum, tum ad alios, ad quos ille quotidiano sermone scribebat: ante omnia uidendum est, ut illas inter se discernere quàm optimè sciamus. neque existimemus orationes omnes in graui, philosophiam in mediocri, epistolas in attenuata figura scriptas esse. Nulla enim ferè oratio est, in qua non omnia hæc genera reperiantur. Narrationes enim plerūq; in attenuata sunt: exordia in mediocri: confirmationes, & confutationes, & conclusiones, præsertim in quibus misratio captatur, plerunq; in graui sunt, nunquam in attenuata: quod ex pondere sententiarum, figurisq; uerborum deprehendi facile potest. Habet enim hæc figura tanquam fluuium quendam dicendi, effunditq; omnes habenas eloquentiæ: uehementiam uerò tantam, ut animos non mouere, sed cogere uideatur. Attenuata huic contraria, nullas translationes, aut figuras habet: neruo tamen sermonis non amittit. In hoc genere comædiæ scriptæ sunt, tametsi insurgunt illæ nonnunquam, iratusq; Chremes (ut ait Flaccus) tumido delitigat ore. In hac figura epistolæ à nobis, nisi grauior res urgeat, magna ex parte scribendæ sunt. Est enim difficilior iā nobis attenuata, quàm grauis ueteribus unquam fuit, propter linguæ latinæ desuetudinem, atq; amissionem, & propter discendi difficultatem. Licet tamen & ex humili

in mediocrem, grauemq; ascendere, & e graui in mediocrem atq; humilem, non tamē repente, sed per quosdam quasi gradus sensim descendere, ut uenisse in eam, non cecidisse uideamur. Mediocris inter utranq; posita, neq; hanc humilitatem, neq; illam sublimitatem omnino retinet. Distinguitur tamen & illa figuris, & luminibus orationis: & quia utriq; finitima est, faciliorem tum ascensum, tum descensum habet. In hoc genere historiae sunt magna ex parte conscriptae: orationes tamen Liuianae praesertim, ad graue plerunq; cōscendunt. In hoc genere magna ex parte orationes à nobis hodie scribi debēt, qui forense illud dicendi genus exercere non possumus, & in laudationibus plerunq; uersamur. Licet etiam in hoc genere epistolas scribere, praesertim eas quae materiam habent grauiorem. Videndum autē est, ne in finitima his figuris uitia dilabamur. Nam dum graues esse cupimus, solemus nonnunquā tumidi fieri, si uel crebris atq; extraneis translationibus, uel frequentibus ac poeticis adiectiuis orationem repleamus: qualia sunt in Petronio, Martiano, & Apuleio multa, quaedam etiā in Hieronymo nostro, praesertim ubi de beata Virgine, aut inferis loquitur. In quod uitium multos quoq; de nostris incidere hodierna die uideo, qui se tum demum latine atq; ornatē loqui putant, quum poeticis adiectiuis, atq;

trans=

translationibus orationem duram ac difficilē reddunt. Attenuatæ contrā figuræ uitium est, quū conjunctiones ac nervos orationi detrahimus, quod in sermone quotidiano fieri uidemus: quale est, Tu nunquam ad me scripsisti, ego scripsi ad te sæpe: Tu non scribis ad me, ego non scribam ad te: Amicitia mea tibi iucunda non est, mihi tua iucunda non erit. Hæc oratio nervos non habet. Adduntur autem nerui sic: Quum ego ad te sæpe scripserim, tu ad me nunquam scripsisti: Quod si post hæc statueris non scribere, ego quoque ad te non scribam: Nam si tibi amicitia nostra non est iucunda, tua quoq; mihi iucunda non erit. Atq; hæc figura quoniā usitatior, & intellectu facilior est, exemplum apposui. Habet enim grande & perspicuum uitium. In cæteris, in quibus uitia uel minora, uel occultiora sunt, non apposui. Mediocris autem figuræ uitium est, quum quasi sine sanguine, neruisq; sententias coaceruamus potius, quàm componimus: & orationi tenorem illum, uigoremq; subtrahimus, qui intelligi magis, quàm dici potest. Sed quoniam hæc sunt à Cicerone, & ab alijs ueteribus, nostrisq; copiosè, ornateq; perscripta, à nobis uerbosius tractanda non sunt.

De

## De uirtutibus elocutionis.

## Cap. XIX.

Reliquū est, ut de uirtutibus elocutionis pauca dicamus. Habet aut tres maximas, precipuasq; uirtutes elocutio, perspicuitatem, ornatum, compositionem: quæ cæteras omnes complectuntur. Perspicuitas tamen in singulis uerbis, tum in ipsa compositione, et ordine consideratur. Verba singula et propria, et usitata, et latina sint necesse est. Propria sunt, quæ uniuscuiusq; rei conceptum propriè accommodatèq; significant. Quo in genere sordida, obscœna, et humilia uitanda sunt: quamuis sint eius, quam exprimere uolumus, rei propria. Sordida existimantur dictu, quæ ab oculorum aspectu remoueri solent: ut officia corporis necessaria, eorumq; membrorum et officiorum uocabula. Obscœna sunt ea, quæ tametsi cum honestate fieri nonnunquam possint, dici tamen sine uerborum sceditate non possunt: ut dare operam liberis, et quæ eiusdem generis omnibus nota sunt: quæ quidem tam honestè dici, quàm fieri debent. Humilia sunt, quæ infra lectorum, aut auditorum, aut etiam eius ipsius qui loquitur, dignitatem sunt: ut si apud Pontificem, et sacrum collegium, asinos, mulos, instrumenta rustica singillatim, aut uilia domus officia nominemus:

mus:

mus: quæ quidem aut silentio prætereunda, aut honestioribus uocabulis nominanda sunt. Propria item sunt, quæ quum uocabulo careant, ad similitudinem referuntur: ut iaculari, quod tam de pilis & sudibus, quàm de iaculis dicimus, quia pilari & sudari non dicimus. Item lapidare, non solum de lapidibus, sed de glebis quoq; & testis, & similibus dicimus, quæ uocabula propria non habent. Vertex item est aquæ reuolutio, & quicquid in se uertitur: per similitudinem tamen & capitis, & montis cacumen dicimus. Propria etiam sunt, quæ usus alicui certæ significationi accommodauit: ut ueteres, qui urbis nomine Romam tantum intelligebant, quamuis aliæ multæ urbes essent: & nos, qui Philosophi nomine Aristotelem, Apostoli Paulum intelligimus, quamuis & philosophi alij, & apostoli fuerint. Denique, ut breuiter dicam, propria sunt, quæ id quod uolumus, auditori maximè apertissimeq; declarant, & (ut Fabius ait) non auditu, sed intellectu perpendenda sunt. Latina autem uerba sunt, quæ ueterum scriptorum autoritas, & Romanæ linguæ consuetudo comprobauit. Quo in genere Græca multa ita iam in usum recepta sunt, ut si quis eadem latinè uelit exprimere, non intelligatur: ut Apostolos, Prophetas, episcopos, euangelia, theologiam, angelos, & alia multa, quæ appellare latina audeat

det nemo. Quædã etiam hebræa uocabula ita recepimus, ut mutare ea nefas ducamus, ut cherubin, seraphin, sabaoth, osanna, alleluia, & similia. Quod si quando de sacris rebus scribamus, aut dicamus, illis abstinere neq; debemus, ne religionem odisse uideamur: neq; possumus. quia si latine hæc dicere uelimus, à nemine prorsus intelligeremur. Ea item, quorum res inuenta nuper sunt, uocabula reformidare non debemus. qualia sunt, Cardinales, bombardæ, campanæ, staphæ, et cætera: quorum quum res nuper inuenta sint, uerba quoq; quibus res illæ exprimantur, in consuetudinem admittenda sunt, ne uel aliud dicere uelle, quum loquimur, uel alio nati seculo, uel nolle omnino intelligi uideamur. Vsitata uerò nō omnia sunt, quæ latina. Ea enim quæ uel in duodecim tabulis, uel in libris pontificum, uel in comædijs, tragædijs, scriptisq; eorum qui ante Ciceronem fuerunt, latina quidem esse nemo dubitat: sed etiam ipso Ciceronis tempore ex usu remota, atq; antiquata erant. proptereaq; minus bene ac perspicue loqui existimandus est Gellius, qui non modo à uerbis illis non abstinet, sed ea etiam affectat, & querit. Contrà ea quæ posteriores philosophi, theologi, et iurisperiti in consuetudinem adduxerunt, uerba magna ex parte fugienda sunt, atq; ad Ciceronianum illum candorem, & perspicuitatem.

difficultatem omnis lingue consuetudo reuocanda, modò uel apud Ciceronem, uel apud alios magnæ autoritatis scriptores ea uerba reperiuntur. Si uerò conceptus aliquos uel in philosophia, uel in theologia exprimere uelimus, qui uerbis uel intacti, uel incogniti fuerint: non propterea debemus uereri quominus quoquo modo exprimamus, aut uoces de integro effugamus, aut inuentas molliamus, auresq; illis nostras assuefaciamus: neq; propterea eos qui id fecerunt, Cyprianum, Lactantium, Hieronymum, Augustinum, innumerabilesq; alios doctissimos uiros, barbaros aut imperitos appellare debemus: sed omnia ad doctissimorum hominum autoritatem, consuetudinemq; referre. Atq; hæc in singulis uerbis breuiter obseruanda esse censeo.

## De uitæ compositionis.

### Cap. XX.

In compositione autem, & contextu ipso, multa & magna uitia committuntur, quæ non modò difficilem atque obscuram, sed ineptam quoq; & inconcinnam orationem reddunt. Nos ex illis quedam maxime insignia annotabimus, ut ex illis cætera cognitu faciliora sint. Ante omnia igitur, si dilucidi esse cupimus, longissimas illas comprehensiones, quas περίοδος Græci uocant,



cant, fugiemus, ne lectoris aut auditoris intentio  
 prosequi ingenio nostram orationem non possit.  
 Item tardam, & diu dilatam uerborum tractatio-  
 nem, quod Græci *ὑπερβατον* uocant, magnopere  
 uitabimus, ne multis interiectis uerbis, finis demum  
 sententiæ oblito iam lectore consequatur: qualia  
 uitia sunt in proœmio Prisciani. His finitimæ sunt  
 longæ, crebræq; sententiarum interpositiones,  
 quas Græci *παρεμβόαις* uocant: quas neq; frequen-  
 tes, neq; longas esse conuenit, ne lector aut princi-  
 palis sententiæ obliuiscatur, aut ita utranq; secum  
 implicet, ut neutram intelligat. Videndum præte-  
 rea est, ne uerba ita texamus, ut uel ancipitem,  
 uel obscurum intellectum reddant. Quale est il-  
 lud, Saxa uocant Itali medijs quæ fluctibus aras:  
 aut illud, Aio te Aeacida Romanos uincere pos-  
 se: quo loco & uictos, & uictores Romanos pos-  
 sumus accipere. Videndum item est, ne dum co-  
 piofi, aut elegantes, aut ornati esse cupimus, in-  
 nani quodam strepitu, circuituq; uerborum, &  
 (ut ait Quintilianus) copiosa loquacitate lon-  
 gissimam & incomprehensibilem uerborum se-  
 riem, sine ullo rerum pondere, aut conclusionem fa-  
 ciamus: qua in re nonnulli maximè laborant, rati  
 se tunc maximè doctos atq; elegantes existimatis-  
 iri, si à quàm paucissimis intelligantur. Alij con-  
 trà breuitati studentes, uerba, nomina, coniun-  
 ctiones,

tionem, et ceteras partes ex oratione detrahunt: rati aut se ita breues fore, si necessaria omiserint: aut ceteros ea intelligere, quæ ipsi intelligant. Nonnulli uerba quidem clara, et suo ordine collocant: sed ita, ut nullus ex his, aut quàm occultissimus sensus emergat, ita ut oporteat lectorem sensus illos non quasi alienos intelligere, sed quasi suos magno labore excogitare, atq; inuenire, quæ quidē *ἰδιαιοντα* à Græcis uocantur. Danda igitur opera est, ut lector atque auditor non modò possit nostram orationem intelligere, sed ut non possit eam, etiam si uelit, non intelligere. Quod quidem obtinebimus, si, ut antè diximus, uerbis proprijs, latinis, et usitatis utemur. Nam emendatè loquēdi ratio, quam Quintilianus adiungit, ad grammaticam institutionem pertinet. Item si comprehensionibus non longis, neq; interiectione sententiarum, aut traiectione uerborum, aut ancipiti contextu sententias obscurabimus. postremò, si neq; orationi quicquam detrahimus, neq; superuacuum diffluere patiemur, neq; sententias de communi usu remotas atq; abhorrentes excogitabimus. Est enim, ut ait Cicero, uitium in oratione uel maximum, à uulgari genere orationis, et à consuetudine communis sensus abhorre. Quod quidem uitium quum semper magnum fuit, tum hoc præcipue tempore uel maxi-

Q. tum,

mum, uel maxime fugiendum est. Nam neq; omnes literis delectantur: neq; hi qui delectantur, hoc dicendi genere delectantur. Præterea quàm paucissimi ex his quorum gratia uel dicimus, uel scribimus, ita docti sunt, ut possint nos, si obscurius loquamur, etiã diligentius attendentes intelligere. Dabimus itaq; operã, si intelligi cupiemus, ut nostra oratio ita in animos lectorum atq; auditorum, ut sol in oculos, etiam inuitos ingruat, atq; incurrat. Illa præterea in compositione uitia fugienda sunt, quæ ineptam, insulsam, atq; inconcinnam orationem reddunt. ut frequēs uocalium earundem concursus: quale esset, Herculeæ armæ æneæ allata sunt. quod uitium uastam, atq; hiantem orationem reddit. Item huic contrarius creber multarum consonantium quasi conflictus, qui difficilem pronunciatu reddit orationē: quale esset, Xerxes strangulauit Ptolemæum. Itē eiusdem literæ crebra repetitio: ut in hoc uersu, O Tite tute Tati tibi tanta tyranne tulisti. Itē eiusdē dictionis frequēs sine decore atq; ornatu repetitio: ut, Si homo cogitaret, quanti hominis uita est, nullus homo hominis gratia homines occideret. Vitandus est etiã ille contextus uerborū, qui uel sonū turpē, uel obscœnū reddit: ut, Cū nostro exercitu, et Dorica castra, et similia. Vel sensum efficit tale, qui etiã in obscœnā partē accipi potest: quale est,

est, Incipiunt agitata tumescere. Vtrūq; autem à græcis *νανέμπατος* dicitur. Item ille uitiosus contextus est, qui in numerum poeticum desinit: ut, Da animas nobis, cætera tolle tibi. Et illud in priore Lucilij libro, Hæc res ad te scriptas Luci misimus Aeli. Item uitiosa sunt crebra similiter cadentia: ut, In conspectu tantorum doctorum uirorum, sapientissimorum oratorum, quis audeat uerba facere? Quæ quidem uitia tametsi obscuram orationem non reddunt, æquæ tamē, atq; obscuritas, lectorē atq; auditorē auertant: atq; haud scio, an etiā magis. Nam obscuritas auditoris uidetur arrogantiam arguere, et quoquo modo attentum eum reddit, ut si qua ex parte possit, quæ dicantur intelligat. Intercinmitas uerò et auditori quamuis imperito fastidium affert, et scriptoris ignorantiam atq; stultitiam ostendit aperte. Dabimus itaq; operam, ut et perspicui in scribendo, dicendoq; simus, et hæc atq; aliis his similia in compositione uitia declinemus.

## De ornatu. Cap. XXI.

Sequitur, ut de ornatu, quam secundam esse uirtutem elocutionis diximus, pauca differamus. Nam ubi oratio proprijs latinisq; ac usitatis uerbis affecuta fuerit, ut perspicue ab omnibus intelligatur, tum quibusdā quasi coloribus depingenda atq; illustranda luminibus erit, ut et aures delectet, et animū mira quadā lectionis suauitate permulceat.

mulceat. quæ quidem quo modo aut inuenienda, aut collocanda sint, magna ex parte natura ipsa docebit, atq; ad locos illos filo quodam, & ordine orationis quasi manu ducet. Non enim hæc tam ab arte, quàm ab ingenio, ac natura ipsa, meo iudicio, proficiuntur. nullis enim præceptis, nullo artificio tradi potest, quo loco unamquamq; figuram disponere & collocare conueniat. Huc accedit, quòd in sermone etiam quotidiano, & communi lingua illiterati homines nō illis modò quæ arte traditæ sunt, sed alijs quoq; & multo pluribus, nullo docente, utuntur. quod quum ita sit, facilius est aut hæc à natura, non ab arte profici sci, aut homines cum arte nasci: quod quidem quæ stultissimum sit, illud profectò sequitur, hæc à natura primùm profecta esse, deinde à doctissimis uiris obseruata: & quia conferre ad dicendum uidebantur, in artem præceptionemq; redacta. Obseruauerunt autem hæc primùm Græci; eaq; in artem & præcepta redigentes, suis nominibus appellauere. Nobis, quibus illa adhuc incognita atq; inaudita erant, maiora ac difficiliora ob nominum nouitatem uidebantur. Nostri deinde illa scribentes, atq; omnia ad patrium, hoc est Romanum sermonem reuocantes, latinis uocabulis nominare. Sed qui parū periti linguae græcæ sunt, alia putant esse quæ græcè audiunt, alia quæ la-  
tine,

tine: neq; esse eandem figuram ὑπερβολὴν & su-  
 perlationem, atq; illo nominum inusitato & ina-  
 cognito sono decipiuntur. Nos & latinæ linguæ,  
 & discientium utilitati consulentes, eas & latinis  
 nominibus appellabimus: & ubi se nobis græca  
 obtulerint, etiam Græcis signabimus: ut & qui  
 hæc latinè scire uolunt, habeant, quibus ea uoci-  
 bus possint appellare: & qui græcè scripta apud  
 alios legunt, alia esse non credant. Appellantur  
 hæc autem à Græcis partim τρόποι, partim: σχή-  
 ματα, eo quòd uertant, formentq; sermonem: à  
 nostris tum figuræ, tum exornationes, siue orna-  
 menta, eo quòd exornent, effingantq; orationem:  
 tum per similitudinem colores, aut lumina, quòd  
 orationem ipsam pingant, & illustrent. Sunt au-  
 tem figuræ, quibus in sermone utimur, tam mul-  
 tæ, ut nihil sine figura loquamur. Nam quum fi-  
 gura sit formatio quædam, compositioq; sermo-  
 nis à uulgata illa, & se primùm nobis offerente  
 loquendi ratione discedens, & ad uariandam at-  
 que illustrandam orationem excogitata, quis ob-  
 secro ualeat modos omnes, quibus oratio uaria-  
 ri aut illustrari potest, præceptis, aut nominibus  
 comprehendere, quum quotidie etiam in sermone  
 communi innumerabiles reperiantur? Nos au-  
 tem, ne partem hanc neglexisse uideamur, pau-  
 cissimos atq; usitatissimos attingemus: reliquos

scire qui uolet, apud Cicronem, Quintilianūq;  
 à quibus nos hæc accepimus, facile inueniet.

## De figuris uerborum.

### Cap. XXII.

Igitur quum ab eodem uerbo membrunt, uel  
 comprehensiones sæpe inchoamus, repetitio à no-  
 bis, à Græcis ἀναφορὰ dicitur, hoc modo: Scipio  
 Numantiā sustulit: Scipio Carthaginē deleuit: Sci-  
 pio pacem peperit: Scipio ciuitatem seruauit.  
 Contrā, quum in idem uerbū sæpe desinimus, con-  
 uersio, siue ἀναστροφὴ appellatur, hoc modo: Pœ-  
 nos populus Romanus iustitia uicit, armis ui-  
 cit, libertate uicit. Quum autem & ab eodem in-  
 choamus, & in idem desinimus, ex ambabus his fi-  
 guris una fit, quæ complexio, siue συμπλοκὴ no-  
 minatur, hoc modo: Qui sunt, qui fœdera sæpe  
 ruperunt? Carthaginenses. Qui sunt, qui in Italia  
 crudele bellum gesserunt? Carthaginenses. Qui  
 sunt, qui Italiam deformauerūt? Carthaginenses.  
 Quum uerò idem uerbū in media oratione cum  
 dignitate & concinnitate in diuersis casibus sæpe  
 repetitur, Transductio, siue πλοκὴ nuncupatur,  
 hoc modo: Qui nihil habet in uita iucundius uita,  
 is cum uirtute uitam non potest colere. Quū au-  
 tem cōmiserationis, uel alterius affectus mouendī  
 gratia, unum, uel plura uerba mutato ordine ite-  
 rantur,

vantur, Conduplicatio, siue *ταυτολογία* dicitur, hoc modo: Pudet iudices, pudet hac de re toties uerba facere. Item, Nunc etiam audes in horum conspectum uenire, proditor patriæ, proditor inquam patriæ uenire audes in horum conspectum? Quum quasi per gradus quosdam à uerbo in uerbum cum antecedentis repetitione descendimus, Gradatio fit, quæ *κλίμαξ* appellatur, hoc modo: Africano uirtutē industria, uirtus gloriā, gloria æmulos comparauit. Atq; his potissimum figuris cum dignitate uerba repetuntur.

Contentio, siue Contrarium, quod *ἀντιθέσις* dicitur, est, quum ex contrarijs uerbis, ac rebus sibi respondentibus sententia conficitur, atque id quod uolumus probatur, hoc modo: Habet assentatio iucunda principia, eadem exitus amarissimos affert. Item, Qui suis rationibus inimicus semper fuit, eum quomodo rebus alienis amicum fore speres? Atque has duas figuras, quum & eiusdem generis sint, & parum inter se discrepent, de industria coniunxi. Differunt autē hoc modo. Nam Contrarium urget, & ex re contraria probat, quod uult: Contentio neq; urget, neq; quicquam probare uult, sed plerunq; reprehendit: quod ex superioribus exemplis apparet.

Exclamatio est, quæ animi affectum ostendit, per loci, aut rei, aut hominis absentis, siue de-



functi compellationem, hoc modo: Te nunc allo-  
quor Africane, cuius mortui quoq; nomen splen-  
dori ac decori est ciuitati. Item, ô singularem au-  
daciam, ô perfidiam incredibilem.

Interrogatio dignitatem atq; ornamentum  
affert orationi, quum ex antedictis urget, fateriq;  
compellit, hoc modo: Quum igitur hæc faceres,  
ac diceres, num rempub. conseruabas? num socios  
in fide retinebas?

Membrum, quod *κῶλον* dicitur, est oratio  
breuis: quæ tametsi sententiam absolutam habet,  
aliam tamen expectat, quæ ei per coniunctionem  
plerunque annectitur: iungunturq; duo aut plura  
membra simul, hoc modo: Et inimico proderas,  
hoc unum membrum est: Et amicum ladebas, hoc  
est alterum. additur & tertium sic, Et tibi ipsi  
non consulebas. Item, Nec rei consuluisti, nec ami-  
cis profuisti, nec inimicis restitisti: quæ quidem  
Græci *τεῖκωλα* uocant.

Articulus, qui *ῥῥόνδετορ* dicitur, est, quoties  
uerba singula sine coniunctione per se quadam  
cum uehementia collocantur, hoc modo: Acrimo-  
nia, uoce, uultu, gestu, inimicos perterruiisti.

Compar est, quum duo aut plura membra  
paria, quantum fieri potest, sine coniunctione  
ponuntur: ut, In prælio mortem pater oppete-  
bat, domi nuptias filius comparabat. Hæc omnia  
grauēs

graues casus administrabant. atq; hæc ἰσὼν ἀλὰ à Græcis appellantur.

Similiter cadēs, quod ὁμοίῳ ἴσῳ dicitur, est, quum plures dictiones in eadem oratione per casus similes efferruntur. ut, Hominem laudas egentem uirtutis, abundantem felicitatis.

Similiter desinens, quod ὁμοιοτέλευτον uocatur, est, quum in easdē syllabas desinunt ea quæ casibus carēt, sic: Turpiter audes facere, nequiter studes dicere: Viuis inuidiose, delinquis studiosē, loqueris odiose. Coniunguntur hæ duæ figuræ simul, hoc modo: Perditissima ratio est, amorem petere, pudorem fugere, diligere formam, negligere famam.

Annominatio, quam παρὼνομασία uocant, est, quū penē eandē dictionē, mutata significatione, per iocum, aut per dicacitatē repetimus. Ea fit cōmutatione, additione, imminutione literarum. ut, Hic mero, non Homero operam dat. Item, Hic qui se magnificē iactat, uenit à te antè, quàm Romanam uenit. Item, Hic sibi posset obtemperare, nisi amori mallet obtemperare. Atq; huius allusionis plures species sunt, quàm ut à nobis breuiter explicari possint. Sed ut à lepido ingenio facile excogitantur, sic à stolido frustra conquiruntur.

Definitio est, quæ breuiter, quid quæq; res sit, & quæ sit natura eius, ostendit: uel dialectico mo-

do pergens ad differentias proprias. ut, Auaritia est cupiditas pecuniæ congregandæ sine erogationis uoluntate. Vel oratorio modo sic: Auaritia est, quæ pecuniam congregat, neq; sibi, neq; alijs quicquam impartit, neq; unquam habendi cupiditate satiatur. quæ quidem potius Descriptio potest appellari.

Transitio est, quæ breuiter, & quid dictum sit, repetit: & quid sit dicendum, proponit. hoc modo: Audistis patres, qualis fuerit Thomæ uita: audite nunc, si placet, qualis fuerit eius uiri doctrina.

Correctio est, quæ tollit id quod dictum est, & pro eo id quod magis idoneum uidetur, reponit, hoc pacto: Quod si iste suos hospites rogasset, imò ipse innuisset modò, hoc facile perfici posset. Item,, Hoc offendit existimationem nostram, imò uerò dignitatem, atque adeò salutem ipsam evertit.

Occupatio est, quum dicimus nos præterire, aut non scire, aut nolle dicere id quod maxime dicimus, hoc modo: Non dico, te ab socijs pecunias accepisse: non sum in eo occupatus, quòd ciuitates, regna, domos omnium depopulatus es: furta, rapinas omnes tuas omitto.

Disiunctio est, quum singulis membris sua uerba damus, sic: Populus Romanus Numantiam  
sustulit,

*Iustulit, Carthaginem deleuit, Corinthum euertit.*

*Coniunctio est, quum uerbum unicum, & illud in medio collocatur, sic: Formæ dignitas aut morbo deflorescit, aut uetustate.*

*Adiunctio est, quum uerbum aut præponitur, aut postponitur. Præponitur, sic: Deflorescit formæ dignitas aut morbo, aut uetustate. Postponitur, sic: Aut morbo, aut uetustate formæ dignitas deflorescit.*

*Interpretatio est, quum idem per diuersa uerba ad rem exaggerandam, & animos commouendos repetimus, sic: Patrem nefariè uerberasti: Parenti sceleratè manus intulisti. Quòd si longior sententia diuersis uerbis repetatur, Expolitio dicitur.*

*Commutatio, quæ a rrimetapopæ dicitur, est, quum duæ contrariæ sententiæ, mutatis tantum uocibus uerborum, aptè simul concluduntur: ut, Oportet esse, ut uiuas: nō uiuere, ut edas. Item, Dicere quæ non sentio, licet: quæ sentio, non licet.*

*Permissio est, quum id in quo uel salus nostra, uel res alia consistit, ex desperatione rerumstrarum alienæ potestati permittimus, sic: Amisissis iam omnibus, uita sola superest: eam uobis totam permitto, ac dedo: uos, ut placet, utimini, atq; abutimini: de me, ut uultis, statuite.*

*Dubitatio est, quū querimus, quid ei rei quā dicere*

cere uolumus, uerbum accommodatum sit, hoc modo: *Que ista tua est siue imprudentia, siue stultitia, siue utrunq?* Dubitamus enim quo eam nomine appellemus.

Expeditio est, quum pluribus rationibus enumeratis, cæterisq; confutatis, unam quam uolumus, nos sequi necessario ostendimus, hoc modo: *Quoniam habes hunc equum, aut dono, aut hæreditate, aut præda, aut furto habeas necesse est. Amicum, qui tibi dono eum dederit, non habes: hæredem te per hos annos nemo scripsit: in exercitu nunquam fuisti: relinquitur ergo, ut eum furto sustuleris. Sed hæc figura inter argumentationes est dicta.*

Dissolutio, quam *ῥαχολογία* appellant, est, quum plura membra sine coniunctionibus per interualla proferimus, sic: *Gere more parenti: pare cognatis: obsequere amicis: obtempera legibus.*

Præcisio est, quum dictis quibusdam id quod dici coepit, imperfectum relinquitur, ad suspicionem, uel atrocitatem augendam, hoc modo: *Tu hoc audes dicere, qui nuper, sed præ turpitudine dicere id non audeo. Plus hic est quod suspicatur auditor, quàm quod ille dicturus fuisset.*

Conclusio est, quum breui argumentatione id quod uolumus, ex antedictis necessario consequi ostendimus, sic: *Si hæc urbs seruari sine com-*  
meatu

meatu non poterat, Pompeius autem & pecuni-  
am, & naues ad commeatum emendum, atq; ad-  
uehendum contulit, Pompeius nimirum hanc ur-  
bem seruauit.

Nominatio, quæ *ὀνοματωσία* dicitur, est,  
quum nomen aliquod nouum rei, quæ satis idone-  
um non habeat, accommodamus. Ea fit duabus de  
causis, imitationis, & significationis gratia: imi-  
tationis, quum ex similitudine aliarum uocum ali-  
quam fingimus, sic: Nami ut maiores nostri philo-  
sophari dicebant eum qui philosophiæ operam  
dabat, sic nos astrologari hūc hominem dicimus.  
Quum aliquid significare & exprimere uolu-  
mus, sic: Conscendit equum, atq; in staphis substi-  
tit. Nomina tamen hæc & raro & necessario &  
dilucidè fingenda sunt.

Pronominatio, quæ *ἀντροπωνομία* dicitur, fit,  
quum aliquem uel laudis, uel ignominie causa  
quodam quasi cognomine appellamus: ut si quem  
nouum, Cæsarem appellemus: aut si inuidum, Zoi-  
lum: pumilionem, Atlantem: aut ignauum, Hære-  
culem, deridendi gratia nominemus.

Denominatio, quæ *μετωνομία* dicitur, est,  
quum à propinquis & finitimis rebus aliquid  
nominamus. ut inuentum ab inuentore: ut quum  
Liberum & Cererem, pro uino & frugibus po-  
nimus. uel contra inuentorem ab inuento: ut quum  
minum

uinum, & fruges, pro Baccho & Cerere ponimus. Item dominum ab instrumento: ut si quis de Gallis loquens, dicat, Expulse sunt ex Italia tandem palle, quæ uestes eorum sunt. aut si quis rusticos, uomeres, aut ligones appellet. Item id quod fit, ab eo qui facit: ut si Martem, bellum apellemus: aut tardos, & frigidos, Saturnos uocemus. Item quum qui facit, ab eo quod fit: ut si pigram hyemem, aut desidiosam artem dicamus, quæ pigros & desidiosos homines reddit. Item id quod continetur, ab eo qui continet: ut si Italiam aut Galliam, pro Italis aut Gallis dicam. Item id quod continet, ab eo quod continetur: ut quum argentum & aurum pro uasis & diuitijs nominamus. Hæc figura species quamplurimas habet, quæ usu magis quàm præceptis discuntur. Sed uidendum est, ne in denominando, aut ab usu recedamus, ut obscuriores simus: aut in poeticas denominationes dilabamur, quæ in oratione soluta uitiosæ sunt. Sed hoc nos oratorum lectio, & usus ipse doceat, necesse est.

Circuitio, quæ περιπασις dicitur, est, quum ornandæ rei gratia id quod paucioribus uerbis dici potest, pluribus dicimus, sic: Scipionis prudentia Carthaginiis opes fregit. poteram dicere, Scipio Carthaginem sustulit, nisi circuire ornandi gratia maluissem.

Trans-

Transgressio, quæ ὑπερβατορ dicitur, est, quæ uerborum perturbat ordinem non solum sine obscuritate, sed etiam cum dignitate ad poeticum quendam numerum, qui non dedecet oratorem. Ea sit uerbis nunc præpostero ordine collocatis: ut, Magna cum laude tua dixisti. nunc in partem aliam traiectis: ut, Non ueni ad te ob eum, quem ex patris morte cepi, dolorem.

Diminutio est, quum rem quampiam oratione attenuamus uel euitandæ arrogantiae causa: ut, Dedi operam, ut artem dicendi non in postremis tenerem. Vel inuidiæ fugiendæ causa: ut, Habeo patrimonium non tenuissimum. Superius uitauimus, ne diceremus Optimè tenerem, quod arrogans esset: hic, ne amplissimum patrimonium appellaremus, quod inuidiosum fuisset.

Superlatio, siue ὑπερβολή, est oratio superans ueritatē, augendi, minuendī ue gratia: ut, Si concordiam retinebimus, magnitudinem imperij solis ortu & occasu metiemur. Fit & per similitudinem: ut, Igneum aspectu ardorem æquabat. & per comparisonem: ut, Dulcior melle ab ore eius fluebat oratio.

Intellectus, qui νόημα dicitur, est, quum uel à toto pars intelligitur: ut si preciosas uestes ostentanti dicam, Ostentas mihi diuitias tuas. uel à parte



à parte totum: Non te illa sanctissima limina, illa ara sacratissima commouebant: quæ partes templum uniuersum representant. Item quum plura ab uno intelliguntur. ut, Miles Romanorū uictor extitit: id est milites, Romanorum. uel unū à pluribus: ut, Turbasti mea pectora. quū pectus unicum habeamus.

Abusio, siue *κατάχρησις* est, quæ uerbo simili, & propinquo, pro certo et proprio abutitur: ut quum longum consilium, & breues uires dicimus, quæ impropria sunt. Nam metiri ea non possumus, sed tamen non inconcinnè usurpamus.

Translatio, siue *μεταφορά* est, quum uerbum ex propria re in aliam per similitudinem quandam cōcinnè, perspicueq; transfertur. Ea fit multis modis: quippe quæ plenus sit quotidianus sermo. nos exempli gratia paucos subiiciemus. Obscœnitatis uitandæ gratia, sic: Eius mater quotidianis nuptijs delectatur. Ornandi gratia, sic: Eloquentia, quæ hæcenus aruerat, tua industria reuirescet. Rei antè oculos ponendæ gratia, sic: Hic tumultus sopitas hominum mentes expergefecit. Augendi gratia, sic: Nullæ opes famē istam tuam explere possent. Minuendi, sic: Mihi fortuna cœpit paululum aspirare. Cæteri modi usu & natura percipiuntur.

Permutatio est, quum tota oratio aliud dicit,  
& aliud

Et aliud intelligit: hanc διαλλαγήν græcè possumus appellare, tametsi eā Consummationē Quintilianus uocet. ea fit per similitudinem, sic: Quum canes fungantur officio luporum, cui iam pecuaria committemus? Per contrarium: ut si diuitem Irunt; pauperem Cræsum, impium Aeneam appellemus: quæ, ut dixi, natura magis quàm arte percipiuntur. Ac de exornationibus uerborum satis sit dictum. Nunc de illis, quæ non pluribus uerbis, sed tota sententia constant, pauca attingemus.

### De figuris sententiarum. Cap. XXIII.

In illis autem obtinet primum, meo iudicio, locum, ea quæ dicitur Sententia, quæ γνώμη appellatur à Græcis. Ea est oratio de uita, et moribus sumpta, quæ breuiter quid sit, aut quid esse oporteat, ostendit, hoc modo: Liber is est existimandus; qui nulli turpitudini seruit. Item, Auaritia pecuniæ studium habet, quam nemo sapiens concupiuit. Item, Possessio diuitiarum, et formæ gloria, fluxa atq; fragilis est: Virtus clara, æternaq; habetur. Quibus quidem sententijs et Salustius in procemijs, et Seneca in omnibus suis libris pleni sunt.

Ratiocinatio est, per quam ipsi à nobis quæ-

Rimus;

rimus, quare unumquodque dicamus: & nostris interrogationibus ipsi respondemus, hoc modo: Maiores nostri, si quam unius peccati mulierem damnabant, simplici in iudicio multorum maleficiorum conuictam putabant. Quo pacto? Quoniam quam impudicam iudicabant, eam ueneficij quoque damnatam existimabant. Quid ita? Quia necesse est eam, quæ suum corpus addixerit turpissimæ cupiditati, timerè permultos. Quos istos? Virum, parentes, ceterosque, ad quos uidet sui dedecoris infamiam pertinere.

Diuisio inter figuras nominatur, quum rem in duo membra diuidimus, atque utrumque breui ratione concludimus, sic: Cur ego nunc tibi obijciam quicquam? si probus es, non meruisti: si improbus, non commoueare.

Frequentatio, quam *συναθροισμὸς* Græci uocant, est, quum res in tota causa dispersæ unum in locum accumulantur, quo grauior atque acrior fiat oratio: ut si quempiam laudauerimus, eiusque uirtutes multas enumerauerimus, denique sic eas in unum congregemus: Quis igitur uobis uideri debet, qui tam pius in patriam extitit, tam liberalis in suos, tam officiosus in omnes, tam mansuetus, æquus, modestus, omnibus denique ob suas uirtutes charus?

Similitudo, est oratio quæ ex re dissimili aliquid

quid simile ad rem, de qua loquimur, accommo-  
dat. Ea fit ornandi gratia per similitudinem, sic:  
Non sicut in uestibus, ea pessima quæ diutissi-  
mè durauit: sic in amicitia, is deterrimus qui ue-  
tustissimus: uestis enim usu teritur, amicitia diu-  
turnitate perficitur. Hæc similitudo per con-  
trarium dicitur, quia uestis amico contraria est:  
fit autem ornandi causa, quia illa poterat care-  
re oratio. Fit etiam probandi gratia per nega-  
tionem, sic: Neq; equus indomitus, quamuis natu-  
ra bene compositus sit, idoneus potest esse ad eas  
utilitates, & aptus, quæ desiderantur ab equo:  
neq; homo indoctus, quamuis ingeniosus sit, ad  
uirtutem potest peruenire. Hoc probabilius fa-  
ctum est exemplo equi, cuius ratio similis uidetur  
esse. Dictum aut per negationem, quia res utraq;  
negatur. Fit item similitudo, apertius dicendi cau-  
sa per breuitatem, sic: Amicitia ut uestis dissuen-  
da magis, quàm laceranda est. Hic eadem oratio-  
ne, utraque res breuiter est conclusa, & apertissi-  
mè dictū quod uolebamus. Fit postremò per colla-  
tionem rei ante oculos ponendæ gratia, quod ad  
poetas maximè pertinet, hoc modo: Sicut citharæ  
dus preciosissimis uestib. indutus, corona aurea,  
cithara pulcherrima, atq; ornatissima, ceterisq;  
rebus, quæ expectationem concitare possunt, insi-  
gnitus, si repente silentio factus, pessimè atq; im-  
peritissimè

peritiſſimè canat, ab omnibus eiſcietur, explode-  
tur: ita, ſi quis in ſummiſ opibus, maximis naturæ  
ac fortunæ commodis conſtitutus, nulla uirtute  
ac doctrina præditus ſit, ex omni cōuentu bono-  
rū eiſcietur. Hæc ſimilitudo per cōparationē po-  
nit rem ante oculos: ſed ut dixi, ad poetæ maxime  
pertinet. Videndum tamen eſt, ut quum ſimilitu-  
dinem rei noſtræ applicamus, uerba ex ipſa ſimi-  
litudine in rem noſtrā cōmodè et appoſitè tranſ-  
feramus, ſic: Vt hirundines æſtuo tempore præ-  
ſto ſunt, frigore pulſæ recedūt: ita falſi amici ſere-  
no uitæ tempore præſto ſunt, ſimulatq; fortunæ  
hyemem uiderunt, deuolant omnes.

Exemplum, quod *παράδειγμα* appellatur,  
eſt alicuius facti aut dicti præteriti cū certi auto-  
ris nomine propoſitio, ad rem noſtrā accōmoda-  
ta. Id ſit iſſdem de cauſis, atq; iſſdem rationibus,  
quibus ſimilitudo: propterea exemplis non eget.

Conformatio, quæ *πρὸς ὁμοιοποίησιν* dicitur, eſt,  
quum abſenti, aut moriuo, aut mutæ rei uocem  
atq; orationem tribuimus: ut ſi ciuitatem introdu-  
camus loquentem, aut aliquem ab inferis ſuscite-  
mus, & loquentem faciamus: ut Cicero fecit pro  
Cælio, qui Appium Claudium Cæcum cum Clo-  
dia illa loquentem induxit.

Sermocinatio, quæ *πρὸς ὁμοιοποίησιν* ab alijs, ab  
alijs *ἀνὰ λόγους* dicitur, eſt, quum ijs de quibus lo-  
quimur,

quimur, sermonem ætati accommodatum damus: ut si de puero loquentes, pueri sermonem effingamus: item si senem, mulierem, seruum, regem loquentem faciamus: quod in narratione rerum gestarum, dū singula exprimere uolumus, atq; in historia & poemate fieri maxime solet. Dialogi item omnes in sermocinatione sunt positi. quæ res exemplis non eget.

Significatio, quæ *ἐμφανής* est dicta, appellatur, quum suspicionis augendæ gratia plus minus uel dicimus, quàm ipsa res sit. Ea fit multis modis. Per exuperationem, quum ueram orationem transgredimur, hoc modo: Hic ex tanto patrimonio ne testam quidem sibi reliquit, qua ignem petat. Per ambiguum, quum uerbum plura significat, sed capitur in eam partem, quam uult is qui dicit: ut si de eo loquamur, qui pecuniam suam omnem alijs crediderit, & dicamus: Religiosus hic admodum uir est, multum enim & libenter credit. Per consequentias, quum rem consequentem exprimimus, & antecedentem intelligi uolumus: ut si aratoris filium uelimus significare, dicamus: Tace tu, cuius pater festis tantum diebus humi spuebat, significamus per hoc, eum alijs diebus manus ad lignonem retinendum conspuisse. Sed hæc genera non nisi à facetissimis ingenijs excogitari possunt. nulla enim arte tradi queunt. Fit etiam

significatio per abscissionem, quum cœptam rem non perficimus, sed in suspitione relinquimus: ut, Scis te ista forma atq; etate in aliena domo, nolo plura dicere. Hanc figuram pulcherrimè locus ille Iuuenalis ostendit: Aut pastor fuit, aut illud quod dicere nolo. Fit etiam Significatio per similitudinem, quum re simili allata, satis significatum existimamus, quid uelimus dicere. ut si patriæ proditorem pœnas daturum significare uelimus, hoc modo per similitudinem significemus: Noli consilijs istis, aut opibus nimium credere: erat etiam ingeniosus & locuples Catilina. Hæc exornatio ad iocandum & mordendum accommodata est.

Breuitas, quæ *ἑραχολογία* nuncupatur, est, quum rem uerbis tantum necessarijs perstringimus, hoc modo: Accitus ab isto Robertus Malatesta, Romam uenit, exercitum cogit, hostem prælio superat, paucis post diebus moritur. Breuius hoc nihil dici potest. Et de figuris hætenus.

## De compositione. Cap. XXIII.

Quoniã de tribus elocutionis partibus, quas supra proposuimus, duæ iam absolute sunt, perspicuitas, & ornatus: reliquum est, ut de compositione, quæ tertia pars erat, breuiter differamus. Non enim satis est, uerba propria & accommodata

commodata rebus inuenire, nostramq; orationem figuris, & quasi luminibus quibusdam illuminare, nisi hæc omnia structura quadam & ordine componamus, & quasi contexamus. Quamquam autem hac de re superius à nobis, quum de perspicuitate loqueremur, multa quæ ad uitiosam compositionem pertinent, sunt dicta, multa etiam alijs locis, ubicunque se opportunitas obtulit, respersa: tamen, quoniam hic proprius eius locus est, quædam de ea separatim dicenda sunt. Danda igitur in primis opera est, quod sæpius repetere non uerebor, ut ita scribamus, ut ab omnibus etiam mediocriter eruditjs facillimè intelligamur. quod quidem assequemur, si à communi quodam, & usitato genere orationis non abhorrebimus, nosq; totos ad illius Ciceroniani candoris & facilitatis imitationem conferemus: dabimusq; operam, ut fluere sponte oratio, non trudi atque impelli, & tunc maximè natura ipsa effundente prouenire, non artificio præscribente excogitari uideatur. Illa enim optima atque artificiosissima sunt, quæ nos facere nullo negotio posse confidimus. Nam si Ciceronem, aut Salustium, aut alium quempiam eius temporis diligentius consideremus, nihil facilius existimabimus, quàm eorum in dicendo candorem & simplicitatem assequi. Quod si ten-



tare id, atq; experiri uelimus, nihil difficilius inueniemus. Texenda igitur ita nostra oratio est, ut naturalem illum candorem, & Romanæ linguæ simplicitatem, quantum fieri potest, præ se ferat. quod consequemur, si ea quæ in perspicuitate sunt à nobis præcepta, seruabimus, ut neque longiores ambitus faciamus, neque inter se uerba obscure atq; ambigue implicemus, neque sententias inusitato quodam modo, aut improprijs, peregrinisq; uocabulis inculcemus. Postremo, si ordinem quendam non in uerbis modo, sed in sententijs quoque singulis, & materia uniuersa seruabimus. Ordo autem in uerbis sic seruandus est, ut neq; uerba suos casus, neque substantiæ suas adiectiones longè positas, disiectasq; desiderent, & quasi expectent, neque inter se ornandi studio dictiones singulæ implicentur: quale esset, si Ciceronianum illud, Orationem autem latinam efficies legendis nostris pleniorẽ: ita implicarem, Orationem autem nostris latinam legendis pleniorẽ efficies. Videndum etiam est, ne uerba ita collocemus, ut alium, quàm nos uolumus, sensum efficiant. Nam, ne ab eodem exemplo discedamus, si uerba commutes, Orationem autem pleniorẽ legendis nostris latinam efficies: sensum omnino alium ac diuersum efficeris. Item, si negationes alio atque alio loco posueris,

fueris, non eundem sensum feceris. Aliud est, Non  
 omnis qui literas discit, doctus est: & aliud, Om-  
 nis qui literas discit, non doctus est: & ali-  
 ud, Omnis qui literas non discit, doctus est. Item  
 non idem est, Ego te non uidi, et Non ego te uidi.  
 Posterius enim plerunque interrogat. Videndum  
 item est, ne sensum in aliarum quoque dictio-  
 num ordine peruertamus. Nam si uelimus di-  
 cere, Ego non solum te, sed tuam quoque fami-  
 liam diligo: non recte sic dicemus, Ego te non so-  
 lum diligo, sed tuam quoque familiam: nec sic,  
 Ego te non diligo solum, &c. Verbum enim di-  
 ligo aut utrique proponendum est, sic: Ego di-  
 ligo non te solum, sed uniuersam quoque famili-  
 am tuam: aut utrique postponendum, ut in prin-  
 cipio fecimus. Sed hæc, quoniam & plura sunt,  
 quam ut breuiter comprehendi possint, & a no-  
 bis magna ex parte in libris de Elegantiâ lin-  
 guæ latinæ pertractata, non sunt hic latius repe-  
 tenda. Illud autem in ordine obseruandum est,  
 ut semper crescat in uerbis sententijsq; oratio:  
 ut, Homo prudentia, mansuetudine, modestia, at-  
 que omni uirtute præditus. Virtus enim & ea  
 quæ dicta sunt, & alia multa complectitur: pro-  
 ptereaq; primo in loco ponenda non erat. Con-  
 trā nonnunquam particularia, quam uniuersa-  
 lia, uehementiæ plus habent, proptereaq; poste-

riore loco ponenda sunt, hoc modo: Amo te cum propter alias uirtutes tuas, tum uerò ob egregiam singularemq; modestiam. Plus enim apud me modestie, quam ceterarum uirtutum ratio ualet. Videndum itaque in hoc genere diligenter est, ut nunquam decrescat & minuatur uis illa, & uigor orationis. Omnibus autem, quas diximus, rebus ita ratio subiicienda est, ut in illis nihil dubitari possit. Rationes, & rationum confirmationes ita texendæ inter se & coniungendæ sunt, ut non solum sententiæ sententijs, propositionibus conclusiones, explicationes diuisionibus, partes partibus, sed uerba etiam singula uerbis ipsis respondeant, referanturq; ita, ut omnia inter se quibusdam quasi hamis loricæ modo inserta, & concathenata sint, ut destrui, & quodammodo retexti non possint. Danda autem opera est, ut neque uerba, neque partes alias omittamus, quæ aut obscuram aut ambiguam orationem reddant: nisi quum uerba tam propinqua sunt, ut intelligi alia, suppleri uel non possint. Nihil contrà ornatus tantum gratia sine magna ratione apponendum est. Frustra ea enim ornamenta sunt, quæ ratione ac specie omnino carent. Quod quidem necessariò mihi dicendum est propter imperitos quosdam, qui tum denique se ornatissimè loqui putant, quum orati-

oni

oni uel superuacuas particulas multas apponūt,  
uel detrahunt necessarias. Illa igitur optima com-  
positio erit, in qua nihil deerit quod desiderari,  
nihil supererit quod auferri possit.

## De numerosa oratione.

### Cap. XXV.

Quoniam autem oratio per aures in animū  
transfunditur, aures autē numeris ita capiuntur,  
ut Aristoxenus nō ignobilis philosophus animam  
harmoniam quandam dicere non dubitauerit, nu-  
meris quibusdam quasi pedibus feratur, & aures  
perfecto quodam, & ut ita dicam, rotundo uer-  
borum ambitu impleat necesse est. Qui quidem  
quum pro qualitate materiae nunc tardius ince-  
dit, nunc celerius currit, tum grauiorem, tum acu-  
torem harmoniam, siue concentū ex sese parit.  
Quum ita instabilis est, ut tenorem seruare nul-  
lum queat, & incompósito uerborum strepitu in-  
nanem quandam, et immodulatum sonum efficit,  
ab auribus confestim, animoq; respuitur. Quan-  
quam id aures iudicare, nisi doctae atque assuetae  
sint, planē non possunt: sentiunt tamen optimum  
illū atq; absolutissimū sonū quoquo modo etiā in-  
doctae. Sed ut in musica minima quaeq; deprehen-  
dere nisi peritissimus artis nō potest: sic in hac re  
ultimam illam, atq; absolutissimā perfectionē in-  
telli-

telligere aures, nisi assuetæ omnino non possunt. Atq; hæc quæ dicimus, eò spectant, ut intelligamus nos artificio, ac præceptis ullis numerosam orationem aut nostram facere, aut cognoscere alienam non posse, nisi aures numerosis orationibus audiendis longa consuetudine sonum illum optimum à minus bono discernere doceamus. Quæ quidem in re assidua nos Ciceronis lectio in primis iuuabit. Quanquam autem neq; qui audiunt hoc tempore, numeros satis intelligunt, neq; qui dicunt, aut scribunt, eos magnopere curât ( uix enim hac ætate unum atq; alterum uidi, qui numeros in dicendo aut scribendo sectaretur ) tamen uel ut intelligamus, quid nobis seruandum sit, si ueteres imitari uelimus, uel ut eorum in scribendo artificio atq; obseruationem cognoscamus, pauca de numeris ex Ciceronis præceptis, atque obseruatione perstringam. Orationem igitur apud Græcos primi omnium Thrasymachus Chalcedonius, & Leontinus Gorgias, numeris astrinxere, quum poetas cum uoluptate, se cum seueritate audiri uiderent, & uoluptati audientium, uarietatiq; consulerent. Gorgias autem paribus paria reddere, & contrarijs contraria referre primus instituit, eaq; re ad uitium usq; delectatus est. Isocrates deinde moderatione quadam adhibita, rem maximè excoluit. nostri eam rem tantopere

pere admirati sunt, ut cum aliquid numerose cecidisset, tota concio pariter exclamaret. C. quidē Gracchus dum oraret, seruum cum organo quodam post se habebat, qui ei numeros modosq; succineret. Cicero in eo genere, quantum intueri licet, palmam mihi uidetur esse affecutus: ita nihil etiam in familiaribus epistolis, quotidianoq; sermone non numerosum efferebat. Neque uero tota oratio numeris tanquam uersus astringenda est: sed ita à principio fluere ac ferri debet comprehensio, ut deponi & quiescere in fine, non cadere, aut proijci uideatur. Et quanquam clausula ipsa, id est finis cōprehensionis maximē debet esse numerosa, cætera tamen omnia quæ ad finem illum ducunt, numeris & modulis quibusdam carere non debent, ita ut auditor aut lector à principio uidere finem illum, atq; expectare uideatur. Neq; hoc sanē difficile factu est illis qui se in scribendo aliquandiu exercuere. Nam ubi primum sententia mente concepta est, confestim uerba ultro sese offerunt, & in ordinem ac numerum quendam digerunt. Requirit autem non eosdem omnia numeros, sed alios alia, pro diuersitate materiæ, & orationis genere. Contentiones enim celerius currere, narrationes tardius ferri debent. Tarditatem orationi, & grauitatem, spondæus in primis afferet, qui duabus syllabis

syllabis longis constat. Celeritatem Pæan maximè conficiet, qui tribus breuibus, & longa uel in principio, uel in fine posita continetur. Dactylus, qui longa & duabus breuibus conficitur, uatriq; generi est accommodatus. Iambus, qui ex breui & longa est, demisso & humili sermoni aptissimus est, proptereaq; eo maximè comici utitur. Principia à longis, ut plurimum, syllabis facienda sunt. fiunt etiam à breuibus nonnunquam: ut Cicero, Animaduerti iudices: & Nouum crimen. Pæan is, qui primam longam & tres breues habet, & in principio & in medio passim optimè collocatur: in fine non decet. Is uerò qui tres breues, & longam postremā habet, ut Temeritas, Aristoteli et Græcis maximè placet. In fine Cicero eum non ualde probat. nam ultimā syllabam ne in uersu quidē, quanta sit, referre arbitrat. Quintilianus longā esse censet oportere. Ego Ciceroni, qui plurimū dixit & scripsit, magis accedo. Cauendū autē est, ne hexametri uersus principium initio dicendi, aut scribendi faciamus: quale dicitur reliquisse Liuius, Facturus ne operæ precium sim. quod qui emendare uoluerunt, Facturus ne sim, postea scripserunt. Sicut etiam finis hexametri et pentametri uitiosus est, in quem Asinius & Brutus incidere sepe numero solebant, ut uideo placuisse Catoni. & Hieronymus noster.

noſter, quanquā non his rebus erat intentus, in translatione Geneſeos ait, Da mihi animas, cetera tolle tibi: quod ego non accuſandi Hieronymi, ſed uitij oſtendendi gratia poſui. Clauſula autem optimè deſinit in dichoreum, id eſt, in duos trocheos: ut, Patris ſapientiam, filij temeritas comprobauit. Trocheus enim ex longa & breui conficitur: quem ad modum Aſia maximè ſecuta eſt. Sed uidendum eſt, ne frequentius idem finis, quamuis optimus ſit, ſatietatem afferat. afferunt enim etiam optima ſatietatem. Optimus eſt etiam in fine Creticus, qui ex longa, breui, & longa conficitur: ſi ante ſe habeat uel Daſtylum, uel Pyrrhichiū, qui duas breues, uel Tribrachum, qui tres item breues habet. quale eſt, Quamdiu tantas iniurias patiemur? & Facite ut bonos ſeruare uideamur. Geminatus etiam idem optimè claudit: ut, Virtus eſt ſeruare quamplurimos. Patitur etiam ante ſe Anapeſtum, qui duabus breuibus & longa conficitur: ut, De uiro loquar nō ſolum bono, uerum etiam nobili. Daſtylus quoque non claudit malè, ſi eum Iambus, uel Creticus antecedit: ut, Hoc noſtra ratione concluditur. malè autem, ſi Spondeus, uel Trocheus antecederet: quale eſſet, Hoc ratione noſtra concluditur: uel, Hoc noſtra ratione clauditur. Illud tamen aduertendum eſt, pedes omnes, ſi ductibus



nibus singulis contineantur, pessimè orationem incohare, & claudere. ut in Iugurthini belli principio apud Salustium notat Quintilianus: Falso queritur de natura sua genus humanum: In fine quale esset, quod modò dicebam, ratione nostra clauditur. Quod quidem & in pedibus bene coeuntibus uitiosum est. Spondeus bene claudit, præsertim quæ incisa nominantur, si eum antecedit Cræticus, ut similis causa, quæ plurimum uti solebat Demosthenes. Item si Anapestus: ut, Loquar de muliere non solum nobili, uerum etiã nota. Item si Iambus: ut, Tu optimũ munus exerceas: qui Molossus efficitur, qui est ex tribus longis. Contrà Spondeus optimè Iambum præcedit: ut, Iisdem in armis fuit: & quid futurum sit, nescio. Claudit autem male spondeus, si eum uel dactylus spondeus, uel pyrrhichius, uel dactylus, uel Pæan, uel Tribrachus antecesserit. Amphibrachius etiam, qui longam inter duas breues habet, autorem Quintiliano, etiam claudit non male: ut, In Africa fuisse. Sed ego id ratione dicto rei, qui eodem in loco est, fieri censeo. Idem Trocheum & Pyrrhichium, qui Pæana conficiunt, optimè cadere existimat: ut, Quanta eos à plebe Romana maneret inuidia. quem pedem Cicerō dicit uigere in principio, in fine iacere. Bacchius, qui est ex breui, & duabus longis, etiam

geminatus

geminatus rectè concludit: ut, *Quæ ratio fuit,*  
ut ab homine tibi amicissimo uenenum timeres?  
Trocheus quoque non solum geminatus, ut dixi-  
mus, sed etiam Spondeo precedente rectè cadit:  
ut, *Quod hic potest, nos possemus.* Itè Pyrrhichi-  
us inter duos Trocheos: ut, Scipio suos omnes uir-  
tute superauit. Drochimum, qui est ex quinque  
syllabis, prima breui, duabus longis, breui, longa,  
existimat Cicero, si semel ponatur, esse non malū:  
ut, *Amicos tenes: quanquā magis numerus quā*  
*pes propter multitudinem syllabarum uideri po-*  
*test.* His uerò clausulis si oratio uariabitur, fiet,  
ut & capiat lectorē, & satietati occurrat. Quan-  
quam autem omnis oratio fluere ita debet, ut nu-  
meris quibusdam incedere uideatur: diligentia ta-  
men illa, & ratio numerorum tribus in locis po-  
tissimum adhibenda est: quum aliquid laudare or-  
natius uolumus, ut fecit Cicero in secundo accusa-  
tionum in C. Verrem, de Sicilia laudibus: aut quū  
narrandum est aliquid, quod plus dignitatis ha-  
beat, quā doloris, ut idem in quarto de Aetnæ:  
si Cerere, de Segestana Diana, de Syracusarū situ  
fecit: aut in amplificationibus & commiseratio-  
nibus, ut idem pro Milone, pro Ligario, & alijs  
iudicijs quā plurimis dixit. Tametsi se conatum  
esse, & uoluisse id assequi fatetur, nescire tamen  
se, an sit consecutus. neq; diu retinendam eam for-

nam numerosè dicendi, idem Cicero arbitratur: sed transeundum ad ea quæ Græci νόματα ἔμματα uocant, nos incisa et membra possumus appellare. his oratio pulcherrimè distinguitur. Sūt autem incisa, breues quædam orationes, quæ uel interrogant, uel respondent, uel confutant, uel indignantur, uel pronunctionē suspendunt. Quale est illud apud Ciceronem: Domus tibi deerat? at habebas. pecunia superabat? at egebas. hæc incisa dicūtur: quæ quidem danda opera est, ut quàm aptissimè cadant. Membra uerò, sententiæ longiusculæ sunt, quæ quibusdam quasi nodis inter se connectuntur, qualia apud eundem eodem in loco sequuntur: Incurristi amens in columnas, in alienos insanus insanisti. Sequitur deinde quædam quasi columna quæ superiora continet, et comprehensionem concludit: depressam, cecam, iacentem domum pluris quàm te, et quàm fortunas tuas extimasti. Quæ quidem comprehensio dichoreo finitur: superiora membra spondeis optimè terminātur. Historia, ut Quintilianus scribit, non tam finitos numeros, quàm orbem quendam, contextūq; desiderat. nam omnia eius membra connexa sunt, et ipse rerum gestarum ordo per se lectorem capit ac detinet. proptereaq; quum in omni scribendi genere, tum in historia uel maximè quæ rerum notitiam pollicetur, seruanda

uanda perspicuitas est, atq; omnis compositionis affectatio fugienda. quo quidem in uitio maximè uersari mihi uidetur Tranquillus: qui dum breuis & non uulgaris esse uoluit, obscurum se, & nimis affectatum reddidit. Omnis igitur oratio candorem quendam, & sponte fluentem cursum habeat necesse est, qui non numerosus sit, & similis numero. nihil est enim peius ac turpius, quàm si artificiosè numeros consectari more poetico uideamur. nihil contrà pulchrius atq; artificiosius, quàm quum ars in omni genere scribendi minimè apparet, totaq; compositio naturæ quàm maximè se accommodat. Quàm quidè rem duabus nos rebus maximè consequemur, lectione & scriptione. Lectio non uaria quotidie et diuersa, sed simplex, & unius generis esse debet, eiusq; præsertim scriptoris, cuius in scribendo esse similes uolumus. multum enim Plinius ait legendum esse, non multa. eum autem esse Ciceronem, nemo dubitat. Ille enim se profecisse sciât (ut Quintilianus ait) cui Cicero ualde placebit. Quòd si historias scribere uelimus, Cæsar & Salustius mihi in primis legendi, imitandi; uidentur. Liuius quoque, tametsi diuersum ab his scribendi genus habeat, obtinet tamen in suo genere principatum. miram enim in scribendo maiestatem præ se fert. Neq; Curtius, meo iudicio, repudiandus est: proxi-

nam numerosē dicendi, idem Cicero arbitratur: sed transeundum ad ea quæ Græci νόματα ἔμμελα uocant, nos incisa et membra possumus appellare. his oratio pulcherrimè distinguitur. Sūt autem incisa, breues quædam orationes, quæ uel interrogant, uel respondent, uel confutant, uel indignantur, uel pronunciationē suspendunt. Quale est illud apud Ciceronem: Domus tibi deerat? at habebas. pecunia superabat? at egebas. hæc incisa dicūtur: quæ quidem danda opera est, ut quàm aptissimè cadant. Membra uerò, sententiæ longiusculæ sunt, quæ quibusdam quasi nodis inter se connectuntur, qualia apud eundem eodem in loco sequuntur: Incurristi amens in columnas, in alienos insanus insanisti. Sequitur deinde quædam quasi columna quæ superiora continet, et comprehensionem concludit: depressam, cæcam, iacentem domum pluris quàm te, et quàm fortunas tuas extimasti. Quæ quidem comprehensio dichoreo finitur: superiora membra spondeis optimè terminātur. Historia, ut Quintilianus scribit, non tam finitos numeros, quàm orbem quendam, contextūq; desiderat. nam omnia eius membra connexa sunt, et ipse rerum gestarum ordo per se lectorem capit ac detinet. propterea quæ in omni scribendi genere, tum in historia uel maximè quæ rerum notitiam pollicetur, seruanda

uanda perspicuitas est, atq; omnis compositionis  
affectatio fugienda. quo quidem in uitio maxime  
uersari mihi uidetur Tranquillus: qui dum bre-  
uis & non uulgaris esse uoluit, obscurum se, &  
nimis affectatum reddidit. Omnis igitur oratio  
candorem quendam, & sponte fluentem cursum  
habeat necesse est, qui non numerosus sit, & si-  
milis numero. nihil est enim peius ac turpius,  
quàm si artificiose numeros confectari more poe-  
tico uideamur. nihil contra pulchrius atq; arti-  
ficiosius, quàm quum ars in omni genere scriben-  
di minimè apparet, totaq; compositio naturæ  
quàm maxime se accommodat. Quàm quidē rem  
duabus nos rebus maxime consequemur, lectione  
& scriptione. Lectio non uaria quotidie et diuer-  
sa, sed simplex, & unius generis esse debet, eiusq;  
præsertim scriptoris, cuius in scribendo esse simi-  
les uolumus. multum enim Plinius ait legendum  
esse, non multa. eum autem esse Ciceronem, nemo  
dubitatur. Ille enim se profecisse sciat (ut Quintilia-  
nus ait) cui Cicero ualde placebit. Quod si histo-  
rias scribere uelimus, Cæsar & Salustius mihi in  
primis legendi, imitandiq; uidentur. Lilius quo-  
quē, tametsi diuersum ab his scribendi genus hā-  
beat, obtinet tamen in suo genere principatum.  
miram enim in scribendo maiestatem præ se fert.  
Neq; Curtius, meo iudicio, repudiandus est: proxi-

me enim ad superiores illos accedit. Alium præter hos, quem imitari debeamus, uideo neminem. Exercitatio autem multiplex est: unusquisque enim suo genere delectatur. Sed illa prima atque utilissima mihi uidetur esse, ut epistolas in omni materia frequentissimas conscribamus, atque illis quodammodo uires quasi in campo aliquo comparemus. possumus enim illis omne scribendi genus experiri, & nos quasi ad ueram pugnam præparare. Illa deinde optima exercitatio est, ut historias siue communi lingua scriptas, siue barbarè atque inornatè compositas, latinè conscribamus. Nonnulli etiam latinè scriptas in ἱστορίαις redigunt, uel alijs uerbis componunt. Quod genus ἱστορίαις Græcis uocatur: quæ quidem si ex soluta oratione in solutâ item orationem transferatur, probanda est: sin ex poemate accipiat, ut à quibusdam fieri nostra ætate intelligo, meo iudicio, pessima ac uitiosissima est. alia enim poematis, alia orationis solutæ ratio est. Adolescentes uerò, qui fines utriusque rei nondum intelligunt, poeticis translationibus candorem illum orationis inuoluunt. Danda itaque opera est primum, ut optimum quemque imitandum nobis deligamus: deinde ut diutissimè his, quibus dixi, rationibus exerceamur. Hæc autem, quæ his libris tradita sunt præcepta, ita teneamus, ita seruemus, ut intelligamus

telligamus neq; sine his magnopere ualere exercitationem, neq; hæc sine exercitatione multum ad scribendum conferre. Quòd si hæc cum exercitatione assidua coniunxerimus, uetustam illam & perfectam scribendi rationem, qua illi, quos maxime admiramur, ueteres utebantur, optime (ut spero) atq; absolutissime consequemur.

## DE RATIONE SCRIBENDI

libri tertij Finis.

S 3

IOAN:



IOANNIS LVDO-  
VICI VIVIS DE CONSCRI-  
bendis Epistolis, ad Idiaqueum  
à secretis Caroli V.



V M. INSTITVEREM  
Idiaquee, opusculum de Episto-  
lis componēdis edere, quarum  
permagnus est usus in omnes ui-  
tæ partes, uisum est mihi tuo no-  
mini inscribere: non quod his meis præceptis ipse  
indigeas, qui præceptores facultatis huius ac du-  
ces habes Ciceronem & Plinium: quorum uesti-  
gijs felicissimè insistis, magna cum admiratione  
omnium qui sciunt quàm breui tempore, quod in  
latinis literis concupieras, sis affecutus: Sed quia  
nemini magis uidetur ea tractatio congruere,  
quàm ei cui sunt quotidie permultæ maximis de  
rebus latinæ epistolæ cum tuo ipsius, tum Caroli  
Cæsaris nomine conscribendæ. deniq; pro nostra  
coniunctissima amicitia et uoluntate mutua, quic-  
quid ab altero proficiscatur, non potest non esse  
alteri longè gratissimum. Epistola est sermo ab-  
sentium per literas: in hoc enim ea est reperta, ut  
conceptus animi, & cogitata aliorum ad alios fi-  
da mandati interpretes & nuncia perferat. Episto-  
larum usus est, inquit D. Ambrosius ad Sabinum,

ut disiuncti locorum interuallis, affectu adheremus, in quibus inter absentes imago resulget presentiae: & collocutio scripta separatos copulat, in quibus etiam cum amico miscemus animum, & mentem ei nostram infundimus. sic ille. Dicta est Græcis à mittendo *ἐπιστολή*, ceu quis dicat missoriam, uocabulo non recepto. Nam inter presentes nihil opus est epistola, nisi fortè si quid certis præscriptisq; es acturus uerbis. ut Suetonius Cæsare Augustum refert sermones cum singulis, etiã cum Liuiã sua grauiores, non nisi scriptos, & è libello habere solitum: ne plus minus uel loqueretur ex tempore quàm oporteret. & arrogantissimus ille dominus Romæ nihil unquam cum seruis egit, nisi nutibus, aut descripto, sicuti est apud Tacitum. Excogitati quoq; codicilli inter homines eadem in urbe ac uicinia, sed quibus uisere inter se parum uel placebat, uel licebat, aut certè commodius scriptis agebatur res: quorum codicillorum frequens est apud Ciceronem, Tacitum, & alios mentio. Antiquissimæ epistolæ in hoc unum paratæ erant, ut aliquid absenti nunciarent de re publica aut priuata, quid actum, quid futurum, quid gereretur, quid uellent fieri, aut secus. Cuiusmodi uidemus esse Ciceronianas, & præcipuè ad T. Atticum. Deinceps omnia quæ dici, quæq; scribi possunt, sub epistolæ ambitum uenerunt. Cicero ad

Curionem: Epistolarum, inquit, genera multa esse non ignoras: sed unum illud certissimum, cuius causa res ipsa inuenta est, ut certiores faceremus absentes, si quid eos scire, aut nostra, aut ipsorum interesset. Reliqua sunt epistolarum genera duo, quæ magnopere me delectant: unum familiare et iocosum, alterum seuerum & graue. Itaq; illa uera est & germana epistola, per quam significamus alicui, id quod in negotijs uel eius interest scire, uel nostra. quales sunt propemodum nuntiatoriæ, petitoriæ, commendatitiæ, consultoriæ, admonitoriæ: & si quæ sunt eius generis, quæ uicem absentis scribentis impleant. Additæ sunt postea consolatoriæ, conciliatoriæ, præceptoræ, disputatoriæ de omni argumento philosophiæ, iuris, antiquitatis, omnium deniq; disciplinarum, atq; earum rerum quæ de scripto inter maxime præsentibus agerentur. sic à Platone de philosophia scribitur ad Dionysium et alios, à Seneca ad Lucilium, à Hieronymo, Ambrosio, Augustino, Cypriano, de rebus sacris ad uarios. Citantur Cætonis Censorij, & multorum Iurisconsultorum libri, de quæsitis aut responsis per epistolam. Nolo in præsentia differere, quàm latè nomen epistolæ extendendum sit: sed certè si recipimus, aut quicquid salutationem præfert, epistola dicatur: quid cause erit, quin libri Tusculanarum questionum

Ciceronis,

Ciceronis, aut de Finibus, epistolæ nominentur ad Brutum? de Senectute uerò et Amicitia, ad Atticum? de Officijs, ad Marcum filium? uel si orationi pro Milone, aut in Verrem, salutationē præponas, ad Iudices, epistolæ sint? Sed nō fit ideo uir ea scæmina, quæ sumit femoralia, aut ense cingitur: ita nō omnis liber fit epistola, cui præposita est salutio, nisi naturam et ingenium sumat epistolæ, quam statim demonstrabimus. Bene Plinius Cæcilius: Aliud est historiam scribere, aliud epistolam. significans, in natura illarum esse discrimen.

### De inuentione Epistolæ.

Inuentionē epistolarum cum aliqua parte dispositionis coniungemus, præcipue in exordijs: propterea quòd hæc sæpenumero disjungi non possunt cōmodè. Eadem enim sunt locis aliquot de utrisq; præcepta; et pleriq; epistolas scripturi, maxime circa principia consuectantur, tanquā inter scopulos; facileq; reliquum cursum conficerent, si modo euasissent ex ambagibus portus. Initio illud præstandum est, inuentionem omnem nō solum epistolæ, uerum cuiuscunq; alterius generis, sermonis, orationisue, ut etiam in his quæ loquimur, haud penitus artis esse, sed prudentiæ: quæ paritur ex ingenio, memoria, iudicio, atque usu rerum: à nobis uerò, tradendis artibus adiu-

uatur, non perficitur : admonetur, nō omnino instituitur. ne quis se uel hoc loco , uel in alijs, aut à me ipso, aut ab alio quopiam scriptore aut magistro plenam cognitionem componendarum epistolarum, alteriusq; omnino generis orationis ac cepturum speret. Sunt enim qui præcepta damnant tanquam inutilia, quæ non statim ex stupido acutum reddant, peritum ex rudi. itaq; sit hoc primum præceptum, adiuuari à nobis inuentio- nem: & promoueri hisce formulis, quæ nec ipsæ uirum sunt aliquid habituræ, nisi usus atq; exercitatio accesserit. hæc præfatus, ad rem uenio. Scripturus epistolam, consideret quis & cui scribat, et quibus de rebus, qui simus nos ad illum, qui ille in se. aut enim ignoti sumus, aut noti: amici aut inimici, leuiter seu dubie amici, aut aperte & arcte, pares aut impares, & hoc uarijs in rebus, genere, fortunis, eruditione, ætate. Tum ille quo genere, plebeius an patricius, honesto an sordido. qua fortuna, summa, magna, mediocri, infima, nulla. quo rerum statu, liber an seruus, opiosus an obscurus, bonæ an malæ famæ, ociosus an occupatus, sutor an sartor. qua eruditione, magna, mediocri, media. Theologus, Medicus, Philosophus, Iurisconsultus, usu rerum an secus. quo ingenio & moribus, tristis an hilaris, remissus an seuerus, placidus an iracundus, humanus

an superciliosus, facilis an difficilis, acutus an hebes. hæc enim uno mentis intuitu facile percurrere omnia, & momento temporis. Frequenter enim excusandum est, quod ignotus scribas, aut leuiter amicus, aut tanto uiro, aut ei in quem forsitan crederis inimico esse animo: hoc primum purgabis. nam ita fert natura ipsa nostri ingenij, ut resoluta epistola, & lecto scribentis nomine, admiretur is cui scribitur, si ab ignoto, si à leuiter charo, si ab inimico mittatur: ita uel impudentiæ, uel temeritatis, uel arrogantiae, uel dementiæ scribentem apud animū suum statim initio damnat: quo fit, ut non tantum aspernetur literas, sed autorem ipsum oderit: idq; eo acrius, si superciliosus sit, aut morosus, & in eum ipsum odij affectū procliuis: ergo occurrendum. Nam & in ipso foro noui oratores re ipsa cogeantur, ante alia omnia de se loqui, cur dicerent. Sic Cicero pro Sexto Roscio Amerino, quam orationem habuit ad iudices primam: & pro lege Manilia, quæ fuit ad populum prima. Sumendum igitur principium uel ex te, aut rebus tuis: uel ex illo, aut rebus eius: uel ex re ipsa de qua scribis: idq; tanquam exordio. Ex te ad hunc ferè modum: Semper te amasse & coluisse illum, ubiq; optimè & sensisse de illo, & dixisse: dolere quòd tam diu illi ignotus, aut tenuiter notus fueris, quem ita sis semper de ingenio

ingenio ac uirtute admiratus; aut dolere, quòd in animū eius inciderit ea suspicio de tua in eum uoluntate, quum tu amicitia illam semper inter præcipua tua bona numeraris. allegabis, si potes, documentum aliquod amicæ tuæ uoluntatis erga illum: culpam reijcies in eos, qui uestre amicitie inuiderint: aut in illum ipsum scilicet, sed modeste, & sine asperitate: aut in tuam imprudentiam, ac ætatem. aut aperte culpam fateberis, si ita res poscat: pœnitere te, & daturum operam, ut re ipsa sentiat, quemadmodum sis iam affectus erga illum. A rebus tuis, amicitiam communem cum aliquo demonstrabis, aut paternam. Ab illo, ingenium, literas, humanitatem, uirtutes, quas es in eo admiratus, adduxisse te ad scribendum; ut in conciliatorijs. ignotus es, sed ille omnes incredibili humanitate cõplectitur, aut cupiditate bene facienda. tū literæ eius, aut prudentia effecerunt, ne ipse aut cuiquam esse possit ignotus, aut quenquā putare debeat ignotum sibi, aut ad se nihil pertinere. Idem de potentia, ut duci, ut regi, ad quem tanquam ad asylum accurrendum est: nec discernendum quis notus, quis ignotus. omnes sunt satis noti, qui se illius curæ crediderunt. Efficiendum potissimum, ut magis uideamur uirtutibus illius adducti, quàm affecti fortuna. Et in commemoratio-  
ne uirtutum, ne sit species ulla assentationis: sed id  
ostena

ostendemus nos habere compertum, uel in nobis, si quo affecti sumus beneficio ab illo, uel audisse ab ijs qui experti sunt, uel cognouisse nos ipsos, uel uidisse. ita testimonium aliquod afferemus ex opere: ut in uiris doctis, ex libris ab eis editis, orationibus habitis, prælectionibus, disputationibus. Et ea maximè cōmemorabimus illius bona, quæ ad rem, de qua scripturi sumus, aptissima fuerint: ut clementiam, si petimus ueniam: humanitatem, si amicitiam: liberalitatē, si beneficium: prudentiam & probitatem, si consilium. A rebus ipsius, uelut à communi amicitia, à paterna: à rebus de quibus scribimus, ut rem esse honestam, doctā, argutam, ideo dignam de qua illi scribatur: aut necessariam, ideo coactos esse nos ad eum tanquā ad aram confugere: uelut ob fortunas ad diuitem, ob iusticiam ad iudicem, ad Regem, ad Magistratum: maluisse nos uitij cuiusuis suspicionem subire, tametsi nobis grauissimam, in animo duntaxat illius, quem nos tanti facimus, quàm non scribere. necessitatem fortissimum esse telum, cui nemo resistat: & honestius est, quum id fit pro altero. aut rem esse eiusmodi, ut quum eam pernouerit, non te uel temerarium iudicet qui scripseris, uel confidentem, sed uirum haudquaquam malū, et in rebus bonis animosum: contra potius iudicaturus esset secordem te, si neglexisses. Est etiam

apud



apud amicum excusandum, cur de re aliqua scribas, de qua poterat coram agere. Cicero Luceio: Coram me tecum eadem hæc agere sæpe conantem, deterruit pudor quidam penè subrusticus, quæ nunc exponam absens audacius: epistola enim non erubescit. Hæc est prima coitio, quæ, ut ille dicit in Comœdia, acerrima est: cætera sunt prouisa post hanc, & magis expedita. Ideo prima epistola uehementer est elaborandum, ne apud nouum erga nos animum in suspicionem ueniamus cuiusquæ uitij, aut impudentiæ, aut arrogantiae, aut loquacitatis, aut ostentationis, aut uastitiei, aut putidæ affectationis, aut immodicæ assentationis & parasitiæ, aut scurrilitatis, aut imperitiæ, aut imprudentiæ. Plurimum enim in prima compactione positum est, sicut in uasis teneris adhuc & mollibus, quæ coalescunt. Nec puto quæquam admonendû esse, non omnia omnibus congruere: uidendum cui possis admirationem de ipso tuam allegare, cui paternum hospitium, cui curam subditorum. Quod si nihil habes, quare scribas, excusandû: tum contemplabere, qui sit ille cui scribis, nam hinc tota epistola temperatur. Ad fortunatum & superciliosum, reuerentius, modò absit assentatio: ad morosum & asperum, parcius & leuius: ad rudem aut hebetem, apertius: ad ingeniosum, accuratius, & maiore apparatu, si eo deletur,

Etatur,

Ratur, & sic se uenerari arguit. docto ad antiqui-  
 tatem accommodatius, ad occupatum breuiter,  
 ad ociosum fusius, si rem non ingratam facturus  
 es: ad hilarem letè, ad humanum minus scrupulo  
 se & anxie, ad seuerum subtristè, ad remissum io-  
 cose, ad mœstum mœstè, ad amicū certum aperte  
 & cum magna fiducia, ad incertum dubie: sed sic,  
 ut se credat diligi, & diligas reuera. Hoc lex na-  
 turæ, hoc melior naturæ lege Christus iubet: ita  
 ut ingratitude ille sese damnet meritò, ni redæ-  
 met. ad inimicum, ut cogites amicū posse fieri, &  
 apertus semper paratusq; maneat reditus in gra-  
 tiam: ut absit omnis asperitas, & mansuetudinem  
 quandam animi exeras etiam in inimicū: & præ-  
 stabit meminisse professionis nostræ, qua ueta-  
 mur quenquam odisse: ita ut emendatum illum o-  
 stendas cupere te, non perditum: & uitium odis-  
 se, amare hominem. ad parem & charum, simpli-  
 citer ac familiariter: ad minus familiarem, cauti-  
 us & comiter, citra deiectionem: ad inferiorem,  
 humanè, ut non uidearis loqui ex alto, sed ex æ-  
 quo, uel infimis. hoc boni mores suadent, hoc pie-  
 tas sacrosancta præcipit. exempla erunt usu faci-  
 lia. Omnino tollendū est è uita genus illud episto-  
 larum fallax, insulsum, ineptū, quo signa omnia  
 uoluntatū confunduntur: adeò blandum & assen-  
 tatorium, ut nullo penitus modo scribentis possit  
 animus

animus dignoscitur. quales sunt epistolæ, quæ nominantur aulicæ, et bene educatæ. nam humanus cogitatus tanta mole corporis contextus, impetrabilis est, profertur quod antenus sermone. Quod si hic quoque fictus sit penitus et contextus, quid reliquum sit ad hominem nascendum? qualis erit hominum communicatio et societas inter se, quum nemo beneuolũ & maleuolum distinguet, & lupum ad se recipiet pro ouicula: aut hanc fugiet, lupi scũitiã formidans? sed hæc alterius sunt instituti. iam de rebus epistolæ.

### De rebus epistolarum.

Epistola quascunque res potest continere. sed nos propius ad rationem præceptorũ in aliquot eam genera partiemur: pingui quidem & rudi Minerua, sed ad captum tyronũ appositè. Nati uel de rebus ad nos spectantibus loquimur, uel ad eum cui scribimus, uel ad utrunque, uel de alienis. Sunt in nobis, ut in omnibus hominibus, animus & corpus: sunt externa. In animo, mens: in qua iudicium, sagacitas, ingenium: & in hoc acumen, celeritas, hebetudo, tarditas, eruditio, ruditas, memoria, thesaurus eruditionis, & rerum omnium quæ uidimus, quæ audiuiimus. Denique aliquo cepimus sensu, siue exteriori, siue interiori. In eadem facilitas, difficultas, firmitas, imbecillitas. Est etiã uoluntas, in qua expetitiones & fuga rerũ, tum bonarum,

bonarum, tum malarum. sub his partibus affectus  
 leti in re presenti, & tristes, & utriq; in re futu-  
 ra & præterita. In corpore, quæ ad extremâ cu-  
 tem, color, species, aut deformitas: quæ in nervis,  
 robur aut infirmitas: quæ in intimis, ualetudo:  
 quæ ad totum, pulchritudo aut fœditas: tum quæ  
 ad id sustentandū, uictus ratio. Extra nos sunt pe-  
 cuniæ, uestimenta, deniq; omnia quæ possidētur,  
 honor, dignitas, genus, acta, amici, patria, inimi-  
 ci, infamia, & post nos posteritas. Ergo epistola  
 uel ad nos pertinet, in commemoratione alicuius  
 rei, exijs quæ diximus. uelut in ingenio, enarra-  
 tio nostrorum studiorū: in memoria, gratiarū ha-  
 bitio, uel actio: in uolūtate, explicatio morū: in af-  
 fectibus, si quā re sumus cōmoti: in corpore, qua  
 ualitudine: in externis, qua fortuna, quid amici  
 pro nobis egerint, aut non egerint: aut inimici nō  
 cuerint, aut tētarint. Itaq; uel aliquid cupimus in  
 ingenio, sicut auxilium eruditioni aut prudētiae:  
 in memoria, cognitioni rerū: in uoluntate, mori-  
 bus aut pietati: quæ sunt consultoriæ. in affectib.  
 beneuolentiam conciliare, quæ est conciliatoria:  
 aut fouere, aut augere conseruatam, quæ est offi-  
 ciosa: aut querelam uel indignationem apud illū  
 effundimus. In corpore remedium, aut conserua-  
 tionem ualitudinis, aut firmitatis: uel pertinet ad  
 uictum, quæ sunt partim ex consultorijs, partim

ex petitorijs. In rebus externis, omnes quibus ali-  
 quid cupimus, uocantur Petitorie, quæ de pecu-  
 nia, dignitate, honore, contra inimicū, si auxiliū  
 imploratur: pro amico autem; nominatur Cōm-  
 mendatitia. In illo cui scribimus, aut aliquid eius  
 narramus tantū, aut etiam laudamus, quæ est Pa-  
 negyrica: aut ad uoluptatem quum iocamur, aut  
 fabellā referimus, quæ illum exhilaret, aut ad com-  
 modum eius pertinet: quales sunt præceptorie,  
 consultorie, hortatorie, admonitorie, castigato-  
 rie, gratificatorie. de rebus omnibus, de ingenio,  
 de memoria, de corpore & rebus eius, de exter-  
 nis, quæ sunt consolatorie & incitatorie, quæ ad  
 affectus tendunt: et aliæ quibus affectum aliquem  
 uel excitare conamur, uel excitatum sedare. Ad  
 utrunq; spectant, quæ de cōmunibus rebus, & de  
 communi eruditione, de cōmunibus negotijs: qua-  
 les sunt mercatorum, expostulatorie, inuectiue.  
 Alienæ sunt, quum refertur quid gestum uel in a-  
 lienā domo, uel in aliena republica, quid quis dixe-  
 rit, egerit, cogitarit: & loquor ad sensum gentili-  
 um, nimis iam à nobis receptum atque approba-  
 tum, qui præter sua et amicorum, ciuitatisq; pub-  
 lica, reliqua à se aliena existimabant esse. Quan-  
 to rectius, & ad naturam propius, senex ille in fa-  
 bula, ad se cruciantem: Homo sum, humani nihil  
 à me alienum puto. Admifcentur uerò narratio-  
 nes

nes illiusmodi omnibus epistolarum generibus, et  
sunt mistæ epistolæ. quæ omnia sint à me dicta ue  
lut exempli gratia. Quis enim aut uniuersa com  
plectatur, aut persequatur singula, quæ sunt infi  
nita? meritoq; Philosophi negarunt de singularia  
bus, utpote innumeris, esse scientiã. Sed nos iam  
usum incipiamus tradere. De nostris rebus dice  
mus modicè, modestè, pudibundè, parcè, ut absit  
species omnis arrogantie, quam ne in maximis  
quidem uiris ferimus: uideturq; uelut uenenum,  
quod res alioqui pulcherrimas superfusum cor  
rumpit. Ad eundem modum si de iniuria uel con  
tumelia nostri querimur, aut omninò uerba faci  
mus, ne uideamur cæci amore nostri rapi (quod  
uitium Græci φιλαυτία nominant, contrarium  
Apollinis præcepto, quo admonemur, ut se quis  
que norit) sed duci iudicio: ita ne multum detra  
hamus illi, de quo querimur, dum nobis indulge  
mus, ne illud audiamus de Satyra: Quum tua per  
uideas ocalis malè lippus inunctis, Cur in amico  
rum uitium tam cernis acutum, Quàm aut aqui  
la, aut serpens Epidaurius? Ita rem nō exaggera  
bimus uerborū atrocitate, sed ciuilitè omnia ex  
plicabimus, et mansuetè. Scribere uerò nos ad illū  
potissimè dicemus, quod pro summo nostro mu  
tuo amore libenter curas omnes, cogitationes, af  
fectus, læta & tristia in illius sinum deponimus:

id esse nobis unicum leuamen anxietudinū. Si petimus aut rem honestā, aut mediāminam turpem nec decet bonum utrum petere, nec petitam concedere. honestam uoco, consilium, amicitia, admonitionem, institutionem: mediā uero, & quasi neutram, pecuniā, fauorem, adiumentū pro nobis, aut amicis. Adsit in petitione omni pudor (nā inferiorem se facit, quisquis rogat: ) sed in alijs rebus, et apud alios, maior aut minor. Rem honestam libere petemus, & audacius: modò ne admisceatur impudētia, & uelut imperiositas quædam, tanquā non roges, sed imperes: quod in Bruto culpatur M. Tullius. Ostendes, cur petas, cur ab eo potissimum. nam si causa non sit petendi, uidetur res insolens, aut arrogans, aut inepta & superuacanea, petere: uelut si uetula, uel auriga, à magno Theologo roget explicari sibi mysteriū trinitatis, ut ab Augustino traditur, uel Hilario. Tum, cur ab eo petas, quod plurimum in ea re ualeat: scire te, illum non negare alijs, minus negaturum tibi, amico, beneuolo, admiratori. Ad simile modum in conciliatione amicitia, esse te admiratorem linguæ Græcæ et Latina, quæ quum in illo sint exactissima, cupere te esse illi persamiliarē. Porro illum talem esse, ut humanitate illā inexhausta uniuersos ad se alliciat & complectatur. Apud amicum, aut hominem ualde humanum ac facilem,

facile. quique solet libenter eiusmodi præbere, quæ nos cupimus, breuius licebit agere & simplicius, ostensa fiducia ex amicitia nostra, aut illius moribus: quæ fiducia ualet etiam apud leuiter amicos, ut præ nobis feramus magnam beneuolentiã, ex qua oritur eiusmodi fiducia. Nam indignatur sæ penumero amici, magnis & ambitiosis precibus aliquid ab se amicos cõtendere: suspicantur enim illos nõ satis amare, aut confidere amori mutuo. Quòd si in rebus honestissimis attingendum, cur petas, & cur ab illo: quanto id magis faciendum est in re media: in qua erit adhibenda cura paulo maior. Sed id quoque ex personis temperandũ est, eius ad quem scribitur, & qui scribit. quippe si sit pater, aut frater, aut charissimus, aut qui debet, aut qui semper solet, nihil opus est magno uerborum ambitu, nisi res sint mutatae. ut duriora et difficiliora tempora, iactura rei familiaris, te factũ minus amabilem, aut quid tale. Discipulus incunctanter petit à magistro, quæ sunt institutionis: priuatus à magistratu, quæ iuris aut æquitatis: doctus à potente uel principe, alimenta ocij literarum. Nam si ab his non petat, qui dabunt? sartoreshæ & rhedarij? tum quòd doctus adiuuat principem bonis monitis, princeps doctũ fauore ac pecunia, uterque, qua re plurimum ualet. Sin alienior sit, & non adeò familiaris, ostende aliquid cur



dignus sis, qui impetres. Ex te, quoniā amicus, aut quod amasti semper, aut ad illum maluisti accur-  
rerē, quā ad alium quemuis: cui mauis, uel quod  
tantum amas, uel ob eius probitatem, debere hoc  
tantum beneficium, quā ulli alteri. uel quod plu-  
rimum ei debes, ideo plus uelis debere: quod est in  
genui (sicut Cicero ait) animi. aut quoniā debe-  
re omnia graue est, malle te bonis debere, quā  
indignis: ita enim fit leuius. aut si in eum tua ulla  
extant beneficia, leuiter admoneas, & parce, ci-  
tra exprobrationem: declara quantum te deuinci-  
et, quantam habiturus sis semper gratiam, quo-  
modo obseruaturus semper tempus, ut remunerare  
ris, si qua possis. non solere te ingratum esse, uel  
minimis beneficijs, aut officijs: quanto minus futu-  
rum in hoc tanto, aut tali tempore. Nam peten-  
tis gratitudo uehementer elicit dantis benignita-  
tem. Si cui opus fuerit, habet ea quæ sunt in perso-  
na. Petimus propter genus, propter patriā, pro-  
pter communionem studiorū, propter magistra-  
tum, propter amicos, propter in-nicos, præser-  
tim communes. hoc se rogare, quo eget, ut cōmu-  
nium inimicorū audaciam compescat, & calum-  
nias retundat, quod est telum acerrimum, animo  
præsertim affecto. Tum ex causa, te hoc petere in  
alimenta studiorum, liberorum, coniugis, aut a-  
mici pauperis. Ex illo, nosse te liberalitatem eius,  
præsertim

præsertim in eos qui ob eiusmodi causas petunt, illum scire quid sit studere, quot rebus sit opus: aut quid sit familiam sustinere, ideo didicisse mihi seris succurrere, non ignarum mali. Denique si nihil sit in nobis dignum, ob quod petamus: illum certe esse dignum, qui det. hoc ei fore pium, honorificum, laudabile, hoc semper studuisse, in hoc subiisse tot labores, parasse tot opes, ut plurimis proderet. Et hæc dicentur ambizioso reuerenter, graui contracte, lato fusius & hilarius: sic tamen, ut ne nimium miseriam nostram uideamur uelle ostentare, & quasi clamare, dignos esse nos misericordia, ut existimemur imbecille nimis atque impotenter ferre nostras res asperas: sed obniti & reluctari, quantum possumus, premitamen interdum ab illis atque urgeri. sic enim natura fert, ut minus misereamur eorum, quos abijcere se in aduersitate cernimus, et nimis lamentari suam fortunam, tanquam rem indignissimam patiantur: ita semper honestiores sunt pro alio lachrymæ, quam pro nobis ipsis, nisi forte ignosci nobis precamur.

### De epistolis commendatitijs.

Pro alio quum petimus, si argumentum est simile superioribus, ad eundem ferè modum tra-

statur, quo docuimus. Commendationis uerò hæc  
 sunt præcepta: Primum omnium, ut dignum osten=  
 damus hunc esse illius gratia & fauore. dignus fit  
 uel ex commendato, uel ex nobis qui commenda=  
 mus, uel ex eo ad quem scribimus. Ex commenda=  
 to, si demonstramus in eo esse aliquid, propter  
 quod mereatur diligi. percurrendum per ea, quæ  
 in persona posuit: nempe genus, quia nobilis: pa=  
 triam, quia Romanus: ingenium, quia festiuus, a=  
 cutus, Græcus, Latinus, Musicus, Philosophus,  
 Theologus, uir prudens, et multis in negotijs uer=  
 satus: animum, quia probus, modestus, modera=  
 tus, & cum primis gratus, si quid ei benefeceris.  
 tum corpus, quod agilis, celer, formosus, robu=  
 stus. Iam externa, quod prædiatus, pecuniosus,  
 gratiosus apud regem, apud multitudinem, magi=  
 stratus. Et accommodanda sunt hæc moribus, at=  
 que usu illius. delectatur cognitione ueteris me=  
 moriæ, hic est eius peritissimus: claritate generis,  
 hic est nobilis: studio armorum, fortis, robustus,  
 exercitatus. sic nonnunquã commendatur nuga=  
 tor nugatori, aleator aleatori, comessator co=  
 messatori, compotor compotori. habet multos a=  
 gros, hic agricola: componit, hic optimus librari=  
 us: eget ministro, ad manus hic diligens & fidelis,  
 & is qui semper illum dilexit, admiratus est, ap=  
 petiuit. natura enim diligimus illos, à quibus amo=  
 re sumus

re sumus prouocati. Solent illa addi: talem esse, ut si propius cognouerit, sit nobis habiturus gratiā, quod talem sibi hominem conciliauimus: non uereri nos, ne mendaces in huius laudibus deprehendamus, ne ue incutiant nobis aliena peccata pudorem: cautos nos esse in laudando, nō consueuise nisi tales cōmendare. ecquid pœniteat eorum, quos sua commendatione esset complexus? multo minus huius, quin & hunc omnes superaturum. aut non esse hunc huius aut illius similem: cōmendati quidam, sed commendatione indignissimi: in illo cepisse nos documentum, quales demum commendari conueniat. Ad eundem modum alia ornamenta, quæ unusquisq; dato exemplo excogitare sibi poterit, usus quoq; ipse plurima suggeret. Ex nostra parte, si nos ille amat, cui scribimus, nec fictē. sufficiet aperire, illum cuius causa laboramus, charum nobis esse: & illius negotium magnæ curæ. Exponitur saepe amoris causa, tum ut ille facilius hoc credat: uelut intercedere uetus hospitium, multa ultro et citro beneficia uel officia, affectum à nobis beneficijs gratissimum se præbuisse, nos eo uti familiariter, cōpluribus locis profuisse. nonnunquam ut eisdem de rebus ab illo diligatur, & suum iudicium adiungat nostro, præsertim si quid ille nobis in iudicando tribuit: sin minus, asseremus testimonium eius, cui magnam

T s ille

ille fidem habet. charus est nobis de eloquentia,  
 de ingenio : quod ille, si quid me credis posse in  
 hoc censere, habet in numero. literas Latinas  
 iuxta & Græcas nouit, ut neminem uideat Era-  
 smus aut Budeus, quem possit huic antepondere,  
 aut etiam conferre. Solent illa quoq; inseri: in hoc  
 homine intelligam, quantum me ames, quanti me  
 facias : da quæso operam, ut hic quàm primum  
 quàm maximas mihi pro cōmendatione hac gra-  
 tias agat, habeatq;: caue credas hanc esse ex uul-  
 garibus commendationibus: non ut alium quem-  
 uis tibi commendo hunc, sed ut ex me genitū com-  
 mendarem, ideoq; & mea ipsius manu hoc episto-  
 la exarauī, quod facere consueui rarius. omnes,  
 quibus tecum est negotium futurum, ad me accur-  
 runt, quòd sciant quanta inter nos beneuolentia  
 intercedat, aut quanti ego te faciam, uel tu me: su-  
 spicantur plurimū me apud te ualere, quod ego  
 eos credere facile patior: et ne hunc errorem exi-  
 mam, qui est mihi gratissimus atq; honorificentis-  
 simus, nemini epistolas commendatitias negare  
 possum, petenti ad te. Habent principes & po-  
 tentes uiri signa quædam inter se, quibus digno-  
 scunt, quàm uere & ex animo commendet, qui  
 scribit. nam sæpe cōmendationes dantur impor-  
 tunis precibus, non amicitia, aut dignitati perso-  
 næ: nec licet interdum recusare. unde sunt illa, Ro-  
 gatus

gatus rogo: Afficio te molestia, quoniam affectus ipse prior: tu quid facto sit opus, uideris: multum huic homini debes, qui sic cupit tibi esse commendatus, ut odio me enecarit, donec id extunderet: tanti scilicet te aestimat, quum ego diu repugnarem. hæc signa epistolaria, & Græcis olim & Latinis hominibus fuerūt in usu. Græci *συμβιβασταὶ ἐπιστολῶν* nominabant, sicut est apud Gregorium magnum, Ciceronē etiam ad Quint. Valerium libro decimotertio. Adijcitur nō rarò commendatio rei potius quàm hominis, ut quod habeat negotiū iustum, pium, illi cui cōmendatur magnificum, gloriosum, plurimis utile, reipublicæ salutare ac necessariū: nos magis laborare in hoc, illius ad quem scribimus cura, quàm eius quem commendemus: fore eam rem illi honorificā, aut fructuosam: eo beneficio ingentem ipsi fauorem ac beneuolentiā uel utilitatem parari, aut ipsi eadem, aut ijs quibus optimè cupiat, nempe liberis, propinquis, affinib. ciuib. Declarabimus quid possit is quē cōmendamus, suo loco efficere, quid soleat, quid eius parētes aut propinqui, quid alij eiusdem ordinis aut nationis. Si nos sumus illi cui scribimus charissimi, aut non leuis momenti, nequaquam opus est prolixa epistola, & accurata, breues quidā uelut codicilli, et tanquā testifica: iudicij ac uoluntatis nostræ suffecerint. Sin secus,  
paulo

paulo pluribus erit differendum, et preces addenda, & promissio reponendi beneficij, quum usus poscat. Exempla cōmendatitiarum sunt apud Ciceronem & Plinium creberrima.

### De rebus eius ad quem scribimus.

In alterius rebus sic semper scribendum, ut uideantur nobis curæ esse. Si tantummodo narras, nullo ad eam rem apparatu uel arte opus fuerit: simpliciter id potest expediri. Sin laudas, uerisimiliter id facito: & ea laudato, quæ sint illi tanquam stimulus ad uirtutem. Nam inuenire est ingenia nonnulla, quæ laude ad præclara opera incitantur. istis adhiberi laudem expediet: ut ferūt equum plus pinguescere, si plana manu dorsum & clunes eius demulceas, quàm pabulo. Sunt contra alij, qui accepta laude, uelut mercede, ab opere desistunt: illis proderit laudatio, his castigatio uel reprehensio. Sed quum rem illi charam laudamus, licebit nobis esse benignioribus, si tamen ea res existimationi nostræ nocitura non est, nec laudatæ rei, ut filio uel amico. Fabellæ, aut gestæ rei narratio, festiuitate condietur, ut multum absit à cothurno et figuris historicis. repet leui lapsu, ut placidus riuulus: non rapietur, ut torrens: nec intonabit classicum, etiamsi bella referat. Quid in  
iocis

iocis sequendum, docuit Cicero libro de Oratore 2. & de Officijs 1. Est & caput apud Quintilianum de risu, item apud eundem Ciceronē in libris de Oratore. Debet à iocis abesse omnis scurrilitas, ne sordidi sint & putidi: procacitas etiam & petulantia, ne uirulētia sit magis quàm iocus, neu in miserum & calamitosum simus dicaces, neu in probum & grauem uirum. nihil est facilius, quàm in quemuis dicta dicere: sed id non est conditi hominis, & educati ingenuē. Debent ergo adesse iocis, elegantia, urbanitas, acumen & facetia: in quibus est sedes risus. nam in alijs admiratio potius est, aut delictatio. Longa res est, de singulis horum præcipere, & hoc loco, quum eam rem neget Cicero arte tradi posse, quod planè ita est. quippe tamen si paratur non nihil uel exercitatione, uel lectione, tamen maxima pars naturæ est munus. idcirco cognoscat se quisq;: & si ad id non est natus, ne tentet quidem: sequitur enim necessariò, ut ipse sis ridiculus, si nō sint tua Quæ de causa Demosthenes, cui putant negatam fuisse hanc facultatem, nunquam quod iocum uideri uellet, orationib. suis admiscuit. Et ex facetijs sunt aliæ breues, quæ in uerbo uno, uel duobus, certè paucis sunt sitæ, quæ dicta nuncupamus: aliæ fuisse, in narratione, atque explicatione rei cuiuspiam. Illud prius genus à paucis intelligitur, nisi  
acuto



acuto ingenio. Vnde uetus illud, Perdidisti dictum;  
 puto, non intellexit. posterius istud imperitis au-  
 ribus aptius est. Sunt qui iocū nec dicere possint;  
 nec ferre. Et quoniam uel superbia humani inge-  
 nij, uel generositate nemo facile fert nouum supe-  
 riorem: hæc; omnes epistolæ, præceptoriam, admo-  
 nitoriam, consultoriam, adhortatoriam, castigatorem,  
 obiurgatorem, tanquam ex alto loquuntur. ideo  
 considerandum accuratè qui scribat, cui, qua de  
 re. Si receptus superior, nihil necessaria erit præ-  
 molitio, aut dulcoratio: tanquam si senex & pru-  
 dens admoneat puerum, aut præceptor discipulū  
 castiget, uel etiam obiurget: uel pater filium, uel  
 frater natu maior fratrem minorem, uel pusillum  
 tutor, uel princeps subditos, aut priuatos magi-  
 stratus, modo superior. Nam obiurgari populus  
 Romanum à Censore licebit, à Questore aut Ae-  
 dile nescio an liceret. Sed fit interdum publici bo-  
 ni gratia, qui est ualidissimus prætextus. Sin uerò  
 par admoneat parem, uel superiorē inferior: uel  
 par aut inferior in una re, superiorem in alia, uel  
 contra: quemadmodū senex probus iuuenem no-  
 bilem, aut locupletem: uel doctus Theologus indo-  
 ctum Episcopum, hic lenimentis opus erit. Consi-  
 derandum ergo, ut dixi, qui scribat. unde sumun-  
 tur lenimenta: non esse mirandum si senex, et tot  
 annos uersatus in ea re de qua agitur, admoneat  
 iuuenem:

iuuenem: sic illum minores se quandoq; admoni-  
 turum, se id debere facere pro publico munere;  
 quippe qui sit concionator, aut magistratus, aut  
 curio. Tum qui ille cui scribis, non posse te retice-  
 re, quum sit amicus paternus, quum sit uelut tue  
 curæ commissus, pro necessitudine patris & tua:  
 Ab ingenio, non posse te abductum tanta indole  
 & acumine ingenij aliter efficere, quin admoner-  
 as, quin consulas, quæ ad absoluendū numeris om-  
 nibus tale ingenium pertineant, desiderari tantū  
 hoc ad summum ingenium: rogare te, ut id quo-  
 que præstet, quo magnum quid & admirabile in  
 eo uideamus. Sic in corpore: formam illius specio-  
 sissimam, quæ est uelut muta commendatio, impu-  
 lisse te, ut cætera uelis uidere conformia, & di-  
 gna illa pulchritudine. Iam corpus & fortunas;  
 uel adductum te miseratione distorti & defor-  
 mis corporis, ut cupias illum ingenti pulchritu-  
 dine animi deformitatem corporis pensare, &  
 quasi obtegere: tanto etiam futuram admirabili-  
 orem animi pulchritudinem; quanto fuerit in ua-  
 se scædiore: ut preciosam gemmā in plumbo, the-  
 saurum in fictilibus. sic Aesopum, & Socratem,  
 & Epictetum in maximo precio fuisse. A rebus  
 uitæ: optare te, ut tantæ fortunæ respondeant cæ-  
 tera: aut contrā, ne desit animus, quum desit for-  
 tuna. Ostensio uitij grauior est multo. Quidam  
 apertam

apertam reprehensionem non ferunt, rectam nō sentiunt, laudes figuratas & de suis ipsorum uitij accipiunt & agnoscunt: tanta est in eis suimet ignoratio. Sunt nonnulli eo acumine, ut omnia quorsum dirigantur intelligant: sed reprehendi se tamen nolunt. alij facile patiuntur reprehendi se atq; obiurgari, sed non à quouis. Planè uarijs ingenijs, ut corporibus, uaria est adhibenda medicina: quod animaduertimus etiam ab Apostolis ipsis factitatum, in studio illo tam arden-  
 ti obtemperandi Deo, non placendi hominibus. Qui simpliciter potest sanari, cum eo simplici-  
 ter agendum. Si laus de uirtute, quam non habet, prodest, laudetur: quales sunt nonnulli Principū & potentum, & doctorum atq; ingeniosorū ho-  
 minum. Si non à quouis admoneri se patitur, nec tu satis magna autoritate sultius, inducās maiore:  
 dic esse uiros graues, qui quum in eo magna & multa bona admirentur, hoc uel illud requirant:  
 esse qui doleāt, illum cum exceptione laudari: te uerò suscepisse illorum negotium, ut ad eum sen-  
 tentias eorum perferres: quòd sit tibi cum ipso ne-  
 cessitudo, quòd frequēter scribas, aut quòd sis con-  
 iunctior, consanguineus, affinis, uetus sodalis, con-  
 discipulus, conterraneus, ciuis, subditus, cliens, ue-  
 tus affecla, aut horum filius, uel alioqui necessa-  
 rius. Sin laudibus insolescit, ac fit insanius, atque  
 ad

ad apertā admonitiōē est uelut asinus ad lyram,  
 si omnino curæ est tibi eius emendatio: rumpe  
 quod aperire non pōtes, & dissecā quod nequīs  
 dissoluere: simpliciter aperteq; obiurga: tum cer-  
 te functus fueris tuo munere. aut si periculum ad-  
 eundū est, quid amplius aut magnificētius, quā  
 pro optima causā? Licebit rationes ostēdere, qui-  
 bus impulsus es ad hoc agendum: ut chirurgi de-  
 clarant, cur aliquid in ægro corpore urendū aut  
 secandum sit. nihil omnino à te, sed uel ab illo, uel  
 à rebus: quòd sit tam charus, quòd tibi commenda-  
 tus, tuæ curæ creditus, uel à parentibus, uel à Chri-  
 sto, uel à ciuitate: ut malis illū tibi inimicū, quā  
 non omnino bene monuisse. A rebus, quòd illud  
 eius uitium damno sit multis, quum sit episcopus,  
 curio, magistratus, rex, & in Christiana religio-  
 ne. modò adsit modestia, & præscriptū illud Do-  
 mini de fraterna correptione, nemo non satis ha-  
 bet iuris in quemuis alium fratrem. Nam si inter  
 eas angustias uersetur, ut difficile sit gratum tem-  
 peramentum obseruare, habemus Apostolorum  
 exemplū ex schola Christi, qui rectā ingressi, Deo  
 curabant approbari se, quemcunq; mortalium of-  
 fenderent. Quod si omnino profuturus nō es, sed  
 magis irritatione tuā & tibi nociturus, & alijs,  
 cōsultius erit Camarinam non mouere: non solū  
 ex gentiliū præceptis (quorū illud est, Frustra

autem niti, neq; aliud se fatigando niſi odiũ quæ-  
 rere, extrema dementiæ eſt ) uerũ etiam exem-  
 plo & dictis Seruatoris. Non eſt prætermitten-  
 dum, quin aliquid ſemper dulcedinis amaritudini  
 admonitionis admiſceamus, idq; à laudibus illius.  
 cætera adeſſe abunde, præter hoc: dolendũ, ſic na-  
 turam nihil undiq; feciſſe abſolutum: quis non mi-  
 ſereatur tale uitium in tali ingenio, aut corpore,  
 aut nobilitate, aut fortunis? Habent conſolationes  
 ſuum locum, ut alia penè omnia, quæ hic diximus.  
 ſed quando quidem ex ſingulis delibamus, de illis  
 quoq; eſt aliquid attingendum. Sumitur ergo con-  
 ſolatio, uel ab eo quem conſolamur: nõ eſſe iſtius  
 generis, non decere tantum ingenium, ueteris ſtu-  
 dioſum philoſophiæ, non probum & pium, non  
 magiſtratum, non principem, ſe affluere. Vel ex  
 rebus, amiſſam rem non tanti eſſe, ut dolorem af-  
 ferat: non eſſe amiſſam, ſed intermiſſam: non per-  
 ditam, ſed proſectam: nondum eſſe amiſſam peni-  
 tus & deploratam. ſuſtineamus nos, & expecte-  
 mus exitum, ne quod ſapiens conſulit, miſeri ſi-  
 mus ante tempus: multa aliter ceciderunt, quàm  
 metuebamus: plura ſunt quæ nos terrent, quàm  
 quæ urgent: ipſum, uelut patrem, filium, aut ne-  
 ceſſarium ægreſerre, ſic mœreri ſuam abſentiam,  
 uel caſum, uel interitum: illi nihil mali contigiſſe,  
 imò liberatum aſperis & inſuauiſſimis uitæ rebus:  
 proſectum

profectum ad beatitudinem sempiternam, uti spes est de uita sancte & pie transacta, uel de genere mortis tam religioso. itaq; non illius causa suscipi dolorem hūc, sed nostra: nec ostendere nos illum amare, sed nos ipsos: optimum illi fuisse mori, antequam fieret peior, exosus erat plurimis, aut miser morbis, egestate, infamia, aut periculum euidēs de his. magnus metus de illius moribus. aut tūc opportuniſſimum mori, quum iucundiſſimum uiuere: aut eo tempore, quum nihil erat amplius uisurus boni propter conditionem uel publicę fortunę, uel priuatę. Iam ex comparatione rei cum homine: non eſſe regis, dolere pecuniā amiſſam, à quo animi magnitudinem, cōtemptum pecunię, tanquā ab exemplari quodam ceteros conuenit doceri: uel eum facile recuperaturū quod amiſerit, alios non item. non eſſe magni uiri, nō philoſophi, frangi humanis caſibus: non, flere filiorum mortem, quum ſciat genitos eſſe mortales: non caſum amicorū. poſtremo, ſi gentilis dixit, Placet homini, quicquid Deo placuit: num nō æquius eſt à Chriſtiano cogitari, dici, præſtari: nō decet humanam excellentiam inferiorē ſacere ſe ijs rebus, quarum natura eſt domina: hoc enim eſt ex regina fieri ancillā. Ex animo eius, ſuperfluum eſt dolor, ex quo nullum peti poteſt remedium. conſilium, unde petitur, uiolentia doloris perturbari.

turbari. Tum exempla adducenda eorum, qui sapienter, qui fortiter pertulerunt impetus fortunæ: ne hoc factu uideatur uel impossibile, uel difficile. Sed transeamus ad alia. Ea quæ ad utrumque spectant, eo temperamento tractabuntur, ut erga nostra præstemus modestiam, erga aliena curam, fidem, diligentiam, amorem. Sunt tamen hic expostulatoriæ, & inuectiue. Expostulamus non rectè esse quid ab aliquo actum, potissimè erga nos, aut res nobis charas. in quo genere imperiosum est, nimis malefactū dicere, & rem atrocitate uerborum insectari: ciuilitatis uerò & comitatis, causam addere cur queraris, cur illud rectè factū non sit: & huc se ratio conuertat, ut uelis in posterum non fieri, magisq; sollicitus uidearis esse de futuro, quàm dolere de præterito. Sub expostulatione cōtinetur exprobratio: turpis quidem illa, & uix tolerabilis, etiam quum maximè necessaria. ideo auersa est una Gratiarum à duabus, reliquæ illam spectant: per quod significatur, meminisse debere qui accepit, obliuisci qui dedit. Sed interdum cōpellit nōs ingratitudo aliena ad exprobrandum, uel pertractos necessitate, uel dolore. Itaq; sic erit moderanda res, ut ne nimium beneficium tuum amplifies: uoluntatem potius & animum benefaciendi declares ingentem fuisse. Si ita libet, commoueri te quod huic tuo animo animus

mus illius non respondeat, præsertim quum tu e-  
geas, & illi adsit copia gratiæ referendæ: aut quòd  
non meminerit beneficij, qui tacuerit, qui dissimu-  
larit, quum de honore aut commodis tuis agere-  
tur: seu, quod omnium indignissimum est, pro be-  
neficio maleficio reposuerit, 'qui læserit adiu-  
tus. Expendendum, cuiusmodi fuerit beneficium.  
nam quæ ad animum spectant, eruditio, consilia,  
educatio, minora habentur uulgo, quàm quæ ad  
corpus, aut fortunas: quum maiora sint reuera, et  
honestius exprobrentur: maioreq; ingratitude  
se alligat, qui præceptori aut educatori gratiam  
non refert, si potest, quàm qui illi à quo est locu-  
pletatus. Illud quoq; diligenter cauendum, ne quis  
uitio communi in æstimandis suis beneficijs falla-  
tur. Hoc enim non natura indidit, sed praua con-  
suetudo, ut unicuiq; sua uideantur magna & pul-  
cherrima, aliena non item. In exprobratione mi-  
nari subtracturum se sua beneficia, non est uiro di-  
gnum: sed potius, se non fore ingrati similem, nec  
illius uitio immutatum iri suam probitatem: se da-  
turum operam, ut nō minus posthac sit bonus &  
beneficus: quin illi etiam benefacturum, quoties  
existimarit beneficijs suis illi fore opus. Inuectiue,  
si ad insectationem uitij, aliosq; ab eo genere uitæ  
deterrendos parantur, ferendæ sunt: alioqui non  
uideo, quid iuuat acerba rabie cōgerere conuicia



& maledicta, caninamq; facundiā exercere, iuxta  
 ta uerbum Appij Claudij. Ergo mordeat uitia, ho-  
 mini quantum fieri poterit parcat. Interdum pro-  
 pter uitium impetitur homo, præsertim obfutu-  
 rus, nisi coerceatur: ut impius, ut hæreticus, ty-  
 rannus, latro, ueneficus, fœnerator, fur, corru-  
 ptor eduliorum, calumniator, seditiosus, imperi-  
 tus, aut malus institutor. Colore hoc excusantur  
 tot orationes Ciceronis, in Pisonē, Gabinium, Ver-  
 rem, Vatinium, Catilinam, M. Antonium: tot De-  
 mosthenis in Philippum, Aeschinem, Midiam. Id-  
 circo ad ea commoda uideatur dirigi tota oratio,  
 quæ erigere conamur, illo homine deiiciendo, ue-  
 lut nobis charissima sint, ac curæ maximæ: ut, reli-  
 gio, patria, ciues, literæ, disciplina. Res quæ ad u-  
 trunque spectant, sicut fide ac sedulitate sunt tra-  
 ctandæ, ita & scribendæ quoq; ut hæ uirtutes in  
 illis eluceant: quemadmodum nullam cōuenit esse  
 epistolam, in qua non uirtus aliqua animi, et gra-  
 ta quædā indoles existat, & quasi se proferat ali-  
 bi ingenuus pudor, alibi reuerentia, aliàs comitas,  
 aliàs humana quædam & moderata grauitas,  
 tum fiducia erga amicum, fides, beneuolentia, ho-  
 nesti respectus, etiam aduersus inimicos placidi-  
 tas, & animi quædam æquitas. Vehementer ca-  
 uendum est, ne quem epistola offendamus, id nan-  
 que altissimè insidet: propterea quòd epistola nu-  
 da est

da est omnino, ac patronis destituta: purgator, le-  
nitor nullus ei adest. ille autem relegendo auget  
uulnus, & maledictum interpretando fit acerbis-  
us: nemoq; est, qui non indulgeat suis doloribus,  
eosq; multo esse maximos arbitretur, ut sua sunt  
cuiq; charissima. Sic uidemus arctissimas amicitia-  
as uno ambiguo epistolæ uerbulo diremptas: quæ  
à me de rebus medijs sint dicta. Nam in uirtute &  
uitio quid sentirem, dudum aperui. Res alienas  
sub narratione licebit comprehendere.

### De responsionibus.

Duo sunt in respondendo spectanda potissi-  
mum, quæ scripta sunt ab eo cui respondemus, &  
quo animo. Possunt enim res esse malæ, aut pa-  
rum rectæ in animo bono: tum condimentum est  
eiusmodi, ut facile condulcoret amaritudinem re-  
rum: laudabitur animus, res ipsas pro illo excusabi-  
mus. nec res posse nobis molestas esse, quarum ta-  
lis sit fons, à quo dimanent, mente uidelicet. & le-  
uiter atq; amicè admonebimus, ut uerbis illis pau-  
lo deinceps circumspectius utatur, ne tam integer  
animus à sinistrè interpretantibus per uerba pa-  
rum cautè ab eo prolata gratiam suâ amittat. Sin  
res sint bonæ, dissimili animo, quid oberit ani-  
mum ex rebus censere? Itaq; dicemus, nō dubitare  
nos de animo, quandoquidem indicia eius, nempe

res ipsas tales intuemur. hic res commendabuntur. Quod factum est à Cicerone in epistola quadam ad M. Antonium de restitutione Sex. Clodij, & de libris P. Clodij. Res si sint in nostram utilitatem, agemus gratias, & agnoscemus amici partes, & sapientis consultoris. si in rem illius, & de nobis est dicendum, id fiat parcè omnino ac modicè. nam illud Thrasonicum est, Orna munus uerbis. Conuenit huic loco uerborum quadam comitas: illum cui damus, maiora esse promeritum: dolere nos, quòd tam effuse, tamq; ambitiose simus rogati: hoc solum facere, quod nihil magis licuit uel per facultatem nostram, uel per illius uoluntatem. quo schemate utitur nonnunquam Plinius Iunior: ut de Cornelia, & de filia Quintiliani. Prorsum de nobis ipsis dicemus modicè ac modèrate, & nostras laudes extenuabimus: ut reuera mortalium omniū bona perexigua sunt, & prætenuia. quæ uerò nobis tribuentur, referemus uel in benignitatem dicentis, uel beneuolentiam erga nos. quæ habeamus uitia, hæc esse nostra propria: quæ autem bona, esse Domini. magis testabimur nos laudantis probare animum, quàm iudicium: haud falso amorem fingi cæcum: probitatē illius omnia æqui boni facere, atq; etiam laudare nulla liude digna. quod si is error amicitiam nobis & beneuolentiā eiusce uiri conciliarit, seruetur sanè per

per nos, neq; eximatur caussa rei adeò nobis grata: malle nos ipsum in eam partem falli, quàm in contrariam resectum sentire. Interdū pudoris est ingenui, nihil penitus ad laudationem respondere, præsertim si qua sunt alia de quibus scribi possit. Sin res ad neutrum spectent, aut sint leuicula, declarabimus gauisos esse nos illa cognosse, nisi eiusmodi sint quæ ægritudinem animi cicant, ut de bellis, interim agemus gratias, ut D. Bruto Cicerò, quòd nō passus sit etiam leuicula illa à se ignorari. Vicissim et nos scribemus ea, quorum est ipse cognoscendi auidus: ut literato de literis, alijs de bellis, alijs de rebus magnis, inusitatis, ridiculis, ut erit cuiusq; uel studium, uel ingenium. Inuectiue ac maledicæ epistolæ, uel in totum respondendum nihil est, uel non ilico, ubi est reddita: sed sedata commotione illa animi, & refrigerato ardore illo perturbationis. tum expendendum, quid obijciatur, & quibus de causis. Si meritò reprehendimur, non solum parata est uenia, sed laus etiam confitenti delictum, & cognoscenti, quum licuisset defendere. sin immeritò, magna queritur ex animi moderatione conimendatio, quod non remorderis morsus. dabitur ratione patefacere, cur quicquam uel feceris, uel dixeris: cōiugia uerò fines præterfluere. Si quis ostendat retineri se modestia Christiana, ne maledicta regerat: & spe-

etare potius quid se deceat, quàm quid illum: rem faciet pulcherrimam, modò ita sentiat, ne aliud gerat clausum corde, aliud ore apertum. Christus non fallitur, cui mentes nostræ sunt perspicuæ: nec est quicquam æquè generosi pectoris, atq; remittere iniuriam. Christianis certe exemplo fit Christi, & ingenti mercede. nam sic quoq; remittuntur nostra scelera à Deo. Porro quemadmodum epistolis moderata quædam comitas suaue condimentum præbet, ita redundantia comitatum palatis quidem sanis insulsa est penitus, ac ingrata.

### De partibus epistolæ:

Quod oporteret significari Epistola, & eum qui mitteret, & eum cui mitteretur: idcirco Latini & Græci omnes statim initio scribentis, & eius qui scriberet, nomē ponebant. prius eius qui scriberet, hoc enim natura prius est, indicari quis faciat, quàm cui. Nam salutationem illam, Parmenonem summum suum plurima salute impertit Gnato: uel metrum excusat, uel parasitica consuetudo: quæ etiam illic, sicut in alijs omnibus, ad risum captandum ludebat. Donatus comicum esse dicit, ac festiuium, & parasiticæ elegantie. Sic etiam in Persa Plauti: Salutem dicit Toxilo Timarchides, & familie. Nec minus est parasiticum, Domitiano Martialis S. uel certè insolentissimæ arrogantiæ

rogantiæ principis, qui id exigebat. Excusat Ausonius ad Paulinum, quod nomen illius præposuisset suo: Paulino Ausonius, metrum sic suadet, ut esses Tu prior, & nomen prægrederere incum. Nomen in calce epistolæ subscribere, natum est ex subscriptionibus, quas olim principes addebant diplomatis: quarum meminit Suetonius in Nerone. Post ubi acrius inuasit animos ostentatio nobilitatis, unusquisque affectauit uideri ortus regio sanguine, & regios mores usurpare, tanquam sibi gentiles & patrios. Alij existimant moderationis esse, postremo se loco nominari: quante fatue? quasi minus honestum sit, quicquid ultimum. Non ne animo legentis primum omnium occurrat, qui scribit? quod si penitus postremus esse cupit, ne ponat initio uel Ego, uel uerbum primæ personæ. Sed hæc sunt ineptissima, quæ conantur rerum naturam inuertere. natura enim primum in quocunque opere facientem constituit. Quæso quid absurditatis habet, si is primus occurrat oculis, qui primus occurrit animo & cogitationi? imò quantumcunque abscondas te, & in angulum chartæ secedas, resoluta epistola statim à primo legèris: nisi iam antea sciat qui legit, à quo mittatur. Epithetis parcebant prorsum, addebant solum si quid muneris gereret, & cui scribebatur, & qui scribebat. M. Cicero  
Imperator

Imperator Cn. Pompeio Magno Proconsuli. M. Brutus, & C. Cassius prætores, M. Antonio Consuli. Cicero decimatertia Philippica literas recitans M. Antonij, Antonius Hircio et Cæsari: neq; se imperatorem, nec Hircium consulem, nec pro prætorem Cæsarem: satis quidem hæc scitè. Depondere alienum nomen ipse maluit, quàm illis suum reddere. Ab alijs adiectis abstinebatur prorsum. Itaq; nos usurpabimus nostra, quæ sunt professione, aut functionis: Senatori, Consuli, Quæstori, Episcopo, Presbytero, Curioni. cætera ex praua consuetudine risum potius aut fastidium mouent, quàm ornant. Quid quod præstabilius est, tantum illum existimari, ut appositis non sit opus: uelut, G. Budæo, Eras. Roterodamo, Th. Moro. In tanta claritudine nominum superflua sunt illa: utraque lingua doctissimo, Theologo summo, uiro clarissimo. neq; enim libris M. Tullij adijcit quisquam, oratoris facundissimi: uel Aristotelis, philosophi acutissimi. Itaque deprehensum est nihil esse grauius, aut decentius, quàm ad Cæsarem sine adiecto scribere, aut ad Regem, quod prudentibus & ingeniosis uiris ualde probatur. Quintiliani & Plinij temporibus cœpit recipi mos, ut omnibus ferè, nisi aperte essent inimici, adderetur Suo. Martialis de charta epistolari: Seu leuiter noto, seu charo missa sodali, Omnes ista suos charta uocare

care solet. Prisci tantummodo filios, aut uxorem, aut seruos, aut libertos duxerunt suos: ut Cicero, Terentia sua, Tullia sua, Tironi suo. Sunt inter homines amicitia coniunctissimos quædam interdum amoris significationes. etenim beneuolentia tanquam ignis sæpenumero cohiberi nequit, quominus foras sese proferat, & patefaciat: ut Gonzalus Tamayus Hugutiono unice charo, Idiaqueus Hieronymo Augustino dimidio animi sui, Stracelius Crucio τῷ αὐτῷ θυμῷ λεχάετομένῳ. & quod de amico Aristoteles dixit, alteri ipsi. Exiit ad allusiones ueteris memoriæ, de fabulis aut historijs petitas: Hier. Ruffaldus Viui Ionathæ suo, Patus Barchero Achatæ suo, Theseo, Pyladi suo. Similes quoq; allusiones ad alia rerum genera possunt transire: Nic. Borbonius Gulielmo Bidaeo, Varroni huius ætatis: Astudillus Io. Gilidæ, alteri Aristoteli: Bonamicus Alciato, id est, Vlpiano ipsi regi: Paulus P. Bembo polyhistori, non multum M. Tullio facundia minori: Velius Iac. Sadoletto, M. Catoni integritate propè pari (nā moderanda sunt immodica) penè dixerim alteri Paulo. Quæ si rarò ponantur, & ad dignos, tū ab ijs qui credantur posse iudicare, plurimum adferunt autoritatis illi ad quæ scribuntur. sumuntur enim ceu quædam testimonia. Sed periculum est, ne hæc sicuti alia omnia honoris signa, uel ambitione, uel peruer-



peruersitate ingeniorum ad indignos transferatur, & prorsus fidem amittant. Amoris autem nota magis salutationi, quàm superscriptioni congruunt: ne frigida atq; ineptæ uideantur plerisque, quorum natura fert, ut solis suis capiantur, aliena eis omnia sordeant. Alteræ quoq; illæ estimationis & dignitatis, inuidiæ sunt obiectæ: quæ res præclaras solita est semper inuadere, ac arroderere. Sed nomina tamen dignitatum, & munerum publicorum, diligentius sunt ad amicos in superscriptione, & explicatiuis ponenda, quàm in salutatione. intus enim nos sumus soli, & grata est utrique simplex illa atq; extra fucum omnem familiaritas: foris uerò multos habemus spectatores oculos & censores, quibus est satisfaciendum. Sed nos reliqua propositi exequamur. Porro autem, ut comitatis est, imò uerò humanitatis, in congressibus salutare: ita statim post omnia bene precabantur. Latini optabant salutem: salutem dicit, Salutem P. dicit, S. dicit P. Græci aliàs: εὐπραγίᾳ, & εὐδαιμονίᾳ, quasi felicitatem: aliàs χαίρειν, quasi gaudere. Romanus salutem dicit: & initio statim bonum uerbum Salutis, bonum erat omen sermonis. Pro salute utuntur nonnulli ritu Apostolico, gratia & pace Domini Iesu: quæ profectò salutem omnem exuperat, nec quicquā potest homini optari salubrius. Licebit nonnunquam

quam & alia precari ex argumento epistolæ, ut bonam mentem, bonam frugem, senectam facilem, prosperum coniugium. sicuti est apud Horatium: Celso gaudere, & bene rem gerere Albino uano, Musa rogata refer, socio comitiq; Neronis. Eundem ad modum illud etiam uetus: Si uales, bene est. à Seneca conuertitur: Si philosopharis, bene est. ualere enim hoc demum est. sine hoc æger est animus, corpus quoq;: etsi magnas habet uires, non aliter quàm furiosi aut phrenetici ualidum est. & alia epistola: Si uales, & te dignum putas, qui aliquando fias tuus, gaudeo. Illa uerò manuum oscula pro salute, obedientiam, summisionem, & eiusmodi, barbaricæ sunt uel imperitiæ, uel arrogantia. quid enim illi optas pro salute, ut tu manus illius osculere? egregia profectò salus, & magnopere expetenda. Sunt apud Ouidium genera quædam salutationum festiua, & arguta: ut, Quam nisi tu dederis caritura est ipsa salute, Mittit Amazonio Cressa puella uiro. Mittit & optat amans, quò mittitur, ire salutem. Hoc modo possent multæ confingi: Salutem dicit, qualem ipse non habet, sed optat: Salutem mittit, quæ utinam eò perueniat. quæ poetis conceduntur, item adolescentibus, tum affectibus commotis. Viris autem grauib; non sunt satis congruentes, quos

quos nec decet ludere, nec animi motibus percelli. Mirantur nonnulli, cur scribens de se tertia utatur persona, & continuo prima: ut, Cicero Lentulo salutem dicit: Ego omni officio, ac potius pietate erga te cæteris satisfacio omnibus. ea de causa existimant, titulū illum epistolæ non fuisse partem, sed à tergo epistolæ subscribi solitum, ad monendum tabellariū, cui nam esset redditurus. Nos adhuc facimus, ideoq; iam multi titulos epistolæ supersedent præponere. Sed fuisse eiusmodi titulos partem epistolæ, & in exordio scriptos, multis & evidentibus argumentis potest planum fieri. Primum quoties Cicero, Sallustius, Cæsar, Demosthenes, et alij epistolam alicuius referunt, uel suam, uel alienam, sic exordiuntur: Antonius Hircio & Cæsari, Lentulus Catilinæ salutem, L. Catilina Catulo S. Cn. Pompeius L. Domitio S. βασιλεὺς μακεδόνων φίλιππος ἀθηναίων τῇ βουλῇ καὶ τῷ δήμῳ χαίρειν. Ovidianæ epistolæ idem illud habent initium, etsi more poetico uariatū. Quid attinebat, si illa tabellario scribebantur, in historia referre? quum satis fuisset dicere, epistolā esse illius ad illum. sed nimirum epistolam integrā uolebant subiungere ab initio ad calcem. Cicero de lege Agraria: Is uidelicet antequam ueniat Pontū, literas ad Cn. Pompeium mittet, quarum ego iam exemplum ab istis esse arbitror. P. Seruilius Rul-

lus,

us, tribunus plebis, decemvir, S. D. Pompeio, Cn. F. non enim credo adscripturum esse Magno: nō uidetur, id quod iminuere lege conatur, concessurus. Sed apertissime primo lib. Epist. Cic. Valerio Iuriconsulto S. D. Cur enim hoc tibi non gratificer, nescio, præsertim quum his temporibus audacia pro sapientia liceat uti. Non uidetur salutatio posita à tergo, alioqui quomodo id scripsisset Cicero, Cur enim hoc tibi non gratificer? quū nihil adhuc de iuris prudentia dixisset. Plutarchus in Demosthene scribit, inuentum in libello Demosthenis initium epistolæ etus ad Antipatrum regem Macedonia, Demosthenes Antipatro: nec aliud quicquam. Liuius lib. 34. de epistola Syracusanorum ad Marcellum: Prætores Syracusani Marcello suo S. tum secundum salutem, ut solet; recte eum atq; ordine fecisse, &c. & in iure civili de negotijs gestis, Hensenius Apollinaris Iulio Paulo S. Et in summo adscribi solitum hunc titulum, declarat Lucianus in Parasitico: Quin & illud, inquit, mihi perridiculum uidetur, si in epistolis in summo, quemadmodum solemus, scripserimus, Simonidi parasito. Deniq; nulla est ueterum epistola, quæ non titulum illum habeat, siue ab autore suo posita, siue ab alio citata. Si is titulus tabellario erat adscriptus quum mitteretur, certe nihil fuit necesse addi, quum ab illo referretur;

tur, aut ederetur ab autore. Sed hac de re argumentorum satis: quæ eò adduxi, quòd non quilibet de plebe, sed docti nonnulli homines sunt in cōtraria sententia, & ita cōtendunt fuisse, quem admodum ipsi opinantur, solum ob tertiam illam personam Dicit. nec considerant, non solitos prius illos homines nomini suo primā addere personam, etiam de se loquentes, sed tertiam: ut in rationibus & contractibus, P. Scipio fatetur se debere uel accepisse, uel recipit daturū se, aut quid simile: potius quàm, Ego P. Scipio fateor. Insecutis deinde seculis receptum est, in prima persona dici. porro epistolæ antiquissimam consuetudinē retinuerunt. Sed transeamus iam ad reliqua propositi. Fuit olim mos uetus, quem Seneca usq; ad suam ætatem seruatum scribit, epistolas sic exoriri: Si uales, bene est, ego quoq; ualeo. Plinius Cæcilius Fabio Iusto S. Olim nullas mihi epistolas mitis. nihil est, inquis, quod scribam: at hoc ipsum scribe, nihil esse quod scribas. uel solum illud, unde incipere priores solebant: Si uales, bene est, ego ualeo. Id uarijs modis enunciabatur: Si uales, ualeo: Si uales, bene est, ego ualeo. Dolabella Cicero ni: Si uales, gaudeo, equidem ualeo, & Tullia nostra rectè ualet. & Cicero: Terentia minus bellè habuit, sed certò scio iam conualuisse. eam. L. Lucceius Ciceroni: Si uales, bene est, ego ualeo sicut soleo,

leo, paulo etiā deterius quā soleo. Lepidus Sen.  
 & pop. Romano: Si uos liberiq; uestri ualeatis, be-  
 ne est, ego quoq; ualeo. Interim non adijciebant  
 quicquā de se, quum nō rectē ualere uolebant si-  
 gnificare, animo præsertim: aut sibi esse curæ illo-  
 rum salutem, suam non item illis. ut Metellus Ci-  
 ceroni: Si uales, bene est. Cicero Metello: Si tu ex-  
 ercitusq; tuus ualeatis, bene est. Quæ particula  
 abiit ex usu, sicut illa in orationibus, Iouem ego  
 optimum maximum: sed nō ita, quin addi possit,  
 & aliquando debeat, ornetq; epistolam.

### De ordine epistolæ.

Ordo in epistolæ corpore nullus est certus:  
 pro re nata scribendum, & exordiendum unde-  
 cunq; libuerit. nihil simplicitate illa iucundius, inē-  
 laborata. Cicero, quum narranda habet multa;  
 nō est ualde sollicitus, quod primum faciat, quod  
 secundum. promiscuē spargit, & refert, ut ueni-  
 unt in mentem. prius ubi est absolutum, adiungit  
 quodcunq; est collibitum, ex abrupto. Itaq; & re-  
 uocat se crebro, & à se rogat: Quid etiam? quid  
 amplius? quid præterea? Ergo sic interdum nar-  
 rat, ut nisi prius rationem cognoris, difficile sit  
 distinguere, quod prius sit, quod posterius. Id ue-  
 rò si quis uelit euitare, & narrare distinctius, ex  
 præceptis narrationis petat; quemadmodum sit  
 acturus. Iā ueluti quædā uincula poteris adijcere,

quæ priora posterioribus coniungant. Habes de hoc, accipe nunc de altero: audisti de Britannia, audi nunc de Italia: hætenus de bellis, iam ad literas: de republica satis, nunc de priuata nostra. Cicero: Sequere me in campum, ardet ambitus, &c. Sed quum ad persuasionem tendit epistola, maiore artificio erit opus, quod quâ nam uia exequeris, ex arte sumito: quin & à primo sunt iam nobis exposita nonnulla. In respondendo promptissimum & cõmodissimum est, ordinem eius cui respondemus, sequi. Sed fit nõ rarò, ut expediat quædam anteuerti, sine quibus progredi non posset epistola, & frustra iactarentur multa uerba; illo impedimẽto obiecto, quod statim est amoliendũ: ut si quis in calce, aut medio epistolæ, ingratitude nis aut maleuolentiæ accusetur. huic enim occurrendum est ante omnia, nisi fortè ex responsione ad alia facilius diluatur crimen. Exempli gratia: Garfias Arabianus Nicolao Valdauræ suo S. Velim cures mihi tapetes aliquos ad ornandum cubiculum. Simoni à manu meus annumerabit tibi pecuniam, eamq; in rem mittes aliquem ex tuis, quo fiat tibi negotium leuius. Nam etsi mea in te sunt officia nonnulla, tu tamen pro me grãdaris quicquam facere, nisi ut multo sit leuissimũ. Valdaura Arabiano suo S. Ex quo te Louanij habitare uelle cognoui, quod uelim tibi bene uertere,

non

non destiti, quæ ad instruendum tuum cubiculum  
 pertinerent, cogitare. & lintea prouidi, de quo  
 testis tibi erit tuus Simon: et aulæa. tametsi tu me  
 uelut ingratitude apud animum tuum uel accu-  
 sas, uel quod indignius est damnas. quam suspicio-  
 nem malim tibi rebus ipsis eximi, quàm uerbis.  
 Itaq; dabo operam, non ut leuissima pro te susci-  
 piam, neq; enim tu es ita de me meritis: sed ut le-  
 uissima mihi fiant, quæcunq; pro te suscepero. In-  
 cidit non raro, ut ex occasione uerbi aut dicti ali-  
 cuius ad caput aliud respondeamus longè dista-  
 tum, etiam quum priores scribimus. hinc uenit in  
 mentem mihi, ex hoc uerbo uel dicto admoner,   
 ut de hoc aut illo dicam. & quia mentionem fecit  
 de Concilio, scito Pontificem et Cæsarem magnis  
 & longis consultationibus conciliū aliquod mo-  
 liri. Sed ut est genus hoc epistolare cum primis li-  
 berum, licebit etiam ab ultimis exordiri respon-  
 sum. ut Cicero fecit ad Q. Cornificium libro Epi-  
 stolarū 12. Sunt molles quidā transitus, & lepidi  
 ad continuationem sequentium, uel eorum quæ  
 sis oblitus. Mane paulisper, nā est aliud quod ad-  
 iijciam; non grauabor hoc quoq; adscribere in tu-  
 am, uel Maluendæ gratiā: quæso ne graueris hoc  
 quoq; legere. iam iam obsignaturo uenit mihi in  
 mentem, quod præteritum minimè oportuit: sed  
 quàm penè exciderat mihi, quod erat præcipuū?



quàm multa scripsi, qui oblitus eram, id quod iure futurum fuerat primum: leue est quod ascribam, sed non omittendum tamen. Cicero plerumque nihil horum curat. Ad extremum literarum addi solet, si quem aut salutatum, aut resalutatum uolumus: aut si qui eos ad quos scribimus, aut eorum amicos uel notos salutarent, resalutarent<sup>9</sup> ue. Atticæ & Pylæ S. Dionysium uelim saluere iubeas. Terentia tibi S. D. Pylæ & puellæ Cæciliæ bellissimæ S. dices. Saluebis à Cicerone nostro. Cicero tibi P. S. D. Hinc, ut digredientes, bene precantur mutuò: id enim humanitas docuit. literarum exitus felix est omen, ut ingressus. Græcis est *ἔπιπρωο*, quasi Vale: quod etiam Latini, tum & Salue. Catilina apud Sallustium: Per filios tuos rogatus aucto: puto ex perturbatione animi et tumultu, in quo scribebat. quin etiam, Cura ut ualeas, fac ualeas: si me amas, ualeitudinem tuam cura diligenter: Vale etiam atq; etiam: & Salue mi Tyro. Hæc uetera. Sed illa aptiora usui uitæ, & magis profutura: Christum precor, ut quæcunq; egeris, secundet, & feliciter tua omnia sinat euenire: seruet te Dominus: pax & fauor Christi sit tecum: opto tibi bonam mentem: Aegidius Calentius reliquit epistolia haud sanè absurda, in quorū calce pro Vale, addit semper congruēs argumento uerbum: si quem aduocabat, Curre, uola: si cui nuncia

nunciabat læta, Gaude: sin tristia, Plorato. Quid-  
 dam interdum simile fecerunt ueteres, sed non e-  
 rat in eis perpetuum, ut in isto: Cicero D. Bruto:  
 Vince, & Vale. Fabricius Pyrrho: Tu nisi caue-  
 as, iacebis. Sed bene precari est multo decentius  
 & congruentius. Postremo, quoniam è re est illi  
 cui scribas, & unde, & quando epistolam dede-  
 ris, cognoscere, locus & tempus adscribebantur.  
 Locus hoc modo: Datum Lucæ, scriptum in ca-  
 stris, Vale ex castris, ex urbe Capua. Data apud  
 Valentiam, in urbe Valentia, Louanij, Lutetiæ,  
 ex rure. Epistolam, inquit Cicero, datam à tribus  
 tabernis: ex castris, ad imam Candauiam. Cicero  
 T. Attico ex rheda scripsit, et de phasello. Ex tẽ-  
 pore cognoscitur, quæ epistola prior sit, quæ po-  
 sterior. hinc enim haud rarò uoluntatum pendet  
 & sententiarum interpretationes: quemadmo-  
 dum in edictis, legibus, diplomatis principũ. Au-  
 gustus horas quoq; epistolis adscribebat, ut est a-  
 pud Suetonium. Annos illi consulum nominibus  
 denotabant, quibus fasti signabantur, & acta om-  
 nia, tum priuata, tum publica. Vnde illud iuris-  
 consultorum: Ne instrumentũ fiat sine die & con-  
 sule. In epistolis amicorũ rarius adscribebant, nisi  
 rem contineret dignã, ob quã id facerent. Atheni-  
 enses habebant suos *ἄρξεις*, Græci olympiades,  
 alij alias notas temporũ. Nec solũ tempus præter-  
 mittebant,

mittebant, sed etiam locum: quum nihil referebat  
addi, uel quia iam is sciebat cui scribebatur, uel ra-  
tio materiae non poscebat. Neque uero in loco &  
tempore & salutatione erat ullus ordo certus. sic  
enim scribebant: Vale, Romæ, Nonis Iunijs: &  
Vale, Nonis Iunij, Romæ: &, Nonis Iunij, Romæ,  
Vale. Si quid uel exciderat, uel ueniebat in men-  
tem ut adderent, sine præfationibus id faciebant,  
rursus apponebant Vale. quod si iterum liberet  
quicquam ascribere, faciebant ad eundem modum,  
iterum uel tertio Vale: itidem quoties placeret.  
cuius rei exempla sunt quum alia permulta, tum  
in primis apud Ciceronem 13. epist. ad Atticum.  
Sed nos pro festis ueteribus utemur nostris. olim  
illi, Vale quinquatribus, Vale rubigalibus, Vale  
uulcanalibus, floralibus: quin nos etiam, Vale na-  
tali Seruatoris, uirginis matris, ferijs D. Marti-  
ni, conuersionis Pauli: nisi forte pudet ac poenitet  
nos nostrorum diuorum, ad quos nulla est illorum  
deorum comparatio. Pro Calendis quoque, Idibus,  
Nonis, expeditius est diem mensis adscribere, quin-  
to Ianuarij, sexto Nouembris, crepusculo diei,  
conticinio noctis, multo mane, bene mane, de me-  
dia nocte, de medio die, in ipso feruore diei, in ri-  
gore noctis mediæ, aut extremæ. Romanis consu-  
libus & Atticis ~~æpys~~ successit felicior computa-  
tio, à nato Domino Iesu, assertore generis huma-  
ni: Anno

ni: Anno à Christo nato, ab orbe redempto, à filio Dei incarnato, à partu uirginis. Si uaria sint scripta, quod maximè infixum uolumus menti, id repetemus post Vale. ut, Vale mi Honorate, & literas cole, quæ te principem uirum efficiant nostræ ciuitatis. Vale etiam atque etiam mi Poblaci, et cura ut ipse è colica mea rectè ualeam. Verùm loci & temporis assignatio longè uidetur mihi aptior & congruentior negotijs, si statim in capite literarum denotentur. quippe si dies aliquot asseruetur epistola, & res uariæ contingant, maxima sequetur perturbatio, quæ res quo tempore acciderit: sin uerò peregrinemur, nec unde scribamus sciri poterit. Ad effugiendam confusionem hanc negotiorum, Cicero quandoque media epistola signat diem: Hæc scripsi ad quintum Caælend. Iunias. Itaq; commodissimū mea sententia, & ad euentuum rerumq; omnium diuersitatē in primis appositum fuerit, hunc in modum, aut similem quempiam scribere; I. L. Viues G. Budæo suo facilem senectam optat. Brugis tertio die Ianuarij, M.D.XXXIII. Cæsarem narrant esse Mantuæ, inde profecturum Bononiam. Agimus epiphaniam Domini. iam pro certo habetur, illum cum Pontifice congregari, & maximis de rebus quotidie consultare, quæ sint toto Christiano nomini cum primis utiles. Hic dies est octauus Ianuarij,

nuarij, de Concilio ferunt illos agitare: Christus illis impartiatur suum spiritum. Dies est iam decimus mensis, sum Gandavi, proficiscens Brussellam, accepi literas tuas duabus epistolis eodem fasciculo: ad omnia ferme respondi, præterquam de necessario illo tuo, quem nondum uidi, sed expectatur hic quotidie. hæc epistola, quia sefellit me qui erat profecturus, nondum est missa in hunc diem, qui est prædicti mensis decimustertius. perueni Brussellam, conueni amicum tuum, quem sum de negotio tuo allocutus: pollicetur suam operam omnem: tu, ut soles, quicquid euenerit, magno sis animo. opto tibi fauorem Christi. Iam pudet me tam diu asseruatæ epistolæ, uicesimus est mensis: ex ijs quæ ille est cum Scæuola collocutus, non uidetur esse eo in te animo, quem existimabamus, quum hic esset: sed dum Christus bono sit in te animo, humanas utilitates facile neglexeris. Saluebis à Cranaueldio nostro, uxori tuæ salutem ex me. P. Brixius saluebit à me officiosè & accurate: item, Beraldus & Tusanus. Quid etiam? quid adhuc? nam uereor, ne in epistola toties in manus resumpta, desit aliquid, quod non esse adscriptum doleam. nihil occurrit, adsit tibi Christus. Epistola hæc una suffecerit pro exemplo, ad ostendam formulam. Salutem & Vale non damno, nec diem & locum in calce: quibus ipse hætenus sum

sum semper usus, nempe antiquis & receptissimis. sed ratio hæc noua scribendi, nec inerudita uideatur mihi esse, & præsentium rerum statui congruentior, non solum in Latina lingua, sed in uernaculis: quibus etiam præcipimus, & prospiciamus, non solum latinæ, etsi huic, uti par est, potissimum. Adde his, quod preces magis religiosæ sunt, magisq; optabiles. In calce epistolæ, si ea sit aliena manu scripta, signum aliquod addendum, quo declares eam non esse adulterinam, aut supposititiam, sed abs te profectam. In quo erat apud ueteres parata fraus, quippe quibus facile esset negare abs se esse missam. Cicero in Antonium, Philip. 2. quem locum adscribam totum, quia sumitur ex prudentia communi: At etiam literas, quas me sibi misisse diceret, recitauit: homo et humanitatis expers, et uitæ cõmunis ignarus. Quis enim unquam, qui paulum modò bonorum consuetudinẽ nosset, literas se ab amico missas, offensione aliqua interposita, in medium protulit, palamq; recitauit? Quid hoc est aliud, quàm tollere è uita uitæ societatem? tollere amicorũ colloquia absentium? quàm multa loca solent esse in epistolis, quæ prolata si sint, inepta esse uideantur? quàm multa seria, neq; tamen ullo modo diuulganda? Sibi hoc inhumanitatis tuæ, stultitiã incredibile uideate. Sed quid oppones tandẽ, si negem me unquam  
istas

istas literas ad te misisse? quo me teste conuincas?  
an chirographo? in quo habes scientiam quæstuo-  
sam? qui possis? sunt enim librarij manu.

### De superscriptionibus.

De superscriptionibus nihil habemus antiquo-  
rum, quod quidem certò possimus affirmare. qua-  
de causa existimarunt nonnulli, titulos fuisse su-  
perscriptiones: quam opinionem paulo ante sa-  
tis refelli. Sed suspicor multis epistolarum non fu-  
isse additam superscriptionem: sicuti nec intus in  
calce, locum aut tempus, quum iam alioqui scire-  
tur, aut nihil referret. Itaq; ubi is, cui perferenda  
epistola dabatur, cui nam esset redditurus noue-  
rat, nihil erat superscriptionis opus. ferè autem  
eam ad rem uel domesticis, uel notis hominibus  
utebantur; quòd si publico tabellario committe-  
rent, is utiq; signa dignoscebat. Sed coniectura-  
rum satis. Superscriptio certè hoc tempore neces-  
saria est. Ea constabit nomine eius, cui mittitur:  
adiecta uel dignitate, uel functione publica, sicut  
in titulo; Cn. Pompeio Magno Proconsuli impe-  
ratori, Ludouico ab Auyla fiduciario & cubicu-  
lario Cesaris. Epitheta sapientiæ, claritatis, illu-  
strationis, & alia uerè sunt, quod dicuntur, super-  
iecta: non honorant superscriptionem, sed onera-  
nt. nihil est eis mendacius, uel absurdius, iam et-  
iam pueri hæc ridet. At ut in titulo dicitur suo,  
ita

ita in superscriptione Meo. nam hic qui scribit, in iungit tabellario ut perferat, uel reddat eas literas: alterum enim illorum uerborum subauditur. Fernando à Toletò, herili filio comitis, auripense meo: in quo intelligendum, reddes. uel ad Fernandum, &c. in quo, perferes. Familiares, & qui optimè cupiunt mutuò, poterūt uerbum aliquod addere amicitiae suae notam, Amico meo unico, maximo, summo, amico multo mihi charissimo, iucundissimo, suauissimo. ad patres, præceptores, tutores, & eiusmodi: mihi semper uerendo, honorando. sed hæc modicè, seu potius intra modum. Post hæc signatur locus ubi ille sit: Romæ, Lute-tiæ, Brugis, Valentiae. Sunt qui ipsi adferunt loco notitiam & claritatem, potius quàm è diuerso: ut reges & principes. ad hos & ruditatis & ineducationis est, locum adscribere.

### De dictione epistolæ.

Epistola imago quædam est quotidiani sermonis, ac colloquij cuiusdam perpetui. hæc enim in aliud est inuenta, quàm ut absentium sermones referat ac representet. Itaq; illud debet potissimum efficere, ut quàm proximè poterit, colloquia & sermonem familiarem exprimat, prudentum dico & eruditorum. Nam optima quæq; sunt æmulanda, quo mediocria saltem cōsequatur. ita est enim unaquæq; ars absolutissima, ut maximè  
ad



ad naturam suam accedit. Sermo autē noster quotidianus simplex esse debet, & rectus, et naturalis, dummodo purus & castus: quippe coinquinatus & sordidus, hominum est uel imperitorū, uel dissolutē negligentium. Excultus porro atq; ornamentis nitidus ac splendens, uel insolentiae est atq; arrogantiae, uel putidae ac puerilis ostentationis. quod si talem decet esse nostrum sermonē, profectō non aliam esse epistolarem dictionem conuenit, umbram atq; imaginem, & quasi uiciariam illius. Itaq; ueteres plurimi, ornari existimabant epistolam simplicitate, & excultissimam esse sine cultu, modō abessent sordes: ut uenerabilior est ille in matrona simplex & parabilis ornatus, quā splendidus & sumptuosus. Idem in uiris contingit, quos effoeminatos esse ducimus, ac moribus parū uiro dignis, si sollicitius munditijs uideamus deditos: ut foedos illos & deuitandos, qui in squalore pœdoreq; computrescunt. Ergo illam unam esse artem epistolarem in eloquendo censebant, nullam adhiberi artem: modō stulti sensus aut inepti, et nimis perturbatus abesset ordo: tum uocabula essent pura eius linguae, qua scribatur. grandia enim, selecta, tumentia, affectata, non decori putarunt esse epistolae, sed irrisioni, ut pauonis pennas in cornicula. Hoc epistolis suis comprobant magni omnes uiri: qui si eisdem de rebus

rebus in epistola loquantur, quibus in oratione, aut iusto libro, stylum protinus mutant & uerba, totumq; illum rerum & uerborum apparatus: demittuntq; se ad humilitatem illam epistolarem, quæ tanquam frugi puella ac modesta, minimeq; loco claro nata abundè compta est, si absit deformitas & sordes. Ergo Cicero aliter ad amicos loquitur de causa Milonis, aut de prouincijs consularibus, aut de consolationibus, quàm uel apud iudices, uel in senatu, uel in Tusculanis: aliter Augustinus de pietate in libro de ciuitate Dei, quàm ad amicos. alio stylo & inuentione Plinius de laudibus Traiani ad amicos, quàm in senatu. de philosophia Seneca elaboratius in libris de ira, aut de tranquillitate uitæ, aut naturalium questionum, quàm ad Lucilium. Plato quoq; ad eundem modum. de Hieronymo taceo, qui non epistolas uidebatur scribere, sed libros: quamuis ipse de temporis angustia & tarditate notarij, haud raro conqueratur. Sed ut de Cicerone loquar, eius epistolæ adeò sermonem eius domesticum & familiarem exprimunt, ut ego illum non aliter cum uxore, cum liberis, seruis, familiaribus, in foro, in campo, in balineo, in cubiculo, in triclinio locutum existimem. Iam ordinè ita neglexit, ut undecunq; uisum sit exordiat, & repetat, & addat, et recipiat se, & reuocet. nihil tale est in orationibus,

aut libris philosophicis. Atticum quoque hortatur, ut scribat quicquid in buccam. Seneca ad Lucilium lib. 10. epist. Qualis sermo meus esset, si uenâ sederemus, aut ambularemus, illaboratus & facilis: tales esse epistolas meas uolo, quæ nihil habeant accersitum & fictum, sed si fieri posset, ostendere quàm loqui mallet. Apollinaris Sulpitij iudicium, quo Plinij stilum in epistolis Cicero niano anteposuit, indignum est quod referatur, nedum ut refellatur. nam nec ipse rationē ullam sui dicti addit, & imitatore se profitetur Plinij, à quo abest longissimè, ut hominis iudicium cognoscas. Veruntamen quod de simplicitate dixi, non est hoc uelut in puncto insectili positum, quin liceat intra illos limites huc se & illuc nonnihil porrigere. Nam sicut in alia omni sermonis forma, ita in hac dispectandum est, quis, cui, quæ de re dicat. In adolescente non fertur solum, sed laudatur etiam dictio comptior, latior, elaboratior, distributio & ordo rerum, descriptio: denique commendatur studiosa diligentia. Sunt, qui accuratis ad se epistolis delectantur, ut homines docti, acuti, ingeniosi: alij contemptum interpretantur sui, ni eleganter & ornate scribas. sunt qui nimiam curam despuant, quasi putidam. Qui aliquid petit, alieno stomacho subseruiat: qui nihil, suo. Res quoque aliæ secum ipsæ adferunt cultum suum;

suum, ut de bellis, de republica, de moribus: alia nolunt nisi cum splendore dici, ac ne possunt quidem. Quintilianus sermonem & epistolas solutas uult esse numeris, nisi quum aliquid supra naturam suam tractant, ut de republica, de philosophia, de laudibus & uituperatione. Idem Seneca aduersus epistolam ornatam adeo seuerus, hæc subiungit: Non me hercule ieiuna & arida esse uolo, quæ de rebus tam magnis dicentur. Neque enim philosophus ingenio renunciat, multum tamen operæ impedi uerbis non oportet. Veteres illi, ut de negotiis modo scribebant, simplici illo & naturali utebantur loquendi more: malebantque, quod est prudentiæ, indoctius loqui, dum apertius: tum errorem in uerbo committere, quam in re. Vbi alia res accesserunt, plus est adhibitum curæ, quod fecit Seneca ipse. Quum uero nihil fuit quod scriberetur, præter mellitas epistolas, aut etiam felleas, inanes tamen à negociis, atque umbratiles, instituerunt eas ornamentis cultuque conuestire: ut quæ cognitione rerum non poterant niti ac sustineri, certe uenustate atque ornatu subsisterent. nam alioqui quis unam illarum sustinuisset perlegere, uacua rebus, & inopem uerbis? Tales sunt epistolæ Plinij Cæcilij. Quin obseruatum est, etiam Marcum ipsum Tullium aliter ad alios, & alijs de rebus solitum scribere. elaboratius ad Brutum quam ad Atticum, quum alia

X      quid

quid contendit impetrare, quàm quum narrat: uelut ad L. Luceium, quàm ad Varronem: quum consolatur item, ut ad M. Marcellum. Et alioqui ars et exercitatio Ciceronis, et ingenium excellens hoc præstabant ei, ut oblata et naturalia in eo uiderentur, quæ extimo essent producta artificio. Summa hæc est, ut meminerimus esse epistolā, hoc est, puellam plebeiam, in quibus etsi aliæ alijs ornantur excultius paulo et purius, mundum tamē patritiarum non æquant, uti nec famulæ dominarum. Aliud est, inquit Plinius, scribere historiam, aliud epistolam, etiam de eodem argumēto. Idem Plinius pressam et astrictā uult esse phrasim epistolarē: sic tamen, ut ne sit ieiuna prorsum ac strigosa, ne uel arida. habebit succi aliquid, et cum leporem ac gratiam, quæ est in astricta dictione, et simplici illa dicendi nota sæpenumero uel maxima. Ideoq; nec tropos continebit crebros, nec translationes uarias, nec allegorias frequētes aut longas, nec confirmationes alias, nec uerba grandia et magnifica, nec concinnam et numerosam structuram: hæc quidem de genere uniuerso. nam in formis uariatur, seruata generis ipsius natura, sicut ostendi. Quæ præcepi de elocutione, transferri ad artem ipsam uniuersam possunt: quæ quum celari ubiq; par sit, tum in epistola adeo debet esse tenuis, ac propè nulla, ut à magnis ipsis artificibus

bus uix queat deprehendi: & si hoc, uti de phrasi docuimus, dirigendum est ad considerationē personarum & rerum. Quidam de epistolis componendis differentes, de proœmio tradunt, de narratione, confutatione, confirmatione, peroratione, de inuentione, dispositione, elocutione, ex rhetorum præceptionibus repetita: quod planè est superuacaneum, et loco huic alienum. Primū, quòd nulla est ferè epistola, quæ habeat quinque illas partes: nec tantum artificium tenera hæc puella sustinet. Deinde, etsi proœmio nonnunquam utatur, & colligat ac conficiat argumenta, uel depellat, & ordinem sequatur, rebus in suos locos distributis: idem faciunt omnes sermonis species, consolationes, gratulationes, dialogi, panegyrici. quid ergo? quoties de aliquo illorū præcepta tradentur, omnia artis ferramenta & arma in mediū proferemus? Quæ artis sunt, semel oportet exhiberi in genere, ut quando opus sit, singulis accommodentur formulis. nullius enim harum sunt propria, minimè omnium epistolæ, quæ minimè uel indiget, uel utitur. Ad doctos & ociosos scribentes, licebit allusiones admiscere, ad fabulas, ad historias, ad prouerbia, ad res naturæ ac morum, ad dicta præstantium scriptorum: modò breuiter, non tam explicandi gratia, quàm uelut puncto signandi, & indicandi digito. Etiam in re-

conditis rebus utile est ænigmata inferere, quod uidemus Ciceronem fecisse crebrò ad Atticum: ne si literæ in alienas manus deuenissent, atq; aperirentur, proderetur quod illi opertum uolebant omnino esse, & occultum. Etiam uerba græca immiscet altera duarum occasionum, uel quã aptius id Græcè dicitur, atque appositius quàm Latine, uel quum non uult à quolibet intelligi. ideoq; abstrusis & Homericis plurimum uerbis, nec passim cuius expositis utitur. Nobis quoq; si negotiũ poscat, uelare sententiam nostram concedetur sermone alienissimo ab eo quò scribimus: uelut si Hispanicè sermone Teutonico, aut Britannico. neq; enim, ut paulo antè admonui, de sola præcipimus Latina lingua. Quid quod etiam in ea ipsa uerbo Germanico uel Scotico, ei tamen cui scribimus cognito, sensum obscurare quis uetat, si id rei qualitas efflagitet? Nam Cicero, non quod lingua Græca elegans et exculta esset, ut quæ maximè, uel potius supra ceteras, idcirco res arcanas illa contegebatur: sed quòd nota Attico, reliquis uerò ciuibus non tantopere. quòd si aliam à Romanorum usum motiorem Atticus sciuiisset, eam ipsam usurpasset Cicero, in rebus quæ nolebat euulgari. Et quando in cuiusq; principis comitatu sunt homines multilingues, repertum est genus quoddã notarum reconditissimum, cifras uocant, è quibus nemo

mo unquam sensum exsculpet, nisi abecedarium, & significationem uerborum teneat, quæ inter illos conuenit. quemadmodum nec Laconicam scythalam quisquam legerit, ni bacillum habeat per omnia illi parem, ad quem erat lorum contortum & conuolutum. Sunt etiam in epistolis Ciceronis, ad Atticum præcipue, multa breuia et præcisa: quam autumo phrasin fuisse sermonis latini, familiaris illo utiq; seculo. omittit enim uerba potissimum, Dico, Mitto, Scribo, Venio.

MISCELLANEA DE VETERUM consuetudine Epistolari, tum agendo, tum loquendo, ex Cicero- nepotissimum. Addita sunt etiam nonnulla nostri  
usus,

**A**Ntiquissimi homines Epistolas solebant in tabellis scribere, quod Homerus uates docet in fabula Bellerophontis. is mos durauit usque ad Romana tempora, uti ostendunt scriptores Latini, Plautus, Cicero, & alij. unde qui literas perferrent, tabellarij nominati: quod nomen etiam nunc manet, quum tabellis iam pridem non utamur, sed ut alia, propter uim atque usum eun-

dem.



dem γραμματοπόπος est Græcè, & à quibusdam nostris Veredarius dicitur: sed hic nō tam est qui literas perfert, quā qui ueredis subinde mutatis breui tempore magna itinera conficit: cui literas solemus committere, ut celeriter perferantur. Co dicilli quoq; appellationem suam sumunt ex tabellis. Literæ dicuntur, & literulæ diminutiue, sicut epistola & epistolium. Exarare literas, componere epistolam, & formare epistolam, et dictare. qui uerò scriberet epistolas domini, librarius, & scriba. sequentibus temporibus notarius: & ab excipiendo, quæ alius dictaret, exceptor. A manu autem, & amanuensis puer est, quo utimur quasi ad manum, in ministerijs intimi cubiculi: qui etiam ad manum appellatur. is interdum excipit quæ nos dictamus, uel præscribimus, secretiora quā ut alijs uelimus communicari, aut leuiora quā ut necesse sit librarium propter illa accersiri. Formalis epistola est uelut forma, & ea non aliarum illius generis. quales sunt principū, quæ ad certam quandam formam, uelut obseruatione religionis conscribuntur. Tabellis successit charta, primū membrana Pergamena: huic uerò hæc nostra papyracea. Erit genus chartæ epistolæ, cuius in apophoretis Martialis meminit, tenuæ, leuæ, firmum, aptum epistolis scribendis. Vna in facie olim scribebant. nam quæ duabus essent scripta,

scripta, ea nuncupabant *opisthographa*: cuiusmodi erat *Orestes* ille *Iuuenalis*, *Scriptus* & *intergo*, nec dum finitus. propterea quod una tantum facies erat *læuigata*, & literis recipiendis idonea, nempe interior, quæ carnea sanè nuncupetur, exterior autem uillosa. Vtebantur etiā *membrana deletili*, *palimpseston* dicebant. *Cicero* *Trebatio*: Nam quod in *palimpsesto*, laudo equidem *parsimoniam*. nescio tamen quid in illa *chartula* fuerit, quod *delere* malueris, quàm hæc non scribere: nisi fortè tuas *formulas*. non enim puto te meas *epistolas* *delere*, ut *reponas* tuas. *Rationes loquendi* in *epistolis* hæc *propemodum*, & eiusmodi *usurpabant*: Qui *epistolam* *perferet*, *pertulit*, *perfert*. quorum primū spectabat *tempus post* *scriptionem*, alterum *post redditionem*. *tertiū est* *tēpus præsens*, quod latè solet *extēdi*: sicuti, *Quis* *prandet* *apud nos*? *Barcherus* et *Patus*: de *pransuris*. *Nihil habebam* quod in *præsentia* *scriberem*, *scriptione dignum*, ad te *præsertim*: *nullum erat* *argumentum*, *nulla materia*, *caussa*, *occasio* *scribendi*, *scriptionis*, *epistolæ*, *literarum*: eoq; *breuior* *est*, *erit*, *hæc epistola*. nam nec tu *inanibus literis* *delectaris*: & ego non iam, ut soleo, *epistolas* *libens* *mitto* *scholasticas* atq; *umbraticas*, in quibus *nihil sit negotij præter comitates*, *officiosa* *uerba* & *mellita*: tametsi hæc *satius est exercere*,

quàm facundiam caninam. Tam multum habeo,  
 uel est, quod scribam, ut initium non uideā: ut neq̃  
 initium, nec exitū inueniam. propter hanc dubita-  
 tionem meam breuior hæc epistola est. Sed tamen  
 ita distinebar, ut uix huic tantulæ epistolæ tem-  
 pus habuerim. noli putare pigritia facere me,  
 quod non mea manu scribam. Ad Plancū scripsi,  
 misi, habes exemplū. Ad senatū quas literas misi,  
 uelim prius perlegas: & si qua tibi uidebuntur,  
 cōmutes. Ad has literas statim mihi rescribe, tuo-  
 rumq̃; aliquē mitte, si quid reconditū magis erit,  
 meq̃; scire opus esse putaris. Et si manē Harpalū  
 miseram, tamen quum haberem, cui rectē darem  
 literas: & si noui nihil erat, eisdem de rebus uolui  
 ad te sæpius scribere: non quòd diffiderem diligen-  
 tiæ tuæ, sed rei me magnitudo mouebat. En quan-  
 tam epistolā ex quàm tenui initio deductā, quan-  
 tum ex arauī chartæ, quum uix tres uersus scriptu-  
 rum me à primo existimarē. Sed quid ego nō imi-  
 tor laconismū tuū? altera pagella procedit. Quid  
 aliud? quid restat? nunquid sum oblitus? excedit? fu-  
 git? Permultum, permagni interest quo tibi hæc  
 tempore epistola reddita sit: an quū solitudinis  
 aliquid haberes, an quū ab molestia uacuius esses.  
 itaq; ei præcepi, quem ad te misi, ut tempus obser-  
 uaret epistolæ tibi reddendæ. Nam quemadmodū  
 coram qui ad nos intempestiuē adeunt, molesti sæ-  
 pe sunt;

pe sunt: sic epistolæ offendunt, non loco redditæ.  
 Coram me tecum hæc eadem agere sepe conantem,  
 deterruit pudor quidem penè subrusticus, quæ nunc  
 exprobram absens audacius. epistola enim non erubescit. Manu mea scripsi, manu tua scripsisti, manu mea ipsius; manu propria mea, negat Valla dici. Brutus tamen; De uoluntate, inquit, propria mea. Scripta iam epistola Hermia uenit, accepi epistolam tuam uacillantibus literulis. redde nobis superiorem epistolam, et appinge aliquid noui. Vale, Da operam ut ualeas, Cura diligenter tuam ualitudine: hoc mihi gratius facere nihil potes. Vale, et matrem, meosque tibi commendatos habe. Vale, et Salue, quarto Calendarum, Calendas Decembres, ad quartum Calend. Decembres, ante diem quartum Calendarum, quasi quarto die ante Calendas. Nuncij nobis tristes, nec uarij uenerunt de Qu. fratre, ex et ante diem Nonarum Iunij usque ad pridie Calendas Septembres. Contulit hoc negotium, siue distulit in ante diem sexum Iduum Maij, usque ante diem quintum Calendas Maias, hoc est, usque ad diem quintum ante Calendas Maij, ut recte interpretatur Budæus. Balbus, Sub postea quam literas communis cum Oppio ad te dedi: quod durum admodum uidetur. Epistolam perscriptam complicabant, uinciebant lino seu filo, addebant ceram. Quodam uero tempore proce-

res Romani ceram quandam ex Asia aduectam, ut refert Cicero pro L. Flacco. in cera signum imprimebant ex gemma annuli. Cicero in L. Catilinam: Ac ne longum sit Quirites, tabellas proferri iussimus, quæ à quoque dicebantur datæ. Primum ostendimus Cethego, signum cognouit, nos lignum incidimus. tum ostendi tabellas Lentulo, & quæsiui, cognosceret ne signum: annuit. est uero, inquam, notum signum, imago aui tui, clarissimi uiri, qui amauit unice patriam & ciues suos. Idem Cicero: Obsignata iam epistola superiore, non placuit ei dare cui constitueram, quod erat alienus. itaque eo die data non est. Hæc scripsi raptim, præproperè, perturbatè, quod ex literis ipsis & sensis facile conijcies. quæso festinationi meæ, & breuitati literarum des ueniam. Nos item complicamus epistolam, quæ si non sit deuincta, est solutilis, uel apertilis: ut quas alicui mittimus legendas prius, quam reddat. filo deuincimus uel supernè, uel transfixam: interdum quoque fibra ex eadem charta, quum signum non habemus. commissura quoque chartacea, uel orbiculari parua: uelut in negocijs mercatorum. uel magna commissura obsignata, ut ad procures. itaque dicitur uel deuincta filo, uel astricta commissura. Solet nunc interstitium uacuum relinqui inter salutem & ipsam epistolam, pro dignitate eius ad quem

quem scribitur, uel amplius, uel astrictius: uocetur id sanè margo honorarius. Qui literas perferūt, sunt tabellarij. è quibus alij sunt ordinarij, alij extra ordinem, lenti, celeres, ucredarij, per equos dispositos magnis itineribus euntes, coniungentes dies noctibus. hi accipiunt precium uecturæ, seu pro uectura, appensis epistolis, nō numeratis. Respondentes uerò, hisce locutionum generibus utebantur, Accepi literas: Plinius etiam recepi dicit. Reddita sunt mihi literæ tuæ amantiſsimæ, ſuauiffimæ, blandiſſimæ, iucundiſſimæ, expectatiſſimæ, amicæ, comes, ſalſæ, feſtiuæ, plenæ humanitatis et beneuolentiæ: uel acres, acerbæ, inſipidæ, dentatæ, maleuolæ, rabioſæ, rabioſulæ, fatuæ, dementes, imprudentiſſimæ. Accepi literas tuas duabus epistolis, duas uel tres epistolas eodē exemplo, manu tua ſcriptas, manu ſcribæ, manu liberti tui. Treis uno die à te accepi epistolas, unam breuem, quam Flacco Volumnio dederas: duas pleniores, quarū alteram tabellarius T. Vibij attulit, alterā ad me miſit Lupus. Puer à ſorore tua miſſus, epistolam mihi abs te allatā dedit. Accepi tuas tres. Plinius: Poſt longum tempus epistolas tuas, ſed tres pariter recepi, omneis elegantiffimas, et quales à te uenire præſertim deſideratas oportebat: quarū una iniungis mihi iucundiſſimum miniſterium, ut ad Plotinam ſanctiſſimam ſceminam literæ tuæ perferantur:

ferantur: perferentur. eadem cōmendas mihi Popilium Artemisiū, statim præstiti quod petebat. Sed ad Ciceronem reuertamur. Obuiam mihi fuit tabellarius. at ego statim: cedo inquam, si quid ab Attico? Si quid erit occultius, & ut scribis, reconditum, meorum aliquem mittā, quo fidelius ad te literæ perferantur. Etsi iusta & idonea usus es excusatione intermissionis literarum tuarum, tamen id ne sæpius facias rogo. Accepi literas ab eo qui misit: accepi à tabellario, qui reddidit. Damus literas ad eum cui scribimus, damus tabellario: tabellarius reddit, atq; etiam interdum dat: etsi hoc rarius. Accepi literas tuas ab Acasto, seruo meo: quas quidem quum expectassem iam diu, admiratus sum, ut uidi obsignatam epistolam, breuitatem eius: ut aperui, rursus σφύχνομαι literularum, quæ solent tuæ comptissimæ & clarissimæ esse. sic ille. Videlicet, breues et parui momenti epistolas non solebant obsignare, sed complicatas solum mittebant in modum codicillorum. Misit ad me literas, quarum exemplum hic habebis. Literæ à Cæsare uenerūt, literæ à Catone sunt adlatæ. Cicero filius Tironi: Quum uehementer tabellarios expectarem quotidie, aliquando uenerūt post diem quadragessimum & sextū, quàm à uobis discesserant: quorum mihi fuit aduentus optatissimus. Expecto tuas literas de multis rebus, te ipsum multo magis,

gis. Scripsisti ad me epistolā plenā cōsiliij, summaeq; tum beneuolentiæ, tum prudentiæ: eam mihi Philotimus postridie quā a te acceperat, reddidit. Q. Seruilius perbreues a te literas mihi reddidit, quæ mihi tamen nimis longæ sunt uisæ. iniuriā enim me accipere putabam, quod rogabar. Accepi a te aliquot epistolas uno tempore, quas tu diuersis temporibus dederas. Ac uelim posthac sic statuas, tuas mihi literas longissimas quasque, gratissimas fore. Quod epistolam cōcisam doles, noli laborare: salua est domi, petes quum libebit. Epistolam tuam, quam accepi ab L. Aruntio, considi innocentem: nihil enim habebat, quod nō uel in cōcione recte legi posset. Resoluta epistola, continuo uidi quod cupiebam, uel quod metuebam. Libentissimè legi tuas literas, in quibus iucundissimū mihi fuit, quod cognoui meas tibi redditas esse. Ex literis tuis cognoui, intellexi, accepi, factus sum, redditus sum certior: nihil certū de te habebamus. Domitium aiunt futurum sine fascibus: quum id scies, facies ut sciam, fac sciam, faciā ut scias, ut noris, ut intelligas. Particulam literarum tuarum, quas misisti Octauio, legi missam ab Attico mihi, particulam literarum legit mihi Atticus. In capite tuarum literarum, in medio, ad medium, in calce, sine, extremo, ad postremum hæc erat literarum tuarum clausula. Habeo, habebā literas a fratre:



tre: non tamen dicitur habui, pro accepi. Respon-  
debo tuis literis ordine, uel promiscuè, non serua-  
to ordine. Tuam rationem scribendi sequar, quo-  
niam uidetur mihi optima, commodissima, appo-  
sitissima. uel ut commodius rescribam, nec oī noua-  
m̄ meam institutam, sed ordinem conseruabo  
tuum, & respondebo primum postremæ tuæ pa-  
ginæ. Ego respondebo tibi ὡς ἔπος πρὸτ' ἔπος, ὡς  
πρῶτ' ἔπος. Epistolas tuas accepi duas: prior recentio-  
rem habebat diem, altera antiquiorem. Vetus epi-  
stola, & recens: dies prior, posterior, recens, anti-  
quus, uetus: item dies repetita, quum uetustior est  
quàm quo epistola fuit scripta. Hæc & alia inue-  
niet permulta, qui ueteres, sed Ciceronem præci-  
puè, diligenter euoluerit.

### Salutandī formulæ ufui nō- stro aptæ.

Salutationem uoco, non primā illam, quæ est  
scribentis ad eum cui scribitur, nempe primi ad  
secundum: sed primi ad tertium per secundū, uel  
per quartum quum scribet, quum uidebit, quum  
quid ad eum mandabit. hinc à tertio ad secundum  
per primum, à quarto ad secundum per tertium  
solum, uel per tertium ad primum. Quorum om-  
nium exempla sunt hæc: Saluta, dic salutem, Salu-  
tē annuntiabis, precaberis meo nomine, meis uer-  
bis,

bis, pro me, mea uice, Petro à Toletò hōspiti meo.  
 Saluebit à me Rodericus Manricus meus. Iubebis  
 saluere Gomezium Benauidium. Significabis Io-  
 anni Manrico à Lara, accepisse te literas à me,  
 quibus iubeo illum saluere: accepisse me literas à  
 Duce Beiaris Francisco, quibus iniūxit, ut si quan-  
 do uel tibi, uel illi scribam, adiungam ei S. suis uer-  
 bis. Si quando Morum conueneris, admone homi-  
 nem, ut quum ad Rossensem Episcopum mittet li-  
 teras, adscribat, precari me lēta omnia, ac felicia.  
 Io. Claymondo patri meo S. & senectam leuem  
 ac facilem: cui epistolam hanc dabis legendam,  
 tanquam ad eum quoq; scriptam. Quum hoc lite-  
 rularum ad te exararem, aderat, uel interuenit,  
 uel nunciauit mihi Al. Viruesius, uti suo nomine  
 S. tibi impertirem, salutem impertirer, S. opta-  
 rem, et optimē euenire quòd filiam probissimam  
 iuueni collocasses, tum Christophoro Mirandæ fi-  
 liolam gratulaberis salua uxore. Quum ad Mo-  
 rum dabis literas, uel nactus fueris qui eò profici-  
 scatur, & mandata ad illum miseris, ne obliui-  
 scare accuratissimam mea uice salutationem ad-  
 iungere ipsi & liberis: sed in primis Margari-  
 tæ Roperæ meæ, quam ego ex quo primum no-  
 ui, non amauī minus, quā si mihi esset soror ger-  
 mana. Quum aliquem tuorum mittes Segobri-  
 gam, præcipe ei, ut quærat ibi aliquem ex fami-  
 lia

lia ducis Alburquercani, cui mandet, ut si Cuelas rem proficiscatur, salutet mihi Bartholomæum à Cueua ducis fratrem, uerbis amantissimis, & officiosissimis. Tersule, quoniam quod optimū in pueris est, hilarula est, meis uerbis suauium des. Illud est animaduertendum, non omnes salutationes omnibus congruere: nec similiter ignotos, aut leuiter notos debere salutari, ut amicos et familiares. non idem debere iniungi superiori, quod pari. non omnes metiendi sunt eadem decempeda, sed gradatim & distinctè, ut emineāt signa uoluntatum: in quo prudentia est opus. Curionē, si quando tibi occurrerit, si uideris, si uoles, si uacabit, si erit tibi commodum, salutabis paucis uerbis, leuiter, suffrigidè, suo ipsius more. Quum adibis Cæsarem, obseruata occasione, precaberis illi meo nomine propitium numen, ut tanta regnorum moles feliciter sub eo administretur ipsi & populis. Oro te uir clarissime, ne graueris institutori tuorū liberorū S. ex me nunciare. Salutat te P. Clodius: ego uerò precor tibi meliorem salutem, quàm ab illo.

### Resalutandi.

Respondet, cui uel scripsimus, uel mandauimus, executum se quod erat iniunctum per se, uel per alium, literis, aut mandatis: uel non licuisse, aut noluisse, quia non deceret, non expediret: tum quid salutatus responderit. Exempla sunt huiusce generis:

generis: Quod erat in extremo tuæ epistolæ, uel in extrema epistola, aut charta, in fine, in calce, in postremo literarū. ut, Ioannem Feuynum nostrum salutare feci, & quidem perlibens. is uerò, ut est ingenio suauissimo & amantissimo suorū, letissimus de te audiuit. resalutat te plus millies. salutationem tibi remittit Cranaueldius noster, cum fœnore incredibili. salutem optat tibi ueram & solidam: optat tibi, quæ sibi met ipsi: precatur tibi omnia euenire ex animi tui sententia, omnia prosperrimè, felicissimè, faustissimè tibi & tuis. non potui ipse Vergaram salutare pro te, quod unice cupiebam, quoniam aberam, quoniam me aduersa ualetudo domi continebat. mandauit Gonzalo Tamyo: is renunciat, incredibile dictu quàm grata illi fuerit tua salutatio, quàmque eam remittat tibi accuratè & copiose cumulatam. Exhilaratus est uehementer Francus Leardus ad commemorationem Petri Mexiæ sui. multo etiam magis ad salutationem, quòd significares te sui meminisse. planè amat te, & reueretur bona fide. nihil non optat tibi faustum & letum. Ain tu, salutaris nos à Nicolao Vottono? de quo iam pridem au diebamus omnino nihil. quæso iube eum à nobis saluere, & meminisse ueteris nostræ amicitiae, ac familiaritatis Louaniensis. M. Crassus misit S. chartaceam, ut solet: mallem auream, hoc duntaxat

xat tempore. redde tu illi pro me chartaceam  
 tem, aut si mauis, aeream, quum illum contuenies.  
 Grata fuit salutatio Vdalli. ego illi pro salute li-  
 gnea uel chartacea, reddam argenteam. Salutem  
 Gabriel Valdaura hoc tempore ad me? quin po-  
 tius literas, & quidem copiosas de rebus suis om-  
 nibus, aut nostris communibus? renuncia ei, non  
 expectare me ab eo salutationes, sed epistolas:  
 aut quod matrona illa castissima marito scribit,  
 Nil mihi rescribas, attamen ipse ueni. Claudius er-  
 go S. mihi? satius esset cædi ab alio, quàm ab illo sa-  
 lutari. Piso nobis Sal. rogo te an serio? quo ore?  
 quo uultu? quibus uerbis? nam est admodum sub-  
 dolus, & maleuolentiam blanditia uerborum as-  
 sueuit occultare. Sed uincamus bono malum, re-  
 pende ei salutationem plena manu, & uerbis a-  
 mantissimis. Cum Demetrio nolo mihi esse rei  
 quicquam: meliore ac commodiore utemur eo, si  
 nullus penitus sit nobis usus cum illo. procul que-  
 so ab hac pice, ne inquinemur. crede mihi, ericius  
 est, ne accedas propius. Fabium Gurgitem nolui  
 salutare tibi, ne insolescat. Cornelio Nepoti non  
 reddidi tuam salutationem: ueritus ne arrepta  
 unius colloquioli occasione, insinuet se in meam  
 familiaritatem. nosti quantus sit irrependi arti-  
 fex: & admissus quàm molestus sit, atq; importu-  
 nus, & excussu difficilis.

## De breuitate epistolæ.

Illud præterea iam olim quæsitum, quàm breuem esse epistolam conueniret. Nam Demetrius Phalereus, seu quis est alius, longam epistolam librum appellat, non epistolam. Et L. Senecæ hæc sunt uerba lib. Epist. 6. Ne epistolæ modum excedam, quæ non debet sinistram manum legentis implere, in alium diem hanc litem cum dialecticis differam. Quinquam eius ipsius epistolæ interdum quoq; dextram bis implent. Ciceronis etiã aliquæ, ad Atticum præcipuè, ad alios quoq; nonnullos uolumina sunt, non epistolæ: quas se ideo tam longas ait conscribere, quòd dormire nò possit. Idem ad eundem, ait se interdum *λακωνικὰ* *ἢ ὀκταντάλιον* mittere. Et ad D. Brutum, iniurari *λακωνισμῶν* illius. omnia temperabat per sonis, et negotijs: quum expediebat, et scribebat fuscè, et sic ad se gaudebat scribi. idcirco Brutum increpat, quòd in medio ardore ciuili bel li, breues ad se literas dedisset, quum negotia longissimas flagitarent: ut sciretur explicatius, quid ageret, quidq; esset acturus. Morosis, incognitis, amicis simulatis, breues: itidem occupatis, aut ijs quos eo scribendi genere uidebat delectari, quasi multa paucis uerbis concluderent. cuiusmodi erat D. Brutus. Noui item amici breuib; sunt epistolis initio tentandi, ut amnes

ignoti cuncta abundè. Sunt qui uel mediocres epistolae loquaces iudicent, atq; aspernentur. Sunt qui epistolium iniuriam interpretentur. Demus tamen operam, ne in alterutro modum excedamus. si necessaria omittas, omnes sunt nimis breues: si superuacanea infarcias, omnes sunt nimis longæ. Multum te accommodari conuenit ingenio illius cui scribis, et pro ratione materiae licebit in fine aut breuitatem excusare apud illum, qui longus cupit: aut prolixitatē apud eum, qui breues. illa excusatur negotijs, aut nostris, aut illius: & pudore, ne obstrepamus aut interpellemus in maximis occupatū. prolixitas excusatur rei qualitate, dulcedine cum illo colloquendi. Nihil perinde uidetur mihi alienum ab epistolis, quàm diffusa in locis communibus iactatio: nisi fortè libri sint potius de sapientiæ præceptis, aut de studijs humanitatis, uel encyclopædia. Epistolia, & codicilli, quæ paucis uerbis acutam quampiam sententiam concludunt, plurimum habent uenustatis. Quum licebat, nolulistis: nunc quum uultis, nō licet. Quod si nihil habeant insolens, superbum, fastidiosum, mitti possunt uel ad reges ipsos, ac principes, & homines quantumuis superciliosos. Hieronymus Salinas Theologus, Inacho, Medoæ, Cardinali, Episcopo Burgenfi, ardentem pietatem precatur. Lutetiae, natali Io. Baptistæ,

1533. Scio prudentiæ tuæ non esse opus consul-  
tore: memoriæ autem, propter uarietate & ma-  
gnitudinem negotiorum, nonnunquam. Itaq; ro-  
go te, memineris nationis studiosorum hominū:  
nam de uoluntate in illos tua nihil dubitamus.  
Marcus Laurinus Carolo V. Cæsari Augusto, re-  
gi Hispaniarum S. Nec abs te contendo, ut mea  
causa iustitiam uioles: quod nec tu faceres, quan-  
tumlibet rogatus. nec uelim te per ignorantiam  
iniuste agere. Itaq; libellum hunc, quem custodiæ  
iustitiæ tuæ confeci, oro attentè legas. tales erant  
Lacedæmonia epistolæ, & responsiones, quæ eti-  
am in prouerbum uenerunt. Res malè gesta est:  
qui superfuere milites, esuriunt. *ἄριστά γὰρ ἐ μὲν  
ὑπαφύπτα, καὶ ἂν οὐ.* Sunt qui in responsione repe-  
tant, ceu epistolæ illius capita, ad quā rescribunt:  
quod solet in grauib; fieri negotijs, & tamen ac-  
curatius, quum à nonnullis lectum iri responsum  
arbitrantur, non lecta epistola prouocante. Nam  
hoc sine etiam in leuioribus fecerunt quidam, ut  
ij qui suas epistolas cogitabant edere, non editis  
ad quas rescriberent: sicuti Plinius & Politianus.  
Fit hoc interdum compendij gratia, & ut lecto-  
ristam labori, tum intelligentiæ consulatur. Ad-  
de etiam, quoniam in disceptationibus nostra cau-  
sa magis ea uia adiuuatur, quum quæ ille uel elo-  
quentia conuestiuit, uel muniuit coloribus, robo-



rauit argumentis : nos omni detracto præsidio, oculis subiiciamus nuda atq; inermia, qui astutus erat oratoribus perusitatus. Ergo unaquæq; epistola uirtutem aliquam habere debet, uel in rebus, uel in dictione, qua commendetur, libenterq; & ab ijs legatur ad quos mittitur, & à posteris quoq; si ad eos perueniat. unde multe placuerunt epistolæ, refrixerunt & iacuerunt plures.

### De autoribus epistolarum.

Antiquissimæ enim epistolæ extant Platonis perpaucæ, & Demosthenis. hinc M. Tullij amissæ quidem multe, sed multe etiam in hanc usque ætatem reseruata, in quibus præter uerba & dictionem, quibus uir ille ceteros omnes scriptores, Latinos duntaxat, tanto post se interuallo relinquit, plurimū inest et ad respublicas, et ad priuatas iudicij ac prudentiæ. Senecæ epistolæ uolumina sunt de philosophia. Accommodatior ad usum Plinius Cæcilius, eorū præsertim qui de negotijs priuatis, aut rep. nō scribunt: nam huiusmodi melior Cicero. Plinius uerò succinctus, & festiuus, & facetus, et acutus, et frequens cōcinnis sententijs, doctis atque acutis ingenijs mirificè est aptus: qui scholasticas inter se mittunt epistolas et umbraticas, ut idem ipse ait, quibus oportet plus ornatus & condimenti adiungi, quando rebus non perinde nituntur. Sparsæ apud Græcos feruntur

runtur complures. Luciani dilucidæ ac faciles, Philostrati picturatiores quàm decet hoc sermone genus:utræq; inanes sunt, & leuiculos habent sensus. Synesij itidem non parum elaborate, metaphoris potissimum. Sunt nonnullæ Basilij, Gregorij, Libanij, & aliorum, breues argutæq; scholæ & hominibus ociosis congruētes magis quàm negotijs. Sed redeamus ad Latinos. Post Plinium scripserunt epistolas Christiani homines, suis temporibus non Christianorum solum, sed omnium quoque sine controuersia eruditissimi. Tertullianus durus, nempe Afer: Cyprianus non perinde, etsi eiusdem gentis. Augustinus item Afer, mollior, sed minus tersus ac comptus. Hieronymus ardens & uehemens, ut uideatur semper ad iudices dicere de causa capitali. Ambrosius lenior ac placidior, aliquot interdum locis subturbidus. Symmachus nec magnitudine rerum, nec gratia sermonis potuit conseruare famam posteriorum. Sidonius Apollinaris Aluernas, obscurus, perplexus, fauorem iudiciorum nec consecutus est, nec meretur. Longo post hos interuallo uelut stellula inter densissimas tenebras emicuit Franciscus Petrarcha, prolixus, ac plerisq; locis morosus, difficilisq; & multum trahens ex rubigine ac situ suorum temporum. Multo post sequitur, qui ætate auorū primus cœpit in Italia latinè balbutire,

Gassparinus: cuius epistolæ uel hac de causa merentur laudem, quia in seculo doctorum primæ. Huic succedunt Leonardus Aretinus, parum adhuc excultus: tum lingua tersiores, Philelpi duo, pater & filius, sententijs inanes et subfrigidi, nec compositione satis grata. Poggius, garrulus, nugator & rabula. Pius secundus Pontifex, qui & Aeneas Syluius, natura felix, infelix arte. Aegidius Calentius, & Campanus, non contemnendi: quanquam hic in ostentationem est maxima ex parte compositus. Sabellicus ubiq; copia & facilitate, & iucunditate sui similis, Pomponius Letus Romanæ puritatis adeò studiosus, ut nec Græcè quidem scire uoluerit, ne quid alienum sonaret, aut admisceret linguae illi Quiritium. ita & uerba habet electa, & dictionem satis castigatã. Io. Picus, & Ang. Politianus, magni. huius uerba facile complectaris atq; exosculeris, illius nõ possis non probare. Ille sententiarũ pondere & sanctitate dictionis excellens: hic acumine & festiuitate amabilis, nisi quòd laudis nimia cupiditate supra epistolæ limites assurgit: ludit etiam non raro, & lasciuit. rebus quoq; displicere posset seueris & eruditione præstantibus, quia multus est in materia leuissima & minutissima sui ostentator: & in eos quibus non probaretur, acerbè maledicus. Allubescunt hæc quidem adolescentibus; uelut

uelut pugnae & certamina: grauius autē & san-  
 ctis uiris insuauia sunt. et imbuuntur tenerae men-  
 tes duobus uitij humanae societati perniciosiss, ia-  
 stantia, & amarulentia linguae: quodq; est indi-  
 gnus, de rebus uilissimis, de literula, de syllabula,  
 de uocula, de intelligentia uersiculi, uel negligen-  
 di, interim etiam obsceni, & moribus damnosissimi.  
 Grauior est Hermolaus Barbarus, & disciplina-  
 rum cognitiōe sine ulla prorsum cōparatione ex-  
 cultior, sed duriusculus, & perplexus. Admiscuit  
 se his philosophaster Marsilius Ficinus, ut olorib.  
 gaudia: atq; epistolas cōposuit, ut de Platoniciis quae-  
 stionibus disputaret, dictione inuenusta & mole-  
 sta. Epistolis Frācis Pici, etsi minus tersis quā-  
 patriui, magis tamē deest genius, quā uel dictio-  
 nis elegantia, uel sententiarum pondus. Rodol-  
 phus agricola, si ipse sua emendasset, maximis  
 quoq; ueterum potuisset comparari: tanta erat  
 in illius eruditione soliditas & sanitas, atq; acrimonia  
 in iudicando. Ioannis Capnionis epistolas  
 nuper uidimus, simul & natas & extinctas: adeo  
 damnauit eas tacitus doctorum consensus, ut uix  
 potuerint paucos uitae menses impetrare. Chri-  
 stophorus Longolius nimia cura imitationis bo-  
 nam naturam corrumpit. Verba habet Cicero-  
 niana, mira religionis ne an superstitionis obser-  
 uatione: sensus est ineptior, propterea quod dicta

grándia rebus exiguis aptabat. Non enim satis illerat, uerba & phrasin Ciceronis miro studio imitari, nisi etiã totum Ciceronem exprimeret, rem illam publicam simularet, & curam imperij, quo totus orbis continebatur: priuatus ipse, & in angulũ studiosi secessus abditus. in quo tamen erat ridiculus, quàm si gigantis uestitum induisset, & uerba ac pronunciationem gigantis effingeret, ut gigas crederetur. legendus tamen, propter uerba. Superant scriptores omnes ætatis huius, & æquant eos, qui patrum atq; auorum memoria uixerũt, ingenio, eruditione, faciũdia, Erasmus Roterodamus, & Guiljelmus Budæus, uariis & diuersissimis dicendi genere, sed uterq; in suo præstans: Erasmus facilis & dilucidus, ut aliàs semper: G. Budæus nouo quodam atq; inusitato dicendi genere est delectatus, quod sit admirari quàm imitari promptius. Pauli epistolæ augustiores sunt, quàm ut illas fas sit sub nostram censuram uenire.

FINIS.

**V**icisti me tandem, humanissime P. habes, toties efflagitatam à nobis scribendarum epistolarum rationē. Sed uide interim, dum tuæ morem gero uoluntati, quantis me calumnijs ipse obiecerim. Quid tandem Critici dicent? imò quid non dicent, ubi uiderint me ausum tractare rem à multis tam diligenter ac scitè tractatam? Vis tu, inquier, Penelopes telam retexere? post tantos autores? Aut eadem dicas necesse est, aut deteriora: quorum alterum superuacaneum est, alterum etiam perniciosum. Ego uerò quanquam multa alia habeo quæ respondere possum, unum hoc tamen dico, nullius qui de hac re aliquid conscripserit, me uestigijs inhæsurum. Accipe itaq; breuissimam, maximeq; compendiariam, conficiendarum epistolarum formulam: tibiq; hoc unum persuade, nō uerbis tantum illas, sed arte etiam indigere. Vale, saluta  
amicos communes.

BREVIS-

# BREVISSIMA MAXIME QVE COMPENDIARIA

conficiendarum Epistolarum formula, per Des. Erasmus  
Roterodamum.

## Epistolæ definitio.



**E**PISTOLA VARIE A scriptoribus Latinis definitur, sed eodem penè sensu. Libanius Sophista Græcus epistolam finit hoc modo : Epistola est absentis ad absentem colloquiū. Porro colloquium sermonem familiarē interpretamur, ut intelligamus epistolam nihil ferè à communi sermone quotidianarum colloctionum differre : nimisq; errare eos, qui tragica quadam grandiloquentia in componendis epistolis utuntur, atque ibi omnes ingenij vires effundunt, atq; splendorem quærunt, copiæq; et ostentationis gloriam, ubi minimè opus est. Esse enim epistolicus stylus simplex debet, ac ueluti negligentiusculus : nam est etiam quædam negligentia diligens. Exemplo sunt Plinij Cæcilij epistolæ acutæ, elegantes, expressæ, in quibus nihil nisi domesticum, quotidianum : sed omnia tamen latina, casta, ornataq; leguntur. Cumq; sit stylus ille multa arte atq; ingenio,

nio, cultuq; subactus atq; elaboratus, illaboratus tamen penè, subitus atq; extemporarius uidetur. Obseruandum uerò illud in primis est, fugienda esse uerba accersita, antiqua, nimium affictata, repetitaq; ex Aboriginū seculis: quibus hodie pleriq; corrupti & cacozele utuntur, uerba noua atq; inusitata anxie quærentes, ut doctiores uideantur: neq; existimantes rerum gratia uerba esse inuenta, scribente ita Horatio in Arte poetica: Rem tibi Socraticæ poterunt ostendere chartæ, Verbaq; præuisam rem non inuita sequentur. Superuacaneum quidem penè fuerat, post M. T. Ciceronem, ac Fabium Quintilianum, idem toties repetere: nisi quidam hodie reperirentur uerborum aucupes, atq; anxij captatores, qui uni-  
us uerbi causa tantum epistolam condere parati sunt. cumq; uoculam unam longo labore quæsitam epistolæ inseruerint, putant se palmarum fructum reperisse: ac tunc maximè suam barbariem ac balbutiem indicant.

### De exercitatione & stylo. Cap. I.

Caput igitur illud primum sit, rem totam acutè, ingeniosè, prudenter disposuisse. Quando in tanta latine lingue opulentia uerba propria, apta, atq; ad rem ipsam significandam nata, deesse non possint. Exercitatione itaque opus est, & stylo non mediocri. Scribendum uerò quàm plurimum,



rimum, & quàm diligentissimè. quoniam stylus optimus effector est & magister dicendi, ut aptè apud Ciceronem Crassus dit. Et ut terra altius effossa generandis alendisq; seminib. fecundior est, sic profectò non à summo petitus stylus studiorum fructus effundit uberius, & fidelius continet. Primum itaque summa sollicitudine ac styli diligentia utendum. sed nec sine frequenti assiduaq; scribendi exercitatione extemporalis facultas, amplissimus certissimusq; studiorum fructus, nec solida dicendi fiducia parari potest. Stylus itaq; frequens & opulentiam nobis parit, copiamq; sermonis, & mirabilem adfert dicendi scribendiq; promptitudinem. Porro tardus primum stylus esse debet, & diligens, cum uaria multipliciq; autorum lectione. habendus est rerum ac uerborum delectus, & pondera examinanda. Neq; occurrentibus primum uerbis, ac statim sese offerentibus incautè utendum est, ut quidam faciunt, captantes prima quæq; atq; auide arripientes. Suspecta est enim facilitas illa, qua plerique imprudenter exultant & gloriantur. Quare Sallustium constat, Quintiliano referente, in scribenda historia fuisse tardissimum, et Vergilium paucissimos indies uersus componere solitum. Nunquam profectò feliciter inueniet, neq; aptè collocabit, neq; ornate scribet ac politè, qui primum & stylo, & iudicio

dictio lento usus non fuerit. Mora enim melius solidiusq; iudicium paratur, refrigeratq; inuentio-  
nis amor. Quare falluntur, qui multa stylo pri-  
mum quàm uelocissimo scribere conantur. Dili-  
gentia enim in primis opus est: quanquam mox  
& feliciter sequitur stylus, & uberior ac prom-  
ptior. Celeritatem enim dabit consuetudo, ut Fa-  
bius ait. Paulatim res sese facilius cōsident, uer-  
ba respondebunt, compositio sequetur: cuncta de-  
niq; ut in familia bene instituta, in officio erunt.  
Ceterum fugienda est eorum morosa nimis dili-  
gentia, quibus nullus est seipsos calumniandi fi-  
nis, & quibus nihil unquam satis placuit. Neque  
enim promptum est dicere, uter eorū peccet ua-  
lidius: is ne cui omnia sua placent, aut cui nihil sa-  
tisfacit. Relinquenda est infinita illa cura, & cu-  
randum ut quàm optimè scribamur, sed scriben-  
dum tamen pro facultate. Adsit ergo ipsi diligen-  
tiæ quidam modus.

## De imitatione. Cap. II.

Quoniam uerò artis pars magna imitatione  
continetur, ab autoribus lectione dignis uerbo-  
rum sumenda est copia, & uarietas figurarum,  
& componendi ratio, tum ad exemplum uirtu-  
tum omnium mens dirigenda est. Stultissimum ue-  
rò est ( ut Plinius in epistolis ait ) non optima  
quæq; sibi ad imitandum proponere.

Circa

**Circa imitationem exactissimo  
iudicio opus esse.**

Quapropter exactissimo iudicio circa hanc partem studiorum opus est. Examinanda sunt omnia, primumque uidendum est quos imitemur. Imitandi uero sine controuersia sunt, quos multorum seculorum consensus probauit. Atque in epistolis Cicero, quanquam latine eloquentiae princeps, plus naturae dicitur habere quam artis. Plinius uero plus artis ac diligentiae. uterque tamen optimus. Sed nec ij soli legendi: legendi enim sunt et alij, qui sese ad ueterum imitationem comparauerunt. Quibus Politianum iure adnumerandum censeo, propter incredibile rerum nitorem, exactamque diligentiam, qua in quibusdam epistolis est usus. Senecam uero doctis tantum legendum putant: quod quanquam eximia uir doctrina fuerit, stylo tamen usus sit sterili et circunciso, cum fecundioribus scriptoribus alenda sint adolescentum ingenia. alioqui magnas uirtutes in eo non quantum ad mores modo pertinet, sed etiam ad literas ac elocutionem, non difficile deprehendēt ij, qui in uaria lectione uersati fuerint. Nec legenda modo epistolae eorum, quos imitari uelimus: sed scripta alia, quaecunque ad phrasim prouectamque eloquentiam faciunt. Etenim sicuti non  
unius

unius generis sunt epistolæ, sic nec eiusdem generis scriptores nobis eligendi. Quare qui ex omni albo operum M. Tullij Ciceronis epistolæ tantum eligunt, aut officia, Ciceronis sese discipulos profiteri non debent. Legendus est enim totus: quippe qui uarius, sibiq; dissimilis, ut in uario dissimiliq; genere materiæ.

### De iudicio. Cap. III.

Imitationi itaq; subest iudicium. nisi enim iudicio apprehendatur, non modò nihil prodest, sed obest etiam perniciosissimè. Videndum igitur qui nobis imitandi sint, ne corruptissimos pro optimis ac probatissimis deligamus. Porro qui Ciceronem sibi ducent atq; antesignanum proposuerit, neq; eloquentiæ, neq; acuminis, neq; dispositionis poenitebit unquam. Falluntur tamen, qui existimant imitationem per se sufficere. uerum est enim illud Quintiliani: Pigri ingenij est, contentum esse ijs quæ sunt ab alijs inuenta. Quid enim, inquit ille, futurum erat temporibus illis, quæ sine exemplo fuerunt, si homines nihil nisi quod iam cognouissent, faciendum sibi aut cogitandum putassent? nempe nihil fuisset inuentum. Quare recte exclamat Horatius in imitatores: O imitatores seruum pecus, ut mihi sæpe Bilem, sæpe iocum, uestri mouere tumultus. Et profectò nemo potest eum æquare, cuius uestigijs sibi utiq; instat.

Ad stendum

stendum putat. Neceſſe eſt, eodem Fabio autore, ut ſemper ſit poſterior qui ſequitur. Et ſunt quædam in oratione maxima, quæ imitabilia nō ſunt: ingenium, inuentionis facilitas. Arte igitur opus eſt, & præceptis, deinde imitatione & iudicio, poſtremò frequenti ſtylo ac exercitatione. Cæterum oritur quæſtio, an ſcribendarum episto- larū ars aliqua dici poſſit. quidam enim naturali rati- one & quotidiano latinoq; ſermone contenti, ar- tem eſſe aliquam ſcribendi negant, & noſtram hanc rident diligentiam: exemplo magni nomi- nis profeſſorum, quorum aliquis interrogatus, quid eſſet ſchema & noema: Neſcire ſe quidem, ſed ſi opus eſſet, eſſe in ſua declamatione, reſpon- dit. alter perconſtanti, Theodoreus ne, an Apola- lodoreus eſſet: Ego, inquit, pernullarius ſum. Sed quis eſt adeò non ab eruditione modò, ſed com- muni ſenſu remotus, ut fabricandi, texendi, & è luto uafa ducendi, artem aliquam eſſe putet: ſer- monem autem, quo nihil eſt ſecundum rationem præſtantius, arte ac præceptis nihil egere? Non diſſimulandum tamen, quosdam contrà ſentire, quotidianis ſcilicet familiariffimisq; epistolis nul- lum adhibendum artificium rhetoricum eſſe, ſed conſtare illas naturali quodam ſenſu, & commu- ni oratione: fruſtraq; ad artem confugere eum, qui epistolam ad amicum de re inopinata ex tem- pore

pore scribere uoluerit, oblato scilicet argumēto, non quæsito. præsentī enim consilio utendum esse, quo nihil est in stylo magis præcipuū, quia uarie, & ad rerum momenta uertitur. Expedit enim interdum mutare ex constituto & tradito ordine aliqua, & nonnunquam decet, ut in statuis ac picturis uidemus uariari habitus, uultus, status, pro re nata. idcirco utilitas quibuscunque præceptis & magistrorum autoritatibus præstenda est: sed ita tamen, ut artis ipsius ratio et frequentior sit, & potior. Quo magis ridiculi sunt, qui omnes epistolas in salutationem, exordium, narrationem, & conclusionem partiuntur, in quibus ijs putant totam artem consistere. Neque enim ijs simul omnibus semper, sed nec frequenter admodum opus est. atque ut in orationibus pleraque mutantur causis, temporibus, necessitate, occasione: ita in epistolis maximè, quæ & uario constant argumento, & ad diuersi cuius generis, tum ordinis, tum ingenij homines scribuntur, nec uno tempore, nec loco. Prudentia itaque opus est, artis ipsius uel sociæ, uel parente. Qui enim ex uno præscripto loqui omnia uel scribere conantur, uirium paruum habere necesse est. Qui uerò nunquam præcepta sequuntur, & quò se cunque rapit impetus, sequuntur, percurruntque uelut effusis habenis, & soluti fluentes, multa licenter effunditant,

funditant, scilicet sine delectu. Quare utrique rei adhibendus est modus. Quanquam uerò confitentur illud, doctrinam detrahere aliquid stylo, ut limam rudibus, & cotes hebetibus, & uino uetustatem, uitia tamen detrahit. atque eo solo minus est, quod literæ perpolierunt, quo melius est, ut Fabius inquit. Nec audiendi illi, qui maiorem uim habere credunt ea quæ non habent artem: ut effringere quàm aperire, rumpere quàm soluere, trahere quàm ducere putant esse robustius, ut Quintilianus scribit. Videntur quidem indocti copiam habere maiorem, quod dicunt omnia, & nulla lege cohibentur: sed soluti & exleges impetum sequuntur, quum doctis elocutio sit & modus. Non ergo illa est uis, sed uiolentia: nempe eorum qui sine labore, sine ratione, sine disciplina disertos sese uideri uolunt.

### De tribus generibus causarum.

Cum ergo tria sint causarum genera, quibus orator utitur, demonstratiuum, deliberatiuum, iudiciale, ut Ciceroni et Quintiliano placet: ad hæc tria epistolarum species omnes esse reducendas, facile is intelliget, qui latentem in ueterum epistolis artem excutere aliquando tentauerit: quiq; fastidito triuiali isto scribendi ac loquendi genere, legem sequi certamq; rationem maluerit, quàm passim ac sine delectu tumultuari, quod infra latius explicabitur.

Demon-

## Demonstratiuum genus.

Demonstratiuum genus constat laude & uituperatione, quod quidem primò ad ostentationem fuit compositum, mox etiam à Romanis negotijs ciuilibus adhibitum. funebres enim orationes ex publico pendent interdum officio, atq; ex senatusconsulto sæpe magistratibus mandantur. Hominis uerò laus, ex animo & corpore, & extrà positis peti debet, ut & Aristoteli & Quintiliano placuit. Ad hoc itaq; genus referendæ sunt epistolæ, quæ uel laudant aliquem, uel uituperant, ea ratione quæ suprà posita est. Eius generis est epistola Plinij, cuius principium est: Si quando urbs nostra, &c. primò Euphratem philosophũ Plinius ab animi bonis, eximijq; uirtutibus, ut humanitate & eloquentia: deinde à bonis corporis, & à corporis proceritate, decora facie, demisso capillo, ingenti & cana barba: postremò ab externis, quanquam leuiter & obiter, ut cum cum dicit Iuliani Pompeij clarissimi iurisconsulti & consulis generum fuisse. Eius generis est epistola apud eundem: Petis ut fratris tui filia, &c. laudat enim Minutium ab honestate morum, clara patria, clarisq; parentibus: & ab ea maxime uerecundia, qua magistratus plurimos gesserat: deinde à facie liberali & ingenua, à totius corporis



pulchritudine, & quodam senatorio decore: denique ab amplis facultatibus, & maximo censu maiorum. Inueniuntur aliae & apud alios, & apud ipsum epistola simili artificio compositae, ex quibus unicuique promptum est, suae epistolae artem & rationem desumere. Totidem uero modis uituperatur quis, quibus laudatur. quare superuacaneum uidetur hoc adijcere. Ad hoc genus pertinent non modo hominum, sed urbium, uillarum, montium, & locorum descriptiones, quae plerumque & orationibus & epistolis necessario incidunt. Cuiusmodi est apud Ciceronem Siciliae descriptio. In ijs autem postremis, speciem intuemur & utilitatem: speciem in maritimis, planis, amoenis: utilitatem in salubribus, fertilibus. Addendum illud: nullum esse genus cui plus ornamenti liceat adhiberi, aut in quo indulgere sibi plus possit orator. Nam & poetice euagatur nonnunquam, & sese uelut extra praescriptos cancellos agit, uti in paenegyricis fieri uidemus. Sed epistola suus est modus. In descriptionibus huiusmodi utendum uerbis quam maxime proprijs & ornatis. Et interdum latius agendum: nec historice modo, sed poetice etiam. Poetice quidem: ut quum amoenissimam uillam describentes, eandem Musarum, Nympharumque contubernium esse dicimus: quale est Virgilianum illud in descriptione portus Carthaginiensis, cum

sis, cum inquit: Intus aquæ dulces, uiuôq; sedilia saxo, Nympharum domus. Etenim si id in oratione non negatur, cur idem in epistola non liceat, quæ & familiaris est, & plerunq; ab ociosis scribitur, non expectato etiam argumento? Etenim ut sit ars epistolis abhibenda, solutius tamen est & liberius totum hoc descriptionis genus. Orationum enim, ut inquit Fabius libro nono, quædã iuncta est atq; contexta, seu perpetua: soluta alia, qualis est in sermone & epistolis: nisi quum aliquid supra naturam suam tractat, ut de Philosophia, re publica, & similibus rebus arduis. Porro ut quisque optimè rem aliquam descripsit, ita nobis studiosè imitandus. In locorum quidem descriptionibus Liuius, interdum & Sallustius: sicuti in alijs Plinius, præsertim ubi uel regionis, uel beluæ alius cuius ac feræ, piscis, arboris, herbæ, floris, folij, radicis, formam depingit, ac ueluti penicillo deformat. Plurimū enim in hoc genere ualuit Plinius. nec satis est unum eius autoris exemplum inspicere: legenda enim omnia, quoad eius fieri potest, ac deligenda sunt optima quæq; ut non modò copiosi, sed etiam uarij ac multiplices fiamus.

### Deliberatiuum genus.

Nunc ad deliberatiuum genus transeundum, quod multas species complectitur epistolarum. Nā & suasoriæ sunt epistolæ, & dissuasoriæ, hor-

tatoria, & dehortatoria, petitoria, monitoria, amatoria, de quibus postea suo ordine dicitur. In primis uerò notandum, deliberatiuū genus, quod suasorium dici potest, utilitate ac honestate defini. quanquam cum utile dicimus, honestum etiam uolumus intelligi: quando nihil utile dici potest, quod idem honestum non sit. Quare in hoc genere spectanda maximè ea est utilitas, quæ honestati coniuncta sit, neq; suadere, persuadere, dissuadere, hortari, dehortari, petere, mouere possumus, nisi ad supradictum scopum omnes, ut ita dixerim, styli sagittas collimauerimus. Huius tamen potius generis partes sunt, honestum, utile, *Ἀυατόν*, quod nostri possibile nominant: quæ ut dura uidetur appellatio, tamen sola est, ut Quintilianus ait. Quas partes non omnes in omnem cadere quæstionem, manifestius est, quàm ut docendum sit, etsi plerique numerum augent, à quibus ponuntur ut partes, quæ species sunt partium. Nam fas, iustum, æquum, pium, mansuetū, & si qua adhuc adijcere quis eiusdem generis uellet, subijci possunt honestati, autore eodem Fabio. Iucundum uerò, quod usq; adeò etiam ad persuadendum ualet, ut in quibusdam causis de sola iucunditate sit deliberatio. Sed tum demum maximè id ualet, cum honestatis speciem præ se fert aliquam, aut potius cum honestum etiam est ac laudabile.

laudabile. nemo est enim adeò luxu solutus, ut nihil in causa suadenda sequatur præter uoluptatem. Quare ut honestum iucundo condiendū, ita iucundum honesto muniendum & adiuuandum. Sæpe etiam utilitatem despiciendam esse dicimus, ut honesta faciamus: ut Opiterginis damus consilium, ne se hostibus dedant: quanquam perituri sint, nisi fecerint. Et utilia honestis præferimus: ut cum suademus, ut bello Punico serui armentur, cum serui tamen pœna capitali à re militari arcerentur, autore Martiano Iuriconsulto. Sed tamen nec hic planè concedendum est, esse id inhonestum. Liberos enim Fabius ait natura omnes homines, & eisdem constare elementis, & fortasse etiam antiquis nobilibus ortos dici potest: & quanquam serui, homines tamen, ut Seneca inquit. Commendatitia quoque epistola à quibusdam sub deliberatiuo genere comprehenditur: nam commendantes aliquem alicui, factum nostrum probare nitimur, honestum, facile, atq; utile esse. Nam laudantes eum quem cōmendamus, honestam cōmendationem nostram ostendimus. Ac primum quidem in hoc genere utimur principio aliquo, uelut captantes beneuolentiā à modestia nostra: ut quum dicimus nos timide ad id officium descendisse, nec nisi precibus aliorum coactos, ac eorum quos commendamus. Deinde

describendo eorum studia & mores, dignos monstrantes uel amicitia & familiaritate, uel beneficio aliquo ac munere eius ad quem scribimus. laudamusq; interdum eos à generis claritate, aut à patria, sed multo efficacius ab ingenij doctrinaq; dotibus, ut à modestia, fide, diligentia, dicendi facultate, aut alia quapiam insigni eruditione. Efficacissima tamen illa ratio est commendandi, quum gratos illos & memores beneficiorum esse dicimus, quum ingratis hominibus quicquid confertur, perire quodammodo existimetur. De facultate autem necesse est ostendere, posse ab illo ad quem scribimus, hunc nostrum iuuari aut ornari: quod etiam interdum per alios fieri potest, nempe amicos eius ad quem scribimus. Huius generis exempla multa sunt apud Ciceronem & Plinium. sed una epistola Pliniana sufficere potest, cuius in secundo libro principium est: Et tu occasiones obligandi me, &c. Horatiana illa breuis ad Claudium Neronem (nam & hoc uersu fieri potest) qua illi Septimium amicum suum magnopere commendat. Vtiq; illud spectandum in primis, ne quos commendemus indignos. Nam eiusmodi commendationis serè comes est poenitentia, quod & recte in epistolis præcepit Horatius, ita scribens: Quem cui commendes, etiã atq; etiam aspice, ne mox incutiant aliena tibi peccata pudorẽ.

Monitorie

Monitoriæ quoque epistolæ & hortatoriæ, &  
 ( quando contrariorū eadē disciplina est ) dehor  
 tatoriæ, eadem propemodum ars et ratio est. Sed  
 ubiq; præsentī utendū est consilio, quod artis ma  
 ximam partem continet: atq; adeò ualet, ut præ  
 cepta omnia ab eo sumpsisse originem uideātur.  
 Petendi quoq; ratio eisdem ferè locis constat, sed  
 huic generi adhibenda est remunerationis speci  
 es aliqua. Quale illud est Virgilianum, in Aeoli  
 ad Iunonem oratione petitoria, quæ & ipsa in  
 credibili constat artificio: Sunt mihi bis septem  
 præstanti corpore nymphæ, Quarū, &c. Qua  
 re ut res tota breui pomærio circumscribatur,  
 honestum, utile, facile seu possibile, ad deliberati  
 ui generis substantiam in uniuersum pertinet.

### Iudiciale genus.

Nunc ad iudiciale ueniendum est. Iudiciale ge  
 nus, quod multiplex est & uarium, officijs potif  
 simū constat duobus, intentionis, ac depulsionis.  
 Intentionem nunc dicimus accusationem, quū cri  
 men reo intenditur: depulsionem, cum reus obie  
 ctum crimen defendit, & à sese procul amolitur.  
 Itaq; accusatoriam epistolam, obiurgatoriā seu  
 criminatorem, inuectiuam, seu uituperatiuam,  
 in hoc genere reponimus: quanquam & hoc, ut  
 sunt mixta inter setria illa genera, sub demon  
 stratiuo comprehendī possit. Excusatoriā uerò,  
 seu

seu culpæ deprecatoriam, prædictis annumeramus: in quibus omnibus, argumentis pugnacissimis ac rationibus utendum est. Adiecerunt quidam mutuam accusationem, quæ Græcis ἀντιλογία, Latinis recriminatio dici potest, cuius duo genera Fabius facit: Alterum, quo litigatio-  
nes, hoc est, idem crimen inuicem intentant, alterum, quo aliud & aliud. Difficile est autē in tanta causarum & argumentorum uarietate, huius generis in uniuersum præcepta colligere. Primum illud sine controuersia aduertendum, augere per amplificationē quæ accusamus in alio, sicuti quæ obiecta sunt elidere, aut repellere, aut minuire: quæ in re ita inardescit nonnunquam oratio, ut totos affectus effundat. Nam interdum in hoc genere optamus, abominamur, rogamus, ac sollicitudinem quandam uel accusationis nostræ, uel defensionis ostendimus. cuiusmodi sunt hæc: Vtinā nunc reuiuiscat parens tuus. & item: Dij prohibete hæc mala. Te nunc ò Iupiter optime maximeq; rogo, &c. & infinita alia: quæ quanquam orationi magis conueniūt quàm epistolæ, tamen aliquādo omnes affectus recipit. In his igitur frequenter utendum breui exordio, quo ad causam totam arte atq; astu irrepimus: ut quum uel accusantes aliquem, uel culpam deprecātes, infirmos nos esse dicimus, & impares contrā agentes, ne  
nimia

nimia elati confidentia, nimiam iusticiæ ac probi-  
 tatis nostræ fidem faciamus. cuiusmodi procerum  
 usum Messalam, autor est Fabius. Aptæ enim sunt  
 eiusmodi exordia ad fauorem emerendum: quan-  
 do natura ipsi libenter fauemus, quos laborantes  
 uidemus & anxios, nec sibi plus nimio fidentes.  
 Inde illa ueterum circa occultandam eloquenti-  
 am simulatio, & procul ab omni fastu posita,  
 simplexq; ac submissa. Vitandum etiam, ne contu-  
 meliosi, maligni, superbi, maledici in quenquam  
 hominem ordinem uel esse uideamur. cuius gene-  
 ris exemplum hoc esse potest: Non sum nescius,  
 quam difficile sit suam innocentiam tueri, aduer-  
 sum te tam receptæ autoritatis uirum: cuiusq; tan-  
 ta dicendi uis, ut nihil non persuadere possit: tam  
 fauorabili apud omnes ordines nomine, ut uel ta-  
 cens ipse, communi omnium consensu; ab eo ab-  
 solui crimine possit, quod mihi nuper abs te obie-  
 ctum iustissime in te torqueatur. Sentio quam du-  
 ras partes sustineam: quamq; difficile munus,  
 sed necessarium tamen subierim, respondendi ti-  
 bi, tam exigua, tam nulla eloquentia nostra, cui eti-  
 am si quid erat antehac uigoris, totum id excusa-  
 tionis huius anxietas ademerit. Illud notandum,  
 etatē multum in hac parte iuuari procerum: ut  
 quā iuuenes nos dicimus, aduersarios ueteranos  
 ac emeritos, qui uel solo rerum usu, quantamlibet  
 uel



uel doctrinam, uel innocentiam nostram euincere possunt. Aut contrà, cum senectam nostram, quàm quietam & placidam esse oportuerat, ab ijs turbari dicimus, qui ætatis nostræ reuerentia timidiore esse debuerant, ac uerecundiores.

FINIS.

# METHODVS CON

FICIENDARVM EPISTOLA

larum per Conradum Celtem.

Quid sit epistola.



**E**PISTOLA NVNCIA mentis, & uelut quidam est uector atq; internūcius sermonis nostri, desiderijq; & cōceptus unius ad alterum absentem, rubore aut alio casu loqui, certioremq; reddere nequeuntis significatio: uel, qua cum amicis & inimicis tacitas nostras cogitationes uoluntatemq; communicamus.

Quàm uaria epistolarum genera.

Epistolarum alia diuina, humana alia est. Et diuina quidem cœlestis, sacra, aut moralis est: Humana, grauiā, consolatoria, amatoria, uel amica exprimit.

exprimit. Graue genus seuera, ardua, difficilia, noua; & quotidie accidētia continet, puta quæ belli aut p̄cis tempore ex castris ad urbem, aut ex urbe ad exercitum, & qua simul nouæ historiæ scribuntur. Consolatorium, si amici, uel propinqui, aut chari mors, calamitas, inedia, aduersa; fortuna interuenerit, unde nobis consolandi illius offertur occasio. Amicum seu commendatitium, cum amicum quempiam familiarem, notū aut ignotum literis commendamus. Amatorium, cum dulcia, exhilarantia, & ad amorē pertinetia petulanter penē et amanter scribimus. Hortatoria, propria uel aliena promit: & propria quidem, cum res domesticas & familiares continet, ut puta prædia, agros, uinum, pecus, frumentum, seruos, & id genus plura: aliena, cum filios, affines, familiares, sodales, discipulos, aut Principes, aut quoscunq; alios ad mores, studia, immortalē gloriam, ad laudem & decus, ornamentumq; exhortamur & impellimus. Ex his igitur, aut similibus rebus, epistolas nostras constare necesse est.

### Epistola quot partes in se complectatur.

Partes epistolæ quinque sunt: Principiū, causa, narratio seu expositio, enumeratio, et character. Initium epistolæ est, per quod animus eius ad quem

quem scribimus constituitur, & preparatur ad percipiendum. Causa est, quæ animum nostrum impellit ad scribendum. Narratio, per quam aperimus quid ab alijs fieri uolumus, aut quid factum sit demonstramus. Enumeratio, conclusio est epistolæ, & eius terminus. Character est, qui continet ea quæ intra & extra epistolam sunt. De quibus iam ex ordine dicemus.

### Exordium epistolæ, siue principium, quibus sit modis constitutuendum.

Sicut citharædi pauca illa, quæ ante legitimæ certamen inchoant, emerendi fauoris gratia canunt: sic scribens epistolam, animū eius ad quem scribit conciliare curabit. id autem duobus modis fieri poterit, salutatione, et proœmio. Salutatione quidem semper, ut nostrum eiusq; nomen præponatur in capite epistolæ: ubi etiam si homo infimus ad maximum Pontificem, Regem, aut Principem scripturus sit, nostrum tamen illius homini præponemus: deinde dignitas officij, ordinis, magistratus, uirtutis nomē, tam nostro quàm suo adiungemus: ut, Cor. Celsus. P. P. Friderico III. Imperatori S. P. D. aut, Innocētio octauo, Pontifici Maximo: aut, Andreæ Pegaso, ciui liberalissimo. Cōtrā uerò agētes neq; Græcorū, neq; Latinorū,  
sed

sed barbarorum morē sequuntur: & à pueris nūper inuentum, & à sordidissimis hominibus in assentationis speciem inductum, in quem errorem ferē omnis nostræ ætatis sex currit.

Proœmio utimur in epistolis nostris, dum attentum, docilem, & beneuolum eum ad quem scribimus, facere curamus. Hoc autem initijs epistolarum perquàm necessarium est. illi enim ad quē scribimus, animum permulcemus, ut procedere ultrà possimus: & quæ scribimus, legantur et admittantur. Dociles habere poterimus, si summam rei exposuerimus: Attentos, si pollicebimur de magnis rebus & insolitis nos uerba facturōs. Beneuolentiam habebimus, si à nostra persona, uel ab aduersarijs incepimus: maximè si nostra incommoda proferemus, inopiam, solitudinem, exilium, calamitatem. Item cum officia nostra in patriā, in amicos, sine arrogantia tamen referimus: dummodo hæc omnia ad rem ipsam, de qua agitur, sint accommodata. De quibus rebus circa orationis partes à nobis dictum est.

### De causa & narratione, quæ per expositionem fit.

Et naturalissimum est, & fieri debet frequentissimè, ut preparato per ea quæ dicta sunt eius ad quem scribimus animo, res quæ exprimendæ

est scribatur. Ea autem est caussa, & eius expositio, quæ ex narratione pendet. Videndū igitur nobis hoc, & quomodo singulas epistolas scribimus exponendū. Diuinas narrabimus, si scripserimus religionem, ceremonias, Deiq; cultum, à maioribus natum & traditum fuisse, nobisq; posteris in uirtutis famam, decoris et humanitatis exemplū, & monumentum relictum, in statuis, simulacris, sepulchris, sanctissimis ædibus, ampliſſimis templis, opibus, & diuitijs, sumptibusq; magnificè extructis, uasis consecratis, & eius generis innumeris. Præterea si Deum secundum essentiā & personas describimus, statum angelorum, ordinē cælorum, loca beatorum, pœnas fontium, fidē, spem, charitatem, obsequium, mandatorum obseruationem, scientiam uirtutum, urbium salutem, humanam societatem, honestatem, prudentiam, fortitudinem, iustitiam, temperantiam, modestiam, opum & diuitiarum contemptum, castitatem, pudicitiam, humilitatem, uerecundiam, amicitiam, & huiusmodi, cum oppositorum & contrariorum uituperatione, adductis exemplis & historijs, scripserimus. Horum autem exempla in epistolis Pauli, Diui Iacobi, Ioannis, Diui Hieronymi, Platonis, Senecæ, Augustini, aliorumq; doctissimorum uirorum inueniri possunt. Circa quod cauendum summopere est, ne in barbariem cum  
nostri

noſtri ſeculi & rudis uulgi hominibus cadamus. Nihil itaque nobis legendum erit, niſi quod caſſe, limate, terſeq; ſcriptum eſt. ab illis autem imperite & negligenter ſcriptis ita cauebimus, ſicut à calamitate atque labe ingenij. Inquinata enim lectio ſordes lectori ingerit, & mentem illius ſimili coinquinat tæbe. Graue uerò genus epiſtolarum exponemus: ſi amoto urbano, ſtatum ducis, militum, rei publicæ, exercitus declaramus. Et ſi animum fidum erga rei publicæ ſalutem, amota ſeditione, eius ſuſpicionem cum ciuium incolumitate aperimus. Et iſta quæ ab aduerſarijs facta fuerint, exponimus, ſi obſidiones, ſi induciæ tractentur. At ſi ſuſpicio interuenerit, illa excuſanda eſt, ut ſi ciuis Romanus ab urbe exul cum exulum multitudine proſectus fuerit, aduerſus quem Populus Romanus Pontificem Maximum & Imperatorem legauerit, qui bellum contra eos mouerit, illi inſcio populo cum Romano Pontifice, aut Imperatore ſermonem habuerint, ita excuſatio formanda eſt: Innocentius Octauus, Pontifex Maximus, & Imperator Auguſtus, S. P. D. S. P. Q. R. Deum ſanctosq; & homines teſtor, Patres Conſcripti, qua mente, & quo animo ſemper in rem publicam fuerim, ut hac nihil antiquius & communius ſaluti & libertati ueſtræ iudicauerim,

quod uobis breui probassem, nisi fortuna proprium consilium extorsisset. nam exercitus cunctus consuetudinem suam in ciuibus cōseruandis, deq; communi pace seditione facta, retinuit: me tantæ multitudinis ciuium Romanorum, & salutis atq; incolumitatis caussam suscipere, ut uerè dicam, coegit. In qua re ego uos, Patres Conscripti, oro atque obsecro, ut priuatis offensionibus omiſſis, summæ reipub. consulatis, & ne caussam uestram exercitus nostri in ciuili diffensione sceleris loco ponatis. quod si salutis ac dignitatis rationem habueritis, melius & uobis, & reipub. consuletis. Valete, ex castris, pridie Kalendas Quintil. Conſolatorium autem exponemus, si nōs dolore eius ad quem scribimus, à scribendo deterreri ostendemus: et si ea lege nos homines natos scripserimus, ut ictibus telisq; fortunæ exposita uita nostra sit: meminerimusq; cum fati ineuitabilibus nobis luctandum non esse, quibus nemo proprio consilio resistere potest. Præterea minus recusandum esse, ut ea qua nati sumus conditione, uiuamus: ne ue tam grauitè eos casus feramus, quos nullo consilio uitare possumus. Et si cogitauerimus, quod alijs euenerit antea, nobis quoq; nouum non accidisse intelligamus. Idq; exemplo non quidē catholico, uerū gentili probabimus: ut, Fridericus Romanorū Imperator, Emanueli Paleologo, Imperatori

ratori Constantinopolitano S.P.D. Et si egomet, qui te consolari cupio, consolandus ipse sim, propterea quòd nullā rem grauius tuli quā incommodum tuum: tamen te magnopere non solū hortor, uerum etiam pro amore nostro rogo atque oro, te colligas, uirumq; præbeas. Et qua cōditione omnes homines, & quibus temporibus nati simus, cogites. Plus tibi uirtus tua dedit, quā fortuna abstulit: propterea quòd adeptus es, quòd non multi homines noui: amisisti, quæ plurimi homines nobilissimi. Ea deinde uidetur conditio impendere legum, iudiciorum, & temporū, ut optimè actum cum eo esse uideatur, qui uita superstes sit. Tu uerò & qui fortunam aduersam expertus, & liberos habeas, & nos cæterosq;, qui necessitudine & beneuolentia tecum coniuncti sumus, magnam nobiscum facultatem habiturus es, & cum tuis omnibus. His de causis debes istam molestiam quā leuissimè ferre: meus autem in te animus erit, liberosq; tuos, semper quem tu esse uis, & qui esse debet. Vale.

Amicum autem epistolarum genus, aut commendaticium, aut amatorium: urbanum etiā, uel hortatorium est. Commendaticium quidem fit, si quos commendamus, amicitia, beneuolentia, amore, affinitate, aut nobis uicinitate sunt coniuncti: aut si doctrina, ingenio, eloquentia, uirtute, nobi-



litate, dignitate, affabilitate, seu comitate præditi sunt, ut nostra commendatione digni uideantur: eos gratissimos & beneficiorum memores esse dicemus, & à prædictis laudabimus. Ingratitudinis quoq; causam refutabimus, cum nihil Deo uel hominibus iucundius, quam se gratum exhiberi: & rursus nihil turpius, quam ingratum iudicari. ueluti boues, qui in sterilibus campis iuga ferre non lunt: et licet pingue solum lasset, ipse tamen labor iuuat. Postea & cōmendationem à quo petimus, honestam, facile, possibilemq; esse, per blandimenta & spem remunerationis exponamus: ut, P. P. Con. Cel. Marco Cardinali Hostiensi Salutem plurim. Dicit: Quia non est obscura in me tua beneuolentia, eò fit, ut multi per me tibi uelint commendari. Nam cum mihi suprema familiaritas, necessitudoq; cum Francisco ciue foret, eius fratrem hominem frugi & modestum, summaq; uirtute præditum, & nobis uehementer probatum, tibi maiorem in modum commendo. Gratum mihi feceris, si is intelligat meam apud te commendationem magno usui atq; adiuuamento sibi fuisse. Vale.

Amatorium autem prosequemur, cum quodam animi affectu, blanditijs, querelis, supplicationibus miseria plenis, & lachrymis, quas etiam supra epistolam effusas emisimus. Item, si munera & dona

& dona polliciti, corporis membra cum laudis  
 eius ad quem scribimus exuperatione, nostriq; di-  
 minutione, cum aliqua uia dissimulationis descri-  
 bemus: aut si gratias habere uoluerimus, animo et  
 corpore, aut fortunæ bonis nos eas reddere osten-  
 demus: matris more, quæ plenis uberibus semper  
 plura reddat quàm recipit: nosq; non spe maio-  
 ra consequendi, sed animo aperto & hilari cum  
 perpetua beneficiorum commemoratione nequa-  
 quam immemores fore exponemus. Huius exem-  
 plum esse potest: C. C. P. P. Hasilinæ Eudemiæ  
 S. P. D. Non possum non cruciari, dum mihi in-  
 mentem uenis, dum coma illa tua, dum crines &  
 oculi castigatissimi, & benignissima facies, dul-  
 cissimum os, et labia suauissima menti se inserunt:  
 dumq; diua illa statura tua animo altius insede-  
 rit. Sed crudelis & seua nil mea uerba curas, nil  
 mei misereris, me mori permittis. nescio an for-  
 tunæ, an fato, an sorti & iniquæ meæ natiuitati  
 tribuendum sit, ut cum te non modò amem, ue-  
 rum adamem, à te uix amari queam. Iam literas  
 legis lachrymis meis illitas, iam locum uides la-  
 chrymis deletum: noli ita crudelis esse, sed asta, et  
 ad me accedas, teq; frui permittas. quid enim dul-  
 cius? quid iucundius? quàm ut uiuamus, amemus,  
 osculemur, & iocemur? nec ætas, nec munera no-  
 bis desunt, quibus gaudere ualeamus: nec ani-

mus perpetuus, qui se tibi totum dedit. Vale, & mei minimè obliuiscaris.

Hortatorium aut̃ exponemus, si ostendamus nos nil gratia nostri aut alterius, sed eius ad quem scribimus petere: idq; fiducia, beneuolentia, & necessitudine. Deinde incōmoda quæ sequi possint, si non fecerit id ad quod hortamur, aut dehortamur. Rursus, quæ si paruerit, commoda consequuturus sit, eaq; exemplis robaremus. Postremo, si cōmodum suum minus attendere uoluerit, saltem nostræ beneuolentiæ, amoris, necessitudinisq; gratia faciat. Vt si militantem in bello, et ad urbē redire cupientem, dehortari intendis, hunc modum obserues. C. C. P. P. egregio adolescēti, Nicolao Patritio, S. D. In omnibus meis epistolis, quas ad Duces uestrum mitto, legitima quædam est accessio commendationis tuæ: nec ea uulgaris, sed cum aliquo insigni iudicio meæ erga te beneuolentiæ, tu modò ineptias istas & desideria urbis deponere: & quo consilio profectus sis, id assiduitate assequere, & uirtute: exēplo Medæ reginæ, quæ licet molli, delicata, & absens à patria dum rediret, à matronis interrogata respondit, pulchrū est ob uirtutem consequendam à patria abesse. nam multi rem suā bene gesserunt procul à patria: multi uerò qui domi ætatem egerunt, propterea sunt improbi. quo in numero tu certè fuisses, nisi te extrusissemus,

trusissemus. sed plura scribemus aliàs. Et quoniã Medeam agere cœpi, illud semper memento: qui sapiens ipse sibi nequit sapere, nequicquam sapit. Cura ut ualeas.

### De enumeratione.

Terminus siue finis epistolæ tribus constare debet: persona, loco, & tempore. ut si uni scribimus, dicamus, Vale; aut, Cura ut ualeas: Vale, & me commendatum habe: Da operam ut ualeas: Vale, & me ama: Sis felix, nostriq; memor: Vale, diuq; uiuas: Vale militiæ decus, uel patriæ, uel literarum ornamentum et columen, & his similia.

Locus, ut dicatur, Datæ uel Datum Romæ. Tempus, ut dicatur, Kalendas, Nonis, aut Idibus mensis alicuius, & anni, siue diebus & septimanis. Prior autem epistolarum cõsignatio, hoc est, per Kalendas & Nonas, doctorum uirorum est, eorumq; approbata autoritate. pro quibus notabimus, uniuscuiusq; mensis diem primum Kalendas uocari, sed melius hoc ex istis patet uersibus:

Prima dies mensis prisco dat more Kalendas,  
Post numerâ Nonas, post Idus, postq; Kalendas.  
Mars, Maius nonas October sex tenet, & Iul.  
Octo tenet Idus mensis generaliter omnis.

Et quoniam omnes hi dies, qui ante Kalendas & Idus currunt, præcedunt eos dies principales tres: ideo semper præpõstero ordine, numerũ die

rum, mensium collocemus: ut, octaua Idus, hoc est, octaua die ante Idus. octauo Kalendas, hoc est, octauo die ante Kalendas. Sicq; euenit, ut Kalendarum dies semper in priore mense cōputandi sint: ea ratione & nos cogimur, pridie Kalendas, pridie Nonas dicere, quod is dies precedat Nonas & Kalendas, & non sequatur.

### De charactere.

Character est, qui intra epistolam aut extra scribitur. Intra quidem epistolam, characterem obseruamus, quum eloquutionis præcepta, quæ à nobis superius tradita sunt, sequimur, punctis orationis nostræ obseruatis: quorum sex sunt, Suspensiuus, Comma, Colon, Interrogatiuus, Parenthesis, & Periodus. Suspensiuus est simplex uirgula, quæ solet quietis gratia poni, antequam sensus alicuius clausulæ haberi possit, sic, ut, Arma. Comma duo puncta sunt, ubi clausula uidetur completa, & tamen imperfecta est, sic: ut, Arma, librosq; meos: diripuerunt milites. Colon punctus est, qui ponitur in fine clausulæ, quando sensus perfectus est, sic, ut, Arma, librosq; meos: diripuerunt milites, quanquam eos huc uenturos nunquam existimarem. Interrogatiuus uirgula est obliqua, sursum tendens puncto supposito, sic: ut, De te quid dicam? Parenthesis sententia est interposita in medium alterius sententiæ, geminis cornibus clausa, sic

sic ( ), ut, Arma, librosq; meos (sicut uidistis) milites diripuerunt. Periodus totius orationis terminus est, sic. Et hoc quidē intra epistolam tersē politeq; seruari debet. Extra autem epistolam consignamus per characterem extrinsecum: hunc seruamus, dum illi ad quem scribimus, dignitatis titulum addimus. Idq; aut in datiuo, aut accusatiuo casibus cum præpositione adscribere debemus. hos in tres ordines digessimus. Namq; tituli Romano Pontifici conuenientes, illi esse debebunt: Sanctissimum, beatissimum dominum nostrum, Pontificē Maximum, summum sacerdotem, & patrem clementissimū dicemus. Ad primos ab eo ordines: Reuerendissimum in Christo patrem & dominū sacrosanctę Romanę ecclesię Episcopū, Presbyterum, aut Diaconum, Cardinalem, Patriarchā, Archiepiscopum, uel Episcopum dicemus. Ad secundos: Reuerendum in Christo patrem & dominū, Episcopum, Abbatem monasterij, aut Apostolicę sedis protonotarium colendissimum & obseruandissimum. Ad tertios ordines: Venerabilē in Christo patrem, dominum honestum, honorandum, religiosum monachum, Canonicum, sacerdotem, uel heremitam. Ad Cæsarem, sacram maiestatem, Romanorum Imperatorem, Cæsarem Augustum, inuictissimum, gloriosissimum, felicissimum, & Cæsarem excellentissimum, serenissimumq; dicemus.

Ad

Ad primos ordines ab eo, sacram Regiam maiestatem, Regem, Ducem, Principem, Marchionem, Comitem, Christianissimum, potentissimum, illustrissimum, inclytum, felicissimum, & illustrem dicemus.

Ad secundos ordines, equites, barones, patricios, consules, senatores, prætores: nobilem, generosum, excellentem, illustrem, inclytum, præstantissimum, clarissimum, magnanimum, potentem, strenuissimum, spectabilem, insignem, magnificumq; dicemus. Ad tertios ordines, milites, præstantes, præclaros, singulares, officiosos, fortes, integerrimos, egregios, prudentes, humanissimos, discretos, industrios, rei bellicæ expertos, gloriososq; appellabimus. Ad Theologos, diuinarum literarum interpretes, sacrarum literarum, sacræ pagine, sacræ theologiæ, magistros, doctores, professores, eximios & sapientissimos dicemus. Ad primos ab eis ordines, uates, musarum alumnos, lauro insignes, hedera decoratos, Apollini sacratos, Phœbi interpretes, rerum naturæ scientes, historiæ peritos, diuinos poetas, liræ modulatores, sacro numine afflatos, grauiissimos, iucundissimos, ornatissimos, celeberrimos, eloquentissimos, facundissimos, Romanæ linguæ principes, humani eloquij ductores, disertissimos, copiosissimos dicemus. Ad secundos ordines, iurisconsultos,

tos, legum interpretes, utriusque iuris Doctores,  
 Civilis & Pontificij, egregios reipub. moderato-  
 res, et sapientissimos, prudentissimos, excellentissi-  
 mos, eximios, integerrimosq; dicemus. Ad tertios  
 ordines, medicos, medicinæ doctores, artis medicæ  
 professores, expertissimos, prudentes, philoso-  
 phos, utriusque medicinæ interpretes, naturæ &  
 causarum speculatores, sapientiæ amatores, fide-  
 les, acutissimos, subtilissimos. Musicos, argutos &  
 iucundos, humanæ uocis magistros, directores,  
 modulatores uocalissimos. Ad geometras, immensi  
 mundi, siderum, & rerum indagatores, naturæ  
 mensores. Arithmeticos & astrologos, acutos, di-  
 uinos, & occultarum rerum indagatores, sapien-  
 tes, fati interpretes, futurarum rerum conscios et  
 subtiles, dicemus. Reliquos ab illis, optimarum li-  
 terarum amatores, bonarum artium studiosissi-  
 mos, eruditos, doctos, & humani studij decus, di-  
 cemus. Ad cognatos, charissimos, dulcissimos, dile-  
 ctissimos, obseruantissimos, optimos, ueneran-  
 dos, & perpetuo amore colendos, dicemus. Ad  
 foeminas, castitatis decus, pudicitie exemplum,  
 honestatis speculum, pudicissimam, castissimam,  
 integerrimam, & honestissimam matronam  
 & dominam, dicemus.

F I N I S.

METHO



METHODVS CON  
 SCRIBENDI EPISTOLAS  
*Christophoro Hegendorphino*  
*autore.*

CHRISTOPHORVS HEGEN-  
 derphinus Laurentio Czoch,  
 discipulo suo,  
 S. D.



INTERVVM prodit opuscu-  
 lum istud de conscribendis epi-  
 stolis, & renatum, & auctum.  
 Tibi uerò, mi Laurenti, nuncu-  
 patur, ut qui à me unicè ama-  
 ris, mei quoque erga te amoris ἀγάπης habeas.  
 Tu uerò in literas & Græcas, & Latinas, ut so-  
 les, gnauiter incumbere. Nec te deterreat, quod hoc  
 seculo tam literæ, quàm literati contemptui sint.  
 Redibit, crede mihi, redibit suus honor & literis,  
 & literatis. nam omnium rerum uicissitudo est.  
 τοῖς δ' ἐρὺς ἐρω χρόνῳ τὰ τερπνὰ πινεὰ γίγνεται,  
 τὰ καὶ αὐθις φίλα, ut inquit Sophocles. Vale.

Quid sit Epistola.

Epistola est sermo absentis ad absentem.

Quor iuuenta;

Vt faceremus certiores absentes, si quid esset,  
 eos scire, aut nostra, aut ipsorum interesset.  
 autor Cicero, libro Epistolarum secundo.

### Genera Epistolarum.

Epistolæ autem sunt demonstratiuæ, aut suaso-  
 riæ, aut iudiciales.

### Demonstratiuum genus

#### Epistolæ.

Constat & laude, & uituperio, personarum,  
 factorum, rerum.

Persona lau- datur à	{	Natalibus.
		Pueritia.
		Adolescentia.
		Iuuentu.
		Seneſta.
		Morte.

Laudari & potest persona ab animi bonis,  
 id est, uirtutibus: à corporis bonis, à ualitudine,  
 dignitate, uiribus, uelocitate. deniq; ab extraneis,  
 honore, pecunia, affinitate, genere, amicitia, po-  
 tentia, patria.

Sic laudaturus Annibalem,  
 scribere potes.

Annibal natus est patre Amilcare, uiro for-  
 tissimo: & cum iam esset annorū nouem, fama est  
 cum pueriliter blandientem patri, ut duceretur  
 in Hispaniam.

in Hispaniam, quum perfecto Africo bello, exercitum eò traiecturus sacrificaret, altaribus admotum, tactis sacris, iureiurando adactum, se, quum primum posset, hostem fore populo Romano. Missus Annibal in Hispaniam, primo statim aduentu, euntem exercitum in se conuertit. Amilcrem uiuentem redditum sibi milites credebant. Ingenium eius ad res diuersissimas, parendam et imperandum, habile erat. Saguntum, Romanis foederatum, intra sex menses euertit. Alpibus patefactis, in Italiam traiecit. P. Scipionem apud Ticinum, Sempronium apud Trebiam, Flaminium apud Trasimenum superauit, &c. Denique cum nemo per omnia sit felix, à Scipione superatus, ad Antiochum regem Syriæ confugit: quo uicto, ad Prusiam Bithyniæ regem concessit. unde Romanam repetiturus, hausto, quod sub annuli gemma habebat, ueneno absumptus est.

### Exempla locorum aliorum:

Cicero lib. Epist. 4. epistola quæ incipit: Accipio excusationem, &c. Seruius tuus, uel potius noster, summa me obseruantia colit, cuius ego cum omni probitate, summaq; uirtute, tum studijs, doctrinaq; delector, &c.

Cicero libro Epistolarum nono,  
epistola, Et si contentus.

Nihil

Nihil enim, mihi crede, uirtute formosius, nihil pulchrius, nihil amabilius. Semper amaui, ut tu scis, Marcum Brutum, propter eius summum ingenium, suauissimos mores; singularem probitatem, atque constantiam, &c.

Plinius Iunior Mauricio suo S.

Petis ut fratris tui filiae prospiciam maritum, quod meritò mihi potissimum iniungis. Scis enim quantopere summum illum uirum suspexerim, dilexerimque, quibus ille adolescentiam meam exhortationibus fouerit: quibus etiam laudibus, ut laudandus uiderer, effecerit. nihil est quod à te mandari mihi aut maius, aut gratius, nihil quod honestius à me suscipi possit, quàm ut eligam iuuenem, ex quo nasci nepotes Auruleno Rustico deceat. qui quidem diu querendus fuisset, nisi paratus, & quasi prouisus esset Munitius Acilianus, qui me, ut iuuenis iuuenem (est enim iunior pauculis annis) familiarissimè diligit, reueretur ut senem. nam ita à me informari & institui cupit, ut ego à uobis solebam. Patria est ei Brixia, ex illa nostra Italia, quæ multum adhuc uerecundiae, frugalitatis, atque rusticitatis retinet ac seruat. Pater Munitius Macrinus, equestris ordinis princeps, quia nihil altius uoluit. Adlectus à diuo Vespasiano inter prætorios, honestam quietem, huic nostræ ambitioni dicam; an dignitati, con-

Cc           stantissimè

stantissimè prætulit: habet auiam maternam, Serranam Proculam, è municipio Patauio, nosti loci mores. Serrana tamen Patauinis quoq; seueritatis exemplum est. Contigit & auunculus ei P. Acilius, grauitate, prudentia, fide propè singulari. In summa, nihil erit in tota domo, quod non tibi tanquam in tua placeat. Aciliano uerò ipsi plurimum uigoris, industriæ: quiq; in maxima uerecundia quæsturam, tribunatum, præturam honestissimè percurrit, ac iam pro se tibi necessitatem ambiendi remisit. Est illi facies liberalis, multo sanguine, multo rubore suffusa. Est ingenua totius corporis pulchritudo, & quidam senatorius decor, quæ ego nequaquam arbitror negligenda. debet enim hoc castitati puellarum quasi præmium dari. Nescio an adijciam, esse patri eius amplas facultates, &c. iidem loci sunt uituperij. Nam & à natalibus obscuris, pueritia tarda, adolescentia stertente, maliciosa, iuuenta ignaua, senectæ inopi, morte ignominiosa, uituperantur persone. Exempla suppeditabit frequens lectio epistolarum & Ciceronis, & Plinij.

Genus demonstratiuum epistolæ  
ipsum facti.

In hoc facta laudamus, & uituperamus.

Loci confirmationis sunt,

Honestum

Honestum, utile, facile, pium, iustum, &c.

### Exemplum.

Multa sunt Romanorum præclara facinora, sed hoc facile clarissimum est, quod P. Decius pro salute exercitus Romani se dijs manib. ultrò deuouerit. nam quid honestius & sibi priuatim, & publicè omnib. facere potuisset? Priuatim, quod non parui animi sit mortem oppetere, uitã, quã nihil charius homines habent, tam lubens ponere. Neq; uerò id temerè fecit, sed admonitus somnio, seu potius diuino adflatu, se deuouet. Publicè uerò, quod non potest non honestum esse, quod uir bonus pro salute patriæ molitur. Age uerò, quot commoditates hoc suo factò attulerit, uide. Duces optimos quosq; seruauit, exercitum uictorem domum remisit, Troianis æternam gloriam peperit, se deniq; à mortalitate uindicauit. Pater patriæ iure suo dici potest. Quid uerò commemor, quàm difficile hoc factu fuerit? Nemo nõ hominum amat uitam: hæc si ponenda est, dolemus, quantumuis simus fortes. Vir tamen ille, cum uideret sua uita reipublicæ salutem periclitaturã, maluit rempublicam quàm se incolumem.

### Aliud.

Quod ducentos ducatos ad ludum literarium erigendum dedisti, uehementer laudandum censeo. Quid enim honestius, quàm de literis bene

mereri? quid magis pium, quàm bonorum iuuenum studia in urbe alere? Porro si Demosthenes essem, commoda facti tui, quid dicam exornare, uix enumerare possem. Principio, uide tua priuata commoda, laudaberis donec ullæ ciuitatis reliquæ superfuerint, tum (cùm nemo non morti obnoxius sit) hoc tuo beneficio te à morte asseres, ut qui semper in hominum pectoribus, in monumentis eruditorum uicturus sis. Non enim ingrati sunt literæ, immortali præconio ornant suos instauratores. Porro ecquam putas multos insigniter eruditos iuuenes uelut ex equo, quod adiunt, Troiano, è ludo isto prodituros? Et cum Plato beatas respublicas dixerit, quas aut philosophi gubernarent, aut in quibus gubernatores philosopharentur: beatissima erit respublica tua, quæ à tot eruditis uiris gubernabitur, idq; beneficio tuo, &c.

### Generis demonstratiui epistolæ.

Cuius loci sunt, honestum, utile, facile, difficile. Honestas, rerum antiquitate, miraculo rei, inuentoribus tractatur. Utilitas spargitur in multa, cum circumstantijs docemus, quibus, quando, ubi, cur res sit utilis.

### Exemplum.

Theologia

Theologia meritò omnibus literarum studijs preponitur, ut quæ antiquissima est, ut quam inueni: ò *theos*, cuius nec principium, nec finis est: quam ut mundo palàm faceret, Christum de cœlo demisit. Hic eam per prædicationem & suam, & Apostolorū, in totum orbem terrarum enunciauit. Commoda Theologiæ, conscientiæ tranquillitas, iustificatio nostri, uita æterna; unicum propugnaculum, aduersus peccatum, mortem, diabolum. Facilitas. Si enim temetipsum abneges, si de te desperes, adest spiritus ille Domini, & sine negotio te in penuaria sua perducit.

### Huc refer descriptiones,

Regionum, quæ laudantur à	{	Ducibus, Regibus, Vrbium frequentia, Celebritate, copia annonæ, Tuto transitu.
------------------------------	---	-----------------------------------------------------------------------------------------

Exemplum est, ut apud Plinium lib. 3. cap. 5. ubi Italiam sic laudibus tollit: Iam uerò tota eā uitalis ac perennis salubritatis cœli temperies est, tam fertiles campi, tam aprici colles, tam innoxij saltus, tam opaca nemora, tam munifica sylvarum genera, tot montium adflatus, tanta frugum & uitium olearumq; fertilitas, tam nobilia pecori uellera, tam opima tauris colla, tot lacus, tot amnium fontiumq; ubertas, totam eam perfun-



dens, tot maria, portus, gremiumq; terrarū com=  
mercio patens undiq; , & tanquam ad iuuandos  
mortales ipsa auida in maria procurrens, &c.

Vrbium, quæ  
laudantur à { Repub. Senatu, populi frequētia,  
bellicositate, ciuium urbanitate,  
concordia, domorum magnificen  
tia, rerum uariarum copia, non  
ita magno parabili, ab aere, à ui-  
cinia, uilla.

### Verg. 1. Aeneid's:

Vrbs antiqua fuit, Tyrij tenuere coloni, Car=  
thago, Italiam cōtrā, Tyberinaq; longe Hostia, di  
ues opum, studijsq; asperrima belli. Plinius lib. 3.  
cap. 5. Romam sic laudat: Vrbs Roma uel sola,  
quo tandem narrari debet opere, &c.

Aedificiorum, quæ  
laudantur ab { Atrio,  
Magnitudine,  
Figura,  
Cubiculis,  
Conclauibus,  
Situ,  
Prospectu,  
Vestibulo,  
Penetralibus,  
Triclinijs.

Exemplum habes apud Plinium libro Episto-  
larum secundo, epistola ad Gallum.

Homerus

Homerus libro Iliad. 7. domum Priami sic describit:

ἀλλ' ὅτι δὴ πριάμοιο δόμον πορικᾶλλι ἱκανὸν  
 ξυστῆς αἰδοῦσθαι τιτυγμένον. αὐτὰρ ἐν αὐτῷ  
 πινυτήκοντ' ἑνίσκον δάλαμοι ξυστοιο λίθοιο  
 πλεσίον ἀλλήλων διδμημένοι. ἐνθαδὶ παῖδιον  
 κοιμῶντο πριάμοιο παρὰ μνηστῆς ἀλόχοισι.  
 κηράων δ' ἐτίρωδιον ἱναττίοι ἐνδοδιον αὐλῆς  
 δώδεκ' ἑσκαρτίγιοι δάλαμοι ξυστοιο λίθοιο.

Hoc est,

Sed quum iam ad Priami domum ualde pulchram uenisset, politis parietibus fabricatam, & in ipsa quinquaginta inerant thalami de polito lapide, prope inter se constructi, ubi filij dormiebant Priami propter desponsatas uxores: filiarum uerò ex altera parte è regione inter aulam duodecim erant sublimes lecti de polito lapide, &c.

Amplitudine, cursu, colore, or-  
 tu, nimirum unde nascatur: locis,  
 Fluminum, quæ præterfluunt, quæ influunt.  
 laudantur ab Agris, nemoribus, quæ irrigant,  
 piscium genere.

Exemplum inuenies apud Plinium libro quinto, capite nono, ubi Nilum describit. Virgilius libro 2. Aeneidos: Leni fluit agmine Tybris. Ecce à cursu Tybrim laudat.

Plinius libro quinto Cap. 28. Amnis Indus in  
Cybiratarū iugis ortus, recipit sexaginta perena-  
nes fluuios, torrentes uerò amplius centum, &c.

Agrorum, qui lau- dantur ab his:	{	Quid ferant, quantum.
		Quo ritu colantur, cuius-
		modi cultores habeant.
	{	Quod arborum genus, quod uinum proferant.

Huc refer laudes amœnitatum ruris.

Horatius lib. Epistolarū. 1. epistola ad Faustum:  
Nouisti ne locum potiore m rure beato?  
Est ubi plus tepeant hyemes? &c.

Montium, qui laudantur a	{	Radicibus,
		Si quid habeant nouum,
		Quid prodigiosum, Quid memorabile.

Plinius lib. 3. cap. 8. Aetna mons nocturnis mi-  
rus incendijs.

Virgilius lib. tertio Aeneidos.

Ipse sed horribilis iuxta sonat Aetna ruinis,  
Interdumq; atram prorumpit ad aethera nubē,  
Turbine fumantem piceo, & candente fauilla,  
Attollitq; globos flammarum, & sidera lambit,  
Interdum scopulos, euulsaq; uiscera montis  
Erigit eructans. &c.

Generis deliberatiui epistolæ.

In hoc

In hoc suademus aliquid, aut dissuademus.

Cuius loci sunt:

Honestum, utile, possibile, necesse, facile, iucundum, pium, iustum, æquum, gloriosum. Porro honesti ratio in uirtutibus sita est. Proinde si honesti fontes scire uis, necesse est ut uirtutū singularum rationes teneas, quas ex 1. Officiorum libro perdisces. Ceterum de utilitate supra diximus. Necesse est, ut inquit Cicero, sine quo salui esse non possumus.

Aliqui hos locos recensent,

Laudem, gloriam, fidem, iustitiam, quæstum, emolumentum, fructus.

Hi uerò loci cum superioribus ipsa cōueniunt.

E X E M P L V M.

Suadet amicus amico, ut iuri ciuili nauet operam.

Audite te uir optime, tecum inire rationem, cui nam studiorū generi te tradas. Tu uerò si amici consilium admittis, suadeo, ut animū tuum ad iuris ciuilis scientiam adiungas. Quid enim honestius hoc studio aut dici, aut fingi potest? Hoc poteris succurrere oppresso, iudicare pupillo, defendere uiduam. Quid porro necessarium magis? Tolle ē medio ius ciuile, & omnes urbes subuerteris, omnes rerum pub. formas confuderis.

Cc 5 Non

Non opinor ignoras, quid dicat Cicero in oratione pro Cluentio: Quod hoc uinculū sit ciuitatis, hoc fundamentum libertatis. Vt enim corpora nostra sine mente, ita ciuitas sine legibus suis partibus et nervis, et sanguine, et membris uti non potest. Audi uerò quid dicat idem Orator pro Cecinna: Nihil in ciuitate, inquit, tam diligenter retinendum, quàm ius ciuile: quò sublato, nihil cuiquam exploratum esse potest, quid suum, quid alienum sit. In hoc enim incumbit ius ciuile, ut optima ciuitas constituatur, Alcinoò autore. En habes iuris ciuilis necessitatem. Iam uerò quantum adfert ijs qui eis præsunt, honoris, gratiæ, dignitatis, quis ignorat? et ut alios omittam, quantum splendoris ars hæc Mutio Scæuolæ attulit, ut cuius domus uerum oraculū ciuitatis Romanæ dicta est? Sabinus quidam, uir angustæ rei familiaris, propter iuris ciuilis studium à Tyberio Cæsare in equestrem ordinem iam grandis natu, et fere quinquaginta annorum, exceptus est. Caius Cassius Longinus sub eodem Tyberio in maximo honore habitus est, sub Claudio præfectus Syriæ creatus. Quod si quæstum quoque ambis, nulla est ars quæstuosior: id quod uersiculus ille, licet in syllaba una uulgo uitiosus, satis arguit: Dat Galenus opes, et sanctio Iustiniani. Quid quod uides nullum quantumuis mediocriter iuris peritum, rei familiaris

familiaris inopia laborare? Nec uerò est, quòd te difficultas deterreat: studium istud admodum facile est, si quis illud disciplinis alijs instructus adeat. Tu uerò quum sis linguarum callentissimus, facundia facundior, memoria uiuacissima pradiatus, quid obsecro difficultatis persensurus es? Accedit huc, quòd totum istud ius in certos, nec illos innumeros libros relatum est. quod si perdidiceris (perdisces uerò, si ingenium intenderis) tantum non alter Scæuola futurus es. Hic quoq; certum aliquem scriptorem elige: nec fac ut pleriq; faciunt, qui iam illius, iam istius autoris interpretamenta sequentes, & ipsi incerti sunt quos sequantur, & auditores multo incertiores abeunt. Deniq; est mira quædam in cognoscendo iure ciuili suauitas et delectatio. Nam (ut Ciceronis uerbis utar) si quem aliena studia delectant, plurima & in omni iure ciuili, & in Pontificum libris, & in 12 tabulis antiquitatis effigies, quòd & Romanorum prisca uetustas cognoscitur, & actionum genera quædam maiorum consuetudinē uitamq; declarant. Age igitur, quum iuris ciuilis studio nullum sit honestius, nullum magis necessarium, nullum utilius, facilius, denique iucundius, Corcobo (quod aiunt) stultior eris, si non ad hoc studium animum tuum appuleris. Vale.

Contrarij

Contrarij loci sunt, in dissua-  
dendo scilicet,

Inhonestum, inutile, difficile, non necessari-  
um, impium, periculosum, impossibile.

E X E M P L U M.

Diffuadet amicus amico, ne mer-  
caturæ studeat:

Licet amicorum mellitissime, ipsemet consilio  
uales, tamen cum te plurimū amem, non possum  
non, quid ego de tuo instituto sentiam, apud te ex  
promere. Rumor est, te mercaturæ uacare uelle:  
quod ne facias, suadeo. Principiò non potest per  
opes tuas fieri, ut copiosam mercaturā instruas.  
Mercatura autem, ut inquit Cicero, si tenuis est,  
sordida putanda est. Sordidi enim putantur, qui  
mercantur à mercatoribus quod statim uendant.  
Quid quæso proficiunt, nisi admodum mentian-  
tur? nec uerò quicquam turpius est uanitate. hæc  
ille. Porro pone ob oculos pericula, quæ tibi in-  
gruent, ubi iam huc, iam illuc, uel pedes, uel eques  
proficisceris: si quid pecuniarum in zona tecum  
gestaueris, mille insidiæ tibi tendentur: si merces  
aliquas coemeris, iam uel in mari intercident, uel  
in uia pedestri à latronibus intercipiētur. Taceo  
imbres, tonitrua, grandines, quæ tibi iam huc, iam  
illuc proficiscenti imminebunt. Omitto laborem  
emendi,

emendi,uehendi domum. has, inquam, malorum  
 Iliadas reputa, & mirum ni cane peius & angue  
 mercaturam oderis. At quæstus forsitan tibi arri  
 det. Verū heus tu, quā quæso sordidus est? quā  
 impius? Si quidem tu res minoris emis, ut pluris  
 fratri tuo uendas. En quā pius quæstus. Quid  
 uerò si aliquando cum merce una aut altera, tan  
 tum iacturæ acceperis, quantum in multis nō re  
 sarcire potes? Quid uerò ubi non semper pecu  
 nia præsentē emere poteris, & maioris emas,  
 quā reuendere unquam queas? Quid si aliquan  
 do unam rem plures alij emerint, & tua tibi do  
 mi maneant, ubi tūc manebit quæstus? Deniq; quæ  
 necessitas, si dijs placet, Diomedæa te ad mercatu  
 ram adigit? an non literas tenes? quæ unæ te quō  
 cunq; terrarum ueneris, alere poterunt? quæuis  
 enim terra alit artem. Ecquid non potius te ad  
 certum aliquod studiorum genus transfers? uel  
 medicinam, uel si in uis etiam iuris prudentiam?  
 hac sanè uia citius ad honores, quorum scio te es  
 se famelicum, ad opes quas ambis, prouehêris.  
 Proinde, si me amicum uis, aliò instituti tui uela  
 uerte.

Exemplum dissuasoriæ oratio  
 nis habes apud Cicer.

7. Philip.

Ad hos



Ad hoc genus epistolæ, refertur epistolam	{	Conciliatricem,
		Exhortatoriam,
		Dehortatoriam,
		Petitoriam,
		Commendatoriam,
	{	Consolatoriam.

Conciliatrix epistola est, qua conciliamus uel nosmetipsos alijs, uel alios alijs.

Loci sunt iidem qui suasoriæ epistolæ. dicimus honestum esse, ut iram, simultatem, odium deponant: siquidem fortium uirorum esse, seipsos uincere. Dicimus impium esse, Christianum cum Christiano dissidere, quum utrunque Christus suo sanguine coniunxerit. ipse enim est pax nostra. Ostendimus multa incommoda, quæ ex illis odijs mutuis, simultatibus, gliscant. facile uerò eos posse reconciliari docemus, si modò utrinque, quicquid ultrò citroquè molestiarum sit, animo expuerint: nos & alios bonos uiros, quod æquum sit utriusque, pronuntiatiuros.

Exhortatoriæ quoque & dehortatoriæ loci sunt, qui suasoriæ & dissuasoriæ.

~~Brasilius~~ hos locos enumerat,

Laudem	{	Rei. ut si res pia, honesta, iucunda, gloriosa, &c. sit.
		Personæ.

Spem

Spem bonorum,	Odium inimicorum,
Metum malorum,	Commiserationem,
Amorem eorum, quo	Aemulationem,
rum gratia res aliqua	Expectationem inimico
subitur.	rum.

Exemplum apud *Erasmum* offendes.

*Cicero* lib. *Epist.* 2. epistola quæ incipit, *Epistolarū, &c.* Est enim tibi grauis aduersaria constituta, & parata incredibilis quædam expectatio, quam tu una re facillimè uinces, si hoc statueris: quarum laudum gloriam adamaris, &c.

*C. Plinius Octauio suo S. D.*

Nominem te patientem, uel potius durum ac penè crudelem? qui tam insignes libros tam diu teneas? quousque & tibi, & nobis inuidebis? tibi maximam laudem, nobis uoluptatem. Sine per ora hominum ferantur, iisdemq; quibus lingua Romana spacijs peruagentur. magna etiam longa; expectatio est, quam frustrari adhuc, & differre non debes. Enotuere quidam tui uersus, & inuito te claustra refrugerunt. hos nisi retrahis in corpus, quandoque ut erroneos, aliquem, cuius dicantur, inuenient. Habe ante oculos immortalitatem, à qua asserere te hoc uno monumento potes. Nam cætera fragilia & caduca, non minus quàm ipsi homines, occidunt, desinuntq;.

Dices,

Dices, ut soles, amici mei uiderint. opto equidem  
 amicos tibi tam fideles, tam eruditos, tam labo-  
 riosos, ut tantum curæ intentionisq; suscipere &  
 possint, & uelint: sed dispice, ne sit parum proui-  
 dum sperare ex alijs, quod tibi ipse non præstes.  
 & de editione quidem interim, ut uoles. recita sal-  
 tem, quo magis libeat emittere, utq; tandem per-  
 cipias gaudium, quod ego olim pro te non teme-  
 re præsumo. Imaginor enim qui concursus, quæ  
 admiratio te, qui clamor, quod etiam silentiū ma-  
 neat: quo ego, quum dico, uel recito, non minus  
 quàm clamore delector. sit modò silentium acre,  
 & intentum, et cupidum ulteriora audiendi. hoc  
 fructu tanto, tam parato, desine studia tua infini-  
 ta ista cunctatione fraudare: quæ quum modum  
 excedit, uerendum est ne inertie & desidia, uel  
 etiam timiditatis nomen accipiat.

### Exemplum epistolæ de- hortatoriæ.

Bella uerò res est, quòd tu, ut audio, dies non  
 flesq; ebrietati deditus es. an non uides quàm tur-  
 pis res sit, quàm homine indigna? Etenim homo  
 una ratione cæteris animantibus anteit. Hæc ue-  
 rò uini iuxta cereuisiaq; ingurgatione adeò ob-  
 ruitur, ut ex homine porcus quidam Acarnanius  
 reddatur. An non uerò te ab ebrietate deterrent

tot malorum agmina, quæ Plin. lib. 14. recenset? Hinc, inquit, pallor & genæ pendulæ, oculorum ulcera, tremulæ manus, effundentes plena uasa, et furiales somni, & inquietas nocturna. hæc ille. Et quid obsecro inimici tui, qui tuam uitam adeò obseruant, dicturi sunt? Imò. quid & amicissimi tui dicent? En hic nos ab ebrietate auocare deberet, et nemo est qui eam impensius amet, colat. Quid huic credemus, qui semper ebrius est? Ebrii uerò nō rarò cum Parmenone Terentiano nihil tacere possunt, quantumuis arcanum, quantumuis bonæ fide illis creditum. Tu si sapias, uide sobrius, magis posthac, quam ebrius conspiciaris. Vale.

### Petitoria.

Petimus honesta, utilia, facilia & factu, & præstituta possibilia, necessaria.

### Exemplum.

Petit amicus sibi decem aureos  
mutuo dari.

Quod ego tibi ultro deferrem, si facultatum mearum esset, id non dubito, quin & tu mihi lubens delaturus sis, mi Petre. Opus est mihi decem aureis, quos oro ut mihi des mutuò: non dici potest, quàm illis egeam. Etenim domi ne obolus quidem amplius mihi est, & ut scis, mihi multi sunt liberi, multæ operæ, quibus uictus suppeditandus

D d

est:

est: non quærunt unde habeas, sed oportet habere. Neq; uerò tibi homini tantum non cum Cræso conferendo, difficile factu erit, decē aureos hominis & egentis, & amici usibus exponere. Tu sanè non decem, sed ducentos citra tuarum rerum dispendium, mihi utendos dare posses: sed parū abs te peto, ut minore negotio impetrem. Quot uerò mihi commoditates parua ista pecunia allaturus sis, uide: meam existimationem, ne omnino eleuetur, conseruabis: liberi, opera, uxor, ne fame pereant, caueris: me in tuo, quod aiunt, ære esse facies. Vbi uicissim, si non pecunia, at industria, consilio, literis, si quas modò calleo, tibi tuisq; consulare potero, dispeream, si non me tuum esse dixeris. Vale.

Seruius, id quod et ~~Cræsus~~ obseruauit, enarrans orationem illam Iunonis in 1. Aeneid. Aeo-  
le, &c. dicit, id quod petimus, possibile, & iustum esse debere, tum modum præstandi præscribendum, postremò remunerationem addendam.

## E X E M P L V M.

Optime uir, est quod à te petam. Sycophanta quem nosti, mihi multis modis molestus est. quare te peto, quo illum compescas, ut molestiarum finē faciat. Ecquid uerò iustius, quàm amicum amico aduersus Sycophantæ oblatrationes patrocinari? Vt uerò patrocineris, nihil facilius. noui enim auctoritatem

toritatem tuam: admone saltem hominem istum, quem nosti, ut lingue imperet, ut maledicendi finem faciat. admonebis uerò ipsum, cum te, ut solet, salutandi gratia accesserit: ego uicissim sedulò quæ uoles, faciam.

In epistola petitoria sæpe demonstratiuæ locis utimur.

C. Plinius Maximo Suo

S. D.

**Q**Uod ipse amicis tuis obtulissem, si mihi eadem materia suppeteret, id nunc iure uideor à te meis petiturus. Arrianus Maturius Altinatiū est princeps. cum dico princeps, non de facultatibus loquor, quæ illi largæ supersunt, sed de castitate, iustitia, grauitate, prudentia. Huius ego cōsilio in negotijs, iudicio in studijs utor. nam plurimum fide, plurimum ueritate, plurimū intelligentia præstat: amat me, (nihil possum dicere ardentius) ut tu: caret ambitu, ideo se in equestri gradu tenuit, cū facile posset ascendere altissimū. mihi tamen ornandus, extollendusq; est. Itaq; magni existimo, dignitati eius aliquid astruere inopiantis, nescientis, imò etiā fortasse nolentis. astruere autem quod sit splendidū, nec molestum, cuius generis, quæ prima occasio tibi, in eum conferas rogo. Habebis me, habebis ipsum gratissimum

Dd 2 debi-

debitorem. quamuis enim ista non appetat, tam grate tamen accipit, quàm si concupiscat.

### Commendatoria.

Qua uel aliquam personam, uel alicuius ingenium commendamus.

Exempla plurima offendes in libro Epistolarum Ciceronis decimo.

Consolatoria epistola est, qua aliquem consolamur.

### EXEMPLVM.

Seruius Sulpitius M. Tullio Cic. S.

**P**osteaquam mihi renunciatum est de obitu Tullie filie tue, sanè quàm pro eo ac debui, grauiter molesteq; tuli, communemq; eam calamitatē existimaui: qui, si istic affuissem, neq; tibi defuissem, coramq; meum dolorem tibi declarassem. Et si genus hoc consolationis minimū atq; acerbum est, propterea quia per quos ea fieri debent propinquos, ac familiareis, ipsi pari molestia afficiuntur: neq; sine lachrymis multis id conari queunt, ut magis ipsi uideantur aliorum consolatione indigere, quàm alijs posse suum officiū præstare: tamen quæ in præsentia in mentem uenerunt, decreui breui ad te perscribere: non quòd ea te fugere existimē, sed quòd forsitan dolore impeditus

peditus minus ea perspicias. Quid est, quod tantopere te commoveat tuus dolor intestinus? cogita quemadmodum adhuc fortuna nobiscum egerit: ea nobis erepta esse, quæ hominibus non minus quàm liberi chara esse debent, patriam, honestatem, dignitatē, honores omnes: hoc uno incommodo addito, quid ad dolorē adiungi potuit? aut qui non in illis rebus exercitatus animus callere iam debet, atq; omnia minoris aestimare? an illius uicem (credo) doles, quoties in eam cogitationem necesse est & tu ueneris, & nos sæpe incidimus, hisce temporibus non pessimè cum ijs esse actum, quibus sine dolore licitum est mortem cum uita commutare? Quid autem fuit, quod illā hoc tempore ad uiuendum magnopere inuitare posset? quæ res, quæ spes, quod animi solatiū? ut cum aliquo adolescente primario coniuncta, ætatem ageret? Licitū est tibi, credo, pro tua dignitate ex hac iuuentute generū deligere, cuius fidei liberos tuos te tutò cōmittere putares: an ut ea liberos ex sese pāreret, quos cū florentis uideret, lætaretur, qui rem à parente traditā per se tenere possent, honores ordinatim in repub. petaturi essent? in amicorum negotijs libertate sua uterentur? Quid horū fuit, quod non prius, quàm datum, ademptum sit? At uerò malum est liberos amittere: malum, nisi hoc peius sit, hæc sufferre et perpeti. Quæ res mi-



hi non mediocrem consolationem attulit, uolo tibi cōmemorare, si fortè eadē res tibi dōlorem minuere posset. Ex Asia rediens, cum ab Aegina Megaram uersus nauigare, cœpi regiones circū circa prospicere. post me erat Aegina, antè Megara, dextra Pyraeus, sinistra Corinthus, quæ oppida quodam tempore florentissima fuerunt, nunc prostrata, & diruta ante oculos iacent. Cœpi ego met mecum sic cogitare, Hem nos hōmunculi indignamur, si quis nostrum interijt, aut occisus est, quorum uita breuior esse debet, cum uno loco tot oppidorum cadauera proiecta iacent. Vis ne tute Serui cohibere, & meminisse hominem esse natū? Crede mihi, cogitatione ea non mediocriter sum confirmatus. Hoc idē si tibi uidetur, fac ante oculos tibi proponas, modò uno tempore tot uiri clarissimi interierunt, de imperio præterea tanta diminutio facta est, omnes prouinciæ conquassatae sunt: in unius mulierculæ animula si iactura facta est, tantopere commoueris? quæ si hoc tempore non suum diem obiisset, paucis post annis tamē ei moriendum fuit, quoniam homo nata fuerat. Etiā tu ab hisce rebus animum ad cogitationē tuā auoca, atq; ea potius reminiscere, quæ digna tua persona sunt: illam, quādiu ei opus fuerat uixisse, unā cum repub. fuisse, te patrem suum, prætorem, consulem, augurem uidisse: adolescentibus primarijs nuptam

nuptam fuisse, omnibus bonis propè perfectam  
 esse, cū respub. occideret uita excessisse. Quid est  
 quod tu, aut illa, cum fortuna hoc nomine queri  
 possis? Deniq; noli te obliuisci Ciceronem esse, &  
 eum qui alijs consueueris præcipere, & dare con-  
 silium: neq; imitare malos medicos, qui in alienis  
 morbis profitentur se tenere medicinæ scientiā,  
 ipsi se curare non possunt: sed potius, quæ alijs tu-  
 te præcipere soles, ea tute tibi subijce, atque apud  
 animum propone. Nullus dolor est, quē non lon-  
 ginitas temporis minuat, atq; molliat. hoc te ex-  
 pectare tempus tibi turpe est, ac non ei rei sapien-  
 tia tuapte occurrere. Quod si quis etiam inferis  
 sensus est, qui illius in te amor fuit, pietasq; in om-  
 neis suos, hoc certē illa te facere non uult. Da hoc  
 illi mortuæ, da cæteris amicis ac familiaribus, qui  
 tuo dolore mœrent: da patriæ, ut si qua in re opus  
 sit, opera et consilio tuo uti possit. Deniq; quoniā  
 in eam fortunam deuenimus, ut etiam huic rei no-  
 bis seruiendum sit, noli committere, ut quisquā te  
 putet non tam filiam, quā reipub. tempora &  
 aliorum uictoriam lugere. Plura me ad te de hac  
 re scribere pudet, ne uidear prudentiæ tuæ diffi-  
 dere. Quare si hoc unum proposuero, finem fa-  
 ciam scribendi. Vidimus aliquoties secundam pul-  
 cherrimē te ferre fortunā, magnamq; ex ea re te  
 laudē adipisci: fac aliquando intelligamus, aduer-

sam quoque te æquè ferre posse : neque id maius, quàm debeat, tibi onus uideri, ne ex omnibus uirtutibus hæc una tibi uideatur deesse. Quod ad me attinet, cum te tranquillo animo esse cognoro, de ijs rebus quæ hic geruntur, quemadmodumq; se prouincia habeat, certiore faciam.

### De genere epistolæ Iudicialis.

Hæc constat intentione, id est, accusatione, cū scilicet alicui crimen obijcitur: & defensione, cum quis crimen obiectum defendit et deprecatur. Hic multum refert, callere rationes amplificandi crimen, quod alicui obijcitur: refert, confutandi rationem habere cognitam.

Amplificatur res à circum- stantijs,	{	Verbis, sententijs, figuris,	
		Loco,	
		Tempore,	Vide Fabium lib. 8.
		Persona,	Cic. in Partitionib.
		Modo,	
		Frequentia.	

### Ratio confutandi.

Aut totum est negandum, quod obiectum est, & fictum & falsum esse docendum: aut redarguenda ea, quæ pro uerisimilibus dicta sunt. Primò dubia esse posita pro certis, item impossibilia esse, repugnantia esse, absurda dictu esse, inuidia magis quàm iudicio effusa, &c.

EXEM

## E X E M P L A.

**Accusatur amicus stupri.**

An'ne uerò Iupiter tibi mentem abstulit omnem? Ecquæ te intemperies agit, quòd Chremetis nostri filix uitium offers? An uerò illud leue crimen est? an uerò tolerandum, quòd in domo optimè de te meriti, ipso die natalis Christi, puellam istam famæ antehac semper integræ, stupras: nec satis est, quod tu in puella tui dissimilis es, nisi etiã sororibus alijs uidentibus, & supra modum queritantibus, tuam expleas libidinem. Quid de te futurum sit, nescio, nisi quòd audio exemplum in te futurum maximum. Bene Vale.

## E X E M P L V M C O N F U T A N D I.

**Confutat quidam suspicionem uulnerati à se uicini.**

Ioannes fuit hodie apud me, indicans uicinum Phaniam graue uulnus accepisse: de nullo uerò suspicionem coortã, nisi de me. Ego uerò ausim deire rare per deos omnes, me esse extra noxam. nam quòd isti dicunt me heri gladio accinctũ, ædes uicini præterijse: nõ arguit, me propterea eũ uulnerasse, cũ multi alij præterierint, nõ minus armati quàm ego, cur nõ in eos quoq; recidit suspicio? Accedit huc, quòd ego heri circiter horã undecimã à meridie domum Phaniæ præterij, & posthac ne

semel quidem in publicū progressus sum. qui' nam igitur fieri potest, ut ego illum uulnerarim? cum constet eum uesperī hora nona uulneratum? Age uerò qui' nam congruit, uulneratum illum à me, quem semper parentis in loco habuerim? testabitur ipse, si mihi nō adhibetur fides. Non me fugit, qui' nam isti sint, qui me hoc nomine traducant. sunt certē mei inimicissimi, qui nihil prius malūt, quàm me extinctum. Ex his igitur colliges, quàm falsissimè traducar, &c.

Ad hoc epistole genus refer	{	Querelam,	{	quæ ut nominibus uariant, ita tractandi ratione ab argumentis epistolæ iudicialis non multum discrepant.
		Expostulationē,		
		Expurgationē,		
		Exprobrationē,		
		Inuectiuam:		

Exempla in autoribus obserua.

### De exordijs epistolarum.

Exordia ducuntur à rebus ipsis de quib. scribimus.

#### E X E M P L V M.

Miram sanè rem, & tibi, ut opinor, auditu iucundissimam, non potui nō ad te perscribere: cum sciam te rerum nouarū percupidum esse. en rem, ut nouā, ita miram. Mira auditu nuper ad te perscripsi, sed audi θαυμαστότερον.

Exordia ducuntur à persona nostra.

#### E X E M.

## E X E M P L A.

Meum erga te animum multis sæpe nominibus tibi cognitum esse, non dubito: scis, opinor, quàm patrem tuum multis rebus sæpe ornari, non te latet quàm toti familiæ tuæ semper prodesse studuerim, &c.

## Aliud.

Si unquam aliud de te benemeritus sum, me antè benemeritum esse, negare non potes, fac te quoq; &c.

## Aliud.

Horreo, ut me Christus amet, dicere, quàm infeliciter cesserit mihi mea profectio. O quam nō ibi calamitatem uidi? O quam non inopiam expertus sum?

## Aliud.

Quamuis alij multi hic sunt, quos mihi adfuturos spero, tu tamen in primis ades, omnium mearum necessitatum prora & puppis, quod aiunt.

Exordia ducuntur ab ijs ad quos scribimus, item ab illis de quibus scribimus. Et his exordij generib. in epistola cōmendatoria autores uti solēt.

C. Plinius libro Epistolarum 2.

C. Pli. Prisco suo.

**E**T tu occasiones obligandi me auidissimè amplecteris, & ego nemini libentius debeo.

Drabua

Duabus ergo de causis à te potissimū petere constitui, quod impetratū maximè cupio. Regis exercitum amplissimum, hinc tibi beneficiorum larga materia: longū præterea tempus, quo amicos tuos exornare potuisti. conuertere ad nostros: nec hos multos. malles tu quidem multos, sed meæ uerecundiæ sufficit unus, aut alter, ac potius unus. is erit Voconius Ro. pater ei in equestri gradu clarus, clarior uitricus, imò pater alius. nam huic quoq; nomini pietate successit. Mater è primis citioris Hispaniæ. Scis quod iudicium prouinciæ illius, quanta sit grauitas. flamē proximè fuit. hūc ego cum simul studeremus, arctè familiariterq; dilexi. ille meus in urbe, ille in secessu, contubernalis: cum hoc seria, cū hoc iocos miscui. quid enim illo aut fidelius amico? aut sodale iucundius? mira in sermone, mira etiam in ore ipso uultuq; suauitas. ad hæc ingenium excelsum, subtile, dulce, facile, eruditum in causis agendis. Epistolas quidem scribit, ut Musas ipsas latinè loqui credas. amatur à me plurimum, nec tamen uincitur. Equidem iuuenis iuueni quantum potui per ætatem auidiſsimè contuli, & nuper ab optimo Principe trium liberorum ius impetraui. quod quanquam parcè & cū defectu daret mihi, tamen tanquā liceret indulſit. hæc beneficia mea tueri nullo modo melius, quàm ut augeam, possum: præsertim cum ipse illa tam  
gratè

gratè interpretetur, ut dū priora accepit, posteriora mereatur. Habes qualis, quā probatus, charusq; sit nobis: quē rogo pro ingenio, pro fortuna tua exornes: in primis ama hominem. nam licet tribuas ei quantum amplissimum potes, nihil tamen amplius potes amicitia tua, cuius esse eum usq; ad intimam familiaritatem capacem, quō magis scires, breuiter tibi studia, mores, omnē deniq; uitam eius expressi. Extenderem preces, nisi et tu rogari diu nolles, & ego tota hac epistola fecissem. rogat enim, & quidem efficacissimè, qui reddit causas rogandi. Vale.

Exempla plurima sunt lib. 13. Epistolarum Ciceronis.

Exordia ducuntur ab officio. sic Cicero lib. primo Epistolarum: Ego omni officio, &c.

Ab aduersariorū persona, si eos in odium, inuidiam, contemtionem adducimus. Hoc exordij genere in Epistola iudiciali uti licebit.

A tempore: ut, Ecquod unquā de te bene merendi tempus oblatum est commodius? Semper occasionem te mihi arctiore amicitiae fœdere astringendi quæsiui, en iam reperi.

A moribus: ut, Mos est, ut in his diebus natalicij amicus cū amico xenijs certet, &c. Mos est apud Lipsenses, ut in diebus Bacchanalibus alius alium ad prandium, coenam inuitet, &c.

Exordia



Exordia sumuntur à sententijs. ut, Rectè dixit Comicus: Quot capita, tot sensus.

A uotis: O quàm uellem mihi dari uberrimā de te benemerendi ansam. Si quid uotis proficere tur, optarē ut iam Croesus alter esses, ut qui tantos sumptus quotidie ferre cogeris.

A comparatione: Si unquam aliàs, hoc certe tempore Deus Op. Max. comprecandus est, ut tandē orbis funestis illis disidijs defungatur, alioqui uereor ne prorsus collabatur.

### Salutandi formulæ.

Paulus sic salutat: Gratia uobis & pax à Deo patre, & Domino Iesu Christo.

Cicero sic salutat: M. Tul. Cicero, Publio Lentulo S. D. Plin. Iunior addit, Suo. Alias formulas ex Erasmo pete.

### De superscriptione Epithetorum.

Principum epitheta ferè sunt  
huiusmodi:

{ Cesar Auguste. Rex inuictissime.  
Fortissime Imperator.  
Dux illustrissime.  
Clementissime princeps.  
Vir generosissime, præpotens,  
ornatissime, clariss. splendidissime.

Opt.

Opt. Max. quod à Ioue sumptum quidam in  
Christum transferunt, in quem uerius competit  
quàm in Iouem?

Magistratum epitheta sunt hæc:

Consul uigilantissime.

Senator splendidissime.

Censor grauiissime.

Aedilis magnificentissime.

Iudex incorruptissime.

Prætor integerrime.

Theologos, graues, synceros, absolu-  
tos, sacros ac diuinos.

Rhetores, disertissimos, suauiloquen-  
tes, facundissimos.

Ex his qui literas pro  
fitetur, ap-  
pellare po-  
teris,

Poetas, sacros, diuinos, claros, nobi-  
les, inclytos.  
Iurisperitos, iuris utriusq; cōsultiissi-  
mos, prudentissimos legum, iuris  
utriusq; iuxta doctos.

Dialecticos, acutos, argutos, inui-  
ctos. (mios.

Medicos, peritissimos, fidos, exi-

Mixte doctos, undequaq; doctissi-  
mos.

Cognatorū & affiniū epitheta ferè sunt hæc,  
Pater optime, mater indulgentissima, frater cha-  
rissime, patrue obseruande, uxor suauiss. nepos  
mellitissime.

INCUN=

Iucundissime { Gener,  
Affinis,  
Sodalis,  
Commilito.

Ex reliquorum genere, qui nulla certa nota sunt insignes, diuites, et autoritate præstantes viros appellabimus, optimates viros, summates, primarios, nobiles, graues, grauissimos, ornatos uirtute, aut eruditione præcellentes, obseruandos, honorandos, colendos, absolutos, eximios, egregios, prudentes, suspiciendos, spectatos, perspicaces, circumspectos.

Matronas { Primarias, optimas,  
nobiles, { integerrimas probas,  
pudicas.

Puellas { Bellas, amabiles, appellabimus,  
lepidas { optime moratas,  
pudicas, mellitas,  
iucundas.

Item adolescentes { Probos, modestos,  
ingeniosos, { optimæ spei, uocare licet,  
generosæ indolis,

Milites fortissimos, exercitatissimos.

Opifices { Industrios, solertes,  
peritos, exquisitos,  
accuratos.

F I N I S.

QVI MAGISTRI, QVIQVE  
scriptores deligendi. Ex lib. 1. cap. 5. Iacobi Lod.

Strebai De uerborum electione &  
collocatione.

**N**VNC quem potissimum doctorem &  
dicendi magistrum sequatur homo stu-  
diosus elocutionis, ut quò maxime uelit, eò bre-  
ui compendio uiarum perueniat, si placet, ex-  
plicemus. Non erit alienum ab instituto, quærere  
ducem, sine quo ad propositum finem rectà ueni-  
re non possit. Non agam de uirtute præceptoris,  
quæ in primis est à discipulis expetenda, propte-  
rea quod pueri ut eius artes, sic & mores, & ma-  
los quàm bonos sæpius, imitantur. Nihil dicam de  
cognitione & scientia rerum maximarum, quam  
si non habet, docet alios indoctus, & quod dementis  
est, uerba sine re profundit. Quàm seueram de-  
beat habere disciplinam, quàm sanctā, quàm uiri-  
lem, quàm assiduam, non est hic disputandi locus.  
Hoc ad rem pertinet, quo sit ingenio, quaq; natu-  
ra præditus. Nam quemadmodum poetæ, sic (mea  
sententia) quodammodo nascuntur oratores. Nec  
enim poetæ, si naturæ parentis igniculi desint, ala-  
ta & ardua excogitare, delectū uerborū habere,  
numeros aptare queant: nec oratores aduersante  
Genio mira quædam inuenire, propriè, copiose,  
uenustè, floridè differere possint. Est in oratione,

Et sicut

sicut in uersu, numerus, et obscura modulatio, quæ teretes & rotundæ sentiunt aures. Quædam uerba sic amica sunt, & penè germana, ut inter se cōcordia summa copulentur. Quædam (ut ita dicā) inimica atque dissona: quæ si coniunxeris, perpetuò rixabuntur, & asperè ferient illam sentiendi facultatē. Quis hac de re iudicabit? Auris. An omnis? Haudquaquam uerò. Quæ sic, & quæ non? Sensus ille, sicut omnia, adiuuatur arte & exercitatione. Fateor, alioquin ista non traderē: sed nisi uis illa naturalis, acuta, sagax, acris, habilisq; sit, nisi sonorum differentias et modorum sponte sua dijudicet, nisi in ambitu, & partibus illius, temperata, curta, redundātia, in uerbis aut singulis aut compositis lenia, aspera, mollia, dura sentiat: ars & usus, res due maximæ, nō efficient ut instructa uenustaq; sit oratio. Noui plurimos studio et amore literarum eximio, qui cognitis atq; perspectis rhetoricæ præceptis, summa cum diligentia multa scripserūt, nec secus ac poetæ solent, in collocanda dictione, et quærenda uenustate diu multumq; laborarunt: sed enim conatus infœlices fuerunt, et male propitiæ Musæ. Non suberat uera uis et indoles, non fluebat illa uena atq; natiua fœcunditas, nec sensum natura duriores mouebat aspera sonorum concursio. Itaq; succumbebat ars & animus silente consilio naturæ, nec ullum percipiebat

bat dignum suo labore fructum. Sic erat, ut colendi peritus agricola, qui sterile solum omni arte et industria subigit, eoq; coniicit semē. hunc fortē nascetur aliquid, quod tandē metat: sed raræ & graciles aristæ fallunt hominem boumq; sudores. Nō omnis fert omnia tellus, inquit Poeta. Nec ars sola potest, quod ipsa cōcurrente natura. Quid? quōd sub uno eodemq; præceptore uideas pueros eadē informari disciplina, & intendi pari diligentia, qui tamen in oratione exædificanda nō sunt inter se pares? Quid est causæ? Quid? Illorum paria nō sunt ingenia. Quum sit una rhetorica, totidē ferē sunt genera dicendi, quot oratores: nec unquam duo per omnia consimiles reperti. Hanc formarū uarietatem non aliter in ordine, quā in hominū ore natura fecit. Quōd si quis aliō quā quō natus est tendit, Gigantum more naturæ deoq; repugnabit, & suæ stultitiæ tandem precium feret. Labor improbus res arduas expugnat, sed funditus euellere naturæ fundamenta non potest. Verum est illud Horatianum:

Naturam expellas furca, tamen usq; recurret.  
Sint igitur eloquēdi magistro celeres animi motus, & insita prudentia. Insit ubertas, & quædam musica uis ingenij: et innatus uenustatis amor alluciat animum eius ad uerborū suauitatē: numerosæ constructionis ordinem persequatur. Sic expetat

Et 2 ornandæ

ornandæ dictionis artem, ut tamen à naturali & illaborato fluxu longè ne recedat. Nam tanto deterior erit, quanto longius à natura ducetur oratio. Nō excidit mihi, quod autore Quintiliano dixeram, elocutionem omnem arte consistere. Natura sine arte in inueniendo & collocando multum sanè potest, in eloquēdo nihil omnino. sed ars sine natura in his omnibus debilis est. Cui natura modulationis huius indidit amorē, uersatus sit in optimis tum proprietatis, tum collocationis autoribus: teneat quæ de singulis uerbis, de compositis, de coagmentatione, de cōcinnitate, de numero, de compositione Cicero præcepit: horū omniū uim rationesq; notas habeat: ne quid ignoret, quod Quintilianus de natura uerborum simplicium, de ornatu, de cōpositione scripsit. Ab his enim duobus uiris penè res omnis est absoluta, ut hic Græcis auctoribus nihil egeamus. Nec opus erat his præceptionibus nostris, nisi agere pingui Minerua, & rem obscuram exemplis illustrare uoluissēmus. Et quoniam aures hic plurimū possunt, erudierit sensum primū in carminibus poetarū, Terentij & Virgilij maxime: altero nemo Latinorum purior uenustiorq;, altero nemo compositior. deinde in oratione non minus propria & latina, quàm instructa atq; modulata, qualis est Cæsaris atq; Ciceronis. Est in Cæsare summa proprietas, cōpositio  
tenuis

tenuis quidē, sed perquā suauis: in Cicerone; cū  
proprietate omne eloquendi genus, omnisq; figu-  
ra dicendi. Hos quatuor, si non ad omnē & inuen-  
tionem et elocutionē, tamen ad id quod uolumus,  
satis esse ducimus. Quanquā non repudiandus est  
educator, qui uarias, si modò sanas, dapes appo-  
nit: non tamen maiorem quærimus uerborum pu-  
ritatem, neq; flagitamus delectum exquisitiorem,  
neq; extruētiorem petimus collocationem. Horū  
scripta cantitauerit magister, & crebra pronun-  
ciatione quodammodo limauerit suas aureis. Hæc  
proponat pueris ediscenda, hæc clara uoce ac uiri-  
li prælegat, interpretetur, quid uirtutis habeant  
sedulò demonstret. Quod si facere nō possit, eum  
satis idoneum non habebō: nec diu uirtus aut uitiiū  
latebit. Animaduertentem difficile non est iudica-  
re (si modò propius inspicitur) qui ualeat ingenio  
professor, qui phrasin redoleat elegantē, qui ser-  
monem habeat purum, dispositum, & ornatum,  
qui uitet illud opimum et adipale dictionis genus,  
in quo ridentur Asiani: qui nec hæsitet turpiter,  
nec intersistat, nec languescat, nec mutila iactet,  
nec cōcise, improprie, barbarē loquatur. Est una  
de summis eius uirtutibus, sermo expeditus, uenu-  
stus, et incorruptus. assidue cadit in aurem pueri,  
sensumq; dulci uoluptate demulcet. Hinc fit, ut nō  
modò libentius audiat eloquentem, sed etiā ut sic



castiget & informet aures, ut horridam & incul-  
tam perferre linguam postea non possit. Nolo ho-  
minem dissolutum, qui subinde pueritiæ uerba fa-  
ciens, propria impropria, pura impura, latina gal-  
lica, grandia parua, composita incomposita cōmi-  
sceat. Volo uirum qui excitet animum, atq; ratio-  
ne moderetur: ut quæ cogitauerit, uerbis lectis, &  
subita facultate digestis exprimat. Animi celeri-  
tas admirabilis, si curam adhibebit ac diligentia,  
in multa se munera partietur, & optima inueni-  
et, & inuenta disponet, et eodem propè tempore  
collocata uestiet honore uerborum. Volo qui ra-  
tionem mentis urgeat: cui sit studium & eximius  
ardor literarum: qui artium liberalium maiestatē  
ueritus, non omnia ad quæstum et auaritiā, more  
multorum, sed ad bene dicendi laudem, et ad ueræ  
gloriæ fructum referat. qui pertulerit illum scri-  
bendi laborem: quem si non hauserit pueritiæ for-  
mator, quī de scriptis alienis rectum iudiciū feret?  
Quis omnium de uersu uerè iudicare potest? Poe-  
ta. Quis autem de oratione? Orator. Quis est aut  
orator, aut poeta, aut saltem finitimus illis? Qui  
carmina permulta diligenter cōdidit, multas epi-  
stolas & orationes arte confecit. Exercitatus ille  
præceptor, & styli minime rudis, facili negotio  
scripta discentis emendabit, improba & ociosa  
expunget, proba et grauia ponet, pro insuauibus  
dulcia.

dulcia, pro fortuitis lecta, pro confusis composita  
promptè suggeret. Si quid alumnus inemendatū  
aut durum locutus erit, expeditè corrigit, et mol  
liet immutato genere loquendi: cuius limam soli  
citè metuens discipulus, uigilabit, & intendet ani  
mū, ne quid proferat nimis squalidum & impoli  
tum. qui haud dubiè securius esset, si artificem im  
peritū scriptis æquaret, aut uinceret. Meus hic di  
scipline princeps pauca, sed præclara dicat. Com  
moretur in locis difficilioribus: ne quantum, sed  
quàm bene serat, curet. Commissa auditoris fidei,  
repetat assidue: materiā scribendi sententiosam,  
rectoq; quasi filo ductam, et primis adumbratam  
lineis proponat, propositā die statuto exigat, ne  
cessatores efficiantur, quorum periculo inutiles  
transmittuntur horæ. Omnia uitia ne uellicet, sed  
tantum notabilia: quoniam scriptor tam sæpe re  
prehensus, animum despondet, et infaustū execra  
tur laborem. Ista nequaquā scribo professoribus  
artium humanarum, quos docere iam, non doceri  
par est: sed prouectis ultra prima rudimenta, qui  
uel Romanæ linguæ magistris doctoribus ope  
ram dare, uel alios eandem linguam do  
cere uolunt.

FINIS.

BASILEAE, EX OFFICIN  
Ioan. Oporini, An. 1549. Mense Martio.





















